

学校的理想装备

电子图书·学校专集

校园网上的最佳资源

苏东坡全集

(上)

 **eBOOK**
内容资料 非卖品

前 言

在中国古代士大夫中，大多数即是文人；而在中国的文人当中，有相当一部分就是做官从政的士大夫，由于这个原因，所以后世常以“士大夫文人”统称之。在中国历史上无数文人士大夫之中，苏轼无疑是很杰出的一位。无论是在思想深刻、才华横溢、学养富赡方面，还是在成就巨大全面、影响深远方面，都很难有人能超过苏轼。据说，当时有大臣在神宗皇帝面前将苏轼比作唐代的大诗人李白，神宗道：“李白有苏轼之才，却没有苏轼之学。”在当时与后世，也很少有人能象苏轼那样受到人们普遍的喜悦。在中国，提起“苏东坡”的名字，几乎是无人不知的。那么，苏轼的魅力究竟在哪里呢？苏轼的意义与价值究竟是什么呢？

苏轼，字子瞻，号东坡居士，四川眉山人，与其父苏洵、其弟苏辙号称为“三苏”，并列于“唐宋八大家”中。在中国古代文人中苏轼一生遭遇的政治风波是比较多的。他曾经少年得志，与弟弟苏辙同榜中进士，获得主考官欧阳修的极口称赞，也得到当朝皇帝的赏识。但进入仕途后，由于卷入新旧党争的激烈漩涡中，因此一生就再也不能平静。先是被朝中小人构陷，由堂堂知州突然被逮捕入狱，成了阶下囚犯。出狱后贬官黄州，官职卑微，薪水很少。以后辗转数处，都不得意。六年后，旧党上台，突然奉诏进京，在短短的二十多天里，居然连升数级，差一点就要拜相了。然而等到哲宗亲政，新党得势，又将他贬到广东的惠州，海南岛的儋州，一贬再贬，越贬越远。在儋州，他以六十余岁的高龄过着生活上“食无肉，病无药，居无室，出无友，冬无炭，夏无寒泉”“日啖薯芋”的贫穷生活，幼子夭亡，最能理解体贴他的侍妾朝云也病死在海岛上，他度过了生命的最后几年，直到六十六岁时遇赦北归，却死在路途之中。在死后的七十年里，他又不断获得赐封殊荣，谥曰“文忠”，又特赠太师。纵观苏轼的一生，可以说是历尽艰辛、大起大落的一生。然而，从现存的苏轼大量诗文来看，苏轼的一生又始终是乐观的一生，积极进取的一生。这种身处逆境之中，既保持一种超然物外，随遇而安的达观胸怀，又始终不放弃对人生的热爱，对美好事物追求的态度，就是苏轼的人格魅力所在。千百年来，苏轼正是以这种旷达洒脱的精神气度影响后人，吸引了无数中国士大夫文人的歆羡仰慕。

我们认为，苏轼一生的最大意义，在于体现了中国人最高的生存智慧与生命智慧。首先，一方面，如前所述，他是中国士大夫文人中遭贬谪较多的一个，他曾以黑色幽默的口吻自我解嘲道：“问汝平生功业，黄州、惠州、儋州。”贬谪蛮荒达十二年之久。政治上被宣布为“奸党”，诗文著作被列为“禁书”，三位妻子原配、续配和爱妾都先他死去，最亲爱的弟弟子由也与他同时遭到政治迫害，兄弟两人长期不得见面。他自己多次大难不死，“乌台诗案”中关进监狱险些被杀头，后来在惠州、儋州又好几次差点病死，一生之灾难不幸可谓多矣。然而，另一方面，苏轼在历代文人中又是最为风趣幽默、乐观超脱的。贬谪到海南岛上，这是当时人们心目中最远的“天涯海角”，亲友们都担心他年迈苍苍难得生还，他却唱道：“枝上柳绵吹又少，天涯何处无芳草！”在惠州，他自宽自解道：“罗浮山下四时春，卢橘杨梅次第新。日啖荔枝三百颗，不妨长作岭南人。”他还说譬如自己本就是当地的一个秀才，如果屡试不中，那不也就要在这穷乡僻壤过一生吗？正是这种热爱生活、无怨无悔的达观态度，使他度过了生命中一个又一个难关，从未

被艰难困苦所击倒。

在众多的中国文人中，苏轼的佛道禅理造诣是最高的。这一方面是来自于先天灵根慧业的悟性，另一方面也是后天的机缘所致。因此，他对人生的本质比以往任何诗人都看得透彻。在他的诗文中，那种人生空漠的感慨比以往任何一个诗人都来得多，来得强烈与深沉。什么“世事一场大梦，人生几度新凉”“人似秋鸿来有信，事如春梦了无痕”“人生到处知何似，应是飞鸿踏雪泥。泥上偶然留指爪，鸿飞哪复计东西？”，这种“人生如梦”的旋律多次在诗文中奏起。而另一方面，苏轼又是最热爱人生、热爱人间、热爱生活、珍惜生命的诗人。在他的诗文中，对亲情、友情、爱情的咏叹，对江山胜景、风土人情的歌唱，对生活情趣的欣赏品味，对古代圣贤、英雄豪杰的向往仰慕，无不真挚深切，极其感人。在这一方面，我们将他奉为“千古情圣”，作为后世文人的典范是完全当之无愧的。

再次，苏轼这种生存智慧与生命智慧还表现在一方面他作为一代贤臣、一代哲人，经常思考的是国计民生问题，建功立业问题，乃至宇宙人生的重大哲理问题，而另一方面，他又决不象某些西方哲学家一样，只知道天上的事，对地下的事一无所知。他很有生活情趣，文娱生活丰富多彩自不必说，就是一些生活琐事也处理得井井有条，对管家理财、烹饪饮食、医药保健、种花养鱼等都颇有研究。贬黄州时，薪水很少，他担心入不敷出，就将月俸分为三十串挂在屋梁上，每天用叉子取一串下来作为日用，若有节余，便用一竹筒贮存起来，以作待客的特支。苏轼还是一个著名的美食家，对煎茶酿酒、佳肴烹制、粗粮细作均有讲究，他所发明的“东坡肉”“东坡肘子”“东坡羹”“东坡饼”至今还保留在中国传统的菜谱里。可以说，正是在这些大大小小的人生问题、生活问题上，苏轼才表现了他对人生的独特领悟，表现了他作为一个活生生的人所具有的真实性情。他的亲切感人，他的聪敏睿智，风趣幽默，赢得了当时和后世人们的深深喜爱。尽管他的诗词文在当时被列为“禁书”，但还是有人冒天下之大不韪而传抄、诵读；尽管他被贬到天涯海角，但还是有人不远千里，浮海专程去探望、访问他，拜他为师。我想，这正是被苏轼的人格魅力所吸引吧。

我们认为，苏轼的生存智慧与生命智慧来自于对中国儒释道三家思想的理解与实践。他将三者融汇贯通，既进取而又不迂执，既超脱而又不厌世。儒家思想始终是鼓励他百折不挠、积极奋进的精神力量，佛老哲学则更多地作为他身处逆境中自我解脱的思想武器。他将人生视为一场棋局：“胜固欣然，败亦可喜，优哉游哉，聊复尔耳。”这样，往往能使他不计较个人的荣辱、穷通、得失，在通达的心境下，更充分地享受真实无伪的人生，坚持对文学艺术和一切美好事物的追求。这种人生态度，对后世的士大夫文人最有影响，使他们在仕途失意的时候能够不厌世，不愤世，面对人生挫折仍不失去乐观平静的心态，这些生存智慧显然都是苏轼式的。

由于有了这种生存智慧与生命智慧，所以苏轼的一生，既是面对现实的一生，也是超脱现实的一生。他往往能以一种诗意的艺术的审美态度来看待人生逆境。当他贬谪到海南岛上度过晚年的时候，不少亲戚朋友与学生寄来书信安慰他，他却说：“九死蛮荒吾不恨，兹游奇绝冠平生。”虽然在他以前的刘禹锡、柳宗元等文人遭贬谪时也曾山水自然、风土人情中寻找慰安，寄托幽愤，但他们始终没有摆脱过“怀才不遇”的牢骚愤慨。苏轼则较少自伤不遇，到了晚年更是如此。“试问岭南应不好？却道：‘此心安处是吾乡。’”

那种东坡所特有的随遇而安、随缘自适思想在诗文中经常流露。不管贬谪到何方，不管经受怎样的人生挫折，在平凡的日常生活中，在大自然的山山水水、清风明月中，他都能发现美，得到美的享受。在这些既高雅而又亲切的生活情趣中，苏轼的人生价值得到了最完美的体现。其实，“怀才不遇”只不过是他人、要社会承认罢了，而人生的价值又何必非要别人承认不可呢？可以说，正是这种忘怀得失的审美人生态度，使苏轼摆脱了生活中的烦恼痛苦，从而完成了由现实人生向艺术人生的转化。

苏轼现存的二千多首诗、三百多首词与卷帙浩繁的散文作品，既是他艺术人生的真实记录，也是我国古代文学宝库中最珍贵的财富。苏轼的文学成就极高，他的诗与黄庭坚并称“苏黄”，代表了宋诗的典型风貌与最高成就；他的词与辛弃疾并称“苏辛”，开创了词坛豪放派的先河；他的散文与欧阳修并称“欧苏”，是唐宋八大家散文中最优美动人、自然流畅的。在这些诗词文作品中，苏轼以才华横溢的文学语言表达了他对社会人生的独特理解，对江山胜景的欣赏与对生活情趣的品味，使我们在阅读的时候，往往既能得到极大的美感享受，又能得到思想哲理的启迪与文学修养的教益。基于上述原因，我们出版这套《苏东坡全集》，就实在是一件很有意义的大事情。

本书以《东坡七集》（中国书店据一九三六年世界书局版影印本）为底本，重新点校，并稍作增删。东坡为翰林学士时，曾为皇帝代拟大量的制敕、诏令、口宣、国书，这类文字并不表现东坡个人的思想，既无审美价值，又无研究意义，为节省篇幅，将其全部删除。本书诗的部分在编排上一仍其旧；文的部分略微打散后分类编排，并根据中华书局版《苏轼文集》增添部分内容；东坡词在当时和后世影响都很重大，因而本书将《东坡乐府》全部收入。本书篇幅较大，虽反复校读，仍难免有错漏，祈请读者方家予以指正。

苏东坡全集

苏东坡宋史本传

苏轼字子瞻，眉州眉山人。生十年，父洵游学四方，母程氏亲授以书，闻古今成败，辄能语其要。程氏读东汉《范滂传》，慨然太息，轼请曰：“轼若为滂，母许之否乎？”程氏曰：“汝能为滂，吾顾不能为滂母邪？”

比冠，博通经史，属文日数千言，好贾谊、陆贽书。既而读《庄子》，叹曰：“吾昔有见，口未能言，今见是书，得吾心矣。”嘉祐二年，试礼部。方时文磔裂诡异之弊胜，主司欧阳修思有以救之，得轼《刑赏忠厚论》，惊喜，欲擢冠多士，犹疑其客曾巩所为，但置第二；复以《春秋》对义居第一，殿试中乙科。后以书见修，修语梅圣俞曰：“吾当避此人出一头地。”闻者始哗不厌，久乃信服。

丁母忧。五年，调福昌主簿。欧阳修以才识兼茂，荐之秘阁。试六论，旧不起草，以故文多不工。轼始具草，文义粲然。复对制策，入三等。自宋初以来，制策入三等，惟吴育与轼而已。

除大理评事、签书凤翔府判官。关中自元昊叛，民贫役重，岐下岁输南山木筏，自渭入河，经砥柱之险，衙吏踵破家。轼访其利害，为修衙规，使自择水工以时进止，自是害减半。

治平二年，入判登闻鼓院。英宗自藩邸闻其名，欲以唐故事召入翰林，知制诰。宰相韩琦曰：“轼之才，远大器也，他日自当为天下用。要在朝廷培养之，使天下之士莫不畏慕降伏，皆欲朝廷进用，然后取而用之，则人人无复异辞矣。今骤用之，则天下之士未必以为然，适足以累之也。”英宗曰：“且与修注如何？”琦曰：“记注与制诰为邻，未可遵授。不若于馆阁中近上帖职与之，且请召试。”英宗曰：“试之未知其能否，如拭有不能邪？”琦犹不可，及试二论，复入三等，得直史馆。轼闻琦语，曰：“公可谓爱人以德矣。”

会洵卒，赙以金帛，辞之，求赠一官，于是赠光禄丞。洵将终，以兄太白早亡，子孙未立，妹嫁杜氏，卒未葬，属轼。轼既除丧，即葬姑。后宫可荫，推与太白曾孙彭。

熙宁二年，还朝。王安石执政，素恶其议论异己，以判官告院。四年，安石欲变科举、兴学校，诏两制、三馆议。轼上议曰：

得人之道，在于知人；知人之法，在于责实。使君相有知人之明，朝廷有责实之政，则胥史皂隶未尝无人，而况于学校贡举乎？虽因今之法，臣以为有余。使君相不知人，朝廷不责实，则公卿侍从常患无人，而况学校贡举乎？虽复古之制，臣以为不足。夫时有可否，物有废兴，方其所安，虽暴君不能废，及其既厌，虽圣人不能复。故风俗之变，法制随之，譬如江河之徙移，强而复之，则难为力。

庆历固尝立学矣，至于今日，惟有空名仅存。今将变今之礼，易今之俗，又当发民力以治官室，敛民财以食游士。百里之内，置官立师，狱讼听于是，军旅谋于是，又简不率教者屏之远方，则无乃徒为纷乱，以患苦天下邪？若乃无大更革，而望有益于时，则与庆历之际何异？故臣谓今之学校，特可因仍旧制，使先王之旧物，不废于吾世足矣。至于贡举之法，行之百年，治乱盛衰，初不由此。陛下视祖宗之世，贡举之法，与今为孰精？言语文章，与今为孰优？所得人才，与今为孰多？天下之事，与今为孰办？较此四者之长短，其议决矣。

今所欲变改不过数端：或曰乡举德行而略文词，或曰专取策论而罢诗赋，或欲兼采誉望而罢封弥，或欲经生不帖墨而考大义，此皆知其一，不知其二者也。愿陛下留意于远者、大者，区区之法何预焉。臣又切有私忧过计者。夫性命之说，自子贡不得闻，而今之学者，耻不言性命，读具文，浩然无当而不可穷；观其貌，超然无著而不可挹，此岂真能然哉！盖中人之性，安于放而乐于诞耳。陛下亦安用之？

议上，神宗悟曰：“吾固疑此，得轼议，意释然矣。”即日召见，问：“方今政令得失安在？虽朕过失，指陈可也。”对曰：“陛下生知之性，天纵文武，不患不明，不患不勤，不患不断，但患求治太急，听言太广，进人太锐。愿镇以安静，待物之来，然后应之。”神宗惊然曰：“卿三言，朕当熟思之。凡在馆阁，皆当为朕深思治乱，无有所隐。”轼退，言于同列。安石不悦，命权开封府推官，将困之以事。轼决断精敏，声闻益远。会上元敕府市浙灯，且令损价。轼疏言：“陛下岂以灯为悦？此不过以奉二宫之欢耳。然百姓不可户晓，皆谓以耳目不急之玩，夺其口体必用之资。此事至小，体则甚大，愿追还前命。”即诏罢之。

时安石创行新法，轼上书论其不便，曰：

臣之所欲言者，三言而已。愿陛下结人心，厚风俗，存纪纲。人主之所恃者人心而已，如木之有根，灯之有膏，鱼之有水，农夫之有田，商贾之有财。失之则亡，此理之必然也。自古及今，未有和易同众而不安，刚果自用而不危者。陛下亦知人心之不满矣。

祖宗以来，治财用者不过三司。今陛下不以财用付三司，无故又创制置三司条例一司，使六七少年，日夜讲求于内，使者四十余辈，分行营干于外。夫制置三司条例司，求利之名也；六七少年与使者四十余辈，求利之器也。造端宏大，民实惊疑；创法新奇，吏皆惶惑。以万乘之主而言利，以天子之宰而治财，论说百端，喧传万口，然而莫之顾者，徒曰：“我无其事，何恤于人言。”操罔署而入江湖，语人曰“我非渔也”，不如捐罔署而人自信。驱鹰犬而赴林藪，语人曰“我非猎也”，不如放鹰犬而兽自驯。故臣以为欲消逸慝而召和气、则莫若罢条例司。

今君臣宵旰，几一年矣，而富国之功，茫如捕风，徒闻内帑出数百万缗，祠部度五千余人耳。以此为术，其谁不能？而所行之事，道路皆知其难。汴水浊流，自生民以来，不以种稻。今欲陂而清之，万顷之稻，必用千顷之陂，一岁一淤，三岁而满矣。陛下遂信其说，即使相视地形，所在凿空，访寻水利，妄庸轻剽，率意争言。官司虽知其疏，不敢便行抑退，追集老少，相视可否。若非的然难行，必须且为兴役。官吏苟且顺从，真谓陛下有意兴作，上靡帑廩，下夺农时。堤防一开，水失故道，虽食议者之肉，何补于民！臣不知朝廷何苦而为此哉？

自古役人，必用乡户。今者徒闻江、浙之间，数郡顾役，而欲措之天下。单丁、女户，盖天民之穷者也，而陛下首欲役之，富有四海，忍不加恤！自杨炎为两税，租调与庸既兼之矣，奈何复欲取庸？万一后世不幸有聚敛之臣，庸钱不除，差役仍旧，推所从来，则必有任其咎者矣。青苗放钱，自昔有禁。今陛下始立成法，每岁常行。虽云不许抑配，而数世之后，暴君污吏，陛下能保之欤？计愿请之户，必皆孤贫不济之人，鞭撻已急，则继之逃亡，不还，则均及邻保，势有必至，异日天下恨之，国史记之，曰“青苗钱自陛下始”，岂不惜哉！且常平之法，可谓至矣。今欲变为青苗，坏彼成此，所丧逾多，

亏官害民，虽悔何及！

昔汉武帝以财力匱竭，用贾人桑羊之说，买贱卖贵，谓之均输。于时商贾不行，盗贼滋炽，几至于乱。孝昭既立，霍光顺民所欲而予之，天下归心，遂以无事。不意今日此论复兴。立法之初，其费已厚，纵使薄有所获，而征商之额，所损必多。譬之有人为其主畜牧，以一牛易五羊。一牛之失，则隐而不言；五羊之获，则指为劳绩。今坏常平而言青苗之功，亏商税而取均输之利，何以异此？臣窃以为过矣。议者必谓：“民可与乐成，难与虑始。”故陛下坚执不顾，期于必行。此乃战国贪功之人，行险侥幸之说，未及乐成，而怨已起矣。臣之所愿陛下结人心者，此也。

国家之所以存亡者，在道德之浅深，不在乎强与弱；历数之所以长短者，在风俗之薄厚，不在乎富与贫。人主知此，则知所轻重矣。故臣愿陛下务崇道德而厚风俗，不愿陛下急于有功而贪富强。爱惜风俗，如护元气。圣人非不知深刻之法可以齐众，勇悍之夫可以集事，忠厚近于迂阔，老成初若迟钝。然终不肯以彼易此者，知其所得小，而所丧大也。仁祖持法至宽，用人有叙，事务掩覆过失，未尝轻改旧章。考其成功，则曰未至。以言乎用兵，则十出而九败；以言乎府库，则仅足而无余。徒以德泽在人，风俗知义，故升遐之日，天下归仁焉。议者见其末年吏多因循，事不振举，乃欲矫之以苛察，齐之以智能，招来新进勇锐之人，以图一切速成之效。未享其利，浇风已成。多开骤进之门，使有意外之得，公卿侍从跬步可图，俾常调之人举生非望，欲望风俗之厚，岂可得哉？近岁朴拙之人愈少，巧进之士益多。惟陛下哀之救之，以简易为法，以清净为心，而民德归厚。臣之所愿陛下厚风俗者，此也。

祖宗委任台谏，未尝罪一言者。纵有薄责，旋即超升，许以风闻，而无官长。言及乘舆，则天子改容；事关廊庙，则宰相待罪。台谏固未必皆贤，所言亦未必皆是。然须养其锐气，而借之重权者，岂徒然哉？将以折奸臣之萌也。今法令严密，朝廷清明，所谓奸臣，万无此理。然养猫以去鼠，不可以无鼠而养不捕之猫；畜狗以防盗，不可以无盗而畜不吠之狗。陛下得上念祖宗设此官之意，下为子孙万世之防？臣闻长老之谈，皆谓台谏所言，常随天下公议。公议所与，台谏亦与之；公议所击，台谏亦击之。今者物论沸腾，怨讟交至，公议所在，亦知之矣。臣恐自兹以往，习惯成风，尽为执政私人，以致人主孤立，纪纲一废，何事不生！臣之所愿陛下存纪纲者，此也。

轼见安石赞神宗以独断专任，因试进士发策，以“晋武平吴以独断而克，苻坚伐晋以独断而亡，齐桓专任管仲而霸，燕哱专任子之而败，事同而功异”为问。安石滋怒，使御史谢景温论奏其过，穷治无所得，轼遂请外，通判杭州。高丽入贡，使者发币于官吏，书称甲子。轼却之曰：“高丽于本朝称臣，而不禀正朔，吾安敢受！”使者易书称熙宁，然后受之。

时新政日下，轼于其间，每因法以便民，民赖以安。徒知密州。司农行手实法，不时施行者以违制论。轼谓提举官曰：“违制之坐，若自朝廷，谁敢不从？今出于司农，是擅造律也。”提举官惊曰：“公姑徐之。”未几，朝廷知法害民，罢之。

有盗窃发，安抚司遣三班使臣领悍卒来捕，卒凶暴恣行，至以禁物诬民，入其家争斗杀人，且畏罪惊溃，将为乱。民奔诉轼，轼投其书不视，曰：“必不至此。”散卒闻之，少安，徐使人招出戮之。

徙知徐州。河决曹村，泛于梁山泊，溢于南清河，汇于城下，涨不时泄，

城将败，富民争出避水。轼曰：“富民出，民皆动摇，吾谁与守？吾在是，水决不能败城。”驱使复入。轼诣武卫营，呼卒长曰：“河将害城，事急矣，虽禁军且为我尽力。”卒长曰：“太守犹不避涂潦；吾济小人，当效命。”率其徒持备锺以出，筑东南长堤，首起戏马台，尾属于城。雨日夜不止，城不沈者三版。轼庐于其上，过家不入，使官吏分堵以守，卒全其城。复请调来岁夫增筑故城，为木岸，以虞水之再至。朝廷从之。

徙知湖州，上表以谢。又以事不便民者不敢言，以诗托讽，庶有补于国。御史李定、舒亶、何正臣摭其表语，并媒孽所为以诗以为讪谤，逮赴台狱，欲置之死，锻炼久之不决。神宗独怜之，以黄州团练副使安置。轼与田父野老，相从溪山间，筑室于东坡，自号“东坡居士”。

三年，神宗数有意复用，辄为当路者沮之。神宗尝语宰相王珪、蔡确曰：“国史至重，可命苏轼成之。”珪有难色。神宗曰：“轼不可，姑用曾巩。”巩进《太祖总论》，神宗意不允，遂手札移轼汝州，有曰：“苏轼黜居思咎，阅岁滋深，人材实难，不忍终弃。”轼未至汝，上书自言饥寒，有田在常，愿得居之。朝奏，夕报可。

道过金陵，见王安石，曰：“大兵大狱，汉、唐灭亡之兆。祖宗以仁厚治天下，正欲革此。今西方用兵，连年不解，东南数起大狱，公独无一言以救之乎？”安石曰：“二事皆惠卿启之，安石在外，安敢言？”轼曰：“在朝则言，在外则不言，事君之常礼耳。上所以待公者非常礼，公所以待上者，岂可以常礼乎？”安石厉声曰：“安石须说。”又曰：“出在安石口，人在子瞻耳。”又曰：“人须是知行一不义，杀一不辜，得天下弗为，乃可。”轼戏曰：“今之君子，争减半年磨勘，虽杀人亦为之。”安石笑而不言。

至常，神宗崩，哲宗立，复朝奉郎、知登州，召为礼部郎中。轼旧善司马光、章惇。时光为门下侍郎，惇知枢密院，二人不相合，惇每以谗侮困光，光苦之。轼谓惇曰：“司马君实时望甚重。昔许靖以虚名无实，见鄙于蜀先主，法正曰：‘靖之浮誉，播流四海，若不加礼，必以贱贤为累。’先主纳之，乃以靖为司徒。许靖且不可慢，况君实乎？”惇以为然，光赖以少安。

迁起居舍人。轼起于忧患，不欲骤履要地，辞于宰相蔡确。确曰：“公徊翔久矣，朝中无出公右者。”轼曰：“昔林希同在馆中，年且长。”确曰：“希固当先公耶？”卒不许。元祐元年，轼以七品服入侍延和，即赐银绶，迁中书舍人。

初，祖宗时，差役行久生弊，编户充役者不习其役，又虐使之，多致破产，狭乡民至有终岁不得息者。王安石相神宗，改为免役，使户差高下出钱雇役，行法者过取，以为民病。司马光为相，知免役之害，不知其利，欲复差役，差官置局，轼与其选。轼曰：“差役、免役，各有利害。免役之害，搐敛民财，十室九空，敛聚于上而下有钱荒之患。差役之害，民常在官，不得专力于农，而贪吏猾胥得缘为奸。此二害轻重，盖略等矣。”光曰：“于君何如？”轼曰：“法相因则事易成，事有渐则民不惊。三代之法，兵农为一，至秦始分为二，及唐中叶，尽变府兵为长征之卒。自尔以来，民不知兵，兵不知农，农出谷帛以养兵，兵出性命以卫农，天下便之。虽圣人复起，不能易也。今免役之法，实大类此。公欲骤罢免役而行差役，正如罢长征而复民兵，盖未易也。”光不以为然。轼又陈于政事堂，光忿然。轼曰：“昔韩魏公刺陕西义勇，公为谏官，争之甚力，韩公不乐，公亦不顾。轼昔闻公道其详，岂今日作相，不许轼尽言耶？”光笑之。寻除翰林学士。

二年，兼侍读。每进读至治乱兴衰、邪正得失之际，未尝不反覆开导，辄有所启悟。哲宗虽恭默不言，辄首肯之。尝读祖宗《宝训》，因及时事，轼历言：“今赏罚不明，善恶无所劝沮；又黄河势方北流，而强之使东；夏人入镇戎，杀掠数万人，帅臣不以闻。每事如此，恐浸成衰乱之渐。”

轼尝锁宿禁中，召入对便殿，宣仁后问曰：“卿前年为何官？”曰：“臣为常州团练副使。”曰：“今为何官？”曰：“臣今待罪翰林学士。”曰：“何以遽至此？”曰：“遭遇太皇太后、皇帝陛下。”曰：“非也。”曰：“岂大臣论荐乎？”曰：“亦非也。”轼惊曰：“臣虽无状，不敢自他途以进。”曰：“此先帝意也。先帝每诵卿文章，必叹曰‘奇才，奇才！’但未及进用卿耳。”轼不觉哭失声，宣仁后与哲宗亦泣，左右皆感涕。已而命坐赐茶，彻御前金莲烛送归院。

三年，权知礼部贡举。会大雪苦寒，士坐庭中，噤未能言。轼宽其禁约，使得尽技。巡铺内侍每摧辱举子，且持暖味单词，诬以为罪，轼尽奏逐之。

四年，积以论事，为当轴者所恨。轼恐不见容，请外拜龙图阁学士、知杭州。未行，谏官言前相蔡确知安州，作诗借郝处俊事以讥太皇太后。大臣议迁之岭南。轼密疏：“朝廷若薄确之罪，则于皇帝孝治为不足；若深罪确，则于太皇太后仁政为小累。谓宜皇帝敕置狱逮治，太皇太后出手诏赦之，则于仁孝两得矣。”宣仁后心善拭言而不能言。轼出郊，用前执政恩例，遣内侍赐龙茶、银合，慰劳甚厚。

既至杭，大旱，饥疫并作。轼请于朝，免本路上供米三之一，复得赐度僧牒，易米以救饥者。明年春，又减价崇常平米，多作饘粥药剂，遣使挟医分坊治病，活者甚众。轼曰：“杭，水陆之会，疫死比他处常多。”乃哀羨缗得二千，复发橐中黄金五十两，以作病坊，稍畜钱粮待之。

杭本近海，地泉咸苦，居民稀少。唐刺史李泌始引西湖水作六井，民足于水。白居易又浚西湖水入漕河，自河入田，所溉至千顷，民以殷富。湖水多葑，自唐及钱氏，岁辄浚治，宋兴，废之，葑积为田，水无几矣。清河失利，取给江潮，舟行市中，潮又多淤，三年一淘，为民大患，六井亦几于废。轼见茅山一河专受江潮，盐桥一河专受湖水，遂浚二河以通漕。复造堰闸，以为湖水蓄泄之限，江潮不复入市。以余力复完六井，又取葑田积湖中，南北径三十里，为长堤以通行者。吴人种菱，春辄芟除，不遗寸草。且募人种菱湖中，著不复生。收其利以备修湖，取救荒余钱万缗、粮万石，及请得百僧度牒以募役者。堤成，植芙蓉、杨柳其上，望之如画图，杭人名为苏公堤。

杭僧净源，旧居海滨，与舶客交通，舶至高丽，交誉之。元丰末，其王子义天来朝，因往拜焉。至是，净源死，其徒窃持其像，附舶往告。义天亦使其徒来祭，因持其国母二金塔，云祝两宫寿。轼不纳，奏之曰：“高丽久不入贡，失赐予厚利，意欲求朝，未测吾所以待之厚薄，故因祭亡僧而行祝寿之礼。若受而不答，将生怨心；受而厚赐之，正堕其计。今宜勿与知，从州郡自以理却之。彼庸僧猾商，为国生事，渐不可长，宜痛加惩创。”朝廷皆从之。未几，贡使果至，旧例使所至吴越七州，费二万四千余缗。轼乃令诸州量事裁损，民获交易之利，无复侵挠之害矣。

浙江潮自海门东来，势如雷霆，而浮山峙于江中，与渔浦诸山犬牙相错，洄洑激射，岁败公私船不可胜计。轼议自浙江上流地名石门，并山而东，凿为漕河，引浙江及溪谷诸水二十余里以达于江。又并山为岸，不能十里以达龙山大慈浦，自浦北折抵小岭，凿岭六十五丈以达岭东古河，浚古河数里达

于龙山漕河，以避浮山之险，人以为便。奏闻，有恶拭者，力沮之，功以故不成。

轼复言：“三吴之水，潴为太湖，太湖之水，溢为松江以入海。海日两潮，潮浊而江清，潮水常欲淤塞江路，而江水清驶，随辄涤去，海口常通，则吴中少水患。昔苏州以东，公私船皆以篙行，无陆挽者。自庆历以来，松江大筑挽路，建长桥以扼塞江路，故今三吴多水，欲凿挽路、为千桥，以迅江势。”亦不果用，人皆以为恨。轼二十年间再莅杭，有德于民，家有画像，饮食必祝。又作生祠以报。

六年，召为吏部尚书，未至。以弟辙除右丞，改翰林承旨。辙辞右丞，欲与兄同备从官，不听。轼在翰林数月，复以谗请外，乃以龙图阁学士出知颖州。先是，开封诸县多水患，吏不究本末，决其陂泽，注之惠民河，河不能胜，致陈亦多水。又将凿邓艾沟与颖河并，且凿黄堆欲注之于淮。轼始至颖，遣吏以水平准之，淮之涨水高于新沟几一丈，若凿黄堆，淮水顺流颖地为患。轼言于朝，从之。

郡有宿贼尹遇等，数劫杀人，又杀捕盗吏兵。朝廷以名捕不获，被杀家复惧其害。匿不敢言。轼召汝阴尉李直方曰：“君能禽此，当力言于朝，乞行优赏；不获，亦以不职奏免君矣。”直方有母且老，与母诀而后行。乃緝知盗所，分捕其党与，手乾刺遇，获之。朝廷以小不应格，推赏不及。轼请以己之年劳，当改朝散郎阶，为直方赏，不从。其后吏部为轼当迁，以符合其考，轼谓已许直方，又不报。

七年，徙扬州。旧发运司主东南漕法，听操舟者私载物货，征商不得留难。故操舟者辄富厚，以官舟为家，补其弊漏，且周船夫之乏，故所载率皆速达无虞。近岁一切禁而不许，故舟弊人困，多盗所载以济饥寒，公私皆病。轼请复旧，从之。未阅岁，以兵部尚书召兼侍读。

是岁，哲宗亲祀南郊，轼为卤簿使，导驾入太庙。有赭伞犍车并青盖犍车十余争道，不避仪仗。轼使御营巡检使问之，乃皇后及大长公主。时御史中丞李之纯为仪仗使，轼曰：“中丞职当肃政，不可不以闻之。”纯不敢言，轼于车中奏之。哲宗遣使责疏驰白太皇太后，明日，诏整肃仪卫，启皇后而下皆毋得迎谒。寻迁礼部兼端明殿、翰林侍读两学士，为礼部尚书。高丽遣使请书，朝廷以故事尽许之。轼曰：“汉东平王请诸子及《太史公书》，犹不肯予。今高丽所请，有甚于此，其可予乎？”不听。

八年，宣仁后崩，哲宗亲政。轼乞补外，以两学士出知定州。时国是将变，轼不得入辞。既行，上书言：“天下治乱，出于下情之通塞。至治之极，小民皆能自通；迨于大乱，虽近臣不能自达。陛下临御九年，除执政、台谏外，未尝与群臣接。今听政之初，当以通下情、除壅蔽为急务。臣日侍帷幄，方当戍边，顾不得一见而行，况疏远小臣欲求自通，难矣。然臣不敢以不得对之故，不效愚忠。古之圣人将有为也，必先处晦而观明，处静而观动，则万物之情，毕陈于前。陛下圣智绝人，春秋鼎盛。臣愿虚心循理，一切未有所为，默观庶事之利害，与群臣之邪正。以三年为期，俟得其实，然后应物而作。使既作之后，天下无恨，陛下亦无悔。由此观之，陛下之有为，惟忧太早，不患稍迟，亦已明矣。臣恐急进好利之臣，辄劝陛下轻有改变，故进此说，敢望陛下留神，社稷宗庙之福，天下幸甚。”

定州军政坏弛，诸卫卒骄情不教，军校蚕食其廩赐，前守不敢谁何。轼取贪污者配隶远恶，缮修营房，禁止饮博，军中衣食稍足，乃部勒战法，众

皆畏伏。然诸校业业不安，有卒史以脏诉其长，轼曰：“此事吾自治则可，听汝告，军中乱矣。”立决配之，众乃定。

会春大阅，将吏久废上下之分，轼命举旧典，帅常服出帐中，将吏戎服执事。副总管王光祖自谓老将，耻之，称疾不至。轼召书吏使为奏，光祖惧而出，讫事，无一慢者。定人言：“自韩琦去后，不见此礼至今矣。”契丹久和，边兵不可用，惟沿边弓箭社与寇为邻，以战射自卫，犹号精锐。故相庞籍守边，因俗立法。岁久法弛，又为保甲所挠。轼奏免保甲及两税折变科配，不报。

绍圣初，御史论拭掌内外制日，所作词命，以为讥斥先朝。遂以本官知英州，寻降一官，未至，贬宁远军节度副使，惠州安置。居三年，泊然无所蒂芥，人无贤愚，皆得其欢心。又贬琼州别驾，居昌化。昌化，故儋耳地，非人所居，药饵皆无有。初僦官屋以居，有司犹谓不可，轼遂买地筑室，僦人运甃畚土以助之。独与幼子过处，著书以为乐，时时从其父老游，若将终身。

徽宗立，移廉州，改舒州团练副使，徙永州。更三大赦，遂提举玉局观，复朝奉郎。轼自元祐以来，未尝以岁课乞迁，故官止于此。建中靖国元年，卒于常州，年六十六。

轼与弟辙，师父洵为文，既而得之于天。尝自谓：“作文如行云流水，初无定质，但常行于所当行，止于所不可不止。”虽嬉笑怒骂之辞，皆可书而诵之。其体浑涵光芒，雄视百代，有文章以来，盖亦鲜矣。洵晚读《易》，作《易传》未究，命轼述其志。轼成《易传》，复作《论语说》；后居海南，作《书传》；又有《东坡集》四十卷、《后集》二十卷、《奏议》十五卷、《内制》十卷、《外制》三卷、《和陶诗》四卷。一时文人如黄庭坚、晁补之、秦观、张耒、陈师道，举世未之识，轼待之如朋涛，未尝以师资自予也。

自为举子至出入侍从，必以爱君为本，忠规说论，挺挺大节，群臣无出其右。但为小人忌恶挤排，不使安于朝廷之上。

高宗即位，赠资政殿学士，以其孙符为礼部尚书。又以其文置左右，读之终日忘倦，谓为文章之宗，亲制集赞，赐其曾孙峤。遂崇赠太师，谥文忠。轼三子：迈、迨、过，俱善为文。迈，驾部员外郎。迨，承务郎。

过字叔党。轼知杭州，过年十九，以诗赋解两浙路，礼部试下。及轼为兵部尚书，任右承务郎。轼帅定武，谪知英州，贬惠州，迁儋耳，渐徙廉、永，独过侍之。凡生理昼夜寒暑所须者，一身百为，不知其难。初至海上，为文曰《志隐》，轼览之曰：“吾可以安于岛夷矣。”因命作《孔子弟子别传》。轼卒于常州，过葬轼汝州郊城小峨眉山，遂家颖昌，营湖阴水竹数亩，名曰小斜川，自号斜川居士。卒，年五十二。

初监太原府税，次知颖昌府鄆城县，皆以法令罢。晚权通判中山府。有《斜川集》二十卷。其《思子台赋》、《飓风赋》早行于世。时称为“小坡”，盖以轼为“大坡”也。其叔辙每称过孝，以训宗族。且言：“吾兄远居海上，惟成就此儿能文也。”七子：籥、籍、节、笈、箏、笛、箭。

论曰：苏轼自为童子时，士有传石介《庆历圣德诗》至蜀中者，轼历举诗中所言韩、富、社、范诸贤以问其师。师怪而语之，则曰：“正欲识是诸人耳。”盖已有颌頔当世贤哲之意。弱冠，父子兄弟至京师，一日而声名赫然，动于四方。既而登上第，擢词科，入掌书命，出典方州。器识之闳伟，议论之卓犖，文章之雄隼，政事之精明，四者皆能以特立之志为之主，而以

迈往之气辅之。故意之所向，言足以达其有猷，行足以遂其有为。至于祸患之来，节义足以固其有守，皆志与气所为也。仁宗初读轼、辙制策，退而喜曰：“朕今日为子孙得两宰相矣。”神宗尤爱其文，宫中读之，膳进忘食，称为天下奇才。二君皆有以知轼，而轼卒不得大用。一欧阳修先识之，其名遂与之齐，岂非轼之所长不可掩抑者，天下之至公也，相不相有命焉，呜呼！轼不得相，又岂非幸欤？或谓：“轼稍自韬戢，虽不获柄用，亦当免祸。”虽然，假令轼以是而易其所为，尚得为轼哉？

前 集
第 一 卷

诗四十七首

辛丑十一月十九日既与子由别于
郑州西门之外马上赋诗一篇寄之

不饮胡为醉兀兀，此心已逐归鞍发。归人犹自念庭闱，今我何以慰寂寞。登高回首坡陇隔，惟见乌帽出复没。苦寒念尔衣裳薄，独骑瘦马踏残月。路人行歌居人乐，僮仆怪我苦凄恻。亦知人生要有别，但恐岁月去飘忽。寒灯相对记畴昔，夜雨何时听萧瑟。君知此意不可忘，慎勿苦爱高官职。尝有夜雨对床之言，故云尔。

和子由澠池怀旧

人生到处知何似，应似飞鸿踏雪泥。泥上偶然留指爪，鸿飞那复计东西。老僧已死成新塔，坏壁无由见旧题。往日崎岖还记否？路长人困蹇驴嘶。往岁，马死于二陵，骑驴至澠池。

次韵和刘京兆石林亭之作石本
唐苑中物散流民间刘购得之

都城日荒废，往事不可还。惟余故苑石，漂散尚人间。公来始购蓄，不惮道里艰。尽从尘埃中，来对冰雪颜。瘦骨拔凜凜，苍根漱潺潺。唐人唯奇章，好石古莫攀。尽今属牛氏，刻凿纷班班。嗟此本何常，聚散实循环。人失亦人得，要不出区寰。君看刘李末，不能保河关。况此百株石，鸿毛于太山。但当对石饮，万事付等闲。

壬寅二月有诏令郡史分往属县减决
囚禁自十三日受命出府至宝鸡虢郿
盩厔四县既毕事因也朝谒太平宫而
宿于南溪溪堂遂并南山而西至楼观
大秦寺延生观仙游潭十九日乃归作

诗五百言以记凡所经历者寄子由远人罹水旱，王命释俘囚。分县传明诏，循山得胜游。萧条初出郭，旷荡实消忧。薄暮来孤镇，登临忆武侯。峥嵘依绝壁，苍茫瞰奔流。半夜人呼急，横空火气浮。天遥殊不辨，风急已难收。晓入陈仓县，犹余卖酒楼。烟煤已狼籍，吏卒尚呀咻。十三日宿武城镇，即俗所谓石鼻寨也，云孔明所筑。是夜二鼓，宝鸡火作，相去三十里，而见于武城。鸡岭云霞古，龙宫殿字幽。县有鸡爪峰、龙宫寺。南山连大散，归路走吾州。欲往安能遂，将还为少留。回趋西虢道，却渡小河洲。闻道磻溪石，犹存渭水头。苍崖虽有迹，大钓本无钩。十四日，自宝鸡行至虢。闻大公磻溪石在县东南十八里，犹有投竿跪饵两膝所著之处。东去过郿坞，孤城象汉

刘。谁言董公健，竟复伍孚仇。白刃俄生时，黄金漫似丘。十五日至郾县，具有董卓城，其城象长安，俗谓之小长安。平生闻太白，一见驻行驹。鼓角谁能试，风雷果致不。岩崖已奇绝，冰雪更瑯瓈。春早忧无麦，山灵喜有湫。蛟龙懒方睡，瓶罐小容偷。是日晚，自郾起至青秋镇宿，道过太白山。相传云军行鸣鼓角过山下，辄致雷雨。山上有湫，甚灵，以今岁旱，方议取之。二曲林泉胜，三川气象侔。近山面麦早，临水竹莫修。十六日至整屋，以近山地美，气候殊早。县有官竹园，十数里不绝。先帝膺符命，行宫画冕旒。侍臣簪武弁，女乐抱箜篌。秘殿开金锁，神人控玉虬。黑衣横巨剑，被发凛双眸。十七日寒食，自整屋东南行二十余里，朝谒太平宫二圣御容。此宫乃太宗皇帝时，有神降于道士张守真，以告受命之符所为立也。神封翊圣将军，有殿。邂逅逢佳士，相将弄彩舟。投篙披绿苕，濯足乱清沟。晚宿南溪上，森如水国秋。绕湖栽翠密，终夜响飕飕。是日与监宫张杲之泛舟南溪，遂宿于溪堂，冒晓穷幽邃，操戈畏炳彪。十八日循终南而西，县尉以甲卒见送，或云近官竹园，往往有虎。尹生犹有宅，老氏旧停辀。问道遗踪在，登仙往事悠。馭风归汗漫，阅世似蜉蝣。羽客知人意，瑶琴系马鞦。不辞山寺远，来作鹿鸣呦。帝子传闻李，岩堂仿佛缙。轻风帟幔卷，落日髻鬟愁。入谷音浴惊蒙密，登坡费挽楼。乱峰巉似槩，一水淡如油。中使何年到，金龙自古投。千重横翠石，百丈见游猷。最爱泉鸣洞，初尝雪入喉。满瓶虽可致，洗耳叹无由。是日游崇圣观，俗所谓楼观也，乃尹喜旧宅，山脚有授经台尚在。遂与张果之同至大秦寺，早食而别。有太平宫道士赵宗有抱琴见送，至寺作鹿鸣之引乃去。又西至延生观，观后上小山，有唐玉真公主修道之遗迹。下山而西行十数里，南入黑水谷。谷中有潭，名仙游潭。上有寺三，倚峻峰，面清溪，树林深翠，怪石不可胜数。潭水以绳缒石数百尺不得其底，以瓦砾投之，翔扬徐下，食顷乃不见。其清澈如此，遂宿于中兴寺，寺中有玉女洞，洞中有飞泉，甚甘，明日以泉二瓶归。至郾，又明日，乃至府。忽忆寻蟆培，方冬脱鹿裘。山川良甚似，水石亦堪俦。惟有泉旁饮，无人自献酬。昔与子由游蟆培时，方冬，洞中温温如二三月。

太白山下早行至横渠镇书崇寿院壁

马上续残梦，不知朝日升。乱山横翠幃，落月淡孤灯。奔走烦邮吏，安闲愧老僧。再游应眷眷，聊亦记吾曾。

留题延生观后山上小堂

溪山愈好意无厌，上到巉巉第几尖。深谷野禽毛羽怪，上方仙子鬓眉纤。不惭弄玉骑丹凤，应逐常娥驾老蟾。涧草岩花自无主，晚来蝴蝶入疏帘。

留题仙游潭中兴寺寺东有玉女洞洞南有马融读书石室过潭而南山石益奇潭上有桥畏其险不敢渡

清潭百丈皎无泥，山木阴阴谷鸟啼。蜀客曾游明月峡，秦人今在武陵溪。独攀书室窥岩窦，还访仙妹款石闺。犹有爱山心未至，不将双脚踏飞梯。

石 鼻 城

平时战国今无在，陌上征夫自不闲。北客初来试新险，蜀人从此送残山。
独穿暗月滕陇里，愁渡奔河苍茫间。渐入西南风景变，道边修竹水潺潺。

蹠 溪 石

墨突不暇黔，孔席未尝暖。安知渭上叟，跪石留双趺。一朝婴世故，辛苦平多难。亦欲就安眠，旅人讥客懒。

郾 坞

衣中甲厚行何惧，坞里金多退足凭。毕竟英雄谁得似，脐脂自照不须灯。

楼 观

秦始皇始立老子庙于观南，晋惠始修此观。
门前古碣卧斜阳，阅世如流事可伤。长有游人悲晋惠，强修遗庙学秦皇。
丹砂久窞井水赤，白树谁烧厨灶香。闻道神仙亦相过，只疑田叟是庚桑。

九月二十日微雪怀子由第二首

岐阳九月天微雪，已作萧条岁暮心。短日送寒砧杵急，冷官无事屋庐深。
愁肠别后能消酒，白发秋来已上簪。近买貂裘堪出塞，忽思乘传问西琛。

江上同舟诗满篋，郑西分马涕垂膺。未成报国惭书剑，岂不怀归畏友朋。
官舍度秋惊岁晚，寺楼见雪与谁登。遥知读易东窗下，车马敲门定不应。

病中闻子由得告不赴商州三首

病中闻汝免来商，旅雁何时更著行。远别不知官爵好，思归苦觉岁年长。
著书多暇真良计，从宦无功漫去乡。惟有王城最堪隐，万人如海一身藏。

近从章子闻渠说，苦道商人望汝来。说客有灵惭直道，道翁久没厌凡才。
夷音仅可通名姓，瘿俗无由辨颈腮。答策不堪宜落此，上书求免亦何哉。章子惇也。

辞官不出意谁知，敢向清时怨位卑。万事悠悠付杯酒，流年冉冉入双髭。
策曾忤世人嫌汝，易可忘忧家有师。此外知心更谁是，梦魂相觅苦参差。

病中大雪数日未尝起观貌令赵荐 以诗相属戏用其韵答之

经旬卧斋阁，终日亲剂和。不知雪已深，但觉寒无奈。飘萧窗纸鸣，堆压檐板堕。阁中皆以板为檐。风飚助凝冽，帟幔困掀簸。惟思近醇醪，未敢窥璨磋。何时反炎苏，却欲躬白磨。谁云座无毡，尚有裘充货。西邻歌吹发，

促席寒威挫。崩腾踏成径，缭绕飞入坐。人欢瓦先融，饮隼瓶屡卧。嗟余独愁寂，空室自困坷。欲为后日赏，恐被游尘涴。寒更报新霁，皎月悬半破。有客独苦吟，清夜默自课。诗人例穷蹇，秀句出寒饿。何当暴雪霜，庶以蹶郊贺。

岁晚相与馈问为馈岁酒食相邀呼为别岁至除
夜达旦不眠为守岁蜀之风俗如是余官于岐下
岁暮思归而不可得故为此三诗寄子由弟

馈 岁

农功各已收，岁事得相佐。为欢恐无见，假物不论货。山川随出产，贫富称小大。置盘巨鲤横，发笼双兔卧。富人事华靡，彩绣光翻座。贫者愧不能，微挚出春磨。官居故人少，里巷佳节过。亦欲举乡风，独倡无人和。

别 岁

故人适千里，临别尚迟迟。人行犹可复，岁行那可迫。问岁安所之，远在天一涯。已逐东流水，赴海归无时。东邻酒初熟，西舍彘亦肥。且为一日欢，慰此穷年悲。勿嗟旧岁别，行与新岁辞。去去勿回顾，还君老与衰。

守 岁

欲知垂尽岁，有似赴壑蛇。修鳞半已没，去意谁能遮。况欲系其尾，虽勤知奈何。儿童强不睡，相守夜欢哗。晨鸡且勿唱，更鼓畏添挝。坐久灯烬落，起看北斗斜。明年岂无年，心事恐蹉跎。努力尽今夕，少年犹可夸。

和子由踏青

春风陌上惊微尘，游人初乐岁华新。人闲正好路旁饮，麦短未怕游车轮。城中居人厌城郭，喧阗晓出空四邻。歌鼓惊山草木动，箠瓢散野乌鸢驯。何人聚众称道人，遮道卖符色怒瞋。宜蚕使汝茧如瓮，宜畜使汝羊如麇。路人未必信此语，强为买服襍新春。道人得钱径沽酒，醉倒自谓吾符神。

和子由蚕市

蜀人衣食常苦艰，蜀人游乐不知还。千人耕种万人食，一年辛苦一春闲。闲时尚以蚕为市，共忘辛苦逐欣欢。去年霜降斫秋获，今年箔积如连山。破瓢为轮土为釜，争买不翅金与纨。忆昔与子皆童丱，年年废书走市观。市人争夸斗巧智，野人暗哑遭欺谩。诗来使我感旧事，不悲去国悲流年。

和子由苦寒见寄

人生不满百，一别费三年。三年吾有几，弃掷理无还。长恐别高中，摧

我鬢与顔。念昔喜著书，别来不成篇。细思平时乐，乃为忧所缘。吾从天下士，莫如与子欢。羨子久不出，读书虱生毡。丈夫重出处，不退要当前。西羌解仇隙，猛士忧塞孺。庙谋虽不战，虏意久欺天。山西良家子。锦缘貂裘鲜。千金买战马，百宝妆刀环。何时逐汝去，与虏试周旋。

和子由论书

吾虽不善书，晓书莫如我。苟能通其意，常谓不学可。貌妍容有颦，壁美何妨椭。端庄杂流丽，刚健含婀娜。好之每自讥，不谓子亦颇。书成辄弃去，缪被旁人裹。皆云本阔落，结束入细么。子诗亦见推，语重未敢荷。迩来又学射，力薄愁官苛。官箭十二把吾能，十一把箭耳。多好竟无成，不精安用夥。何当尽屏去，万事付懒惰。吾闻古书法，守骏莫如跛。世俗笔苦骄，众中强鬼馘。钟张忽已远，此语与时左。

记所见开元寺吴道子画佛灭度以答子由

西方真人谁所见，衣被七宝从双趺。当时修道颇辛苦，柏生两时乌巢肩。初如濛濛隐山玉，渐如濯濯出水莲。道成一旦就空灭，奔会四海悲人天。翔禽哀响动林谷，兽鬼踟躅泪进泉。庞眉深目彼谁子，绕床弹指性自圆。隐如寒月堕清昼，空有孤光留故躔。春游古寺拂尘壁，遗像久此霾香烟。画师不复写名姓，皆云道子口所传。从横固已蔑孙邓，有如巨鳄吞小鲜。来诗所夸孰与此，安得携挂其旁观。

和子由寒食

寒食今年二月晦，树林深翠已生烟。绕城骏马谁能借，到处名园意尽便。但挂酒壶那计盏，偶题诗句不须编。忽闻啼鴂惊羁旅，江上何人治废田。

和刘长安题薛周逸老亭周 最善饮酒未七十而致仕

近闻薛公子，早退惊常流。买园招野鹤，凿井动潜虬。自言酒中趣，一斗胜凉州。翻然拂衣去，亲爱挽不留。隐居亦何乐，素志庶可求。所亡嗟无几，所得不啻酬。青春为君好，白日为君悠。山鸟奏琴筑，野花弄闲幽。虽辞功与名，其乐实素侯。至今清夜梦，尚惊冠压头。谁能载美酒，往以大白浮。之子虽不识，因公可与游。

中隐堂诗 并叙

岐山宰王君绅，其祖故蜀人也，避乱来长安，而遂家焉。其居第园圃有名，长安城中号中隐堂者是也。予之长安，王君以书戒其子弟，邀予游，且乞诗甚勤，因为作此五篇。

去蜀初逃难，游秦遂不归。园荒乔木老，堂在昔人非。凿石清泉激，开门野鹤飞。退居吾久念，长恐此心违。

径转如修蟒，坡垂似伏龟。树从何代有，人与此堂高。好古嗟生晚，偷闲厌久劳。王孙早归隐，尘土污君袍。

二月惊梅晚，幽香此地无。依依慰远客，皎皎似吴妹。不恨故园隔，空嗟芳岁徂。春深桃李乱，笑汝益羸孤。

翠石如鸚鵡，何年别海壖。贡随南使远，载压渭舟偏。已伴乔松老，那知故国迁。金人解辞汉，汝独不潸然。

都城更几姓，到处有残碑。古隧埋蝌蚪，崩崖露伏龟。安排壮亭榭，收拾费金赀。岫嶙何须到，韩公浪自悲。

凤翔八观 并叙

《凤翔八观》诗，记可观者八也。昔司马子长登会稽，探禹穴，不远千里，而李太白亦以七泽之观，至荆州。二子盖悲世悼俗，自伤不见古人，而欲一观其遗迹，故其勤如此。凤翔当秦蜀之交，士大夫之所朝夕往来。此八观者，又皆跬步可至，而好事者有不能遍观焉。故作诗以告欲观而不知者。

石 鼓

冬十二月岁辛丑，我初从政见鲁史。旧闻石鼓今见之，文字郁律蛟蛇走。细观初以指画肚，欲读嗟如钳在口。韩公好古生已迟，我今况又百年后。强寻偏旁推点画，时得一二遗八九。我车既攻马亦同，其鱼维鲙贯之柳。其词云我车既攻，我马既同。又云其鱼维何，维鲙维鲤。何以贯之，惟杨与柳。惟此六句可读，余多不可通。古器纵横犹识鼎，众星错落仅名斗。模糊半已似瘢胝，诸曲犹能辨跟时。娟娟缺月隐云雾，濯濯嘉禾秀葳蕤。漂流百战偶然存，独立千载谁与友。上追轩颡相唯诺，下揖冰斯同。忆昔周宣歌鸿雁，当时籀史变蝌蚪。厌乱人方思圣贤，中兴大为生耆耇。东征徐虏阚虓虎，北伏犬戎随指嗾。象肯杂沓贡狼鹿，方邵联翩赐圭鹵。遂因鼓鼙思将帅，岂为考击烦矇瞍。何人作颂比崧高，万古斯文齐岫嶙。勋劳至大不矜伐，文武未远犹忠厚。欲寻年岁无甲乙，岂有名字记谁某。自从周衰更七国，竟使秦人有九有。扫除诗书诵法律，投弃俎豆陈鞭杻。当年谁人佐祖龙，上蔡公子牵黄狗。登山刻石颂功烈，后者无继前无偶。皆云皇帝巡四国，烹灭强暴救黔首。六经既已委灰尘，此鼓亦当遭击剖。传闻九鼎沦泗上，欲使万夫沉水取。暴君纵欲穷人力，神物义不污秦垢。是时石鼓何处避，无乃天公令鬼守。兴亡百变物自闲，富贵一朝名不朽。细思物理坐叹息，人生安得如汝寿。

诅 楚 文

碑获于开元寺土下，今在太守便厅。秦穆公葬于雍橐泉祈年观下，今墓在开元寺之东南数十步，则寺岂祈年之故基耶。淮南王迁于蜀，至雍道病卒，则雍非长安，此乃古雍也。

岧嶢开元寺，仿佛祈年观。旧筑扫成空，古碑埋不烂。诅书虽可读，字法嗟久换。词云秦嗣王，敢使祝用瓚。先君穆公世，与楚约相捍。质之于巫咸，万叶期不叛。今其后嗣王，乃敢构多难。剗胎杀无罪，亲族遭围绊。计

其所称诉，何啻桀纣乱。吾闻古秦俗，面诈背不汗。岂惟公子邛，社鬼亦遭谩。辽哉千岁后，发我一笑粲。

王维吴道子画

何处访吴画，普门与开元。开元有东塔，摩诘留手痕。吾观画品中，莫如二子尊。道子实雄放，浩如海波翻。当其下手风雨快，笔所未到气已吞。亭亭双林间，彩晕扶桑暾。中有至人谈寂灭，悟者悲涕迷者手自扪。蛮君鬼伯千万万，相排竞进头如鼋。摩诘本诗老，佩芒袭芳芬。今观此壁画，亦若其诗清且敦。祇园弟子尽鹤骨，心如死灰不复温。门前两丛竹，雪节贯霜根。交柯乱叶动无数，一一皆可寻其源。吴生虽妙绝，犹以画工论。摩诘得之于象外，有如仙翮谢笼樊。吾观二子皆神俊，又于维也敛衽无间言。

维摩像唐杨惠之塑在天柱寺

昔者子舆病且死，其友子祀往问之，跼蹐鉴井自叹息，造物将安以我为。今观古塑维摩像，病骨磊砢如枯龟。乃知至人外生死，此身变化浮云随。世人岂不硕且好，身虽未病心已疲。此望神完中有恃，谈笑可却千熊羆。当其在时或问法，俯首无言心自知。至今遗像兀不语，与昔未死无增亏。田翁俚妇那肯顾，时有野鼠衔其髭。见之使人每自失，谁能与结无言师。

东湖

吾家蜀江上，江水绿如蓝。尔来走尘土，意思殊不堪。况当岐山下，风物尤可惭。有山秃如蒲，有水浊如柑。不谓郡城东，数步见湖潭。入门便清奥，恍如梦西南。泉源从高来，随坡走涵涵。东去触重阜，尽为湖所贪。但见苍石螭，开口吐清甘。借汝腹中过，胡为目耽耽。新荷弄晚凉，轻棹极幽探。飘飘忘远近，偃息遗佩玕。深有龟与鱼，浅有螺与蚶。曝晴复戏雨，戢戢多于蚕。浮沉无停饵，倏忽遽满篮。丝缙虽强致，琐细安足戡。闻昔周道兴，翠凤栖孤岚，飞鸣饮此水，照影弄毵毵。此古饮凤池也。至今多梧桐，合抱如彭聃。彩羽无复见，上有鸛搏鷃。嗟予生虽晚，考古意所耽。图书已漫泛，犹复访侨郛。卷阿诗可继，此意久已含。扶风古三辅，政事岂汝谗。聊为湖上饮，一纵醉后谈。门前远行客，劫劫无留骖。问胡不回首，无乃趁朝参。予今正疏懒，官长幸见函。不辞日游再，行恐岁满三。暮归还倒载，钟鼓已齿齿。音谳

真兴寺阁

山川与城郭，漠漠同一形。市人与鸦鹊，浩浩同一声。此阁几何高，何人之所营。侧身送落日，引手攀飞星。当年王中令，斫木南山頽。写真留阁下，铁面眼有棱。身强八九尺，与阁两峥嵘。古人虽暴恣，作事今世惊。登者尚呀喘，作者何以胜。易不观此阁，其人勇且英。

李氏园 李茂正园也，今为王氏所有

朝游北城东，回首见修竹。下有朱门家，破墙围古屋。举鞭叩其户，幽响答空谷。入门所见伙，十步九移目。异花兼四方，野鸟喧百族。其西引溪水，活活转 曲。东注入深林，林深窗户绿。水光兼竹净，时有独立鹄。林中百尺松，岁久苍鳞蹙。岂惟此地少，意恐关中独。小桥过南圃，夹道多乔木。隐如城百雉。挺若舟千斛。阴阴日光淡，黯黯秋气蓄。尽东为方池，野雁杂家鹜。红梨惊合抱，映岛孤云馥。春光水溶漾，雪阵风翻扑。其北临长溪，波声卷平陆。北山卧可见，苍翠间饶秃。我时来周览，问此谁所筑。云昔李将军，负嶮乘衰叔。抽钱筹间口，但未椎羹粥。当时夺民田，失业安敢哭。谁家美园圃，籍没不容赎。此亭破千家，郁郁城之麓。将军竟何事，虬虱生刀 。何尝载美酒，来此驻车毂。空使后人，闻名颈犹缩。俗犹呼皇后园，盖茂正谓其妻也。我今官正闲，屡至因休沐。人生营居止，竟为何人卜。何当办一身，永与清景逐。

秦穆公墓

素泉在城东，墓在城中无百步。乃知昔未有此城，秦人以泉识公墓。昔公生不诛孟明，岂有死之日而忍用其良。乃知三子徇公意，亦如齐之二子从田横。古人感一饭，尚能杀其身。今人不复见此等，乃以所见疑古人。古人不可望，今人益可伤。

和子由闻子瞻将如终南太平宫溪堂读书

役名则已勤，徇身则已偷。我诚愚且拙，身名两无谋。始者学书判，近亦知问囚。但知今当为，敢问向所由。土方其未得，唯以不得忧。既得又忧失，此心浩难收。譬如倦行客，中路逢清流。尘埃虽未脱，暂慈得一漱。我欲走南涧，春禽始嚶啾。鞅掌久不决，尔来已徂秋。桥山日月迫，府县烦差抽。王事谁敢愬，民劳吏宜羞。中间罹旱暵，欲学唤雨鸠。千夫挽一木，十步八九休。渭水涸无泥，曹堰旋插修。对之食不饱，余事更追求。近日秋雨足，公余试新 。劬劳幸已过，朽钝不任镵。秋风迫吹帽，西阜可纵游。聊为一日乐，慰此百日愁。

将往终南和子由见寄

人生百年寄鬓须，富贵何啻葭中草。惟将翰墨留染濡，绝胜醉倒蛾眉扶。我今废学如寒竽，久不吹之涩欲无。岁云暮矣嗟几余，欲往南溪侣禽鱼。秋风吹雨凉生肤，夜长耿耿添漏壶。穷年弄笔衫袖乌，古人有之我愿如。终朝危坐学僧趺，闭门不出闲履舄。下视官爵如泥淤，嗟我何为久踟蹰。岁月岂肯为汝居，仆夫起餐秣吾驹。

七月二十四日以久不雨出禱躡溪是日宿
虢县二十五日晚自虢县渡渭宿于僧舍曾
阁阁故曾氏所建也夜久不寐见壁有前县
令赵荐留名有怀其人

龕灯明灭欲三更，敬枕无人梦自惊。深谷留风终夜响，乱山衔月半床明。
故人渐远无消息，古寺空来看姓名。欲向躡溪问姜叟，仆夫屡报小杓倾。

二十六日五更起行至躡溪未明

夜入躡溪如入峡，照山炬火落惊猿。山头孤月耿犹在，石上寒波晓更喧。
至人旧隐白云合，神物已化遗踪蜿。安得梦随霹雳驾，马上倾倒天瓢翻。

是日自躡溪将往阳平憩于 麻田青峰寺之下院翠麓亭

不到峰前寺，空来渭上村。此亭聊可喜，修径岂辞扪。谷映朱栏秀，山
含古木尊。路穷惊石断，林缺见河奔。马困嘶青草，僧留荐晚飧。我来秋日
午，旱久石床温。安得云如盖，能令雨泻盆。共看山下稻，凉叶晚翻翻。

二十七日自阳平至斜谷宿 子南山中躡龙寺

横槎晚渡碧涧口，骑马夜入南山谷。浴音。谷中暗水响泠泠，岭上疏星
明煜煜。寺藏岩底千万仞，路转山腰三百曲。风生饥虎啸空林，月黑惊鹿窜
修竹。入门突兀见深殿，照佛青荧有残烛。愧无酒食待游人，旋斫杉松煮溪
蔽。板阁独眠惊旅枕，木鱼晓动随僧粥。起观万瓦郁参差，目乱千岩散红绿。
门前商贾负椒笋，山后咫尺连巴蜀。何时归耕江上田，一夜心逐南飞鹄。

是日至下马碛憩于北山僧舍有 阁曰怀贤南直斜谷西临五丈原 诸葛孔明所从出师也

南望斜谷口，三山如犬牙。西观五丈原，郁屈如长蛇。有怀诸葛公，万
骑出汉巴。吏士寂如水，萧萧闻马挝。公才与曹丕，岂止十倍加。顾瞻三辅
间，势若风卷沙。一朝长星坠，竟使蜀妇髻。山僧岂知此，一室老烟霞。往
事逐云散，故山依渭斜。客来空吊古，清泪落悲笳。

第二卷

诗八十三首

和子由记园中草木十一首

煌煌帝王都，赫赫走群彦。嗟汝独何为，闭门观物变。微物岂足观，汝独观不倦。牵牛与葵藿，采摘人诗卷。吾闻东山傅，置酒携孌婉。富贵未能忘，声色聊自遣。汝今又不然，时节看瓜蔓。怀宝自足珍，蓺兰那计碗。吾归于汝处，慎勿嗟岁晚。

荒园无数亩，草木动成林。春阳一已敷，妍丑各自矜。蒲萄虽满架，困倒不能任。可怜病石榴，花如破红襟。葵花虽粲粲，蒂浅不胜簪。丛蓼晚可喜，轻红随秋深。物生感时节，此理等废兴。飘零不自由，盛亦非汝能。

种柏待其成，柏成人亦老。不如种丛蓍，春种秋可倒。阴阳不择物，美恶随意造。柏生何苦艰，似亦费天巧。天工巧有几，肯尽为汝耗。君看藜与藿，生意常草草。

萱草虽微花，孤秀能自拔。亭亭乱叶中，一一芳心插。牵牛独何畏，诘曲自牙蘖。走寻荆与榛，如有宿昔约。南斋读书处，乱翠晓如泼。偏工贮秋雨，岁岁坏篱落。

笋笋初似竹，稍开叶如蒲。方春节抱甲，渐老根生须。不爱当夏绿，爱此及秋枯。黄叶倒风雨，白花摇江湖。江湖不可到，移植苦勤劬。安得双野鸭，飞来成画图。

行乐惜芳晨，秋风常苦早。谁知念离别，喜见秋瓜老。秋瓜感霜霰，茎叶飒已槁。宦游归无时，身若马系皂。悲鸣念千里，耿耿志空抱，多忧竟何为，使汝玄发缟。

官舍有丛竹，结根问囚厅。下为人所径，土密不容钉。殷勤戒吏卒，荆棘护中庭。绕砌忽坟裂，走鞭瘦岭岵。我常携枕簟，来此荫寒青。日暮不能去，卧听窗风冷。

穹莠生蜀道，白芷来江南。漂流到关辅，犹不失芳甘。濯濯翠茎满，濯濯清露涵。及其未花实，可以资筐篮。秋节忽已老，苦寒非所堪。斫根取其实，对此微物惭。

自我来关辅，南山得再游。山中亦何有，草木媚深幽。菖蒲人不识，生此乱石沟，山高霜雪苦，苗叶不得抽。下有千岁根，蹙缩如蟠虬。长为鬼神守，德薄安敢偷。

我归自南山，山翠犹在目。心随白云去，梦绕山之麓。汝从何方来，笑齿粲如玉。探怀出新诗，秀语夺山绿。觉来已茫昧，但记说秋菊。有如采樵子，入洞听琴筑。归来写遗声，犹胜人间曲。八月十二日，夜宿府学，方和此诗。梦与弟游南山，出诗数十篇，梦中甚爱之。乃觉，唯记一句云，蟋蟀悲秋菊。

野菊生秋涧，芳心空自知。无人惊岁晚，唯有暗蛩悲。花开涧水上，花落涧水湄。菊衰蛩亦蛩，与汝岁相期。楚客方多感，秋风咏江蓠。落英不满掬，何以慰朝饥。

周公庙在岐山西北七八里庙

后百许步有泉依山涌冽异常国
史所谓润德泉世乱则竭者也

吾今那复梦周公，尚喜秋来过故宫。翠凤旧依山碑兀，清泉长与世穷通。
至今游客伤离黍，故国诸生咏雨濛。牛酒不来乌鸟散，白杨无数暮号风。

南溪之南竹林中新构一茆堂予以
其所处最为深邃故名之避世堂

犹恨溪堂浅，更穿修竹林。高人不畏虎，避世已无心，隐几颓如病，忘
言兀似暗。茆茨追上古，冠盖谢当今。晓梦猿呼觉，秋怀鸟伴吟。暂来聊解
带，屡去欲携衾。湖上行人绝，阶前暮雪深。应逢绿毛叟，扣户夜抽簪。

自清平镇游楼观五郡大秦延生仙游往返
四日得十一诗寄舍弟子由同作

楼 观

鸟噪猿呼画闭门，寂寥谁识古皇尊。青牛久已辞轘轳，白鹤时来访子孙。
山近朔风吹积雪，天寒落日淡孤村。道人应怪游人众，汲尽阶前井水浑。

五 郡

古观正依林麓断，居民来就水泉甘。乱溪赴渭争趋北，飞鸟迎山不复南。
羽客衣冠朝上象，野人香火祝春蚕。汝师岂解言符命，山鬼何知托老聃。观
有明皇碑，言梦老子告以享国长久之意。

授经台 乃南山一峰耳，非复有筑处。

剑舞有神通草圣，海山无事化琴工。此台一览秦川小，不待传经意已空。

大 秦 寺

晃荡平川尽，坡陁翠麓横。忽逢孤塔迥，独向乱山明。信足幽寻远，临
风却立惊。原田浩如海，袞袞尽东倾。

仙游潭五首

潭上有寺三：二在潭北循黑水而上，为东路至南寺；度黑水西里余，
从马北上，为西路至北寺。东路峻不可骑马，而西路隔潭，潭水深不可
测。上以一木为桥，不敢过，故南寺

有塔，望之可爱，而终不能到。

翠壁下无路，何年雷雨穿。光摇岩上寺，深到影中天。我欲然犀看，龙
应抱宝眠。谁能孤石上，危坐试僧禅。

东去愁攀石，西来怯渡桥。碧潭如见试，白塔苦相招。野馈惭微薄，村沽慰寂寥。路穷斤斧绝，松桂得干霄。南寺。

唐初传有此，乱后不留碑。畏虎关门早，无村得米迟。山泉自入瓮，野桂不胜炊。信美那能久，应先学忍饥。北寺。

未应将军聘，初从季直游。绛纱生不识，苍石尚能留。岂害依梁冀，何须困李侯。吾诗慎勿刻，猿鹤为君羞。马融石室。

洞里吹萧子，终年守独幽。石泉为晓镜，山月当帘钩。岁晚杉枫尽，人归雾雨愁。送迎应鄙陋，谁继楚臣讴。玉女洞。

爱玉女洞中水既致两瓶恐后复取而为使者见给因破竹为契使寺僧藏其一以为往来之信戏谓之调水符

欺谩久成俗，关市有契繻。谁知南山下，取水亦置符。古人辨淄渑，皎若鹤与鳧。吾今既谢此，但视符有无。常恐汲水人，智出符之余。多防竟无及，弃置为长吁。

自仙游回至黑水见居民姚氏山亭高绝可爱复憩其上

山鸦晓辞谷，似报游人起，出门犹屡顾，惨若去吾里。道途险且迂，继此复能几。溪边有危构，归驾聊复柅。爱此山中人，缥缈如仙子。平生慕独往，官爵同一展。胡为此溪边，眷眷若有埃。国恩久未报，念此惭且耻。临风浩悲吁，万世同一轨。何年谢穉簪，丹砂留迅晷。

南溪有会景享处众亭之间无所见甚不称其名余欲迁之少西临断岸西向可以远望而力未暇特为制名曰招隐仍为诗以告来者庶几迁之

飞檐临古道，高榜劝游人。未即令公隐，聊须濯路尘。茆茨分聚落，烟火傍城闉。林缺湖光漏，窗明野意新。居民谁白帽，过客谩朱轮。山好留归展，风回落醉巾。他年谁改筑，旧制不须因。再到吾虽老，犹堪作坐宾。

凌虚台

才高多感激。道直无往还。不如此台上，举酒邀青山。青山虽云远，似亦识公颜。崩腾赴幽赏，披豁露天湄。落日衔翠壁，暮云点烟鬟。浩歌清兴发，放意未礼删。是时岁云暮，微雪洒袍斑。吏退迹如扫，宾来勇跻攀。台前飞雁过，台上雕弓弯。联翩向空坠，一笑惊尘寰。

竹 籟

野人献竹籟，腰腹大如盎。自言道旁得，采不费置罔。鸱夷让圆滑，混

沌惭瘦爽。两牙虽有余，四足仅能仿。逢人自惊蹶，闷若儿脱襁。念兹微陋质，刀几安足枉。就禽太仓卒，羞愧不能飧。南山有孤熊，择兽行舐掌。

溪陂鱼陂在鄂县

霜筠细破为双掩，中有长鱼如卧剑。紫苻穿腮气惨凄，红鳞照坐光磨闪。携来虽远鬻尚动，烹不待熟指先染。坐客相看为解颜，香粳饱送如填堑。早岁尝为荆渚客，黄鱼屡食沙头店。滨江易采不复珍，盈尺辄弃无乃僭。自从西征复何有，欲致南烹嗟久欠。游倏琐细空自腥，乱骨纵横动遭砭。故人远馈何以报，客俎久空惊忽贍。东道无辞信使频，西邻幸有庖爨醢。

读道藏

嗟予亦何幸，偶此琳宫居。宫中复何有，戢戢千函书。盛以丹锦囊，冒以青霞裾。王乔掌关籥，蚩尤守其庐。乘闲窃掀搅，涉猎岂暇徐。至人悟一言，道集由中虚。心闲反自照，皎皎如芙蕖。千载厌世去，此言乃蘧蔕。人皆忽其身，治之用土苴。何暇及天下，幽忧吾未除。

十二月十四日夜微雪明日 早往南溪小酌至晚

南溪得雪真无价，走马来看及未消。独自披榛寻履迹，最先犯晓过朱桥。谁怜破屋眠无处，坐觉村饥语不嚣。惟有暮鸦知客意，惊飞千片落寒条。

九月中曾题二小诗于南溪竹上 既而忘之昨日再游见而录之

湖上萧萧疏雨过，山头霏霏暮云横。陂塘水落荷将尽，城市人归虎欲行。谁谓江湖居，而为虎豹宅。焚山岂不能，爱此千竿碧。

司竹监烧苇园因召都巡检柴贻 勋左藏以其徒会猎园下

官园刈苇岁留槎，深冬放火如红霞。枯槎烧尽有根在，春雨一洗皆萌芽。黄狐老兔最狡捷，卖侮百兽常矜夸。年年此厄竟不悟，但爱蒙密争来家。风回焰卷毛尾热，欲出已被苍鹰遮。野人来言此最乐，徒手时出归满车。

巡边将军在近邑，呼来飒飒从矛义。戍兵久闲可小试，战鼓虽冻犹堪挝。雄心欲搏南涧虎，阵势颇学常山蛇。霜干火烈声爆野，飞走无路号且呀。迎人截来春逢箭，避火逸去穷投且。击鲜走马殊未厌，但恐落日催栖鸦。弊旗仆鼓坐数获，鞍挂雉兔肩分麋。主人置酒聚狂客，纷纷醉语晚更哗。燎毛燔肉不暇割，饮啖直欲追羲娲。青丘云梦古所吒，与此何啻百倍加。苦遭谏疏说夷羿，又被赋客嘲淫奢。岂如闲官走山邑，放旷不与趋朝衙。农工已毕岁云暮，车骑虽少宾殊佳。酒酣上马去不告，猎猎霜风吹帽斜。

和子由木山引水二首

蜀江久不见沧浪，江上枯槎远可将。去国尚能三犊载，汲泉何爱一夫忙。
崎岖好事人应笑，冷淡为欢意自长。遥想纳凉清夜永，窗前微月照汪汪。
千年古木卧无梢，浪卷沙翻去似瓢。几度过秋生藓晕，至今流润应江潮。
泓然疑有蛟龙吐，断处人言霹雳焦。材大古来无适用，不须郁郁慕山苗。

寄题兴州晁太守新开古东池

百亩新池傍郭斜，居人行乐路人夸。自言官长如灵运，能使江山似永嘉。
纵饮坐中遗白蛤，幽寻尽处见桃花。不堪山鸟号归去，长遣王孙苦忆家。

华阴寄予由

三年无日不思归，梦里还家旋觉非。腊酒送寒催去国，东风吹雪满征衣。
三峰已过天浮翠，四扇行看日照扉。里堆消磨不禁尽，速携家餉劳骖騑。

和董传留别

粗缯大布裹生涯，腹有诗书气自华。厌伴老儒烹瓠叶，强随举子踏槐花。
囊空不办寻春马，眼乱行看择婿车。得意犹堪夸世俗，诏黄新湿字如鸦。

次韵柳子玉见寄

薄雷轻雨晓晴初，陌上春泥未溅裾。行乐及时虽有酒，出门无侣漫看书。
遥知寒食催归骑，定把鸱夷载后车。他日见邀须强起，不应辞病似相如。

送曹子固倅越得燕字

醉翁门下士，杂还难为贤。曾子独超轶，孤芳陋群妍。昔从南方来，与翁两联翩。
翁今自憔悴，子去亦宜然。贾谊穷适楚，乐生老思燕。那因江鲙美，遽厌天庖膾。
但苦世论隘，聒耳如蝮蝉。安得万顷池，养此横海鳣。

王颐赴建州钱监求诗及草书

我昔识子自武功，寒厅夜语樽酒同。酒阑烛尽语不尽，倦仆立寐僵屏风。
丁宁劝学不死诀，自言亲受方瞳翁。嗟余闻道不早悟，醉梦颠倒随盲聋。
尔来忧患苦摧剥，意思萧索如霜蓬。羨君颜色愈少壮，外慕渐少由中充。
河车挽水灌脑黑，丹砂伏火入颊红。大梁相逢又东去，但道何日辞樊笼。
未能便乞峒嵎令，官曹似是锡与铜。留诗河上慰离别，草书朱暇缘匆匆。

秀州僧本莹静照堂

鸟囚不忘飞，马系常念驰。静中不自胜，不若听所之。君看厌事人，无

事乃更悲。贫贱苦形劳，富贵嗟神疲。作堂名静照，此语子谓谁。江湖隐沦士，岂无适时资。老死不自惜，扁舟自娱嬉。从之恐莫见，况肯从我为。

石苍舒醉墨堂

人生识字忧患始，姓名粗记可以休。何用草书夸神速，开卷恍恍令人愁。我尝好之每自笑，君有此病何年瘳。自言其中有至乐，适意无异逍遥游。近者作堂名醉墨，如饮美酒销百忧。乃知柳子语不妄，病嗜土炭如珍羞。君于此艺亦云至，堆墙败笔如山丘。兴来一挥百纸尽，骏马倏忽踏九州。我书意造本无法，点画信手烦推求。胡为议论独见假，只字片纸皆藏收。不减钟张君自足，下方罗赵我亦优。不须临池更苦学，完取绢素充衾裯。

送安惇秀才失解西归

旧书不厌百回读，熟读深思子自知。他年名宦恐不免，今日栖迟那可追。我昔家居断还往，著书不复窥园葵。揭来东游慕人爵，弃去旧学从儿嬉。狂谋谬算百不遂，惟有霜鬓来如期。故山松柏皆手种，行且拱矣归何时。万事早知皆有命，十年浪走宁非痴。与君未可较得失，临别惟有长嗟咨。

送任佖通判黄州兼寄其兄孜

吾州之豪任公子，少年盛壮日千里。无媒自进谁识之，有材不用今老矣。别来十年学不厌，读破万卷诗愈美。黄州小郡隔溪谷，苑屋数家依竹苇。知命无忧子何病，见贤不荐谁当耻。平泉老令更何悲，六十青衫贫欲死。桐乡遗老至今泣，颍川大姓谁能捶。因君寄声问消息，莫对黄鹂矜爪嘴。

和子由初到陈州见寄二首 次韵

道丧虽云久，吾犹及老成。如今各衰晚，那更治刑名。懒惰便樗散，疏狂托圣明。阿奴须碌碌，门户要全生。旧隐三年别，杉松好在不。吾今尚眷眷，此意恐悠悠。闭户时寻梦，无人可说愁。还来送别处，双泪寄南州。

次韵子由绿筠堂

爱竹能延客，求诗剩挂墙。风梢千纛乱，月影万夫长。谷鸟惊棋响，山蜂识酒香。只应陶靖节，会听北窗凉。

送刘放倅海陵

君不见，阮嗣宗，臧否不挂口。莫夸舌在牙齿牢，是中惟可饮醇酒。读书不用多，作诗不须工。海边无事日日醉，梦魂不到蓬莱宫。秋风昨夜入庭树，莼丝未老君先去。君先去，几时回，刘郎应白发，桃花开不开。

送钱藻出守婺州得英字

老手便剧郡，高怀厌承明。聊纾东阳缓，一濯沧浪纓。东阳佳山水，未到意已清。过家父老喜，出郭壶浆迎。子行得所愿，怆恨居者情。吾君方急贤，日旰坐迓英。黄金招乐毅，白壁赐虞卿。子不少自贬，陈义空峥嵘。古称为郡乐，渐恐烦敲榜。临分敢不尽，醉语醒还惊。

送吕希道知和州

去年送君守解梁，今年送君守历阳。年年送人作太守，坐受尘土堆胸肠。君家联翩三将相，富贵未已今方将。凤雏骥子生有种，毛骨往往传诸郎。观君崛郁负奇表，便合剑佩趋明光。胡为小郡屡奔走，征马未解风帆张。我生本自便江海，忍耻未去犹徬徨。无言赠君有长叹，美哉河水空洋洋。

次韵王晦夜坐

爱君东阁能延客，顾我闲官不计员。策杖频过如未厌，卜居相近岂辞迁。莫将诗句惊摇落，渐喜樽罍省扑缘。待约月明池上宿，夜深同看水中天。

送文与可出守陵州

壁上墨君不解语，见之尚可消百忧。而况我友似君者，素节凛凛欺霜秋。清诗健笔何足数，逍遥齐物追庄周。夺官遣去不自觉，晓梳脱发谁能收。江边乱山赤如赭，陵阳正在千山头。君知远别怀抱恶，时遣墨君解我愁。

送刘道原归覲南康

晏婴不满六尺长，高节万仞陵首阳。青衫白发不自叹，富贵在天那得忙。十年闭户乐幽独，百金购书收散亡。謁来东观弄丹墨，聊借旧史诛奸强。孔融不肯下曹操，汲黯本自轻张汤。虽无尺捶与寸刃，口吻排击含风霜。自言静中阅世俗，有似不饮观酒狂。衣巾狼藉又屡舞，旁人大笑供千场。交朋翩翩去略尽，惟我与子犹徬徨。世人共弃君独厚，岂敢自爱恐子伤。朝来告别惊何速，归意已逐征鸿翔。匡庐先生古君子，挂冠两纪鬓未苍。定将文度置膝上，喜动邻里烹猪羊。君归为我道姓名，幅巾他日容登堂。

出都来陈所乘船上有题小诗八首 不知何人有感于余心者聊为和之

蛙鸣青草泊，蝉噪垂杨浦。吾行亦偶然，及此新过雨。
鸟乐忘置，鱼乐忘钩饵。何必择所安，滔滔天下是。
烟火动村落，晨光尚熹微。田园处处好，渊明胡不归。

我行无疾徐，轻揖信溶漾。船留村市闹，闸发寒波涨。
舟人苦炎热，宿此乔木湾。清月未及上，黑云如颓山。
万窍号地籁，冲风散天池。喧豷瞬息间，还挂斗与箕。

颖水非汉水，亦作蒲萄绿。恨无襄阳儿，令唱铜鞮曲。
我诗虽云拙，心平声韵和。年来烦恼尽，古井无由波。

次韵张安道读杜诗

大雅初微缺，流风困暴豪。张为词客赋，变作楚臣骚。展转更崩坏，纷纶阅俊髦。地偏蕃怪产，源失乱狂涛。粉黛迷真色，鱼虾易豢牢。谁知杜陵杰，名与谪仙高。扫地收千轨，争标看两艘。诗人例穷苦。天意遣奔逃。尘暗人亡鹿，溟翻帝斩鳌。艰危思李牧，述作谢王褒。失意各千里，哀鸣闻九皋。骑鲸遁沧海，捋虎得终袍。巨笔屠龙手，微官似马曹。迂疏无事业，醉饱死游遨。简牍仪刑在，儿童篆刻劳。今谁主文字，公合把旌旄。开卷遥相忆，知音两不遭。般斤思郢质，鯤化陋濠，恨我无佳句，时蒙致白醪。殷勤理黄菊，未遣没蓬蒿。

送张安道赴南都留台

我公古仙伯，超然羨门姿。偶怀济物志，遂为世所縻。黄龙游帝郊，萧韶凤来仪。终然反溟极，岂复安笼池。出入四十年，忧患未尝辞。一言有归意，阖府谏莫移。吾君信英睿。搜士及茆茨。无人长者侧，何以安子思。归来扫一室，虚白以自怡。游于物之初，世俗安得知。我亦世味薄，因循鬓生丝。出处良细事，从公当有时。

傅尧俞济源草堂

微官共有田园兴，老罢方寻隐退庐。栽种成阴十年事，仓皇求买万金无。先生卜筑临清济，乔木如今似画图。邻里亦知偏爱竹，春来相与护龙雏。

陆龙图说挽词

挺然直节庇峨岷，谋道从来不计身。属矿家无十金产，过车巷哭六州民。尘埃攀寺三年别，樽俎岐阳一梦新。他日思贤见遗像，不论宿草更沾巾。成都有思贤阁画诸公像。

胡完夫母周夫人挽词

柏舟高节冠乡邻，绛帐清风耸搢绅。岂似凡人但慈母，能令孝子作忠臣。当年织屦随方进，晚节称觞见伯仁。回首悲凉便陈迹，凯风吹尽棘成薪。

和柳子五过陈绝粮次韵二首

风雨萧萧夜晦迷，不须鸣叫强知时。多才久被天公怪，阙食惟应爨妇知，杜叟挽衣那及胫，颜翁食粥敢言炊。诗人情味真尝遍，试问于君底事亏。

如我自观犹可厌，非君谁复肯相寻。图书跌宕悲年老，灯火青荧语夜深。早岁便怀齐物意，微官敢有济时心。南行十里成何事，一听秋涛万鼓音。

颍州初别子由二首

征帆挂西风，别泪滴清颖。留连知无益，惜此须臾景。我生三度别，此别尤酸冷。念子似元君，木讷刚且静。寡词真吉人，介石乃机警。至今天下士，去莫如子猛。嗟我久病狂，意行无坎并。有如醉且坠，幸未伤辄醒。从今得闲暇，默坐消日永。作诗解子忧，持用日三省。

近别不改容，远别涕沾胸。咫尺不相见，实与千里同。人生无离别，谁知恩爱重。始我来宛丘，牵衣舞儿童。便知有此恨，留我过秋风。秋风亦已过，别恨终无穷。问我何年归，我言岁在东。离合既循环，忧喜迭相攻。悟此长太息，我生如飞蓬。多忧发早白，不见六一翁。

欧阳少师令赋所蓄石屏

何人遗公石屏风，上有水墨希微踪。不画长林与巨植，独画峨眉山西雪，岭上万岁不长之孤松。崖崩涧绝可望不可到，孤烟落日相溟濛。含风偃蹇得真态，刻画始信天有工。我恐毕宏韦偃死葬虢山下，骨可朽烂心难穷。神机巧思无所发，化为烟霏沦石中。古来画师非俗士，摹写物象略与诗人同。愿公作诗慰不遇，无使二子含愤泣幽宫。

陪欧阳公燕西湖

谓公方壮须似雪，谓公已老光浮颊。揭来湖上饮美酒，醉后剧谈犹激烈，湖边草木新著霜，芙蓉晚菊争煌煌。插花起舞为公寿，公言百岁如风狂。赤松共游也不恶，谁能忍饥啖仙药。已将天寿付天公，彼徒辛苦吾差乐。城上乌栖暮霭生，银缸画烛照湖明，不辞歌诗劝公饮，坐无桓伊能抚箏。

十月二日将至涡口五里所遇风留宿

长淮久无风，放意弄清快。今朝雪浪满，始觉平野隘，两山控吾前，吞吐久不嘬。孤舟系桑本，终夜舞澎湃。舟人更传呼，弱缆恃菅蒯。平生傲忧患，久已恬百怪。鬼神欺吾穷，戏我聊一噫。瓶中尚有酒，信命谁能戒。

出颖口初见淮山是日至寿州

我行日夜向江海，枫叶芦花秋兴长。平淮忽迷天远近，青山久与船低昂。寿州已见白石塔，短棹未转黄茅冈。波平风软望不到，故人久立烟苍茫。

寿州李定少卿出钱城东龙潭上

山鸦噪处古灵湫，乱沫浮涎绕客舟。未暇然犀照奇鬼，欲将烧燕出潜虬。使君借别催歌管，村巷惊呼聚获猴。此地他年颂遗爱，观鱼并记者庄周。

濠州七绝

涂山下有鯀庙，山前有禹会村。

川锁支祁水尚浑，地理汪罔骨应存。樵苏已入黄能庙，乌鹊犹朝禹会村。

彭祖庙 有云母山，云彭祖所采服也。

跨历商周看盛衰，欲将齿发斗蛇龟。空餐云母连山尽，不见蟠桃著子时。

逍遥台 庄子祠堂在开元寺，即墓为堂。

常怪刘伶死更埋，岂伊忘死未忘骸。乌鸢夺得与蝼蚁，谁信先生无此怀。

观鱼台

欲将同异较锱铢，肝胆犹能楚越如。若信万殊归一理，子今知我我知鱼。

虞姬墓

帐下佳人拭泪痕，门前壮士气如云。苍皇不负君王意，只有虞姬与郑君。

四望亭

大和中，刺史刘嗣之立。李绅以太子宾客分司东都，过濠。为作记，今存而亭废者数年矣。

颓垣破础没柴荆，故老犹言短李亭。敢请使君重起废，落霞孤鹜换新铭。

浮山洞

洞在淮中，夏潦不能及，而冬不加高，故人疑其浮也。

人言洞府是鳌宫，升降随波与海通。共坐船中那得见，乾坤浮水水浮空。

第三卷

诗七十六首

泗州僧伽塔

我昔南行舟系汴，逆风三日沙吹面。舟人共劝祷灵塔，香火未收旗脚转。回头顷刻失长桥，却到龟山未朝饭。至人无心何厚薄，我自怀私欣所便。耕田欲雨刈欲晴，去得顺风来者怨。若使人人祷辄遂，造物应须日千变。我今身世两悠悠，去无所逐来无恋。得行固愿留不恶，每到有求神亦倦。退之旧云三百尺，澄观所营今已换。不嫌俗士污丹梯，一看云山绕淮甸。

龟山

我生飘荡去何求，再过龟山岁五周。身行万里半天下，僧卧一庵初白头，地隔中原劳北望，潮连沧海欲东游。元嘉旧事无人记，故垒摧颓今在不。宋文帝遣将拒魏太武，筑城此山。

发洪泽中途遇大风复还

风浪忽如此，吾行欲安归。挂帆却西迈，此计未为非。洪泽三十里，安流去如飞。居民见我还，劳问亦依依。携酒就船卖，此意厚莫违。醒来夜已半，岸木声向微。明日淮阴市，白鱼能许肥。我行无南北，适意乃所祈。何劳弄澎湃，终夜摇阖扉。妻孥莫忧色，更典篋中衣。

十月十六日记所见

风高月暗云水黄，淮阴夜发朝山阳。山阳晓雾如细雨，炯炯初日寒无光。云收雾卷已亭午，有风北来寒欲僵。忽惊飞雹穿户牖，迅驶不复容遮防。市人颠沛百贾乱，疾雷一声如颓墙。使君来呼晚置酒，坐定已复日照廊。恍疑所见皆梦寐，百种变怪旋消亡。共言蛟龙厌旧穴，鱼鳖随徙空陂塘。愚儒无知守章句，论说黑白推何祥。惟有主人言可用，天寒欲雪饮此觞。

广陵会三同舍各以其字为韵仍邀同赋

去年送刘郎，醉语已惊众。如今各漂泊，笔砚谁能弄。我命不在天，羿毂未必中。作诗聊遣意，老大慵讥讽。夫子少年时，雄辩轻子贡。尔来再伤弓，戢翼念前痛。广陵三日饮，相对恍如梦。况逢贤主人，白酒拨春瓮。竹西已挥手，湾口犹屡送。羨子去安闲，吾邦正喧哄。

三年客京辇，憔悴难具论，挥汗红尘中，但随马蹄翻。人情贵往返，不报生祸根。坐令平生友，终岁不及门。南来实清旷，但恨无与言。不谓广陵城，得逢刘与孙。异趣不两立，譬如王孙猿。吾侪久相聚，恐见疑排根。我褊类中散，子通真巨源。绝交固未敢，且复东南奔。

江陵昔相遇，幕府称上宾。再见明光宫，峨冠挹搢绅。如今三见子，坎

珂为逐臣。朝游云霄间，欲分丞相茵。莫落江湖上，遂与屈子邻。了不见喜愠，子岂真可人。邂逅成一欢，醉语出天真。土方在田里，自比渭与莘。出试乃大谬，刍狗难重陈。岁晚多霜露，归耕当及辰。

游金山寺

我家江水初发源，宦游直送江入海。闻道潮头一丈高，天寒尚有沙痕在。中冷南畔石盘陀，古来出没随涛波。试登绝顶望乡国，江南江北青山多。羁愁畏晚寻归楫，山僧苦留看落日。微风万顷靴文细，断霞半空鱼尾赤。是时江月初生魄，二更月落天深黑。江心似有炬火明，飞焰照山栖鸟惊。怅然归卧心莫识，非鬼非人竟何物。江山如此不归山，江神见怪惊我顽。我谢江神岂得已，有田不归如江水。是夜所见如此。

自金山放船至焦山

金山楼观何眈眈，撞钟击鼓闻淮南。焦山何有有修竹，采薪汲水僧两三。云霾浪打人迹绝，时有沙户祈春蚕。我来金山更留宿，而此不到心怀惭。同游尽返决独往，赋命穷薄轻江潭。清晨无风浪自涌，中流歌啸倚半酣。老僧下山惊客至，迎笑喜作巴人谈。自言久客忘乡井，只有弥勒为同龕。困眠得就纸帐暖，饱食未厌山蔬甘。山林饥卧古亦有，无田不退宁非贫。展禽虽未三见黜，叔夜自知七不堪。行当投劾谢簪组，为我佳处留茆庵。吴人谓水中可田者为沙，焦山长老中江人也。

甘露寺

江山岂不好，独游情易阑。但有相携人，何必素所欢。我欲访甘露，当途无闲官。二子旧不识，欣然肯联鞍。古郡山为城，层梯转朱栏。楼台断崖上，地窄天水宽。一览吞数州，山长江漫漫。却望大明寺，惟见烟中竿。很石卧庭下，穹隆如伏獬。缅怀卧龙公，挟策事雕钻。一谈收獬子，再说走老瞒。名高有余想，事往无留观。萧翁古铁钁，相对空团团。坡陀受百斛。积水生微澜。泗水逸周鼎，渭城辞汉盘。山川失故态，怪此能独完。僧繇六化人，霓衣挂冰纨。隐见十二叠，观者疑夸谩。破板陆生画，青猊戏盘跚。上有二天人，挥手如翔鸾。笔墨虽欲尽，典刑垂不刊。赫赫赞皇公，英姿凛以寒。古柏亲手种，挺然谁敢干。枝撑云峰裂，根入石窟蟠。荆草得断碑，斩崖出金棺。瘞藏岂不牢，见伏理可叹。四雄皆龙虎，遗迹俨未刊。方其盛壮时，争夺肯少安。废兴属造物，迁逝谁控搏。况彼妄庸子，而欲事所难。古今共一轨，后世徒辛酸，聊兴广武叹，不待雍门弹。

次韵子由柳湖感物

忆昔子美在东屯，数间茅屋苍山根。嘲吟草木调蛮獠，欲与猿鸟争啾喧。子今憔悴众所弃，驱马独出无往还。惟有柳湖万株柳，清阴与子供朝昏。胡为讥评不少借，生意凌挫难为繁。柳虽无言不解温，世俗乍见应抚然。娇姿共爱春濯濯，岂问空腹修蛇蟠。朝看浓翠做炎赫，夜爱疏影摇清圆。风翻雪

阵春絮乱，蠹响啄木秋声坚。四时盛衰各有态，摇落凄沧惊寒温。南山孤松积雪底，抱冻不死谁复贤。

送蔡冠卿知饶州

吾观蔡子与人游，掀髯笑语无不可。平时倜傥不惊俗，临事迂阔乃过我。横前坑阱众所畏，布路金珠谁不裹。尔来变化惊何速，昔号刚强今亦颇。怜君独守廷尉法，晚岁却理鄱阳柁。莫嗟天骥逐羸牛，欲试良玉须猛火。世事徐观真梦寐，人生不信长坎坷。知君决狱有阴功，他日老人酬魏颗。

次韵杨褒早春

穷巷凄凉苦未和，君家庭院得春多。不辞瘦马骑冲雪，来听佳人唱踏莎。破恨径须烦曲蘖，增年谁复怨羲娥。良辰乐事古难并，白发青衫我亦歌。细雨郊园聊种菜，冷官门户可张罗。放朝三日君恩重，睡美不知身在何。

初到杭州寄子由二绝

眼看时事力难任，贪恋君恩退未能。迟钝终须投劾去，使君何日换聋丞。圣明宽大许全身，衰病摧颓自畏人。莫上冈头苦相望，吾方祭灶请比邻。

次韵柳子玉二首

地 炉

细声蚯蚓发银瓶，拥褐横眠天未明。衰鬓镊残欹雪领，壮心降尽倒风旌。自称丹灶锱铢火，倦听山城长短更。闻道床头惟竹几，夫人应不解卿卿。俗谓竹几为竹夫人

纸 帐

乱文龟壳细相连，惯卧青绫恐未便。洁似僧巾白叠布，暖于蛮帐紫茸毡。锦衾速卷持还客，破屋那愁仰见天。但恐娇儿还恶睡，夜深踏裂不成眠。

腊日游孤山访惠勤惠思二僧

天欲雪，云满湖，楼台明灭山有无。水清出石鱼可数，林深无人鸟相呼。腊日不归对妻孥，名寻道人实自娱，道人之居在何许，宝云山前路盘纡。孤山孤绝谁肯庐，道人有道山不孤。纸窗竹屋深自暖，拥褐坐睡依圆蒲。天寒路远愁仆夫，整驾催归及未晡。出山回望云木合，但见野鹤盘浮图。兹游淡泊欢有余，到家恍如梦蓬蓬。作诗火急追亡速，清景一失后难摹。

李杞寺丞见和前篇复用元韵答之

兽在藪，鱼在湖，一入池槛归期无。误随弓旌落尘土，坐使鞭捶环呻呼。追胥连保罪及孥，近屡获盐贼，皆坐同保徒其家。百日愁叹一日娱。白云旧有终老约，朱绶岂合山人纡。人生何者非蘧庐，故山鹤怨秋猿孤。何时自驾鹿车去，扫除白发烦菖蒲。麻鞋短后随猎夫，射弋狐兔供朝晡。陶潜自作五柳传，潘阆画入三峰图。吾年凜凜今几余，知非不去惭卫蘧。岁荒无术归亡逋，鹄则易画虎难摹。

再 和

东望海，西望湖，山平水远细欲无。野人疏狂逐渔钓，刺史宽大容歌呼。君恩饱暖及尔孥，才者不闲拙者娱。穿岩度岭脚力健，未厌山水相索纡。三百六十古精庐，出游无伴篮舆孤。作诗虽未造藩阃，破闷岂不贤樗蒲。君才敏赡兼百夫，朝作千篇日未晡。搗来湖上得佳句，从此不看营丘图。知君篋牍富有余，莫惜锦绣偿营蘧。穷多斗峻谁先逋，赌取名画不用摹。

游灵隐寺得来诗复用前韵

君不见，钱塘湖，钱王壮观今已无。屋堆黄金斗量珠，运尽不劳折简呼。四方宦游散其孥，宫阙留与闲人娱。盛衰哀乐两须臾，何用多忧心郁纡。溪山处处皆可庐，最爱灵隐飞来孤。乔松百丈苍髯须，扰扰下笑柳与蒲。高堂会食罗干夫，撞钟击鼓喧朝晡。凝香方丈眠氎毼，绝胜絮被缝海图。清风时来惊睡余，遂超羲皇傲几蘧。归时栖鸦正毕逋，孤烟落日不可摹。

戏 子 由

宛丘先生长如丘，宛丘学舍小如舟。常时低头诵经史，忽然欠伸屋打头。斜风吹帷雨注面，先生不愧傍人羞。任从饱死笑方朔，肯为雨立求秦优。眼前勃磈何足道，处置六凿须天游。读书万卷不读律，致君尧舜知无术。劝农冠盖闹如云，送老盐齏甘似蜜。门前万事不挂眼，头虽长低气不屈。余杭别驾无功劳，画堂五丈容旗旆。重楼跨空雨声远，屋多人小风骚骚。平生所惭今不耻，坐对疲氓更鞭捶。道逢阳虎呼与言，心知其非口诺唯。居高忘下真何益，气节消缩今无几。文章小技安足程，先生别驾旧齐名。如今衰老俱无用，付与时人分重轻。

越州张中舍寿乐堂

青山偃蹇如高人，常对不肯入官府。高人自与山有素，不待招邀满庭户。卧龙蟠屈半东州，万室鳞鳞枕其股。背之不见与无同，狐裘反衣无乃鲁。张君眼力觑天奥，能遣荆棘化堂宇。持颐宴坐不出门，收揽奇秀得十五。才多事少厌闲寂，卧看云烟变风雨。笋如玉筋椹如簪，强饮且为山作主。不忧儿辈知此乐，但恐造物怪多取。春浓睡足午窗明，想见新茶如泼乳。

姚屯田挽词

京口年来耆旧衰，高人沦丧路人悲。空闻韦叟一经在，不见恬侯万石时。
贫病只知为善乐，逍遥却恨弃官迟。七年一别真如梦，犹记萧然瘦鹤姿。

送岑著作

懒者常似静，静岂懒者徒。拙则近于直，而直岂拙欤。夫子静且直，雍容时卷舒。嗟我复何为，相得欢有余。我本不违世，而世与我殊。拙于林间鸟，懒于冰底鱼。人皆笑其狂，子独怜其愚。直者有时信，静者不终居。而我懒拙病，不受贬药除。临行怪酒薄，已与别泪俱。后会岂无时，遂恐出处疏。惟应故山梦，随子到吾庐。

吉祥寺赏牡丹

人老簪花不自羞，花应羞上老人头，醉归扶路人应笑，十里珠帘半上钩。

吉祥寺僧求阁名

过眼荣枯电与风，久长那得似花红，上人宴坐观空阁，观色观空色即空。

和刘道原见寄

敢向清时怨不容，直嗟吾道与君东。坐谈足使淮南惧，归去方知冀北空。
独鹤不须惊夜旦，群乌未可辨雌雄。庐山自古不到处，得与幽人子细穷。

和刘道原咏史

仲尼忧世接舆狂，臧谷虽殊竟两亡。吴客漫陈豪士赋，相侯初笑越人方。
名高不朽终安用，日饮无何计亦良。独掩陈编吊兴废，窗前山雨夜浪浪。

和刘道原寄张师民

仁义大捷径，诗书一旅亭。相夸缓若若，犹诵麦青青。腐鼠何劳吓，高鸿本自冥。
颠狂不用唤，酒尽渐须醒。

送张职方吉甫赴闽漕六和寺中作

羨君超然鸾鹤姿，江湖欲下还飞去。空使吴儿怨不留，青山漫漫七闽路。
门前江水去掀天，寺后清池碧玉环。君如大江日千里，我如此水千山底。

雨中游天竺灵感观音院

蚕欲老，麦半黄，前山后山雨浪浪。农夫辍来女废筐，白衣仙人在高堂。

和蔡准郎中见邀游西湖三首

夏潦涨湖深更幽，西风落木芙蓉秋。飞雪晴天云拂地，新蒲出水柳映洲。湖上四时看不足，惟有人生飘著浮。解颜一笑岂易得，主人有酒君应留。君不见钱塘游宦客，朝椎囚，暮决狱，不因人唤何时休。

城市不识江湖幽，如与蟋蟀语春秋。试令江湖处城市，却似麋鹿游汀洲。高人无心无不可，得坎且止乘流浮。公卿故旧留不得，遇所得意终年留。君不见抛官彭泽令，琴无弦，中有酒，醉欲眠时遣客休。

田间决水鸣幽幽，插秧未遍麦已秋。相携烧笋苦竹寺，却下踏藕荷花洲。船头斫鲜细缕缕，船尾炊玉香浮浮。临风饱食得甘寝，肯使细故胸中留。君不见壮士憔悴时，饥谋食，渴谋饮，功名有时无罢休。

和子由柳湖久涸忽有水开 元寺山茶旧无花今岁盛开

太吴祠东铁墓西，一樽曾与子同携，回瞻郡阁遥飞槛，北望樯竿半隐堤。饭豆羹藜思两鹄，饮河噉水赖长霓。如今胜事无人共，花下壶卢鸟劝提。

长明灯下石栏干，长共杉松斗岁寒。叶厚有棱犀甲健，花深少态鹤头丹。久陪方丈曼陀雨，羞对先生苜蓿盘。雪里盛开知有意，明年归后更谁看。

六月二十七日望湖楼醉书

黑云翻墨未遮山，白雨跳珠乱入船。卷地风来忽吹散，望湖楼下水如天。放生鱼鳖逐人来，无主荷花到处开。水枕能令山俯仰，风船解与月裴回。乌菱白芡不论钱，乱系青菰裹绿盘。忽忆尝新会灵观，滞留江海得加餐。献花游女木兰桡，细雨斜风湿翠翘。无限芳洲生杜若，吴儿不识楚词招。未成小隐聊中隐，可得长闲胜暂闲。我本无家更安往，故乡无此好湖山。

七月一日出城舟中苦热

凉飈呼不来，流汗方被体。稀星乍明灭，暗水光弥弥。香风过莲芡，惊枕裂魴鲤。欠伸宿酒余，起坐濯清泚。火云势方壮，未受月露洗。身微欲安适，坐待东方启。

宿余杭法喜寺寺后绿野亭 望吴兴诸山怀孙莘老学士

徙倚秋原上，凄凉晚照中。水流天不尽，人远思何穷。问谍知秦过，看山识禹功。余杭，始皇所舍舟也。西北舟杭山，尧水系舟山上。稻凉初吠蛤，柳老半书虫。荷背风翻白，莲腮雨退红。追游慰迟暮，觅句效儿童。北望苕溪转，遥怜震泽通。烹鱼得尺素，好在紫髯翁。

宿临安净土寺

鸡鸣发余杭，到寺已亭午。参禅固未暇，饱食良先务。平生睡不足，急

扫清风字。闭门群动息，香篆起烟缕。觉来烹石泉，紫笋发轻乳。晚凉沐浴罢，衰发稀可数。浩歌出门去，暮色入村坞。微月半隐山，圆荷争泻露。相携石桥上，夜与故人语。明朝入山房，石镜炯当路。昔照熊虎姿，今为猿鸟顾。废兴何足吊，万世一仰俯。

自净土步至功臣寺

落日岸葛巾，晚风吹羽扇。松间野步稳，竹外飞桥转。神功凿横岭，岩石得巨片。直度千人沟，下有微流泫。冈峦蔚回合，金碧烂明绚。缅怀异姓王，负担此乡县，长逢跨下辱，屡乞桑间饭。谁谓山石顽，识此希世彦。凛然英气逼，屹起犹耸战。他年万骑归，父老恣欢宴。锦绣被原野，金珠散贫贱。窦融既入朝，吴芮空记面。荣华坐销歇，阅世如邮传。惟有长明灯，依然照深殿。

游径山

众峰来自天目山，势若骏马奔平川，中途勒破千里足，金鞭玉鞵相回旋。人言山住水亦住，下有万古蛟龙渊。道人天眼识王气，结茆宴坐荒山巅。精诚贯山石为裂，天女下试颜如莲。寒窗暖足来朴握，夜钵咒水降蜿蜒。雪眉老人朝扣门，愿为弟子长参禅。尔来废兴三百载，奔走吴会输金钱。飞楼涌殿压山破，朝钟暮鼓惊龙眠。晴空偶见浮海蜃，落日下数投村鸢。有生共处覆载内，扰扰膏火同烹煎。近来愈觉世议隘，每到宽处差安便。嗟余老矣百事废，却寻旧学心茫然。问龙乞水归洗眼，欲看细字销残年。龙井水洗病眼有效。

自径山回得吕察推诗用其韵招之宿湖上

多君贵公子，爱山如爱色。心随叶舟去，梦绕千山碧。新诗到中路，令我喜折履。古来轩冕徒，操舍两悲栗。数朝词簪笏，两脚得暂赤。归来不入府，却走湖上宅。宠辱吾久忘，宁畏官长诘。飘然便欲去，谁在子思侧。君能从我游，出郭及未黑。

宿望湖楼再和

新月如佳人，出海初弄色。娟娟到湖上，潋潋摇空碧。夜凉人未寝，山静闻响屐。骚人故多感，悲秋更慄慄。君胡不相就，朱墨纷黝赤。我行得所嗜，十日忘家宅。但恨无友生，诗病莫诃诘。君来试吟味，定作鹤头侧。改罢心愈疑，满纸蛟蛇黑。

夜泛西湖五绝

新月生魄迹未安，才破五六渐盘桓。今夜吐艳如半壁，游人得向三更看。三更向阑月渐垂，欲落未落景特奇。明朝人事谁料得，看到苍龙西没时。苍龙已没牛斗横，东方芒角升长庚。渔人收筒及未晓，船过惟有菰浦声。

湖上禁渔、皆盗钓者也。

菰蒲无边水茫茫，荷花夜开凤露香。渐见灯明出远寺，更待月黑看湖光。

湖光非鬼亦非仙，风恬浪静光满川。须臾两两入寺去，就视不见空茫然。

焦千之求惠山泉诗

兹山定空中，乳水满其腹。遇隙则发见，臭味实一族。浅深各有值，方圆随所蓄。或为云汹涌，或作线断续。或鸣空洞中，杂佩间琴筑。或流苍石缝，宛转龙鸾蹙。瓶罍走四海，真伪半相读。贵人高宴罢，醉眼乱红绿。赤泥开方印，紫饼截圆玉。倾瓿共叹赏，窃语笑僮仆。岂如泉上僧，盥洒自挹掬。故人怜我病，翦笼寄新馥。欠伸北窗下，昼睡美方熟。精品厌凡泉，愿子致一斛。

答任师中次韵来诗劝以诗酒自娱

闲里有深趣，常忧儿辈知。已成归蜀计，谁借买山资。世事久已谢，故人犹见思。平生不饮酒，对子敢论诗。

沈谏议召游湖不赴明日得双莲于北山下作 一绝持献沈既见和又别作一首因用其韵

湖上棠阴手自栽，问公更得几回来。水仙亦恐公归去，故遣双莲一夜开。诏书行捧缕金牋，乐府应歌相府莲。莫忘今年花发处，西湖西畔北山前。

和欧阳少师会老堂次韵

一时冠盖尽严终，旧德年来岂易逢。闻道堂中延盖叟，定应床下拜梁松。蠹鱼自晒闲箱篋，科斗长收古鼎钟。我欲弃官重问道，寸筵何以得春容。

和欧阳少师寄赵少师次韵

朱门有遗啄，千里来燕雀。公家冷如冰，百呼无一诺。平生亲友半迁逝，公虽不怪旁人愕。世事如今腊酒酿，交情自古春云薄。二公凛凛和非同，畴昔心亲岂貌从。白须相映松间鹤，清句更酬雪里鸿。何日杨雄一廛足，却追范蠡五湖中。

监试呈诸试官

我本山中人，寒苦盗寸廩。文词虽少作，勉强非天稟。既得旋废忘，懒惰今十稔。麻衣如再著，墨水真可饮。每闻科诏下，白汗如流沈。此邦东南会，多士敢题品。刍蕘尽兰荪，香不数葵荏。贫家见珠贝，眩晃自难审。缅怀嘉祐初，文格变已甚。千金碎全璧，百纳收寸锦，调和椒桂醢，咀嚼沙砾砢。广眉成半额，学步归蹉跎。维时老宗伯，气压群儿凜。蛟龙不世出，鱼

鲔初惊滟。至音久乃信，知味犹食楸。至今天下士，微管几左袄。谓当千载后，石室祠高朕。尔来又一变，此学初谁捻。权衡破旧法，刍豢笑凡饪。高言追卫乐，篆刻鄙曹沈。先生周孔出，弟子渊寥寝。却顾老钝躯，顽朴谢镌。诸君况才杰，容我懒且噤。聊欲废书眠，秋涛春午枕。

望海楼晚景五绝

海上涛头一线来，楼前指顾雪成堆。从今潮上君须上，更看银山二十回。

横风吹而入楼斜，壮观应须好句夸。雨过潮平江海碧，电光时掣紫金蛇。青山断处塔层层，隔岸人家唤欲应。江上秋风晚来急，为传钟鼓到西兴。楼下谁家烧夜香，王笙哀怨弄初凉。临风有客吟秋扇，拜月无人见晚妆。沙河灯火照山红，歌鼓喧喧语笑中。为问少年心在否，角中欹倒鬓如蓬。

试院煎茶

蟹眼已过鱼眼生，飍飍欲作松风鸣。蒙茸出磨细珠落，眩转绕瓯飞雪轻。银瓶泻汤夸第二，未识古人煎水意。古语云，煎水不煎茶。君不见，昔时李生好客手自煎，贵从活火发新泉。又不见，今时潞公煎茶学西蜀，定州花瓷琢红玉。我今贫病长苦饥，分无玉碗捧娥眉。且学公家作茗饮，搏炉石铫行相随。不用撑肠拄腹文字五千卷，但愿一瓯常及睡足自高时。

孙莘老求墨妙亭诗

兰亭茧纸入昭陵，世间遗迹犹龙腾。颜公变法出新意，细筋入骨如秋鹰，徐家父子亦秀绝，字外出力中藏棱。峯山传刻典刑在，千载笔法留阳冰。杜陵评书贵瘦硬，此论未公吾不凭。短长肥瘠各有态，玉环飞燕谁敢憎。吴兴太守真好古，购买断缺挥缣缃。龟趺人坐螭隐壁，空斋昼静闻登登。奇踪散出走吴越，胜事传说夸友朋。书来乞诗要自写，为把栗尾书溪藤。后来视今犹视昔，过眼百世如风灯，他年刘郎忆贺监，还道同时须伏膺。

李公择求黄鹤楼诗因

记旧所闻子冯当世者

黄鹤楼前月满川，抱关老卒饥不眠。夜闻三人笑语言，羽衣著展响空山。非鬼非人意其仙，石扉三扣声清圆。洞中铿铍落门关，缥缈入石如飞烟。鸡鸣月落风驭还，迎拜稽首愿执鞭。汝非其人骨腥膻，黄金乞得重莫肩。持归包裹弊席毡，夜穿茅屋光射天。里间来观已变迁，似石非石铅非铅。或取而有众忿喧，讼归有司今几年。无功暴得喜欲颠，神人戏汝真可怜。愿君为考然不然，此语可信冯公传。

八月十日夜看月有怀子由并崔度贤良

宛丘先生自不炮，更笑者崔穷百巧。一更相过三更归，古柏阴中看参昴。

去年举君曹蓍盘，夜倾闽酒赤如丹。今年还看去年月，露冷遥知范叔寒。典衣自种一项豆，那知积雨生科斗。归来四壁草虫鸣，不如王江长饮酒。王江陈州道人。

催试官考较戏作

八月十五夜，月色随处好，不择茆檐与市楼，况我官居似蓬岛。风味堂前野橘香，剑潭桥畔秋荷老。八月十八潮，壮观天下无。鲲鹏水击三千里，组练长驱十万夫。红旗青盖互明灭，黑沙白浪相吞屠。人生会合古难必，此景此行那两得，愿君闻此添蠹烛，门外白袍如立鹄。

八月十七复登望海楼自和前篇是日 榜出余与试官两人复留五首

楼上烟云怪不来，楼前飞纸落成堆。非关文字须重看，却被江山未放回。眼昏烛暗细行斜，考阅精强外已夸。明日失杯君莫怪，早知安足不成蛇。乱山遮晓拥千层，睡美初凉撼不应。昨夜酒行君屡叹，定知归梦到吴兴。天台桂子为谁香，倦听空阶夜点凉。赖有明朝看潮在，万人空巷斗新妆。秋花不见眼花红，身在孤舟兀兀中。细雨作寒知有意，未教金菊出蒿蓬。

第四卷

诗八十八首

秋怀二首

苦热念西风，常恐来无时。及兹遂凄凛，又作往年悲。蟋蟀鸣我床，黄叶投我帷。窗前有栖鹏，夜啸如狐狸。露冷梧叶脱，孤眠无安枝。熠熠亦求偶，高屋飞相追。定知无几见，迫此清霜期。物化逝不留，我兴为嗟咨。便当勤秉烛，为乐戒暮迟。

海风东南来，吹尽三日雨。空阶有余滴，似与幽人语。念我平生欢，寂寞守环堵。壶浆慰作劳，裹饭救寒苦。今年秋应熟，过从饱鸡黍。嗟我独何求，万里涉江浦。居贫岂无食，自不安畎亩。念此坐达晨，残灯翳复吐。

哭欧公孤山僧惠思示小诗次韵

故人已为土，衰鬓亦惊秋。犹喜孤山下，相逢说旧游。

梵天寺见僧守诠小诗清婉可爱次韵

但闻烟外钟，不见烟中寺。幽人行未已，草露湿芒履。惟应山头月，夜夜照来去。

和陈述古拒霜花

千林扫作一番黄，只有芙蓉独自芳。唤作拒霜知未称，细思却是最宜霜。

和沈立之留别二首

而今父老千行泪，一似当时初去时。不用镌碑颂遗爱，丈人情德畏人知。卧闻饶鼓送归艎，梦里匆匆共一觞。试问别来愁几许，春江万斛若为量。去时子在试院。

次韵孔文仲推官见赠

我本麋鹿性，谅非伏辕姿。君如汗血马，作驹已权奇。齐驱大道中，并带銜镳驰。闻声自决骤，那复受絃维。谓君朝发燕，秣楚日未歇。云何中道止，连赛驴骡随。金鞍冒翠锦，玉勒垂青丝，旁观信美矣，自揣良厌之。均为人所劳，何必陋盐輜。君看立仗色，不敢鸣且窥。调习困鞭捶，仅存骨与皮。人生各有志，此论我久持。他人闻定笑，聊与合子期。空斋卧积雨，病骨烦撑支。秋草上垣墙，霜叶鸣阶墀。门前自无客，敢作扬雄麾。候吏报君来，弭节江之湄。一对高人谈，稍忘俗吏卑。今朝在诗句，粲如凤来仪。上山绝梯蹬，堕海迷津涯。怜我枯槁质，借润生华滋。肯效世俗人，洗刮求瘢痍。贤明日登用，清庙歌缉熙。胡不学长卿，预作封禅词。

汤村开运盐河雨中督役

居官不任事，萧散羨长卿。胡不归去来，滞留愧渊明。盐事星火急，谁能恤农耕。薨薨晓鼓动，万指罗沟坑。天雨助官政，泫然淋衣纓。人如鸭与猪，投泥相溅惊。下马荒堤上，四顾但湖泓。线路不容足，又与牛羊争。归田虽贱辱，岂失泥中行，寄语故山友，慎毋厌藜羹。

是日宿水陆寺寄北山清顺僧二首

草没河堤雨暗村，寺藏修竹不知门。拾薪煮药怜僧病，扫地烧香净客魂。农事未休侵小雪，佛灯初上报黄昏。年来渐识幽居味，思与高人对榻论。
长嫌钟鼓聒湖山，此境萧条却自然。乞食绕村真为饱，无言对客本非禅。披棒觅路冲泥入，洗足关门听雨眠。遥想后身穷贾岛，夜寒应耸作诗肩。

客位假寐

谒人不得去，兀坐如枯株。岂惟主忘客，今我亦忘吾。同僚不解事，无色见髭苏。虽无性命忧，且复忍须臾。

盐官部役戏呈同事兼寄述古

新月照水水欲冰，夜霜穿屋衣生棱。野庐半与牛羊共，晓鼓却随鸦鹊兴。夜来履破裘穿缝，红颊曲眉应入梦。千夫在野口如林，岂不怀归畏嘲弄。我州贤将知人劳，已酿白酒买豚羔。耐寒努力归不远，两脚冻硬公须软。

朱寿昌郎中少不知母所在刺血写经求 之五十年去岁得之蜀中以诗贺之

嗟君七岁知念母，怜君壮大心愈苦。羨君临老得相逢，喜极无言泪如雨。不羨白衣作三公，不爱白日升青天。爱君五十著彩服，儿啼却得偿当年。烹龙为炙玉为酒，鹤发初生千万寿。金花诏书锦作囊，白藤肩舆帘蹙绣。感君离合我酸辛，此事今无古或闻。长陵謁来见大姊，仲孺岂意逢将军。开皇苦挑空记面，建中天子终不见。西河郡守谁复议，颖谷封人羞自荐。

将之湖州戏赠莘老

余杭自是山水窟，久闻吴兴更清绝。湖中橘林新著霜，溪上苔花正浮雪。顾渚茶牙白于齿，梅溪木瓜红胜颊。吴儿鲈缕薄欲飞，未去先说馋涎垂。亦知谢公到郡久，应怪杜牧寻春迟。鬢丝只好对禅榻，湖亭不用张水嬉。

鸦种麦行

霜林老鸦闲无用，畦东拾麦畦西种。畦西种得青猗猗，畦东已作牛毛稀，

明年麦熟芒攢槩，农夫未食鸦先啄。徐行俯仰若自矜，鼓翅跳跟上牛角，忆昔舜耕历山鸟为耘，如今老鸦种麦更辛勤。农夫罗拜鸦飞起，劝农使者来行水。

盐官绝句四首

南寺千佛阁

古邑居民半海涛，师来构筑便能高。千金用尽身无事，坐看香烟绕白毫。

北寺悟空禅师塔名齐安宣宗微时师知其非凡人

已将世界等微尘，空里浮花梦里身。岂为龙颜更分别，只应天眼识天人。

塔前古桧

当年双桧是双童，相对无言老更恭。庭雪到腰埋不死，如今化作两苍龙。

僧爽白鸡 养二十余年常立坐侧听经

断尾雄鸡本畏烹，年来听法伴修行。还须却置莲花漏，老怯风霜恐不鸣。

送张轩民寺丞赴省试

龙飞甲子尽豪英，常喜吾犹及老成。人竞春兰笑秋菊，天教明月伴长庚。传家各自闻诗礼，与子相逢亦弟兄。洗眼上林看跃马，贺诗先到古宣城。伯父与太平州张特读同年，此其子。

六和寺冲师阗山溪为水轩

欲放清溪自在流，忍教冰雪落沙洲。出山定被江潮惋，能为山僧更少留。

和致仕张郎中春书

投级归来万事轻，消磨未尽祇风情。旧因药菜求长假，新为杨枝作短行。不祷自安缘寿骨，苦藏难没是诗名。浅斟杯酒红生颊，细琢歌词稳称声。蜗壳卜居心自放，蝇头写字眼能明。盛衰阅过君应笑，宠辱年来我亦平。跪履数从圯下老，逸书闲问济南生。东风屈指无多日，祇恐先春鶗鴂鸣。

冬至日独游吉祥寺

井底微阳回未回，萧萧寒雨湿枯荻。何人更似苏夫子，不是花时肯独来。

后十余日复至

东君意浅著寒梅，千朵深红未暇裁。安得道人殷七七，不论时节遣花开。

戏 赠

惆怅沙河十里春，一番花老一番新。小楼依旧斜阳里，不见楼中垂手人。

和人求笔迹

麦光铺几净无瑕，入夜青灯照眼花。从此剡藤真可吊，半纤春蚓缩秋蛇。

再用前韵寄莘老

君不见夷甫开三窟，不如长康号痴绝。痴人自得终天年，智士死智罪莫雪。困穷谁要卿料理，举头看山笏拄颊。野鳧翅重自不飞，黄鹤何事两翼垂。泥中相从岂得久，今我不住行恐迟。江夏无双应未去，恨无文字相娱嬉。黄庭坚莘老婿能文。

画鱼歌 湖州道中作

天寒水落鱼在泥，短钩画水如耕犁。渚浦披折藻荇乱，此意岂复遗鳅鲵。偶然信手皆虚击，本不词劳几万一。一鱼中刃百鱼惊，虾蟹奔忙误跳掷。渔人养鱼如养雏，插竿冠笠惊鸕鶒。岂知白挺闹如雨，搅水觅鱼嗟已疏。

吴中田妇叹和贾收韵

今年粳稻熟苦迟，庶见霜风来几时。霜风来时雨如泻，把头出茵镰生衣。眼枯泪尽雨不尽，忍见黄穗卧青泥。萌苦一月垆上宿，天晴获稻随车归。汗流肩頰载入市，价贱乞与如糠粃。卖牛纳税拆屋炊，虑浅不及明年饥。官今要钱不要米，西北万里招羌儿。龚黄满朝人更苦，不如却作河伯妇。

和邵同年戏赠贾收秀才三首

倾盖相欢一笑中，从来未省马牛风。卜邻尚可容三径，投社终当作两翁。古意已将兰缉佩，招词闲咏桂生丛。此身自断天休问，白发年来渐不公。

朝见新黄出旧搓，骚人孤愤苦思家。五噫处士太穷约，三赋先生多诞夸。帐外鹤鸣衮有镜，个中钱尽按无鲑。玉川何日朝金阙，白昼关门守夜义。时贾欲再娶。

生涯到处似樵乌，科第无心摘颌须。黄帽刺船忘岁月，白衣担酒慰鰥孤。狙公欺病来分栗，水伯知馋为出鲈。莫向洞庭歌楚曲，烟波渺渺正愁予。

游道场山何山

道场山顶何山麓，上彻云峰下幽谷。我从山水窟中来，尚爱此山看不足。

陂湖行尽白漫漫，青山忽作龙蛇盘。山高无风松自响，误认石齿号惊湍。山僧不放山泉出，屋底清池照瑶席。阶前合抱香入云，月里仙人亲手植，出山回望翠云鬟，碧瓦朱栏缥缈间。白水田头问行路，小溪深处是何山。高人读书夜达旦，至今山鹤鸣夜半。我今废学不归山，山中对酒空三叹。

赠莘老七绝

嗟余与子久离群，耳冷心灰百不闻。若对青山谈世事，当须举白便浮君。天目山前禄浸裾，碧澜堂下看衔舻。作堤捍水非吾事，闲送苕溪入太湖。

夜来雨洗碧嶙峋，浪涌云屯绕郭寒。间有弁山何处是，为君四面意求看。夜桥灯火照溪明，欲放扁舟取次行。暂借官奴遣吹笛，明朝新月到三更。三年京国厌藜蒿，长羨淮鱼压楚糟。今日骆驼桥下泊，恣看修网出银刀。乌程霜稻袭人香，酿作春风雪水光。时复中之徐邈圣，毋多酌我次公狂。去年腊日访孤山，曾借僧窗半日闲。不为思归对妻子，道人有约径须还。

莘老葺天庆观小国有亭北 向道士山宗说乞名与诗

春风欲动北风微，归雁亭边送雁归。蜀客南游家最远，吴山寒尽雪先晞。扁舟去后花絮乱，五马来时宾从非。惟有道人应不忘，抱琴无语立斜晖。

至秀州赠钱端公安道兼寄其弟惠山山人

鸳鸯湖边月如水，孤舟夜榜鸳鸯起。平明系缆石桥亭，惭愧冒寒髯御史。结交最晚情独厚，论心无数今有几。寂寞抱关叹萧生，耆老执戟哀杨子。怪君颜采却秀发，无乃迂滴反便美。天公欲困无奈何，世人共抑真疏矣。毗陵高山锡为骨，陆子遗味泉冰齿。贤哉仲氏早拂衣，占断此山长洗耳。山头望湖光泼眼，山下濯足波生指。傥容逸少间金堂，记与嵇康留石髓。

秀州报本禅院乡僧文长老方丈

万里家山一梦中，吴音渐已变儿童。每逢蜀叟谈终日，便觉峨眉翠扫空。师已忘言真有道，我除搜句百无功。明年采药天台去，更欲题诗满浙东。

王复秀才所居双桧二首

吴王他馆遍重城，闲草幽花不记名。青盖一归无觅处，祇留双桧待升平。凜然相对敢相欺，直干凌空未要奇。根到九泉无曲处，世间惟有蛰龙知。

宋叔达家听琵琶

数弦已品龙香拨，半面犹遮凤尾槽。新曲从翻玉连锁，旧声终爱郁轮袍。梦回只记归舟字，赋罢双垂紫锦绦。何异乌孙送公主，碧天无际雁行高。

元日次韵张先子野见和七夕寄莘老之作

得句牛女夕，转头参尾中。青春先入睡，白发不遗穷。酒社我为敌，诗坛子有功。缩头先夏鼈，见玉川子实腹鄙秋虫。莫唱裙垂绿，无人脸断红。旧交怀贺老，新进谢终童。袍鹞双双瑞，腰犀一一通。小蛮知在否，试问囁嚅翁。

正月九日有美堂饮醉归径睡五鼓 方醒不复能眠起阅文书得鲜于子 骏所寄杂兴作古意一首答之

众人事纷扰，志士独悄悄。何异琵琶弦，常遭腰鼓闹。三杯忘万虑，醒后还皎皎。有如辘护索，已脱重萦绕。家人自约敕，始慕陈妇孝。可怜原臣先，放荡今谁吊。平生嗜羊炙，识味肯轻饱。烹蛇啖蛙蛤，颇讶能稍稍。忧来自不寐，起视天汉渺。阑干玉绳低，耿耿太白晓。

次韵答章傅见赠

并生天地宇，同阅古今宙。视下则有高，无前孰无后。达人千钧弩，一弛难再彀。下士沐猴冠，已系犹跳骤。欲将驹过隙，坐待石穿溜。君看汉唐主，宫殿悲麦秀。而况彼区区，何异一醉富。爱居非所养，俯仰眩金奏。髑髅有余乐，不博南面后，嗟我昔少年，守道贫非疚。自从出求仕，役物恐见囿。马融既依梁，班固亦事窦。效顰岂不欲，顽质谢镌镂。仄闻长者言，悻直非养寿。唾面慎勿拭，出胯当俯就。居然成懒废，敢复齿豪右。子如照海珠，罔目疏见漏。宏材乏近用，巧舞困短袖。坐令倾国容，临老见邂逅。吾衰信久矣，书绝十年旧，门前可罗雀，感子烦屡扣。愿言歌缁衣，子粲予还授。

法惠寺横翠阁

朝见吴山横，暮见吴山从。吴山故多态，转则为君容。幽人起朱阁，空洞更无物。惟有千步冈，东西作帘额。春来故国归无期，人言悲秋春更悲。已泛平湖思濯锦，更看横翠忆峨眉。雕栏能得几时好，不独凭栏人易老。百年兴废更堪哀，悬知草莽化池台。游人寻我旧游处，但觅吴山横处来。

祥符寺九曲观灯

纱笼擎烛逢门入，银叶烧香见客邀。金鼎转丹光吐夜，宝珠穿蚁闹连朝。波翻焰里元相激，鱼舞汤中不畏焦。明日酒醒空想像，清吟半逐梦魂销。

上元过祥符僧可久房萧然无灯火

门前歌鼓斗分朋，一室清风冷欲冰。不把琉璃闲照佛，始知无尽本无灯。

正月二十一日病后述古邀往城外寻春

屋上山禽苦唤人，槛前冰沼忽生鳞。老来厌逐红裙醉，病起空惊白发新。
卧听使君鸣鼓角，试呼稚子整冠巾。曲栏幽榭终寒窹，一看郊原浩荡春。

有以官法酒见饷者因用前韵求述古为移厨饮湖上

喜逢门外白衣人，欲脍湖中赤玉鳞。游舫已收吴榜稳，舞衫初试越罗新。
欲将鱼钓追黄帽，未要靴刀抹绛巾。芳意十分强半在，为君先踏水边春。

饮湖上初晴后雨二首

朝曦迎客艳重冈，晚雨留人入醉乡。此意自佳君不会，一杯当属水仙王。
湖上有水仙王庙。

水光潋滟晴方好，山色空濛雨亦奇。欲把西湖比西子，淡妆浓抹总相宜。

往富阳新城李节推先行三日留风水洞见待

春山礧礧鸣春禽，此间不可无我吟。路长漫漫傍江浦，此间不可无君语。
金鲫池边不见君，追君直过定山村。路人皆言君未远，骑马少年清且婉。
风岩水穴旧闻名，只隔山溪夜不行。溪桥晓溜浮梅萼，知君系马岩花落。
出城三日尚透迟，妻孥怪马归何时。世上小儿夸疾走，如君相待今安有。

风水洞二首和李节推

风转鸣空穴，泉幽泻石门。虚心闻地籁，妄意觅桃源。过客诗难好，居僧语不繁。
归瓶得冰雪，清冷慰文园。

山前雨水隔尘凡，山上仙风舞桧杉。细细龙鳞生乱石，团团羊角转空岩。
冯夷窟宅非梁栋，御寇车舆谢辔衔。世事渐艰吾欲去，永随二子脱讥讪。

独游富阳普照寺

富春真古邑，此寺亦唐余。鹤老休乔木，龙归护赐书。连筒春水远，出谷晚钟疏。
欲继江潮韵，何人为起予。

自普照游二庵

长松吟风晚雨细，东庵半掩西庵闭。山行尽日不逢人，淅淅野梅香入袂。
居僧笑我恋清景，自厌山深出无计。我虽爱山亦自笑，独往神伤后难继。
不如西湖饮美酒，红杏碧桃香覆髻。作诗寄谢采薇翁，本不避人那避世。

富阳妙庭观董双成故宅发地得

丹鼎覆以铜盘承以琉璃盆盆既
破碎丹亦为人争夺持去今独盘
鼎在耳二首

人去山空鹤不归，丹亡鼎在世徒悲。可怜九转功成后，却把飞升乞内芝。
琉璃击碎走金丹，无复神光发旧坛。时有世人来舐鼎，欲随鸡犬事刘安。

新城道中二首

东风知我欲山行，吹断檐间积雨声。岭上晴云披絮帽，树头初日挂铜钲，
野桃含笑竹篱短，溪柳自摇沙水清。西崦人家应最乐，煮芹烧笋饱春耕。
身世悠悠我此行，溪边委辔听溪声。散材畏见搜林斧，疲马思闻卷旆钲。
细雨足时茶户喜，乱山深处长官清。人间岐路知多少，试向桑田问耦耕。

山村五绝

竹篱茆屋趁溪斜，春入山村处处花。无象太平还有象，孤烟起处是人家。
烟雨濛濛鸡犬声，有生何处不安生。但教黄犊无人佩，布谷何劳也劝耕。
老翁七十自腰镰，惭愧春山笋蕨甜。岂是闻韶解忘味，尔来三月食无盐。
杖藜裹饭去匆匆，过眼青钱转手空。赢得儿童语音好，一年强半在城中。
窃禄忘归我自羞，丰年底事汝忧愁。不须更待飞鸢堕，方念平生马少游。

湖上夜归

我饮不尽器，半酣味尤长。篮舆湖上归，春风吹面凉。行到孤山西，夜色已苍苍。
清吟杂梦寐，得句旋已忘。尚记梨花村，依依闻暗香。入城定何时，宾客半在亡。
睡眠忽惊矍，繁灯闹河塘。市人拍手笑，状如失林獐。始悟山野姿，异趣难自强。
人生安为乐，吾策殊未良。

寒食未明至湖上太守未来两县令先在

城头月落尚啼乌，乌榜红舷早满湖。鼓吹未容迎五马，水云先已扬双鳧。
映山黄帽螭头舫，夹道青烟鹊尾炉。老病逢春只思睡，独求僧榻寄须臾。

次韵孙莘老见赠时莘老移庐州因以别之

炉锤一手赋形殊，造物无心敢望渠。我本疏顽固当尔，子犹沦落况其余。
龚黄侧畔难言政，罗赵前头且眩书。莘老见称政事与书，而莘老书至不上。
惟有阳关一杯酒，殷勤重唱赠离居。

赠 别

青鸟衔巾久欲飞，黄莺别主更悲啼。殷勤莫忘分携处，湖水东边凤岭西。

次韵代留别

绛蜡烧残玉笋飞，离歌唱彻万行啼。他年一舸鸱夷去，应记侬家旧姓西。

月兔茶

环非环，玦非玦，中有迷离玉兔儿，一似佳人裙上月。月圆还缺缺还圆，此月一缺圆何年。君不见斗茶公子不忍斗小团，上有双衔绶带双飞鸾。

薄命佳人

双颊凝酥发抹漆，眼光入帘珠的皪。故将白练作仙衣，不许红膏污天质。吴音娇软带儿痴，无限闲愁总未知。自古佳人多命薄，闭门春尽杨花落。

吉祥花将落而述古不至

今岁东风巧剪裁，含情只待使君来。对花无信花应恨，直恐明年便不开。

述古闻之明日即来坐上复用前韵同赋

仙衣不用剪刀裁，国色初酣卯酒来。太守问花花有语，为君零落为君开。

李铃辖坐上分题戴花

二八佳人细马驼，十千美酒渭城歌。帘前柳絮惊春晚，头上花枝奈老何。露湿醉巾香掩冉，月明归路影婆娑。绿珠吹笛何时见，欲把斜红插皂罗。

于潜令刁同年野翁亭

山翁不出山，溪翁长在溪。前二令作二翁亭。不如野翁来往溪山间，上友麋鹿下凫鹭。问翁何所乐，三年不去烦推挤。翁言此间亦有乐，非丝非竹非娥眉。山人醉后铁冠落，溪女笑时银栉低。我来观政问风谣，皆云吠犬足生髻。但恐此翁一旦舍此去，长使山人索寞溪女啼。天目山唐道士常冠铁冠，于潜妇女皆插大银栉，长尺许。谓之蓬沓。

于潜女

青裙缟袂于潜女，两足如霜不穿屨。觴沙鬢发丝穿屨，蓬沓鄣前走风雨。老嫠官妆传父祖，至今遗民悲故主。苕溪杨柳初飞絮，照溪画眉渡溪去。逢郎樵归相媚妩，不信姬姜有齐鲁。

自昌化双溪馆下步 寻溪源至治平寺二首

乱山滴翠衣裘重，双涧响空窗户摇。饱食不嫌溪笋瘦，穿林闲觅野芎苢。
却愁县令知游寺，尚喜渔人争渡桥。正似醴泉山下路，桑枝刺眼麦齐腰。

每见田园辄自招，倦飞不拟控扶摇。共疑杨恽非锄豆，谁信刘章解立苗。
老去尚贪彭泽米，梦归时到锦江桥。宦游莫作无家客，举族长悬似细腰。

于潜僧绿筠轩

可使食无肉，不可居无竹。无肉令人瘦，无竹令人俗。人瘦尚可肥，俗
士不可医。旁人笑此言，似高还似痴。若对此君仍大嚼，世间那有扬州鹤。

与临安令宗人同年剧饮

我虽不解饮，把盏欢意足。试呼白发感秋人，令唱黄鸡催晓曲。与君登
科如隔晨，弊袍霜叶空残绿。如今莫问老与少，儿子森森如立竹。黄鸡催晓
不须愁，老尽世人非我独。

宝山昼睡

七尺顽躯走世尘，十围便腹贮天真。此中空洞浑无物，何止容君数百人。

第五卷

诗一百三首

僧清顺新作垂云亭

江山虽有余，亭榭著难稳。登临不得要，万象各偃蹇。惜哉垂云轩，此地得何晚。天功争向背，诗眼巧增损。路穷朱栏出，山破石壁很。海门浸坤轴，湖尾抱云巘。葱葱城郭丽，淡淡烟村远。纷纷乌鹊去，一一渔樵返。雄观快新获，微景收昔遁。道人真古人，啸咏慕嵇阮。空斋卧蒲褐，芒屨每自捆。天怜诗人穷，乞与供诗本。我诗久不作，荒涩旋锄垦。从君觅佳句，咀嚼废朝饭。

五月十日与吕仲甫周邠僧惠勤惠思清 顺可久惟肃义途同泛湖游北山

三吴雨连月，湖水日夜添。寻僧去无路，潏潏水拍檐。驾言徂北山，得与幽人兼。清风洗昏翳，晚景分浓纤。缥缈朱楼人，斜阳半疏帘。临风一挥手，怅焉起遐瞻。世人鹜朝市，独向溪山廉。此乐得有命，轻传神所歼。

会客有美堂周邠长官与数僧同泛 湖往北山湖中闻堂上歌笑声以诗 见寄因和二首时周有服

蔼蔼君诗似岭云，从来不许醉红裙。不知野屐穿山翠，惟见轻挠破浪纹。颇忆呼庐袁彦道，难邀骂坐灌将军。皆取其有服也。晚风落日元无主，不惜清凉与子分。

载酒无人过子云，掩关昼卧客书裙。歌喉不共听珠贯，醉面何因作缬纹。僧侣且陪香火社，诗坛欲敛鹤鹅军。凭君遍绕湖边寺，涨绿晴来已十分。

席上代人赠别

凄音怨乱不成歌，纵使重来奈老何。泪眼无穷似梅雨，一番匀了一番多。天上麒麟岂混尘，笼中弱翠不由身。那知昨夜香闺里，更有偷啼暗别人。莲子擘开须见忆，楸枰著尽更无期。破衫却有重逢处，一饭何曾忘却时。

唐道人言天目山上俯视雷雨每大雷电 但闻云中如婴儿声殊不闻雷震也

已外浮名更外身，区区雷电若为神。山头只作婴儿看，无限人间失箸人。

追和子由去岁试举人洛下所 寄诗五首暴雨初晴楼上晚景

秋后风光雨后山，满城流水碧潺潺。烟云好处无多子，及取昏鸦未到间。
洛邑从来天地中，嵩高苍翠北邙红。风流耆旧消磨尽，只有青山对病翁。
谓富公也。

白汗翻浆午景前，雨余风物便萧然。应倾半熟鹅黄酒，照见新晴水碧天。
疾雷破屋雨翻河，一扫清风未觉多。应似画师吴道子，高堂巨壁写降魔。
客路三年不见山，上楼相对梦魂间，明朝却踏红尘去，羞向清伊照病颜。

过广爱寺见三学演师观杨惠之 塑宝山朱瑶画文殊普贤三首

寓世身如梦，安闲日似年。败蒲翻覆卧，破械再三连。劝客眠风竹，长
斋饮石泉。回头万事错，自笑觉师贤。妙迹苦难寻，兹山见几层。乱峰螺髻
出，绝涧阵云崩。措意元同画，观空欲问憎。莫教林下意，终老叹何曾。朱
瑶唐晚辈，得法尚雄深。满寺空遗迹，何人识苦心。长廊欹雨脚，破壁撼钟
音。成坏无穷事，他年复吊今。

韩子华石淙庄

绛侯百万兵，尚畏书牍背。功名意不已，数与危机会。我公抱绝识，凛
凛镇横溃。欲收伊吕迹，远与巢由对。誓言虽未从，久已断诸内。区区为怀
祖，颇觉羲之隘。此身随造物，一叶舞澎湃。田园不早定，归宿终安在。彼
美石淙庄，每到百事废。泉流知人意，屈折作涛濑。寒光洗肝鬲，清响跨竽
籁。我旧门前客，放言不自外。园中亦何有，苍蔚可胜计。请公试回首，岁
晚余苍桧。

立秋日祷雨宿灵隐寺同周徐二令

百重堆案掣身闲，一叶秋声对榻眠。床下雪霜侵户月，枕中琴筑落阶泉。
崎岖世味尝应遍，寂寞山栖老渐便。惟有问农心尚在，起占云汉更茫然。

病中独游净慈谒本长老周长官以 诗见寄仍邀游灵隐因次韵答之

卧闻禅老人南山，净扫清风五百间。我与世疏宜独往，君缘诗好不容攀。
自知乐事年年减，难得高人日日闲。欲问云公觅心地，要知何处是无还。楞
严经云：我今示汝无所还地。

病中游祖塔院

紫李黄瓜村路香，乌纱白葛道衣凉。闭门野寺松阴转，欹枕风轩客梦长。
因病得闲殊不恶，安心是药更无方。道人不惜阶前水，借与匏樽自在尝。

虎跑泉

亭亭石塔东峰上，此老初来百神仰。虎移泉眼趁行脚，龙作浪花供抚掌。至今游人濯濯罢，卧听空阶环珮响。故知此老如此泉，莫作人间去来想。

佛日山荣长老方丈五绝

陶令恩归久未成，远公不出但闻名。山中只有苍髯叟，数里萧萧管送迎。千株三架搀云立，一穗珠旒落镜寒。何处霜眉碧眼客，结为三友令相看。东麓云根露角牙，细泉幽咽走金沙。不堪土肉埋山骨，未放苍龙浴渥洼。食罢茶瓯未要深，清风一榻抵千金。腹摇鼻息庭花落，还尽平生未足心。日射回廊午枕明，水沈销尽碧烟横。山人睡觉无人见，只有飞蚊绕鬓鸣。

癸丑春分后雪

雪入春分省见稀，半开桃杏不胜威。应惭落地梅花识，却作漫天柳絮飞。不分东君专节物，故将新巧发阴机。从今造物尤难料，更暖须留御腊衣。

孤山二咏 并引

孤山有陈时柏二株，其一为人所薪。山下老人自为儿时，已见其枯矣。然坚悍如金石愈于未枯者，僧志诠作堂于其侧，名之曰柏堂。堂与白公居易竹阁相连，属余作二诗以记之。

柏 堂

道人手种几生前，鹤骨龙姿尚宛然。双干一先神物化，九朝三见太平年。忽惊华构依岩出，乞与佳名到处传。此柏未枯君记取，灰心聊伴小乘禅。

竹 阁

海山兜率两茫然，古寺无人竹满轩。白鹤不留归后语，苍龙犹是种时孙。两丛却似萧郎笔，十亩空怀渭上村。欲把新诗问遗像，病维摩诘更无言。

与述古自有美堂乘月夜归

娟娟云月稍侵轩，做做星河半隐山。鱼钥未收清夜永，凤箫犹在翠微间。凄风瑟缩经弦柱，香雾凄迷着髻鬟。共喜使君能鼓乐，万人争看火城还。

有美堂暴雨

游人脚底一声雷，满坐顽云拨不开。天外黑风吹海立，浙东飞雨过江来。十分潏潏金樽凸，千杖敲铿羯鼓催。唤起谪仙泉洒面，倒倾蚊室泻琼瑰。

八月十五日看潮五绝

定知玉兔十分圆，已作霜风九月寒。寄语重门休上钥，夜潮留向月中看。
万人鼓噪慑吴侬，犹似浮江老阿童。欲识潮头高几许，越山浑在浪花中。
江边身世两悠悠，久与沧波共白头。造物亦知人易老，故教江水更西流。
吴儿生长狎涛渊，冒利轻生不自怜。东海若知明主意，应教斥卤变桑田。
是时新有旨禁弄潮。

江神河伯两醯鸡，海若东来气吐霓。安得夫差水犀手，三千强弩射潮低。
吴越王尝以弓弯射潮头与海神战，自尔水不近城。

东阳水乐亭 为东阳令王都官概作

君不学白公引泾东注渭，五斗黄泥一钟水。又不学哥舒横行西海头，归来羯鼓打凉州。但向空山石壁下，爱此有声无用之清流。流泉无弦石无穷，强名水乐人人笑。惯见山僧已厌听，多情海月空留照。洞庭不复来轩辕，至今鱼龙舞钧天。闻道磬囊东入海，遗声恐在海山间。锵然涧谷含宫徵，节奏未成君独喜。不须写入薰风弦，纵有此声无此耳。

与周长官李秀才游径山二 君先以诗见寄次其韵二首

少年饮红裙，酒尽推不去。呼来径山下，试与洗尘雾。痴马惜鄣泥，临流不肯渡。独有汝南君，从我无朝暮。肯将红尘脚，暂着白云屦。嗟我与世人，何异笑百步。功名一破甑，弃置何用顾。更凭陶靖节，往问征夫路。

龙亦恋故居，百年尚来去。至今雨雪夜，殿暗风缠雾。而我弃乡国，大江忘北渡。便欲北山前，筑室安迟暮。又恐大幽独，岁晚霜入屦。同游得李生，仄足随蹇步。孔明不自爱，临老起三顾。吾归便却扫，谁踏门前路。

临安三绝

将 军 树

阿坚泽畔菰蒲节，玄德墙头羽葆桑。不会世间闲草木，与人何事管兴亡。

锦 溪

楚人休笑沐猴冠，越俗徒夸翁子贤。五百年间异人出，尽将锦绣裹山川。

石 镜

山鸡舞破半岩云，蔓叶开残野水春。应笑武都山下土，枉教明月徇佳人。

登玲珑山

何年僵立两苍龙，瘦脊盘盘尚倚空。翠浪舞翻红罢亚，白云穿破碧玲珑。

三休亭上工延月，九折岩前巧贮风。脚力尽时山更好，莫将有限趁无穷。

宿九仙山 九仙谓左元敏许迈王谢之流

风流王谢古仙真，一去空山五百春。玉室金堂余汉士，桃花流水失秦人。困眠一榻香凝帐，梦绕千岩冷逼身。夜半老僧呼客起，云峰缺处涌冰轮。

陌上花三首并引

游九仙山，闻里中儿歌陌上花。父老云：吴越王妃，每岁必归临安。王以书遗妃曰：陌上花开，可缓缓归矣。吴人用其语为歌，含思宛转，听之凄然，而其词鄙野为易之云。

陌上花开蝴蝶飞，江山犹是昔人非。遗民几度垂垂老，游女长歌缓缓归。陌上山花无数开，路人争看翠辇来。若为留得堂堂去，且更从教缓缓回。生前富贵草头露，身后风流陌上花。已作迟迟君去鲁，犹歌缓缓妾回家。

游东西岩 即谢安东山也

谢公含雅量，世运属艰难。况复情所钟，感概萃中年。正赖丝与竹，陶写有余欢。常恐儿辈觉，坐令高趣阑。独携缥缈人，来上东西山。放怀事物外，徙倚弄云泉。一旦功业成，管蔡复流言。慷慨桓野王，哀歌和清弹。挽须起流涕，始知使君贤。意长日月促，卧病已辛酸。恸哭西州门，往驾那复还。空余行乐处，古木昏苍烟。

宿海会寺

篮舆三日山中行，山中信美少旷平。下投黄泉上青冥，线路每与猿猱争。重楼束缚遭涧坑，两股酸哀饥肠鸣。北度飞桥踏彭铿，缭垣百步如古城。大钟横撞千指迎，高堂延客夜不扃。杉槽漆斛江河倾，本来无垢洗更轻。倒床鼻息四邻惊，絃如五鼓天未明。木鱼呼粥亮且清，不闻人声闻履声。

海会寺清心堂

南郭子綦初丧我，西来达摩尚求心。此堂不说有清浊，游客自观随浅深。两岁频为山水役，一溪长照雪霜侵。纷纷无补竟何事，惭愧高人闭户吟。

径山道中次韵答周长官兼赠苏寺丞

年来战纷华，渐觉夫子胜。欲求五亩宅，洒扫乐清净。学道恨日浅，问禅惭听莹。聊为山水行，遂此麋鹿性。独游吾未果，觅伴谁复听。吾宗古遗直，穷达付前定。餽糟醉方熟，洒面呼不醒。奈何效燕蝠，屡欲争晨暝。不如从我游。高论发犀柄。溪南渡横木，山寺称小径。太平寺俗号小径山，幽寻自兹始，归路微月映。南望功臣山，云外盘飞磴。三更渡锦水，再宿留石镜。缅怀周与李，能作洛生咏。明朝三子至，诗律严号令。篮舆置纸笔，得

句轻千乘。玲珑苦奇秀，名实巧相称。九仙更幽绝，笑语千山应。空岩侧破瓮，飞溜洒浮磬。山前见虎迹，候吏饶鼓竞。我生本艰奇，尘土满釜甑。山禽与野兽，知我久蹭蹬。笑谓候吏还，御虎吾有命。径山虽云远，行李稍可并。颇讶王子猷，忽起山阴兴。但报菊花开，吾当理归榜。

汪覃秀才久留山中以诗见寄次其韵

季子应嗔不下机，弃家来伴碧云师。中秋冷坐无因醉，半月长斋未肯辞。擲筒摇毫无忤色，汪善书托写众人诗。投名入社有新诗。飞腾桂籍他年事，莫忘山中采药时。

再游径山

老人登山汗如濯，到山困卧呼不觉。觉来五鼓日三竿，始信孤云天一握。古语云：孤云两角去天一握。平生未省出艰险，两足惯曾行荦确。含晖亭上望东溟，凌霄峰头挹南岳。共爱丝杉翠丝乱，谁见玉芝红玉琢。白云何事自来往，明月长圆无晦朔。山有白云峰明月庵，冢上鸡鸣犹忆钦，山前凤舞远徵璞。雪窗驯兔元不死，烟岭孤猿苦难捉。从来白足傲死生，不怕黄巾把刀槊。榻上双痕凛然在，剑头一映何须角。以上皆山中故事。嗟我昏顽晚闻道，与世龃龉空多学。灵水先除眼界花，清诗为洗心源浊。骚人未要逃竞病，禅者但喜闻剥啄。此生更得几回来，从今有暇无辞数。

洞霄宫

上帝高居愍世顽，故留琼馆在凡间。青山九锁不易到，作者七人相对闲。论语云，作者七人矣。今盐官凡七人。庭下流泉翠蛟舞，洞中飞鼠白鸦翻。长松怪石宜霜鬓，不用金丹苦驻颜。

初自径山归述古召饮介亭以病先起

西风初作十分凉，喜见新橙透甲香。迟暮赏心惊节物，登临病眼怯秋光。惯眠处士云庵里，倦醉佳人锦瑟旁。犹有梦回清兴在，卧闻归路乐声长。

明日重九亦以病不赴述古会再用前韵

月入秋帷病枕凉，霜飞夜簟故衾香。可怜吹帽狂司马，空对亲春老孟光。不作雍容倾坐上，翻成肮脏倚门旁。人间此会论今古，细看茱萸感叹长。

九日寻臻闍梨遂泛小舟至勤师院二首

白发长嫌岁月侵，病眸兼怕酒杯深。南屏老宿闲相过，东阁郎君懒重寻。试碾露芽烹白雪，休拈霜药嚼黄金。扁舟又截平湖去，欲访孤山支道林。

湖上青山翠作堆，葱葱郁郁气佳哉。笙歌丛里抽身出，云水光中洗眼来。白足赤髭迎我笑，拒霜黄菊为谁开。明年桑苎煎茶处，忆著衰翁首重回。皎

然有九日与陆羽煎茶诗羽自号桑苎翁，余来年九日去此久矣。

九日舟中望见有美堂上鲁少卿饮处以诗戏之

指点云间数点红，笙歌正拥紫髯翁。谁知爱酒龙山客，却在渔舟一叶中。
西阁珠帘卷落晖，水沉烟断佩声微。遥知通德凄凉甚，拥髻无言怨未归。

游诸佛舍一日饮醪茶七盏戏书勤师壁

示病维摩元不病，在家灵运已忘家。何烦魏帝一丸药，且尽卢仝七碗茶。

九日湖上寻周李二君不见君亦见寻 于湖上以诗见寄明日乃次其韵

湖上野芙蓉，含思愁脉脉。娟然如静女，不肯傍阡陌。诗人杳未来，霜
艳冷难宅。君行逐鸥鹭，出处浩莫侧。苇间闻拿音，云表已飞展。使我终日
寻，逢花不忍摘。人生如朝露，要作百年客。喟彼终岁劳，幸兹一日泽。愿
言竟不遂，人事多乖隔。悟此知有命，沉忧伤魂魄。

送杭州杜戚陈三橡罢官归乡

秋风撼撼鸣枯蓼，船阁荒村夜悄悄。正当逐客断肠时，君独歌呼醉连晓。
老夫平生齐得丧，尚恋微官失轻矫。君今憔悴归无食，五斗未可秋毫小。君
言失意能几时，月啖虾蟆行复皎。杀人无验中不快，此恨终身恐难了。徇时
所得无几何，随手已遭忧患绕。期君正似种宿麦，忍饥待食明年。

次韵周长官寿星院同钱鲁少卿

琉璃百顷水仙家，风静湖平响钓车。寂历疏松欹晚照，伶俜寒蝶抱秋花。
囿眠不觉依蒲褐，归路相将踏桂华。更著纶巾披鹤氅，他年应作画图夸。

次韵述古过周长官夜饮

二更饶鼓动诸邻，百首新诗间八珍。已遣乱蛙成两部，更邀明月作三人。
云烟湖寺家家境，灯火沙河夜夜春。易不劝公勤秉烛，老来光景似奔轮。

述古以诗见贵屡不赴会复次前韵

我生孤癖本无邻，老病年来益自珍。肯对红裙词白酒，但愁新进笑陈人。
北山怨鹤休惊夜，南亩中车欲及春。多谢清诗屡推轂，豨膏那解转方轮。宋
诗有云霄蒲轮之句。

金门寺中见李留台与二钱惟演易 唱和四绝句戏用其韵跋之

帝城春日帽檐斜，二陆初来尚忆家。未肯将盐下莼菜，已应知雪似杨花。
生平贺老惯乘舟，骑马风前怕打头。欲问君王乞符竹，但忧无蟹有监州。
皆世所传钱氏故事。

西台妙迹继杨风，拟式无限龙蛇洛寺中。一纸清诗吊兴废，尘埃零落梵王宫。

五季文章堕劫灰，升平格力未全回。故知前辈宗徐庾，数首风流似玉台。

胡穆秀才遗古铜器似鼎而小上有两柱可以覆而不蹶以为鼎则不足疑其饮器也胡有诗答之

只耳兽啮环，长蜃鹅孽喙。三趾下锐春蒲短，两柱向张秋菌细。君看翻覆俯仰间，覆成三角翻两髻。古书虽满腹，苟有用我亦随世。嗟君一见呼作鼎，才注升合已漂逝。不如学鸱夷，尽日盛酒真良计。有古篆五字不可识。

贺陈述古弟章生子

郁葱佳气夜充间，始见徐卿第二雏。甚欲去为汤饼客，惟愁错写弄璋书。
参军新妇贤相敌，阿大中郎喜有余。我亦从来识英物，试教啼看定何如。

赠治易僧智周

寒窗孤坐冻生瓶，尚把遗编照露萤。阁束九师新得妙，梦吞三画旧通灵。
断弦挂壁知音丧，师与契嵩深相知时已逝矣。挥尘空山乱石听。斋罢何须更临水，胸中自有洗心经。

张子野年八十五尚闻买妾述古今作诗

锦里先生自笑狂，莫欺九尺鬓眉苍。诗人老去莺莺在，公子归来燕燕忙。
柱下相君犹有齿，江南刺史已无肠。平生谬作安昌客，略遣彭宣到后堂。

书双竹湛师房

我本江湖一钓舟，意嫌高屋冷飕飕。羡师此室才方丈，一柱清香尽日留。
暮鼓朝钟自击撞，闭门孤枕对残缸。白灰旋拨通红火，卧听萧萧雪打窗。

宝山新开径

藤梢橘刺元无路，竹杖棕鞋不用扶。风自远来闻语笑，水分流处见江湖。
回观佛国青螺髻，踏遍仙人碧玉壶。野客归时山月上，棠梨叶战暝禽呼。

和述古冬日牡丹

一朵妖红翠欲流，春光回照雪霜羞。化工只欲呈新巧，不放闲花得少休。

花开时节雨连风，却向霜余染烂红。漏泄春光私一物，此心未信出天工。
当时只道鹤林仙，能遣秋花发杜鹃。谁信诗能回造化，直教霜枿放春妍。
不分清霜入小园，故将诗律变寒暄。使君欲见蓝关咏，更倩韩郎为染根。

和钱安道寄惠建茶

我官于南今几时，尝尽溪茶与山茗。胸中似记故人面，口不能言心自省。
为君细说我未暇，试评其略差可听。建溪所产虽不同，一一天与君子性。森
然可爱不可慢，骨清肉腻和且正。雪花雨脚何足道，啜过始知真味永。纵复
苦硬终可录，汲黯少蠢宽饶猛。草茶无赖空有名，高者妖邪次顽扩。体轻虽
复强浮泛，性滞偏工呕酸冷。其间绝品岂不佳，张禹纵贤非骨鲠。葵花玉鞍
不易致，道路幽险隔云岭。谁知使者来自西，开缄磊落收百饼。嗅香嚼味本
非别，透纸自觉光炯炯。批糠团凤友小龙，奴隶日注臣双井。收藏爱惜待佳
客，不敢包裹钻权幸。此诗有味君勿传，空使时人怒生瘿。

和柳子玉喜雪次韵仍呈述古

诗翁爱酒长如渴，瓶尽欲沽囊已竭。灯青火冷不成眠，一夜捻须吟喜雪。
诗成就我觅欢处，我穷正与君仿佛。易不走投陈孟公，有酒醉君仍饱德。琼
瑶欲尽天应惜，更遣清光续残月。安得佳人擢素手，笑捧玉碗两奇绝。艳歌
一曲回阳春，坐使高堂生暖热。

吊天竺海月辩师三首

欲寻遗迹强沾裳，本自无生可得亡。今夜生公讲堂月，满庭依旧冷如霜。
生死犹如臂屈伸，情钟我辈一酸辛。乐天不是蓬莱客，凭仗西方作主人。
欲访浮云起灭因，无缘却见梦中身。安心好住王文度，此理何须更问人。

李颀秀才善画山以两轴见寄仍有诗次韵答之

平生自是个中人，欲向渔舟便写真。诗句对君难出手，云泉劝我早抽身。
年来白发惊秋速，长恐青山与世新。从此北归休怅望，囊中收得武林春。

雪后至临平与柳子玉同至僧舍见陈尉烈

落帆古戍下，积雪高如丘。强邀诗老出，疏髯散飕飕。僧房有宿火，手
足渐和柔。静士素寡言，相对自忘忧。铜炉擢烟穗，石鼎浮霜沍。我行虽有
程，坐稳且复留。大哉天地间，此生得浮游。

夜至永乐文长老院文时卧病退院

愁闻巴叟卧荒村，来打三更月下门。往事过年如昨日，此身未死得重论。
老非怀土情相得，病不开堂道益尊。惟有孤栖旧时鹤，举头见客似长言。

柳氏二外生求笔迹

退笔成山未足珍，读书万卷始通神。君家自有元和脚，莫厌家鸡更问人。
一纸行书两绝诗，遂良须鬓已如丝。何当火急传家法，欲见诚悬笔谏时。

钱安道席上令歌者道服

乌府先生铁作肝，霜风卷地不知寒。犹嫌白发年前少，故点红灯雪里看。
他日卜邻先有约，待君投级我休官。如今且作华阳服，醉唱伙家七返丹。

除夜野宿常州城外二首

行歌野哭两堪悲，远火低星渐向微。病眼不眠非守岁，乡音无伴苦思归。
重衾脚冷知霜重，新沐头轻感发稀。多谢残灯不嫌客，孤舟一夜许相依。
南来三见岁云徂，直恐终身走道涂。老去怕看新历日，退归拟学旧桃符。
烟花已作青春意，霜雪偏寻病客须。但把穷愁博长健，不辞最后饮屠酥。

元日过丹阳明日立春寄鲁元翰

堆盘红缕细茵陈，巧与树花两斗新。竹马异时宁信老，土牛明日莫辞春。
西湖弄水犹应早，北寺观灯欲及辰。白发苍颜谁肯记，晓来频嚏为何人。

古缠头曲

鸱弦铁拨世无有，乐府旧工惟尚叟。一生喙硬眼无人，坐此困穷今白首。
翠鬟女子年十七，指法已似呼韩妇。轻帆渡海风掣回，满面沙尘和泪垢。青
衫不逢溢浦客，红裹漫插曹纲手。尔来一见哀台他，便着臂躬并臼。我惭
贫病百不足，强对黄花饮白酒。转关菠索动有神，雷辊空堂战窗牖。四弦一
抹拥袂立，再拜十分为我寿。世人只解锦缠头，与汝作诗传不朽。

刁同年草堂

不用长竿矫绣衣，南园北第两参差。青山有约长当户，流水无情自入池。
岁久醅醲浑欲合，春来杨柳不胜垂。主人不用匆匆去，正是红梅着子时。

惠山谒钱道人烹小龙团登绝顶望太湖

踏遍江南南岸山，逢山未免更留连。独携天上小圆月，来试人间第二泉。
石路萦回九龙脊，水光翻动五湖天。孙登无语空归去，半岭松声万壑传。

钱道人有诗云直须认取 主人翁作两绝戏之

首断故应无断者，冰消那复有冰知。主人若苦令依认，认主人人竟是谁。

有主还须更有宾，不如无镜自无尘。只从半夜安心后，失却当年觉痛人。

和苏州太守王规甫侍太夫人观灯之什余时
以刘道原见访滞留京口不及赴此会二首

不觉朱轳辗后尘，争看绣锦缠轮。洛滨侍从三人贵，京兆平反一笑春。
但逐东山携伎女，那知后阁走穷宾。滞留不见荣华事，空作赧诗第七人。
翻翻缇骑走香尘，激激飞涛射火轮。美酒留连三夜月，丰年倾倒五州春。
时浙西皆以不熟罢灯，惟苏独盛。安排诗律追强对，蹭蹬归期为恶宾。堕珥
遗簪想无限，华胥犹见梦回人。

成都进士杜暹伯升出家名法通往来吴中

欲识当年杜伯升，飘然云水一孤僧。若教俯首随纆锁，料得如今似我能。
柳子玉云：暹若及第，不过似我。

第六卷

诗九十九首

虎丘寺

入门无平田，石路穿细岭。阴风生涧壑，古木翳潭井。湛庐谁复见，秋水光耿耿。铁花秀岩壁，杀气噤蛙邑。幽幽生公堂，左右立顽矿。当年或未信，异类服精猛。胡为百岁后，仙鬼互驰骋。窈然留清诗，读者为悲哽。东轩有佳致，云水丽千顷。熙熙览生物，春意破凄冷。我来属无事，暖日相与永。喜鹊翻初旦，愁鸢蹲落景。坐见渔樵还，新月溪上影。悟彼良自哈，归田行可请。

常润道中有怀钱塘寄述古五首

从来直道不辜身，得向西湖两过春。沂上已成曾点眼，泮宫初采鲁侯芹。休惊岁岁年年貌，且对朝朝暮暮人。细雨晴时一百六，画船鼙鼓莫违民。

草长江南莺乱飞，年来事事与心违。花开后院还空落，燕入华堂怪未归。世上功名何日是，樽前点检几人非。去年柳絮飞时节，记得金笼放雪衣。杭人以放鸽为太守寿。

浮玉山头日日风，即金山也涌金门外已春融。二年鱼鸟浑相识，三月莺花付与公。剩看新翻眉倒晕，未应位别脸消红。何人织得相思字，寄与江边北向鸿。

国艳天饶酒半酣，去年同赏寄僧檐。但知扑扑晴香软，谁见森森晓态严。谷雨共惊无几日，蜜蜂未许辄先甜。应须火急回征棹，一片词枝可得黏。

惠山泉下土如濡，阳羨溪头米胜珠。卖剑买牛吾欲老，杀鸡为黍子来无。地偏不信容高盖，俗俭真堪着腐儒。莫怪江南苦留滞，经营身计一生迂。

刁景纯赏瑞香花忆先朝侍宴次韵

上苑夭桃自作行，刘郎去后几回芳。厌从年少追新赏，闲对宫花识旧香。欲赠佳人非泛洩，好纫幽佩吊沉湘。鹤林神女无消息，为问何年返帝乡。

同柳子玉游鹤林招隐醉归呈景纯

花时腊酒照人光，归路春风洒面凉。刘氏宅边霜竹老，戴公山下野桃香。岩头匹练兼天静，泉底真珠溅客忙。安得道人携笛去，一声吹裂翠崖冈。

景纯见和复次韵赠之二首

解组归来道益光，坐看百物自炎凉。卷帘堂上檀槽闹，送客林间桦烛香。浅量已愁当酒怯，非才尤觉和诗忙，何人贪佩黄金印，千柱耿耿锁北冈。

人间膏火正争光，每到藏春得暂凉。多事始知田舍好，凶年偏觉野蔬香。溪山胜画徒能说，来往如梭为底忙。老去此身无处著，为翁栽插万松冈。

柳子玉亦见和因以送之兼寄其兄子璋道人

不羨腰金照地光，暂时假面弄西凉。晴窗咽日肝肠暖，古殿朝真履袖香。
说静故知犹有动，无阑底处更求忙。先生官罢乘风去，何用区区赋陟冈。

子玉家宴用前韵见寄复答之

自酌金樽劝孟光，更教长笛奏伊凉。子玉家有笛婢。牵衣男女绕太白，
扇枕郎君烦阿香。诗病逢春转深痼，愁魔得酒暂奔忙。醒时情味吾能说。日
在西南白草冈。

景纯复以二篇一言其亡兄与伯父同 年之契一言今者唱酬之意仍次其韵

灵寿扶来似孔光，感时怀旧一悲凉。蟾枝不独同攀桂，鸡舌还应共赐香。
亦同为郎。等是浮休无得丧，粗分忧乐有闲忙。年来世事如波浪，郁郁谁知
柏在冈。

屡把铅刀齿步光，更遭华袞照庞凉。苏门山上莫长啸，詹叟林中无别香。
烛烬已残中夜刻，槐花还似昔年忙。背城借一吾何敢，慎莫樽前替戾冈。

金山寺与柳子玉饮大醉卧宝 觉禅榻夜分方醒书其壁

恶酒如恶人，相攻剧刀箭。颓然一榻上，胜之以不战。诗翁气雄拔，禅
老语清软。我醉都不知，但觉红绿眩。醒时江月堕，撼撼风响变。惟有一龛
灯，二豪俱不见。

大风留金山两日

塔上一铃独自语，明日颠风当断渡。朝来白浪打苍崖，倒射轩窗作飞雨。
龙骧万斛不敢过，渔艇一叶从掀舞。

细思城市有底忙，却笑蛟龙为谁怒。无事久留童仆怪，此风聊得妻孥许。
灊山道人独何事，半夜不眠听粥鼓。

监洞霄宫俞康直郎中所居四咏

退 圃

百丈休牵上濑船，一钩归钓缩头鳊。园中草木春无数，只有黄杨厄闰年。
俗说黄杨岁长一寸，过闰退三寸。

逸 堂

新第谁来作并邻，旧官宁复忆星辰。请君置酒吾当贺，知向江湖拜散人。

遁 轩

冠盖相望起隐沦，先生那得老江村。古来真遁何曾遁，笑杀逾垣与闭门。

远 楼

西山烟雨卷疏帘，北户星河落短檐。不独江天解空阔，地偏心远似陶潜。

游鹤林招隐二首

郊原雨初霁，春物有余妍。古寺满修竹，深林闻杜鹃。睡余柳花堕，目眩山樱然。西窗有病客，危坐看香烟。

行歌白云岭，坐咏修竹林。风轻花自落，日薄山半阴。涧草谁复识，闻香沓难寻。时见城市人，幽居惜未深。

书普慈长老壁志诚

普慈寺后千竿竹，醉里曾看碧玉椽。倦客再游行老矣，高僧一笑故依然。久参白足知禅味，苦厌黄公鸟名聒昼眠。惟有两株红百叶，晚来犹得向人妍。

书焦山纶长老壁

法师住焦山，而实未尝住。我来辄问法，法师了无语，法师非无语，不知所答故。君看头与足，本自安冠屨。譬如长鬣人，不以长为苦。一旦或人间，每睡安所措。归来被上下，一夜着无处。展转遂达晨，意欲尽镊去。此言虽鄙浅，故自有深趣。持此问法师，法师一笑许。

刁景纯席上和谢生二首

误入仙人碧玉壶，一欢那复间亲疏。杯盘狼藉吾何敢，车骑雍容子甚都。此夜新声闻北里，他年故事纪南徐。欲穷风月三千界，愿化人天百亿躯。

纵饮谁能问挈壶，不知门外晓星疏。绮罗胜事齐三阁，宾主谈锋敌两都。榻畔烟花常叹杜，海中童仆尚追徐。毋多酌我公须听，醉后粗狂胆满躯。

留别金山宝觉圆通二长老

沐罢巾冠怯晚凉，睡余齿颊带茶香。舫舟北岸何时渡，睨发东轩未肯忙。康济此身殊有道，医治外物本无方。风流二老长还往，顾我归期尚渺茫。

无锡道中赋水车

翻翻联联衔尾鸦，荦荦确确蜕骨蛇。分畦翠浪走云阵，刺水绿针抽稻牙。

洞庭五月欲飞沙，鹭鸣窟中如打衙。天公不见老翁泣，唤取阿香推雷车。

杭州牡丹开时仆犹在常润周令作
诗见寄次其韵复以一首送赴阙

羞归应为负花期，已是成阴结子时。与物寡情怜我老，遣春无恨赖君诗。
玉台不见朝酣酒，金缕犹歌空折枝。从此年年定相见，欲师老圃问樊迟。
莫负黄花九日期，人生穷达可无时。十年且就三都赋，万户终轻千首诗。
天静伤鸿犹戢翼，月明惊鹊未安枝。君看六月河无水，万斛龙骧到自迟。

苏州闾丘江君二家雨中饮酒二首

小圃阴阴遍洒尘，方塘潏潏欲生纹。已烦仙袂来行雨，莫遣歌声便驻云。
肯对绮罗辞白酒，试将文字恼红裙。今宵记取醒时节，点滴空阶独自闻。
五纪归来鬓未霜，十眉环列坐生光。唤船渡口迎秋女，驻马桥边问泰娘。
曾把四弦娱白傅，敢将百草斗吴王。从今却笑风流守，画戟空凝宴寝香。

次韵沈长官三首

家山何在两忘归，杯酒相逢慎勿违。不独饭山嘲我瘦，也应糠核怪君肥。
男婚已毕女将归，累尽身轻志莫违。谁道山中食无肉，玉池清水自生肥。
造物知吾久念归，似怜衰病不相违。风来震泽帆初饱，雨入松江水渐肥。

戏书吴江三贤画像三首

谁将射御教吴儿，长笑申公为夏姬。却遣姑苏有麋鹿，更怜夫子得西施。
范蠡
浮世功劳食与眠，季鹰真得水中仙。不须更说知机早，直为鲈鱼也自贤。
张翰
千首文章二顷田，囊中未有一钱看。却因养得能言鸭，惊破王孙金弹丸。
陆龟蒙

和刘孝叔会虎丘时王规甫斋
素祈雨不至二首

白简威犹凜，青山兴已秣。鹤闲云作憇，驰卧草埋峰。跪履若可教，卜
邻应见容。因公问回老，何处定相逢。
太常斋未解，不肯对纤秣。只遣三千履，来游十二峰。林空答清唱，潭
净写衰容。归去瑶台路，还应月下逢。

过永乐文长老已卒

初惊鹤瘦不可识，旋觉云归无处寻。三过门间老病死，一弹指顷去来今。
存亡惯见浑无泪，乡井难忘尚有心。欲向钱塘访圆泽，葛洪川畔待秋深。

赠张刁二老

两邦山水未凄凉，二老风流总健强。共成一百七十岁，各饮三万六千场。
藏春坞里莺花闹，仁寿桥边日月长。惟有诗人被磨折，金钗零落不成行。

去年秋偶游宝山上，方入一小院，阒然无人有。
僧隐几低头读书，与之语漠然不甚对，问其邻。
之僧曰：此云闇梨，也不出十五年矣。今年六月
自常润还，复至其室，则死葬数月矣。作诗题其壁。

云师来宝山，一住十五秋。读书常闭户，客至不举头。去年造其室，清坐忘百忧。我初无言说，师亦无对酬。今来复扣门，空房但飕飕。云已灭无余，薪尽火不留。却疑此室中，尝有斯人不。所遇孰非梦，事过吾何求。

听僧昭素琴

至和无攫，至平无按抑。不知微妙声，究竟何从出。散我不平气，洗我不和心。此心知有在，尚复此微吟。

僧惠勤初罢僧职

轩轩青田鹤，郁郁在樊笼。既为物所縻，遂与吾辈同。今来始谢去，万事一笑空。新诗如洗出，不受外垢蒙。清风入齿牙，出语如风松。霜髭茁病骨，饥坐听午钟。非诗能穷人，穷者诗乃工。此语信不妄，吾闻诸醉翁。

游灵隐高峰塔

言游高峰塔，薄食治野装。火云秋未衰，及此初旦凉。雾霏岩谷暗，日出草木香。嘉我同来人，久便云水乡。相劝小举足，前路高且长。古松攀龙蛇，怪石坐牛羊。渐闻钟磬音，飞鸟皆下翔。入门空无有，云海浩茫茫。惟见聋道人，老病时绝粮。问年笑不答，但拍穴藜床。心知不复来，欲归更傍徨。赠别留匹布，今岁天早霜。

八月十七日天竺山送桂花分赠元素

月缺霜浓细蕊干，此花元属桂堂仙。鹫峰子落惊前夜，蟾窟枝空记昔年。破裓山僧怜耿介，练裙溪女斗清妍。愿公采撷纫幽佩，莫遣孤芳老涧边。

捕蝗至浮云岭山行疲苦有怀子由第二首

西来烟阵塞空虚，洒遍秋田雨不如。新法清平那有此，老身穷苦自招渠。无人可诉乌衔肉，忆弟难凭犬寄书。自笑迂疏皆此类，区区犹欲理蝗余。

霜风渐欲作重阳，熠熠溪边野菊黄。久废山行疲鞞确，尚能村醉舞淋浪。
独眠林下梦魂好，回首人间忧患长。杀马毁车从此逝，子来何处问行藏。

青牛岭高绝处有小寺人迹罕到

暮归走马沙河塘，炉烟袅袅十里香。朝行曳杖青牛岭，崖泉咽咽千山静。
君勿笑老僧耳聋唤不闻，百年俱是可怜人。明朝且复城中去，白云却在题诗处。

新城陈氏园次晁补之韵

荒凉废圃秋，寂历幽花晚。山城已穷僻，况与城相远。我来亦何事，徙倚望云。
。不见苦吟人，清樽为谁满。

梅圣俞诗集中有毛长官者今于 潜令国华也圣俞没十五年而君 犹为令捕蝗至其邑作诗戏之

诗翁憔悴老一官，厌见苜蓿堆青盘。归来羞涩对妻子，自比鲋鱼缘竹竿。
今君滞留生二毛，饱听衙鼓眠黄紬。更将嘲笑调朋友，人道猕猴骑土牛。愿
君恰似高常侍，暂为小邑仍刺史。不愿君为孟浩然，却遭明主放还山。官游
逢此岁年恶，飞蝗来时半天黑。羨君封境稻如云，蝗自识人人不识。

与毛令方尉游西菩寺二首

推挤不去已三年，鱼鸟依然笑我顽。人未放归江北路，天教看尽浙西山。
尚书清节衣冠后，处士风流水石间。一笑相逢那易得，数诗狂语不须删。

路转山腰足未移，水清石瘦便能奇。白云自占东西岭，明月谁分上下池。
黑黍黄粱初熟后，朱柑绿橘半甜时。人生此乐须天赋，莫遣儿曹取次知。

听贤师琴

大弦春温和小平，小弦廉折亮以清，平生未识宫与角，但闻牛鸣盎中雉
登木。门前剥啄谁扣门，山僧未闲君勿瞋，归家且觅千斛水，净洗从来箏笛
耳。

赠写真何充秀才

君不见路州别驾眼如电，左手挂弓横捻箭。又不見雪中骑驴孟浩然，皱
眉吟诗肩耸山。饥寒富贵两安在，空有遗像留人间。此身常拟同外物，浮云
变化无踪迹。问君何苦写我真，君言好之聊自适。黄冠野服山家容，意欲置
我山岩中。勋名将相今何限，往写褒公与鄂公。

回先生过湖州东林沈氏饮醉以石榴皮

书其家东老庵之壁云西邻已富忧不足
东老虽贫乐有余白酒酿来因好客黄金
散尽为收书西蜀和仲闻而次其韵三首
东老沈氏之老自谓也湖人因以名之其
子偕作诗有可观者

世俗何知贫是病，神仙可学道之余。但知白酒留佳客，不问黄公觅素书。
符离道士晨兴际，华岳先生尸解余。忽见黄庭丹篆句，犹传青纸小朱书。
凄凉雨露三年后，仿佛尘埃数字余。至用榴皮缘底事，中书君岂不中书。

李行中秀才醉眠亭

已向闲中作地仙，更干酒里得天全。从教世路风波恶，贺监偏工水底眠。
君且归休我欲眠，人言此语出天然。醉中对客眠何害，须信陶潜未苦贤。
孝先风味也堪怜，肯为周公昼日眠。枕曲先生犹笑汝，枉将空腹贮遗编。

甘露寺弹筝

多景楼上弹神曲，欲断哀弦再三促。江妃出听雾雨愁，白浪翻空动浮玉。
金山名唤取吾家双凤槽，遣作三峡狐猿号。与君合奏芳春调，啄木飞来霜树杪。

单同年求德兴俞氏聚远楼诗三首

云山烟水苦难亲，野草幽花各自春。赖有高楼能聚远，一时收拾与闲人。
无限青山散不收，云奔浪卷入帘钩。直将眼力为疆界，何啻人间万户侯。
闻说楼居似地仙，不知门外有尘寰。幽人隐几寂无语，心在飞鸿灭没间。

平山堂次王居卿祠部韵

高会日陪山简醉，狂言屡发次公醒。酒如人面天然白，山向吾曹分外青。
江上飞云来北固，槛前修竹忆南屏。六朝兴废余丘垤，空使英雄笑宁馨。

次韵陈海州书怀

郁郁苍梧海上山，东海郁洲山云自苍梧浮来。蓬莱方丈有无间。旧闻草木
皆仙药，欲弃妻孥守市闾。雅志未成空自叹，故人相对若为颜。酒醒却忆
儿童事，长恨双鬼去莫攀。陈曾令乡邑。

次韵陈海州乘槎亭

人事无涯生有涯，逝将归钓汉江槎。乘桴我欲从安石，遁世谁能识子嗟。
日上红波浮碧，潮来白浪卷青沙。清谈美景双奇绝，不觉归鞍带月华。

次韵孙职方苍梧山

苍梧奇事岂虚传，荒怪还须问子年。远托鳌头转沧海，来依鹏背负青天。
或云灵境归贤者，又恐神功亦偶然。闻道新春恣游览，羨君平地作飞仙。

次韵孙巨源寄涟水李盛二 著作并以见寄五绝

南岳诸刘岂易逢，相望无复马牛风。山公虽见无多子，杜燕何由恋塞鸿。
昔与巨源、刘贡父、刘莘老相遇于山阳，自尔契阔，惟巨源近者复相见于京口。

高才晚岁终难进，勇退当年正急流。不独二疏为可慕，他时当有景孙楼。
巨源近离东海郡，有景疏楼。

漱石先生难可意，谓巨源。啮毡校尉久无朋。自谓。应知客路愁无奈，
故遣吟诗调李陵。谓李君也。

云雨休排神女车，忠州老病畏人夸。诗豪正值安仁在，空看河阳满县花。
盛为邑宰。

胶西未到吾能说，桑朽禾麻不见春。不羨京尘骑马客，羨他淮月弄舟人。

王 莽

汉家殊味识经纶，入手功名事事新。百尺穿成连夜井，千金购得解飞人。

董 卓

公业平时劝用儒，诸公何事起相图。只言天下无健者，岂信车中有布乎。

虎 儿

旧闻老蚌生明珠，未省老兔生于菟。老兔自谓月中物，不骑快马骑蟾蜍。
蟾蜍爬沙不肯行，坐令青衫垂白须。

于菟骏猛不类渠，指挥黄态驾黑躯。丹砂紫麝不用涂，眼光百步走妖狐。
妖狐莫夸智有余，不劳摇牙咀尔徒。

除夜病中赠段屯田

龙钟三十九，劳生已强半。岁莫日斜时，还为昔人叹。乐天诗云：行年
三十九，岁莫日斜时。今年一线在，那复堪把玩。欲起强持酒，故交云雨散。
惟有病相寻，空斋为老伴。萧条灯火冷，寒夜何时旦。倦仆触屏风，饥鼯嗅
空案。数朝闭阁卧，霜发秋蓬乱。传闻使者来，策杖就梳盥。书来苦安慰，
不怪造请缓。大夫忠烈后，高义金石贯。要当击权豪，未肯觑衰懦。此生何
所似，暗尽灰中炭。归田计已决，此邦聊假馆。三径粗成货，一枝有余暖。
愿君更信宿，庶奉一笑粲。

乔太博见和复次韵答之

百年三万日，老病常居半。其间迁忧乐，歌笑杂悲叹。颠倒不自知，直为神所玩。须臾便堪笑，万事风雨散。自从识此理，久谢少年伴。逝将游无何，岂暇读城旦，非才更多病，二事可并案。愧烦贤使者，弭节整纷乱。乔侯瑚璉质，清庙尝荐盥。奋髯百吏走，坐变齐俗缓。未遭甘鹄退，并进耻鱼贯。每闻议论余，凛凛激贪懦。莫邪当自跃，岂复烦炉炭。便应朝袜越，未暮刷燕馆。胡为守故丘，眷恋桑榆暖。为君扣牛角，一咏南山粲。

二人再和亦再答之

寒鸡知将晨，饥鹤知夜半。亦如老病客，遇节常感叹。光阴等敲石，过眼不容玩。亲友如搏沙，放手还复散。羈孤每自笑，寂寞谁肯伴。元达号神君，晋循吏乔智明。字元达。高论森月旦。纪明本贤将，段释之本将家。汨没事堆案。欣然肯相顾，夜阁灯火乱。盘空愧不饱，酒薄仅堪盥。雍容许着帽，不怪安石缓。虽无窈窕人，清唱弄珠贯。幸有从横舌，说剑起懦懦。二豪沉下位，暗火埋湿炭。岂似草玄人，默默老儒馆。行看富贵逼，炙手借余暖。应念苦思归，登楼赋王粲。

雪后书北台壁二首

黄昏犹作雨纤纤，夜静无风势转严。但觉裳调如泼水，不知庭院已堆盐。五更晓色来书幌，半月寒声落画檐。试扫北台看马耳，未随埋没有双尖。

城头初日始翻鸦，陌上晴泥已没车。冻合玉楼寒起粟，光摇银海眩生花。遗蝗入地应千尺，宿麦连云有几家，老病自嗟诗力退，空吟冰柱忆刘义。

谢人见和前篇二首

已分酒杯欺浅懦，敢将诗律斗深严。渔蓑句好应须画，柳絮才高不道盐。败履尚存东郭指，飞花又舞滴仙檐。书生事业真堪笑，忍冻孤吟笔退尖。

九陌凄风战齿牙，银杯逐马滞随车。也知不作坚牢玉，无奈能开顷刻花。得酒强欢愁底事，闭门高卧定谁家。台前日暖君须爱，冰下寒鱼渐可叉。

铁沟行赠乔太博

城东坡陇何所似，风吹海涛低复起，城中病守无所为，走马夹寻铁沟水。铁沟水浅不容辘，恰似当年韩与侯。有鱼无鱼何足道，驾言聊复写我忧。荒村野店亦何有，欲发狂言须斗酒。山头落日侧金盆，倒着接离搔白首。忽忆从军年少时，轻裘细马百不知。臂弓腰箭南山下，追逐长杨射猎儿。老去同君两樵悴，犯夜醉归人不避。今年定起故将军，未肯先诛灞陵尉。

出城送客不及步至溪上二首

送客客已去，寻花花未开。未能城里去，且复水边来。父老借问我，史

君安在哉。今年好雨雪，会见麦千堆。

春来六十日，笑口几回开。会作堂堂去，何妨得得来。倦游行老矣，旧隐赋归哉。东望峨眉小，庐山翠作堆。郡东庐山，绝类峨眉而小。

苏州姚氏三瑞堂 姚氏山以莘尔

君不见，董邵南隐居行义孝且慈，天公亦恐无人知。故令鸡狗相哺儿，又令韩老为作诗。尔来三百年，名与淮水东南驰。此人世不乏，此事亦时有。枫桥三瑞皆目见，天意宛在虞鰈后。惟有此诗非昔人，君更往求无价手。

莫笑银杯小 答乔太博

陶潜一县令，独饮仍独醒。犹将公田二顷五十亩，种秫作酒不种秔。我今号为二千石，岁酿百石何以醉宾客。请君莫笑银杯小，尔来岁旱东海窄。会当拂衣归故丘，作书贷粟监河侯。万斛船中着美酒，与君一生长拍浮。

送段屯田分得于字

劝农使者古丈夫，不惜春衫践泥涂。王事靡监君甚劬，奉常客卿虬两须。东武县令天马驹，伴宫先生非俗儒。相与野饮四子俱，乐哉此乐城中无。溪边策杖自携壶，腰笏不烦何易于。胶西病守老且迂，空斋愁坐纷墨朱。四十岂不知头颅，畏人不出何其愚。

和段屯田荆林馆

南山有佳色，无人空自奇。清诗为题品，草木变芬菲。谢女得秀句，留待中郎归。便当勒鞭策，仆倦马亦饥。段有侄女在密。

赠上天竺辩才师

南北一山门，上下两天竺。中有老法师，瘦长如鹤鹄。不知修何行，碧眼照山谷。见之自清凉，洗尽烦恼毒。坐令一都会，勇丈礼白足。我有长头儿，角颊峙犀玉。四岁不知行，抱负烦背腹。师来为摩顶，起走趁奔鹿。乃知戒律中，妙用谢羈束。何必言法华，佯狂啖鱼肉。

游庐山次韵章传道

尘容已似服辕驹，野性犹同纵壑鱼。出入岩峦千初表，较量筋力十年初。虽无窈窕驱前马，还有鸱夷挂后车。莫笑吟诗淡生活，当令阿买为君书。

庐山五咏

庐敖洞

《图经》云：敖秦博士避难此山，遂得道。
上界足官府，飞升亦何益。还在此山中，相逢不相识。

饮酒台

博士雅好饮，空山谁与娱。莫向骊山去，君王不喜儒。

圣灯岩

石室有金丹，山神不知秘。何必露光芒，夜半惊童稚。

三 泉

皎皎岩下泉，无人还自洁。不用比三星，清光同一月。

障日峰 其状类峨眉，但小耳。

长安自不远，蜀客苦思归。莫教名障日，唤作小峨眉。

第七卷

诗八十三首

次韵章传道喜雨 祷常山而得

去年夏旱秋不雨，海畔居民饮咸苦。今年春暖欲生螽，地上戢戢多于土。预忧一旦开两翅，口吻如风那肯吐。前时渡江入吴越，布阵横空如项羽。去岁钱塘见飞蝗自西北来，极可畏。农夫拱手但垂位，人力区区固难御。扑缘尾困牛马，啖啮衣服穿房户。坐观不救亦何心，秉畀炎火传自古。荷锄散掘谁敢后，得米济饥还小补。常山山神信英烈，驾雷公河电母。应怜郡守老且愚，欲把疮痍手摩抚。山中归时风色变，中路已觉商羊舞。夜窗骚骚闹松竹，朝畦泫泫流膏乳。从来蝗旱必相资，此事吾闻老农语。庶将积润扫遗孽，收拾丰岁还明主。县前已窖八千斛，今春及今得蝗于八千余斛。率以一胜完一亩。更看蚕妇过初眠，蚕一眠。则蝗不复生矣。未用贺客来旁午。先生笔力吾所畏，蹙踏鲍谢跨徐庚。偶然谈笑得佳篇，便恐流传成乐府。陋邦一雨何足道，吾君盛德九州普。中和乐职几时作，试向诸生选何武。

谢郡人田贺二生献花

城里田员外，城西贺秀才。不愁家四壁，自有锦千堆。珍重尤奇品，艰难最后开。芳心困落日，薄艳战轻雷。昨日雷雨。老守仍多病，壮怀先已灰。殷勤此粲者，贺献魏花三朵。攀折为谁哉。玉腕擅红袖，金樽泻白醅。何当镊霜鬓，强插满头回。

惜花

吉祥寺中锦千堆，钱塘花最盛处。前年赏花真盛哉，道人劝我清明来。腰鼓百面如春雷、打彻凉州花自开。沙河塘上插花回，醉倒不觉吴儿哈。岂知如今双鬓催，城西古寺没蒿莱。有僧闭门手自栽，千枝万叶巧剪裁。就中一丛何所似，马脑盘成金缕杯。而我食菜方清斋，对花不饮花应猜，夜来雨雹如李梅，红残绿暗吁可哀。

和顿教授见寄 用除夜韵

我笑陶渊明，种秫二顷半。妇言既不用，还有责子叹。无弦则无琴，何必劳抚玩。我笑刘伯伦，醉发蓬茆散。二豪苦不纳，独以锺自伴。既死何用埋，此身同夜旦。孰云二子贤，自结两重按。笑人还自笑，出口谈治乱。一生涵尘垢，晚以道自盥。无成空得懒，坐此百事缓。厌闻顿夫子，讲道出新贯。岂无一尺书，恐不记庸懦。陋邦贫且病，数米株称炭。惭愧章先生，十日坐空馆。袖中出子诗，贪读酒屡暖。狂言各须慎，勿使输薪粲。

和子由四首

韩太祝送游太山

偶作郊原十日游，未应回首厌笼囚。但教尘土驱驰足，终把云山灿漫酬。
闻道逢春思濯锦，便须到处觅菟裘。恨君不上东封顶，夜看金轮出九幽。

送 春

梦里青春可得追，欲将诗句绊余晖。酒阑病客惟思睡，蜜熟黄蜂亦懒飞。
芍药樱桃俱扫地，病过此二物。鬢丝禅榻两忘机。凭君借取法界观，一洗人间万事非。来书云：近看此书，余未尝见也。

首夏官舍即事

安石榴花开最迟，绛裙深树出幽菲。吾庐想见无限好，客子倦游胡不归，
坐上一樽虽得满，古来四事巧相违。令人却忆湖边寺，垂柳阴阴画掩扉。

送李供奉席上和李白诗

家声赫奕盖并凉，也解微吟锦瑟傍。孽水取鱼湖起浪，引杯看剑坐生光。
风流别后人人忆，才器归来种种长。不用更贪穷事业，风骚分付与沉湘。

西 斋

西斋深且明，中有六尺床。病夫朝睡足，危坐觉日长。昏昏既非醉，踽踽亦非狂。
褰衣竹风下，穆然中微凉。起行西园中，草木含幽香。榴花开一枝，桑枣沃以光。
鸣鸠得美荫，困立忘飞翔。黄鸟亦自喜，新音变圆吭。杖藜观物化，亦以观我生。
万物各得时，我生日皇皇。

小 儿

小儿不识愁，起坐牵我衣。我欲嗔小儿，老妻劝儿痴。儿痴君更甚，不乐愁何为。
还坐愧此言，洗盥当我前。大胜刘伶妇，区区为酒钱。

寄刘孝叔

君王有意诛骄虏，椎破铜山铸铜虎。联翩三十七将军，走马西来各开府，
南山伐木作车轴，东海取鼉漫战鼓。汗流奔走谁敢后，恐乏军兴污资斧。保甲连村团未遍，
方田讼牒纷如雨。尔来手实降新书，抉剔根株穷脉缕。诏书惻但信深厚，吏能浅薄空劳苦。
平生学问止流俗，众里笙竽谁比数。忽令独奏凤将雏，仓卒欲吹那得谱。况复连年苦饥谨，
剥啮草木啖泥土。今年雨雪颇应时，又报蝗虫生翅股。忧来洗盏欲强醉，寂寞虚斋卧空瓶。
公厨十日不生烟，更望红裙踏筵舞。故人屡寄山中信，只有当归无别语。方将雀鼠偷太仓，
未肯衣冠挂神武。吴兴丈人真得道，平日立朝非小补。自从四方冠盖闹，归作二浙湖山主。
高踪已自杂渔钩，大隐何曾弃簪组。去年相从殊未足，问

道已许谈其祖。逝将弃官往卒业，俗缘未尽那得睹。公家只在雷溪上，上有白云如白羽。应怜进退昔皇皇，更把安心教初祖。

孔长源挽词二首

少年才气冠当时，晚节孤风益自奇。君胜宜为夫子后，林宗不愧蔡邕碑。南荒尚记诛元恶，东越谁能事细儿。耆旧如今几人在，为君无憾为时悲。

小堰门头柳系船，天山堂上月侵筵。潮声夜半千岩响，诗句明朝万口传。长源自越过杭，夜饮有美堂上联句。长源诗云：天目远随双凤落，海门遥蹙两潮趋。一坐称善。岂意日斜庚子后，忽惊岁在己辰年。佳城一闭无穷事，南望题诗泪洒笺。

寄吕穆仲寺丞

孤山寺下水侵门，每到先看醉墨痕。楚相未亡谈笑是，中郎不见典刑存。杭有伶人，善学吕，举措酷似。别后常令作之以为笑。君先去踏尘埃陌，我亦来寻桑枣村。回首西湖真一梦，灰心霜鬓更休论。

余主簿母挽词

闺庭兰玉照乡间，自昔虽贫乐有余。岂独家人在中馈，却因麟趾识关雎。云輶忽已归仙府，乔木依然拥旧庐。忍把还乡千斛泪，一时洒向老莱裾。

送赵寺丞寄陈海州

景疏楼上唤峨眉，君到应先诵此诗。若见孟公投辖饮，莫忘冲雪送君时。

答陈述古二首

漫说山东第二州，枣林桑泊负春游。城西亦有红千叶，人老簪花却自羞。小桃破萼未胜春，罗绮丛中第一人。闻道使君归去后，舞衫歌扇总生尘。陈有小妓，述古称之。

张安道乐全堂

列子驭风殊不恶，犹被庄生讥数数。步兵饮酒中散琴，于此得全非至乐。乐全居士全于天，维摩丈室空修然。平生痛饮今不饮，无琴不独琴无弦。我公天与英雄表，龙章风姿照鱼鸟。但令端委坐庙堂，北狄西戎谈笑了。如今老去苦思归，小字亲书寄我诗。试问乐全全底事，无全何处更求亏。

张文裕挽词

高才本出朝廷右，能事空推德业余。每见便闻曹植句，至今传宝魏华书。济南名士新调丧，剑外生祠已絮除。欲寄西风两行泪，依然乔木郑公庐。

怀西湖寄晁美叔同年

西湖天下景，游者无愚贤。深浅随所得，谁能识其全。嗟我本狂直，早为世所捐。独专山水乐，付与宁非天。三百六十寺，幽寻遂穷年。所至得其妙，心知口难传。至今清夜梦，耳目余芳鲜。君持使者节，风采烁云烟。清流与碧巘，安肯为君妍。胡不屏骑从，暂借僧榻眠。读我壁间诗，清凉洗烦煎。策杖无道路，直造意所便。应逢古渔父，苇间自寅缘。问道若有得，买鱼勿论钱。

和梅户曹会猎铁沟

山西从古说三明，谁信儒冠也捍城。竿上鲸貌犹未掩，近泉数盗草中狐兔不须惊。东州赵叟饮无敌，南国梅仙诗有声。不向如皋闲射雉，归来何以得卿卿。是日惟梅、赵不射。

蔡常山回小猎

青盖前头点皂旗，黄茅冈下出长围。弄风骄马跑空立，趁兔苍鹰掠地飞。回望白云生翠巘，归来红叶满征衣。圣朝若用西凉簿，白羽犹能效一挥。

和章七出守湖州二首

方丈仙人出渺茫，高情犹爱水云乡。功名谁使连三捷，身世何缘得两忘。早岁归休心共在，他年相见话偏长。只应未报君恩重，清梦时时到玉堂。

绛阙云台总有名，应须极贵又长生。鼎中龙虎黄金贱，松下龟蛇绿骨轻。君好炉火而饵伏苓。霏水未浑纓可濯，弁峰初见眼应明。两厄春酒真堪羨，独占人间分外荣。

和张子野见寄三绝句

前生我已到杭州，到处长如到旧游。更欲洞霄为隐吏，一庵闲地且相留。过旧游。

狂吟跌宕无风雅，醉墨淋漓不整齐。应为诗人一回顾，山僧未忍扫黄泥。见题壁。

柏堂南畔竹如云，此阁何人是主人。但遣先生披鹤氅，不须更画乐天真。竹阁见忆。

和蒋夔寄茶

我生百事常随缘，四方水陆无不便。扁舟渡江适吴越，三年饮食穷芳鲜。金齏玉鲙饭炊雪，海螯江柱初脱泉。临风饱食甘寝罢，一瓯花乳浮轻圆。自从舍舟入东武，沃野便到桑麻川。剪毛胡羊大如马，谁记鹿角腥盘筵。厨中蒸粟埋饭瓮，大构更取酸生涎。拓罗铜碾弃不用，脂麻自上须盆研。故人犹

作旧眼看，谓我好尚如当年。沙溪北苑强分别，水脚一线争谁先。清诗两幅寄千里，紫金百饼费万钱。吟哦烹眺两奇绝，只恐偷乞烦封缠。老妻稚子不知爱，一半已入姜盐煎。人生所遇无不可，南北嗜好知谁贤。死生祸福久不择，更论甘昔争蚤妍。知君穷旅不自择，因诗寄谢聊相饒。

答李邦直

美人如春风，著物物未知。羈愁似水雪，见子先流渐。子从徐方来，吏民举熙熙。扶病出见之，惊我一何衰。知我久慵倦，起我以新诗。诗词如醇酒，盎然薰四支。径饮不觉醉，欲和先昏疲。西斋有蛮帐，风雨夜纷披。放怀语不择，抚掌笑脱颐。别来今几何，春物已含姿。柳色日夜暗，子来竟何时。徐方虽云乐，东山禁游嬉。又无狂太守，何以解忧思。闻子有贤妇，华堂诗螽斯。盍不倒囊囊，卖剑买蛾眉。不用教丝竹，唱我新歌词。

和文与可洋川国池三十首

湖 桥

朱栏画柱照湖明，白葛乌纱曳履行。桥下龟鱼晚无数，识君拄杖过桥声。

横 湖

贪看翠盖拥红妆，不觉湖边一夜霜。卷却天机云锦段，从教匹练写秋光。

书 轩

雨昏石砚寒云色，风动牙签乱叶声。庭下已生书带草，使君疑是郑康成。

冰 池

不嫌冰雪绕池看，谁似诗人巧耐寒。记取义之洗砚处，碧琉璃下黑蛟蟠。

竹 坞

晚节先生道转孤，岁寒惟有竹相娱。粗才杜牧真堪笑，唤作军中十万夫。

荻 浦

雨折霜干不耐秋，白花黄叶使人愁。月明小艇湖边宿，便是江南鹦鹉洲。

蓼 屿

秋归南浦蟋蟀鸣，霜落横湖沙水清。卧雨幽花无限思，抱丛寒蝶不胜情。

望云楼

阴晴朝暮几回新，已向虚空付此身。出本无心归亦好，白云还似望云人。

天汉台

漾水东流旧见经，银潢左界上通灵。此台试向天文觅，阁道中间第几星。

待月台

月与高人本有期，挂檐低户映蛾眉。只从昨夜十分满，渐觉冰轮出海迟。

二乐榭

此间真趣岂容谈，二乐并君已是三。仁智更烦河妄见，坐令鲁叟作瞿昙。
来诗云：二见因妄生。

泉亭

闻道池亭胜两川，应须烂醉答云烟。劝君多拣长腰米，消破亭中万斛泉。

吏隐亭

纵横忧患满人间，颇怪先生日日闲。昨夜清风眠北牖，朝来爽气在西山。

霜筠亭

解箨新篁不自持，婵娟已有岁寒姿。要看凛凛霜前意，须待秋风粉落时。

无言亭

殷勤稽首雄摩诘，敢问如何是法门。弹指未终千偈了，向人还道本无言。

露香亭

亭下佳人锦绣衣，满身璎珞缀明玕。晚香消歇无寻处，花已飘零露已晞。

函虚亭

水轩花榭两争妍，秋月春风各自偏。惟有此亭无一物，坐观万景得天全。

溪光亭

决去湖波尚有情，却随初日动櫓楫。溪光自古无人画，凭仗新诗与写成。

过 溪 亭

身轻步稳去忘归，四柱亭前野构微。忽悟过溪还一笑，水禽惊落翠毛衣。

被 锦 亭

烟江露绿晓风香，燕舞莺啼春日长。谁道使君贫且老，绣屏锦帐咽笙簧。

楔 亭

曲池流水细鳞鳞，高会传筋似洛滨。红粉翠蛾应不要，画船来往胜于人。

菡 亭

日日移床趁下风，清香不尽思何穷。若为化作龟千岁，巢向田田乱叶中。

茶 洞

长忆故山寒食夜，野茶发暗香来。分无素手簪罗髻，且折霜苏浸玉醅。
长忆故山，一作半晴半雨。

笕 筍 谷

汉川修竹贱如蓬，斤斧何曾赦箨龙。料得清贫馋太守，渭滨千亩在胸中。

寒 芦 港

溶溶晴港漾春晖，芦笋生时柳絮飞。还有江浦风物否，桃花流水鳊鱼肥。

野 人 庐

少年辛苦事犁锄，刚厌青山绕故居。老觉华堂无意味，却须时到野人庐。

此 君 庵

寄语庵前抱节君，与君到处合相亲。写真虽是文夫子，我亦真堂作记人。

金 橙 径

金橙纵复里人知，不见鲈鱼价自低。须是松江烟雨里，小船烧薤携香齏。

南 园

不种天桃与绿杨，使君应欲候农桑。春畦雨过罗纨腻，夏垅风来饼饵香。

北 园

汉水巴山乐有余，一麾从此首归涂。北园草木凭君问，许我他年作主无。

寄题刁景纯藏春坞

白首归来种万松，待看千尺舞霜风。年抛造物陶甄外，春在先生杖屦中。杨柳长齐低户暗，樱桃烂熟滴阶红。何时却与徐元直，共访襄阳庞德公。

玉盘盂二首 并序

东武旧俗，每岁四月，大会于南禅资福两寺，以芍药供佛，而今岁最盛。凡七千余朵，皆重树累萼，繁丽丰硕。中有白花，正圆如履盂。其下十余叶稍大，承之如盘，姿格绝异，独出于七千朵之上，云得之于城北苏氏园中。周宰相首公之别业也，而其名俚甚，乃为易之。

杂花狼籍占春余，芍药开时扫地无。两寺妆成宝纓络，一枝争看玉盘盂。佳名会作新翻曲，绝品难寻旧画图。从此定知年谷熟，姑山亲见雪肌肤。

花不能言意可知，令君痛饮更无疑。但持白酒劝嘉客，直待琼舟覆玉彝。负郭相君初择地，看羊羸国首吟诗。吾家岂与花相厚，更问残芳有几枝。

和潞公超然台次韵

我公厌富贵，常苦勋业寻。相期赤松子，永望白云岑。清风出谈笑，万窍为号吟。吟成超然诗，洗我蓬之心。嗟我本何人，麋鹿强冠襟。身微空志大，交浅屡言深。嘱公如得谢，呼我幸寄音。但恐酒钱尽，烦公挥囊金。

闻乔太博换左藏知钦州以诗招饮

今年果起故将军，幽梦清诗信有神。马革裹尸真细事，虎头食肉更何人。阵云冷压黄茆瘴，羽扇斜挥白葛巾。痛饮从今有几日，西轩月色夜来新。

乔将行烹鹅鹿出刀剑以饮客以诗戏之

破匣哀鸣出素虬，倦看鸚鵡听啾啾。明朝只恐兼烹鹤，此去还须却佩牛。便可先呼报恩子，不妨仍带醉乡侯。他年万骑归应好，奈有移文在故丘。

次韵刘贡父李公择见寄二首

白发相望两故人，眼看时事几番新。曲无和者应思郢，论少卑之且借秦。岁恶诗人无好语，公择来诗，皆道失中饥苦之状。夜长鰥守向谁亲。贡父，近丧偶。少思多睡无如我，鼻息雷鸣撼四邻。

何人劝我此间来，弦管生衣甑有埃。绿蚁濡唇无百斛，蝗虫扑面已三回。

磨刀入谷追穷寇，洒涕循城拾弃孩。为郡鲜欢君莫叹，犹胜尘土走章台。

寄黎眉州

胶西高处望西川，应在孤云落照边。瓦屋寒堆春后雪，峨眉翠扫雨余天，治经方笑春秋学，好士今无六一贤。君以春秋受知于欧阳文忠公、公自号六一居士。且待渊明赋归去，共将诗酒趁流年。

和赵郎中捕蝗见寄次韵

麦穞人许长，谷苗牛可没。天公独何意，忍使蝗虫发。驱攘著令典，农事安可忽。我仆既脐肠，我马亦款斫。飞腾渐云少，筋力亦已竭。苟无百篇诗，何以醒睡兀。初如疏吠浍，渐若决解渤。往来供十吏，腕脱不容歇。平生轻妄庸，熟视笑魏勃。爱君有逸气，诗坛专斩代。民病何时休，吏职不可越。慎无及世事，向空书咄咄。

登常山绝顶广丽亭

西望穆陵关，东望琅邪台。甫望九仙山，北望空飞埃。相将叫虞舜，遂欲归蓬莱。嗟我二三子，狂饮亦荒哉。红裙欲仙去，长笛有余哀。清歌入云霄，妙舞纤腰回。自从有此山，白石封苍苔。何尝有此乐，将去复徘徊。人生如朝露，白发日夜催。弃置当何言，万劫终飞灰。

薄薄酒二首 并序

胶西先生赵明叔，家贫好饮不择酒而醉。常云薄薄酒，胜茶汤；丑丑妇，胜空房。其言虽俚而近乎达，故推而广之，以补东州之乐府。既又以为未也，复自和一篇，聊以发览者之一噓云耳。

薄薄酒，胜茶汤；粗粗布，胜无裳；丑妻恶妾胜空房。五更待漏靴满霜，不如三伏日高睡足北窗凉。珠襦玉押万人祖送归北诏，不如悬鹑百结独坐负朝阳。生前富贵，死后文章。百年瞬息万世忙，夷齐盗蹠俱亡羊。不如眼前一醉，是非忧乐都两忘。

薄薄酒，饮两种；粗粗布，著两重。美恶虽异醉暖同，丑妻恶妾寿乃公。隐居求志义之从，本不计较东华尘土北窗风。百年虽长要有终，富死未必输生穷。但恐珠玉留君容，千载不朽遭樊崇。文章自足欺盲聋，谁使一朝富贵面发红。达人自达酒何功，世间是非忧乐本来空。

同年王中甫挽词

先帝亲收十五人，四方争看击鹏鲲。如君才业真堪用，顾我衰迟不足论。出处升沉十年后，死生契阔几人存。他时京口寻遗迹，宿草犹应有泪痕。仁宗朝，贤良十五人。今惟富郑公、张宣献、钱纯老及余与舍弟在耳。

七月五日二首

避谤诗寻医，畏病酒入务。萧条北窗下，长日谁与度。今年苦炎热，草木困薰煮。况我早衰人，幽居气如缕。秋来有佳兴，秫稻已含露。还复此微吟，往和糟床注。

何处觅新秋，萧然北台上。秋来未云几，风日已清亮。云间耸孤翠，林表浮远涨。新枣渐堪剥，晚瓜犹可饷。西风送落日，万窍舍凄怅。念当急行乐，白发不汝放。

赵郎中见和戏复答之

赵子吟诗如泼水，一挥三百八十字。奈何效我欲寻医，恰似西施藏白地。赵子饮酒如淋灰，一年十万八千杯。若不令君早入务，饮竭东海生黄埃。我衰临政多缪错，羨君精采如秋鹞。颇哀老子今日饮，为君坐啸主画诺。

次韵周邪寄雁荡山图二首

指点先凭采药翁，丹青化出大槐宫。眼明小阁浮烟翠，齿冷新诗嚼雪风。二华行观雄陕右，九仙今已压京东。将赴河中，密迩太华、九仙在东武，奇秀不减雁荡也。此生的有寻山分，已觉温台落手中。

西湖三载与君同，马入尘埃鹤入笼。东海独来看出日，石桥先去踏长虹。遥知别后添华发，时向樽前说病翁。所恨蜀山君未见，他年携手醉郫筒。

送碧香酒与赵明叔教授

闻君有妇贤且廉，劝君慎勿为楚相。不羨紫骝分御食，自遣赤脚沽村酿。嗟君老狂不知愧，更吟丑妇恶嘲谤。诸生闻语定失笑，冬暖号寒卧无帐，碧香近出帝子家，鹅儿破壳酥流盎。不学刘伶独自饮，一壶往助齐眉响。

赵既见和复次韵答之

长安小吏天所放，日夜歌呼和丞相。岂知后世有阿瞞，曹公自言参之后。北海樽前捉私酿。先生未出禁酒国，诗语孤高常近谤。几回无酒欲沽君，却畏有司书簿帐。近制公使酒过数法甚重。酸寒可笑分一斗，日饮如何足袁盎。更将险语压衰翁，只恐自是台无饷。

赵郎中往莒县逾月而归复以一壶遗之仍用元韵

东邻主人游不归，悲歌夜夜闻春相。门前人闹马嘶急，一家喜气如春酿。王事何曾怨独贤，室人岂忍交谪谤。大儿跟越门限，小儿咿哑语绣帐。定教舞袖掣伊凉，更想夜庖鸣瓮盎。题诗送酒君勿诮，免使退之嘲一饷。

苏潜圣挽词

妙龄驰誉百夫雄，晚节忘怀大隐中。悃悃无华真汉吏，文章尔雅称吾宗。
趋时肯负平生志，有子还应不死同。惟我闲思十年事，数行老泪寄西风。

第八卷

诗七十二首

和晁同年九日见寄

仰看鸾鹄刺天飞，富贵功名老不思。病马已无千里志，骚人长负一秋悲。
古来重九皆如此，别后西湖付与谁。遣子穷愁天有意，吴中山水要清诗。

送乔施州

恨无负郭田二顷，空有载行书五车。江上青山横绝壁，云间细路蹶飞蛇。
鸡号黑暗通蛮货，胡人谓犀为黑暗。蜂闹黄连采蜜花。共怪河南门下客，不
应万里向长沙。乔受知于吴丞相，而施州风土，大类长沙。

夜雪独宿柏仙庵

晚雨纤纤变玉霰，小庵高卧有余清。梦惊忽有穿窗片，夜静惟闻泻竹声。
稍压冬温聊得健，未濡秋旱若为耕。天公用意真难会，又作春风烂漫晴。

和孔郎中荆林马上见寄

秋禾不满眼，宿麦种亦稀。永愧此邦人，芒刺在肌肤。平生五千卷，一
字不救饥。方将怨无襦，忽复歌缁衣。堂堂孔北海，直气凜群儿。朱轮未及
郊，清风已先驰。何以累君子，十万贫与羸。滔滔满四方，我行竟安之。何
时剑关路，春山闻子规。

留别零泉

举酒属零泉，白发日夜新。何时泉中天，复照泉上人。二年饮泉水，鱼
乌亦相亲。还将弄泉手，遮日向西秦。

留别释迦院牡丹呈赵倅

春风小院却来时，壁间惟见使君诗。应问使君何处去，凭花说与春风知。
年年岁岁何穷已，花似今年人老矣。去年崔护若重来，前度刘郎在千里。

董储郎中尝知眉州与先人游过安 丘访其故居见其子希甫留诗屋壁

白发郎潜旧使君，至今人道最能文。只鸡敢忘桥公语，下马来寻董相坟。
冬月负薪虽得免，邻人吹笛不堪闻。死生契阔君休问，洒泪西南向白云。

刘贡父见余歌词数首以诗见戏聊次其韵

十载漂然未可期，那堪重作看花诗。门前恶语谁传去，醉后狂歌自不知。刺舌君今犹未戒，炙眉我亦更何词。相从痛饮无余事，正是春容最好时。

除夜大雪留潍州元日早晴遂行中涂雪复作

除夜雪相留，元日晴相送。东风吹宿酒，瘦马兀残梦。葱昞晓光开，放转余花弄。下马成野酌，佳哉谁与共。须臾晚云合，乱洒无缺空。鹅毛垂马骏，自怪骑白凤。三年东方旱，逃户连敬栋。老农释耒叹，泪入饥肠痛。春雪虽云晚，春麦犹可种。敢怨行役劳，助尔歌饭瓮。

大雪青州道上有怀东武园亭寄交代孔周翰

超然台上雪，城郭山川两奇绝，海风吹碎碧琉璃，时见三山白银阙。盖公堂前雪，绿窗朱户相明灭。堂中美人雪争妍，粲然一笑玉齿颊。就中山堂雪更奇，青松怪石乱琼丝。惟有使君游不归，五更上马愁敛眉。君不是淮西李侍中，夜入蔡州缚取吴元济。又不是襄阳孟浩然，长安道上骑驴吟雪诗。何当闭门饮美酒，无人毁誉河东守。

至济南李公择以诗相迎次其韵二首

弊裘羸马古河滨，野阔天低糝玉尘。自笑餐毡典属国，来看换酒谪仙人。宦游到处身如寄，农事何时手自亲。剩作新诗与君和，莫因风雨废鸣晨。

夜拥签歌雪水滨，回头乐事总成尘。今年送汝作太守，到处逢君是主人。聚散细思都是梦，身名渐觉两非亲。相从继烛何烦问，蝙蝠飞时日正晨。

和孔君亮郎中见赠

偶对先生尽一樽，醉看万物汹崩奔。优游共我聊卒岁，肮脏如君合倚门。只恐掉头难久住，应须倾盖便深论。固知严胜风流在，又见长身十世孙。戮字君严，勘字君胜，退之志其墓云：孔子世三十八，吾见其孙白而长身，今君亮四十八世矣。

送范景仁游洛中

小人真暗事，闲退岂公难。道大吾何病，言深听者寒。忧时虽早白，住世有还丹。得酒相逢乐，无心所遇安。去年行万里，蜀路走千盘。投老身弥健，登山意未阑。西游为樱笋，东道尽鹇鸾。杖屨携儿去，园亭借客看。折花斑竹寺，弄水石楼滩。鬻马衰怜白，惊雷怯笑韩。薛书标洞府，欧阳永叔尝游嵩山，日莫于绝壁上见苔藓成文云：神清之洞。明日复寻，不见。松盖偃天坛。试与刘夫子，重寻靖长官。刘几云，曾见人嵩山幽绝处，眼光如猫，意其为靖长官也。

次韵景仁留别

公老我亦衰。相见恨不数。临行一杯酒，此意重山岳。歌词白纛清，琴弄黄钟浊。诗新眇难和，饮少仅可学。欲参兵部选，有力谁如萃。且作东诸侯，山城雄鼓角。南游许过我，不惮千里邈。会当闻公来，倒展发一握。

书韩干牧马图

南山之下，汧渭之间，想见开元天宝年。八坊分屯隘秦川，四十万匹如云烟。骅骝騊駼骆骊骝，白鱼赤兔骅骝皇。龙颅凤颈狞且妍，奇姿逸德隐骛顽。碧眼胡儿手足鲜，岁时翦刷供帝闲。柘袍临池侍三千，红妆照日光流渊。楼下玉螭吐清寒，往来蹙踏生飞湍。众工舐笔和朱铅，先生曹霸弟子韩。厩马多肉尻脰圆，肉中画骨夸尤难，金羁玉勒绣罗鞍。鞭捶刻烙伤天全，不如此图近自然。平沙细草荒芋绵，惊鸿脱兔争后先。王良挟策飞上天，何必俯首服短辕。

送鲁元翰少卿知卫州

冗士无处著，寄身范公园。桃花忽成阴，荠麦秀已繁。闭门春画永，惟有黄蜂喧。谁人肯携酒，共醉榆柳村。髯卿独何者，一月三到门。我不往拜之，髯来意弥敦。堂堂元老后，仁人言。忆在钱塘岁，情好均弟昆。时于冰雪中，笑语作春温。欲饮径相觅，夜开丛竹轩。搜寻到篋笥，鲈醢无复存。每愧烟火中，玉腕亲炮燔。别来今几何，相对如梦魂。告我当北渡，新诗侑清樽。坡陀太行麓，汹涌黄河翻。仕宦非不遇，王畿西北垣。斯民如鱼耳，见网则惊奔。皎皎千丈清，不如尺水浑。刑政虽首务，念当养其源。一闻襦袴音，盗贼安足论。

次韵子由送蒋夔赴代州学官

功利争先变法初，典刑独守老成余。穷人未信诗能尔，倚市悬知绣不如。代北诸生渐狂简，床头杂说为爬梳。归来问雁吾何敢，疾世王符解著书。

和李邦直沂山祈雨有应

高田生黄埃，下田生苍耳。苍耳亦已无，更问麦有几。蛟龙睡足亦解惭，二麦枯时雨如洗。不知雨从何处来，但闻昌梁百步声如雷。试上城南望城北，际天菽粟青成堆。饥火烧肠作牛吼，不知待得秋成否。半年不雨坐龙慵，共怨天公不怨龙。今朝一雨聊自赎，龙神社鬼各言功。无功日盗太仓谷，嗟我与龙同此责。劝农使者不汝容，因君作诗先自劾。

宿州次韵刘泾

我欲归休瑟渐希，舞零何日著春衣。多情白发三千丈，无用苍皮四十围。晚觉文章真小技，早知富贵有危机。为君垂涕君知否，千古华亭鹤自飞。泾之兄汴，亦有文。死矣。

和孔密州五绝

见邱家园留题

大旆传闻载酒过，小诗未忍著砖磨。阳关三叠君须秘，除却胶西不解歌。来诗有渭城之句。

春步西园见寄

岁岁开园成故事，年年行乐不辜春。今年太守尤难继，慈爱聪明惠利人。
东栏梨花梨花

淡白柳深青，柳絮飞时花满城。惆怅东栏二株雪，人生看得几清明。

和流杯石上草书小诗

蜂腰鹄膝嘲希逸，春蚓秋蛇病子云。醉里自书醒自笑，如今二绝更逢君。

堂后白牡丹

城西千叶岂不好，笑舞春风醉脸丹。何似后堂冰玉洁，游蜂非意不相干。孔颇有声伎而客不见者。

和赵郎中见戏

以除伎不如东武，诗中见戏云：只有当时燕子楼。

燕子人亡三百秋，卷帘那复似扬州。西行未必能胜此，空唱崔徽上白楼。
我击藤床君唱歌，明年六十奈君何。醉颠只要装风景，莫向人前自洗磨。
赵每醉歌毕，辄曰：明年六十矣。

和子由与颜长道同游

百步洪相地筑亭种柳

平明坐衙不暖席，归来闭阁闲终日。卧闻客至倒展迎，两眼蒙笼余睡色。
城东泗水步可到，路转河洪翻雪白。安得青丝络骏马，蹙踏飞波柳阴下。奋身三丈两蹄间，振鬣长鸣身自干。少年狂兴久已谢，但忆嘉陵绕剑关。剑关大道车方轨，君自不去归何难。山中故人应大笑，筑室种柳何时还。

次韵李邦直感旧

驺骑传呼出跨坊，簿书填委入充堂。谁教案部如何武，只许清樽对孟光。
婉婉有时来入梦，温柔何日听还乡。酸寒病守尤堪笑，千步空余仆射场。

与梁先舒焕泛舟得临酿字二首

彭城古战国，孤客倦登临。汴泗交流处，清潭百丈深。故人轻千里，足茧来相寻。何以娱佳客，潭水洗君心。

老守厌簿书，先生罢函丈。风流魏晋间，谈笑羲皇上。河洪忽已过，水色绿可酿。君毋轻此乐，此乐清且放。

次韵答邦直子由四首

簿书颠倒梦魂间，知我疏慵肯见原。闲作闭门僧舍冷，病闻吹枕海涛喧。忘怀杯酒逢人共，引睡文书信手翻。欲吐狂言喙三尺，怕君瞋我却须吞。邦直屡以此见戒。

城南短李好交游，箕踞狂歌总自由。尊主庇民君有道，乐天知命我无忧。醉呼妙舞留连夜，闲作清诗断送秋。萧洒使君殊不俗，樽前容我揽须不。

老弟东来殊寂寞，故人留饮慰酸寒，草荒城角开新径，雨入河洪失旧滩。车马追陪迹未扫，唱酬往复字应漫。此诗更欲凭君改，待与江南子布看。

君虽为我此迟留，别后凄凉我已忧。不见便同千里远，退归终作十年游。恨无杨子一区宅，懒卧元龙百尺楼。闻道鹓鸿满台阁，网罗应不到沙鸥。

司马君实独乐园

青山在屋上，流水在屋下。中有五亩园，花竹秀而野，花香袭杖屦，竹色侵盥罍。樽酒乐余春，棋局消长夏。洛阳古多士，风俗犹尔雅。先生卧不出，冠盖倾洛社。虽云与众乐，中有独乐者。才全德不形，所贵知我寡。先生独何事，四海望陶冶。儿童诵君实，走卒知司马。持此欲安归，造物不我舍。名声逐吾辈，此病天所赭。抚掌笑先生，年来效暗哑。

送颜复兼寄王巩

彭城官居冷如水，谁从我游颜氏子。我衰且病君亦穷，衰穷相守正其理。胡为一朝舍我去，轻衫触热行千里。问君无乃求之欤，答我不然聊尔耳。京师万事日日新，故人如故今有几，君知牛行相君宅，扣门但觅王居士。清诗草圣俱入妙，别后寄我书连纸。苦恨相思不相见，约我重阳嗅霜蕊。君归可唤与俱来，未应指目妨进拟。大一老仙闲不出，张安道为太一宫使。踵门问道今时矣。因行过我路几何，愿君推挽加鞭捶。吾济一醉岂易得，买羊酿酒从今始。

蝎 虎

黄鸡啄蝎如啄黍，窗间守宫称蝎虎。暗中缴尾伺飞虫，巧捷功夫在腰膂。跂跂脉脉善缘壁，陋质从来谁比数。今年岁旱号蜥蜴，狂走儿童闹歌舞。能衔渠水作冰雹，便向蛟龙觅云雨。守宫努力搏苍蝇，明年岁旱当求汝。

辙幼从子瞻兄读书未尝一日相舍既壮将

游宦四方读韦苏州诗有云那知风雨夜复
此对床眠惻然感之乃相约早退为闲居之
乐故子瞻始为凤翔幕官留诗与辙曰夜雨
何时听萧瑟其后子瞻通守余杭复移守胶
西而辙滞留于淮阳济南不见者七年熙宁
十年二月始复会于渲濮之间相从彭城留
百余日时宿于逍遥堂追感前约作二小诗

逍遥堂后千寻木，长送中宵风雨声。误喜对床对旧约，不知漂泊在彭城。
秋来东阁凉如水，客去山公醉似泥。困卧北窗呼不醒，风吹松竹雨凄凄。

子由将赴南都与余会宿于逍遥堂作两绝
句读之殆不可为怀因和其诗以自解余观
子由自少旷达天资近道又得至人养生长
年之诀而余亦窃闻其一二以为今者宦游
相别之日浅而异时退休相从之日长既以
自解且以慰子由云

别期渐近不堪闻，风雨萧萧已断魂。犹胜相逢不相识，形容变尽语音存。
但令朱雀长金花，此别还同一转车。五百年间谁复在，会看铜狄两咨嗟。

留题石经院三首

葱茜门前路，行穿翠密中。却来堂上看，岩谷意无穷。
夭矫庭中桧，枯枝鹊踏消。瘦皮缠鹤骨，高顶转龙腰。
窈窕山头井，潜通伏涧清。欲知深几许，听放轳轳声。

过云龙山人张天骥

郊原雨初足，风日清且好。病守亦欣然，肩輿白门道。荒田咽蛩蚓，村
巷悬梨枣。下有幽人居，闭门空雀噪。西风高正厉，落叶纷可扫。孤僮卧斜
日，病马放秋草。墟里通有无，垣墙任摧倒。君家本冠盖，丝竹闹邻保。脱
身声利中，道德自濯澡。躬耕抱羸疾，奉养百岁老。诗书膏吻颊，菽水媚翁
温。饥寒天随子，杞菊自撷笔。慈孝董邵南，鸡狗相乳抱。吾生如寄耳，归
计失不早。故山岂敢忘，但恐迫华皓。从君学种秫，斗酒时相劳。

赠王仲素寺丞 名景纯

养气如养儿，弃官如弃泥。人皆笑子拙，事定竟谁迷。归耕独患贫，问
子何所贳。尺宅足自庇，寸田有余畦。明珠照短褐，陋室生虹霓。虽无孔方
兄，顾有法喜妻。弹琴一长啸，不答阮与嵇。曹南刘夫子，名与子政齐。家
有鸿宝书，不铸金 蹄。促膝问道要，遂蒙分刀圭。不忍独不死，尺书肯见
梯。我生本强鄙，少以气自挤。孤舟倒江河，赤手揽象犀。年来稍自笑，留
气下暖脐。苦恨闻道晚，意象飒已凄。空见孙思邈，区区赋病梨。

阳关词三首

赠张继愿

受降城下紫髯郎，戏马台南古战场。恨君不取契丹首，金甲牙旗归故乡。

答李公择

济南春好雪初晴，行到龙山马足轻。使君莫忘霁溪女，时作阳关肠断声。

中秋月

暮云收尽溢清寒，银汉无声转玉盘。此生此夜不长好，明月明年何处看。

和孔周翰二绝

再观邸园留题

小园香雾晓蒙笼，醉手狂词未必工。鲁望录诗应有取，曲收彤管邶鄘风。

观净观堂效韦苏州诗

弱羽巢林在一枝，幽人蜗舍两相宜。乐天长短三千首，却爱韦郎五字诗。

京师哭任遵圣

十年不还乡，儿女日夜长。岂惟催老大，渐复成调丧。每闻音旧亡，涕洟声辄放。老任况奇逸，先子推辈行。文章小得誉，诗语尤清壮。吏能复所长，谈笑万夫上。自喜作剧县，偏工破豪党。奋髯走猾吏，嚼齿对奸将。哀哉命不偶，每以才得谤。竟使落穷山，青衫就黄壤。宦游久不乐，江海永相望。退耕本就君，时节相劳饷。此怀今不遂，归见累累葬。望哭国西门，落日衔千嶂。平生惟一子，抱负珠在掌。见之韶龢中，已有食牛量。他年如入洛，生死一相访。惟有王浚冲，心知中散状。

答任师中家汉公

先君昔未仕，杜门皇祐初。道德无贫贱，风采照乡闾。何尝疏小人，小人自阔疏。出门无所诣，老史在郊墟。门前万竿竹，堂上四库书。高树红消梨，小池白芙渠。常呼赤脚婢，雨中撷园蔬。矫矫任夫子，罢官还旧庐。是时里中儿，始识长者车。烹鸡酌白酒，相对欢有余。有如庞德公，往还葛与徐。妻子走堂下，主人竟谁欤。我时年尚幼，作赋慕相如。侍立看君谈，精悍实起予。岁月曾几何，耆老逝不居。史侯最先没，孤坟拱桑樗。我亦涉万里，清血满襟祛。漂流二十年，始悟万缘虚。独喜任夫子，老佩刺史鱼。威

行乌白蛮，解辫请冠裾。方当入奏事，清庙陈璠玑。胡为厌轩冕，归意不少纾。上蔡有良田，黄沙走清渠。罢亚百顷稻，雍容十年储。闲随李丞相，搏射鹿与猪。苍鹰十斤重，猛犬如黄驹。岂比陶渊明，穷苦自把锄。我今四十二，衰发不满梳。彭城古名郡，乏人偶见除。头颅已可知，几何不樵渔。会当相从去，芒鞋老菑畬。念子瘴江边，怀抱向谁撝。赖我同年友，相欢出同舆。冰盘荐文鮓，鮓鮓也，戊沪常有。玉斝倾浮蛆。醉中忽思我，清诗缀琼踞。知我少所谐，教我时卷舒。世事日反覆，翩如风中 。雀罗吊廷尉，秋扇悲婕妤。升沉一何速，喜怒纷众狙。作诗谢二子，我师宁与蓬。

初别子由

我少知子由，天资和而清。好学者益坚，表里渐融明。岂独为吾弟，要是贤友生。不见六七年，微言谁与赓。

常恐坦率性，放纵不自程。会合亦何事，无言对空枰。使人之意消，不善无由萌。森然有六女，包裹布与荆。

无忧赖贤妇，黎藿等大烹。使子得行意，青衫陋公卿。明日无晨炊，倒床作雷鸣。秋眠我东阁，夜听风雨声。

悬知不久别，妙理重细评。昨日忽出门，孤舟转西城。归来北堂上，古屋空峥嵘。退食误相从，入门中自惊。

南都信繁会，人事水火争。念当闭阁坐，颓然寄聋盲。妻子亦细事，文章固虚名。会须扫白发，不复用黄精。

次韵吕梁仲屯田

雨叶风花日夜稀，一杯相属竟何时。空虚岂敢酬琼玉，枯朽犹能出菌芝。门外吕梁从迅急，胸中云梦自透迟。待君笔力追灵运，莫负南台九日期。

章质夫寄惠崔徽真

玉钗半脱云垂耳，亭亭芙蓉在秋水。当时薄命一酸辛，千古华堂奉君子。水边何处无丽人，近前试看丞相嗔。

不如丹青不解语，世间言语元非真。知君被恼更愁绝，卷赠老夫惊老拙。为君援笔赋梅花，未害广平心似铁。

王巩屡约重九见访既而不至以诗送将官
梁交且见寄次韵答之交颇文雅不类武人
家有侍者甚惠丽

知君月下见倾城，破恨悬知酒有兵。老守无何惟日饮，将军竟病自诗鸣。花枝不共秋欹帽，笔阵空来夜祈营。爱惜微官将底用，他年只好写铭旌。

台头寺雨中送李邦直赴史馆分韵得
忆字人字兼寄孙巨源二首

霜林日夜西风急，老送君归百忧集。清歌窈眇人行云，云为不行天为泣。
红叶黄花秋正乱，白鱼紫蟹君须忆。凭君说向髯将军，衰鬓相逢应不识。

珥笔西归近紫袁，太平典册不缘麟。付君此事宁论晋，载我当时旧过秦。
门外想无千斛米，墓中知有百年人。看君两眼明如镜，休把春秋坐素臣。

代书答梁先

此身与世真悠悠，苍颜华发谁汝留。强名太守古徐州，忘归不如楚沐猴。
鲁人岂独不知丘，藉躡夫子无罪尤。异哉梁子清而修，不远千里从我游。
了然正色悬双眸，世之所驰子独不。一经通明传节侯，小楷精绝规摹欧。
梁生学欧阳公书。我衰废学懒且偷，畏见问事贾长头。别来红叶黄花秋，
夜梦见之起坐愁。遗我驳石盆与匝，黑质白章声琳球，谓言山石生涧沟，
追琢尚可王公差。感子佳意能无酬，反将木瓜报珍投。学如富贾在博收，
仰取俯拾无遗筹。道大如天不可求，修其可见致其幽。愿子笃实慎勿浮，
发愤忘食乐忘忧。

九日邀仲屯田为大水所隔以诗见寄次其韵

无复龙山对孟嘉，西来河伯意雄夸。霜风可使吹黄帽，舟人黄帽，土胜水也。
尊酒那能泛浪花。漫遣鲤鱼传尺素，却将燕石报琼华。何时得见悲秋老，
醉里题诗字半斜。

河 复 并叙

熙宁十年秋，河决澶渊，注巨野，入淮泗，自澶魏以北皆绝流，而齐楚大被其害。
彭门城下水二丈八尺，七十余日不退。吏民疲于守御。十月十三日，澶州大风终日，
既止，而河流一枝已复故道，闻之喜甚。庶几可塞乎？乃作河复诗，歌之道路，
以致民愿而迎神休，盖守土者之志也。

君不见，西汉元光元封间，河决瓠子二十年。巨野东倾淮泗满，楚人恣食黄河鱣。
万里沙回封禅罢，初遣越巫沉白马。河公未许人力穷，薪刍万计随流下。
吾君仁圣如帝尧，百神受职河神骄。帝遣风师下约束，北流夜起澶州桥。
东风吹冻收微禄，神功不用淇园竹，楚人种麦满河淤，仰看浮槎栖古木。

韩干马十四匹

二马并驱攒八蹄，二马宛颈鬣尾齐。一马任前双举后，一马却避长鸣嘶。
老髯奚官骑且顾，前身作马通马语。后有八匹饮且行，微流赴吻若有声。
前者既济出林鹤，后者欲涉鹤俯啄。最后一匹马中龙，不嘶不动尾摇风。
韩生画马真是马，苏子作诗如见画。世无伯乐亦无韩，此诗此画谁当看。

有言郡东北荆山下可以沟畎积水因与吴
正字王户曹同往相视以地多乱石不果还

游圣女山山有石室如墓而无棺椁或云宋
司马桓 墓二子有诗次其韵二首

侧手区区未易遮，奔流一瞬卷千家，共疑智伯初围赵，犹有张汤欲漕斜。
已坐迂疏来此地，分将劳苦送生涯。使君下策真堪笑，隐隐惊雷响踏车。

茫茫清泗绕孤岑，归路相将得暂临。试著芒鞋穿荦确，更然松炬照幽深。
纵令司马能鑿石，奈有中郎解摸金。强写苍崖留岁月，他年谁识此时心。

赠写御容妙善师

忆昔射策干先皇，珠帘翠幄分两厢。紫衣中使下传诏，跪捧再拜闻天香。
仰观眩晃目生晕，但见晓色开扶桑。迎阳晚出步就坐，绛纱玉斧光照廊。野
人不识日月角，仿佛尚记重瞳光。三年归来真一梦，桥山松桧凄风霜。天容
玉色谁敢画，老师古寺昼闭房。梦中神授心有得，觉来信手笔已忘。幅巾常
服俨不动，孤臣入门涕自滂。元老情坐须眉古，虎臣立侍冠剑长。平生惯写
龙凤质，肯顾草间猿与獐。都人踏破铁门限，黄金白壁空堆床。尔来摹写亦
到我，谓是先帝白发郎。不须览镜坐自了，明年乞身归故乡。

哭刁景纯

读书想前辈，每恨生不早。纷纷少年场，犹得见此老。此老如松柏，不
受霜雪槁。直从毫末中，自养到合抱。宏材乏近用，千岁自枯倒。文章余正
始，风节贯华皓。平生为人耳，自为薄如缟。是非虽难齐，反覆看愈好。前
年旅吴越，把酒庆寿考。扣门无晨夜，百过迹未扫。但知从德公，未省厌丘
嫂。别时公八十，后会知难保。昨日故人书，连年丧公媪。景纯妻先亡。伤
心范桥水，漾漾舞寒藻。华堂不见人，瘦马空恋早。我欲江东去，匏樽酌行
潦。镜湖无贺监，恸哭稽山道。忍见万松冈，荒池没秋草。

答吕梁仲屯田

乱山合沓围彭门，官居独在悬水村。吕梁地名。居民萧条杂糜鹿，小市
冷落无鸡豚。黄河西来初不觉，但讶清泗流奔浑。夜间沙岸鸣瓮盎，晓看雪
浪浮鹏鲲。吕梁自古喉吻地，万顷一抹何由吞。坐观入市卷闾井，吏民走尽
余王尊。计穷路断欲安适，吟诗破屋愁鸢蹲。岁寒霜重水归壑，但见屋瓦留
沙痕。入城相对如梦寐，我亦仅免为鱼鼈。旋呼歌舞杂诙笑，不借饮酌空瓶
盆。念君官舍冰雪冷，新诗美酒聊相温。人生如寄何不乐，任使绛 烧黄昏。
宣房未筑淮泗满，故道堙灭疮痍存。明年劳苦应更甚，我当奋锄先黥髡。付
君万指伐顽石，千锤雷动苍山根。高城如铁洪口快，谈笑却扫看崩奔。农夫
掉臂免狼顾，秋谷布野如云屯。还须更置软脚酒，为君击鼓行金樽。

张寺丞益斋

张子作斋舍，而以益为名。吾闻之夫子，求益非速成。譬如远游客，日
夜事征行。今年适燕蓟，明年走蛮荆。东观尽沧海，西涉渭与泾。归来闭户

坐，八方在轩庭。又如学医人，识病由饱更。风雨晦明淫，跛臂暗聋盲。虚实在其脉，静躁在其情。荣枯在其色，寿夭在其形。苟能阅千人，望见知死生。为学务日益，此言当自程。为道贵日损，此理在既盈。愿君书此诗，以为益斋铭。

答孔周翰求书与诗

身闲曷不长闭口，天寒正好深藏手。吟诗写字有底忙，未脱多生宿尘垢。不蒙讥诃子厚疾，反更刻画无盐丑。

征西自有家鸡肥，太白应惊饭山瘦。与君相从知几日，东风待得花开否。拨弃万事勿复谈，百觚之后那词酒。

送李公恕赴阙

君才有如切玉刀，见之凛凛寒生毛。愿随壮士斩蛟蜃，不愿腰间缠锦条。用违其才志不展，坐与胥史同疲劳。忽然眉上有黄气，吾君渐欲收英髦。立谈左右俱动色，一语径破千言牢。我顷分符在东武，脱略万事惟嬉遨。尽坏屏障通内外，仍呼骑曹为马曹。君为使者见不问，反更对饮持双螯。酒酣箕坐语惊众，杂以嘲讽穷诗骚。世上小儿多忌讳，独能容我真贤豪。为我买田临汶水，逝将归去诛蓬蒿。安能终老尘土下，俯仰随人如桔槔。

第九卷

诗六十八首

春 菜

蔓菁宿根已生叶，韭牙戴土拳如蕨。烂蒸香荠白鱼肥，碎点青蒿凉饼滑。宿酒初消春睡起，细履幽畦掇芳辣。茵藤甘菊不负渠，鲙缕堆盘纤手抹。北方昔寒今未已，雪底坡棱如铁甲。岂如吾蜀富冬蔬，霜叶露牙寒更茁。久抛菘葛犹细事，苦笋江豚那忍说。明年投劾径须归，莫待齿摇并发脱。

送郑户曹

游遍钱塘湖上山，归来文字带芳鲜。羸僮瘦马从吾饮，陋巷何人似子贤。公业有田常乏食，广文好客竟无毡。东归不趁花时节，开尽春风谁与妍。

虔州八境图八首

坐看奔湍绕石楼，使君高会百无忧。三犀窃鄙秦太守，八咏聊同沈隐侯。涛头寂寞打城还，章赣台前莫霭寒。倦客登临无限思，孤云落日长安。白鹊楼前翠作堆，萦云岭路若为开。故人应在千山外，不寄梅花远信来。

朱楼深处日微明，皂盖归时酒半醒。薄莫渔樵人去尽，碧溪青嶂绕螺亭。使君那暇日参禅，一望丛林一怅然。成佛莫教灵运后，着鞭从使祖生先。却从尘外望尘中，无限楼台烟雨濛。山水照人迷向背，只寻孤塔认西东。烟云缥缈郁孤台，积翠浮空雨半开。想见之罘观海市，绛宫明灭是蓬莱。回峰乱嶂郁参差，云外高人世得知。谁向空山弄明月，山中木客解吟诗。

读孟郊诗二首

夜读孟郊诗，细字如牛毛。寒灯照昏花，佳处时一遭。孤芳擢荒秽，苦语余诗骚。水清石凿凿，湍激不受篙。初如食小鱼，所得不偿劳。又似煮彭亨，竟日嚼空螯。要当斗憎清，未足当韩豪。人生如朝露，日夜火消膏。何苦将两耳，听此寒虫号。不如且置之，饮我玉色醪。

我憎孟郊诗，复作孟郊语。饥肠自鸣唤，空壁转饥鼠。诗从肺腑出，出辄愁肺腑。有如黄河鱼，出膏以自煮。尚爱铜斗歌，鄙俚颇近古。桃兮射鸭罢，独速短蓑舞。不忧踏船翻，踏浪不踏土。吴姬霜雪白，赤脚浣白纻。嫁与踏浪儿，不识离别苦。歌君江湖曲，感我长羁旅。

访张山人得山中字二首

鱼龙随水落，猿鹤喜君还。旧隐丘墟外，新堂紫翠间。野麋驯杖屨，幽桂出棒菅。洒扫门前路，山公亦爱山。张故居为大水所坏，新卜此室，故居之东。

万木锁云龙，山名。天留与戴公。路迷山向背，人在灊西东。荠麦余春雪，樱桃落晚风。入城都不记，归路醉眠中。

送孔郎中赴陕郊

惊风击面黄沙走，西出靖函脱尘垢。使君来自古徐州，声震河潼殷关右。十里长亭闻鼓角，一川秀色明花柳。北临飞槛卷黄流，南望青山如岷首。东风吹开锦绣谷，绿水翻动蒲荡酒。讼庭生草数开樽，过客如云牢闭口。

与梁左藏会饮傅国博家

将军破贼自草檄，论诗说剑俱第一。彭城老守本虚名，识字劣能欺项籍。风流别驾贵公子，欲把笙歌暖锋镝。红旆朝开猛士噪，翠帷暮卷佳人出。东堂醉卧呼不起，啼鸟落花春寂寂。试教长笛傍耳根，一声吹裂阶前石。

寒食日答公择三绝次韵

从来苏李得名双，只恐全齐笑陋邦。诗似悬河供不办，故欺张籍陇头泷。簿书髻鼓不知春，佳句相呼赖故人。寒食德公方上冢，归来谁主复谁宾。巡城已困尘埃眯，执朴仍遭虬虱缘。欲脱布衫携素手，试开病眼点黄连。来诗谓仆布衫督役。

约公择饮是日大风

先生生长匡庐山，山中读书三十年。旧闻饮水师颜渊，不知治剧乃所便。偷儿夜探赤白丸，奋髯忽逢朱子元。半年群盗诛七百，谁信家书藏九千。春风无事秋月闲，红妆执乐豪且妍。紫衫玉带两部全，琵琶一抹四十弦。客来留饮不计钱，齐人爱公如子产。儿啼卧路呼不还，我惭山郡空留连。牙兵部吏笑我寒，邀公饮酒公无难。约束官奴买花钿，薰衣理鬓夜不眠。晓来颠风尘暗天，我思其由岂坐愠。作诗愧谢公笑让，归来瑟缩愈不安。要当啖公八百里，豪气一洗儒生酸。

坐上赋戴花得天字

清明初过酒阑珊，折得奇葩晚更妍。春色岂关吾辈事，老狂聊作坐中先。醉吟不耐欹纱帽，起舞从教落酒船。结习渐消留不住，却须还与散花天。

夜饮次韵毕推官

簿书丛里过春风，酒圣时时且复中。红烛照庭嘶驷裹，黄鸡催晓唱玲球。老来渐减金钗兴，醉后空惊玉箸工。毕善篆月未上时应早散，免教壑谷问吾公。

续丽人行

李仲谋家有周昉画背面欠伸
年人极精戏作此诗

深宫无人春日长，沉香亭北百花香。美人睡起薄梳洗，燕舞莺啼空断肠。
画工欲画无穷意，背立东风初破睡。若教回首却嫣然，阳城下蔡俱风靡。
杜陵饥客眠长寒，赛驴破帽随金鞍。隔花临水时一见，只许腰支背后看。
心醉归来茅屋底，方信人间有西子。君不见孟光举案与眉齐，何曾背面伤春啼。

闻李公择饮傅国博家大醉二首

儿童拍手闹黄昏，应笑山公醉习园。纵使先生能一石，主人未肯独留髡。
不肯惺惺骑马回，玉山知为玉人颓。紫云有语君知否，莫唤分司御史来。

起伏龙行 并叙

徐州城东二十里有石潭，父老云与泗水通。增损清浊，相应不差。时有河鱼出焉。元丰元年春旱，或云置虎头潭中，可以致雷雨。用其说，作起伏龙行一首。

何年白竹千钩弩，射杀南山雪毛虎。至今颅骨带霜牙，尚作四海毛虫祖。
东方久旱千里赤，三月行人口生土。碧潭近在古城东，神物所蟠谁敢侮。
上欹苍石拥岩窦，下应清河通水府。眼光作电走金蛇，鼻息为云擢烟缕。
当年负图传帝命，左右羲轩诏神禹。尔来怀宝但贪眠，满腹雷霆暗不吐。
赤龙白虎战明日，是月丙辰，明日庚寅。倒卷黄河作飞雨。嗟吾岂乐斗两雄，有事径须烦一怒。

闻公择过云龙张山人辄
往从之公择有诗戏用其韵

我生固多忧，肉食常苦墨。轩然就一笑，犹得好饮力。闻君过云龙，对酒两静默。
急携清歌女，出郭及未吴。一欢难力致，邂逅有胜持。喧蜂集晚花，乱雀啁丛棘。
山人乐此耳，寂寞准时侧。何当求好人，聊使治要。使君自孤愤，此理谁相直。
不如学养生，一气服千息。

送李公择

嗟余寡兄弟，四海一子由。故人虽云多，出处不我谋。弓车无停招，逝去势莫留。
仅存今几人，各在天一隅。有如长庚月，到晓烂不收。宜我与夫子，相好手足侔。
比年两见之，宾主更献酬。乐哉十日饮，衍衍和不流。论事到深夜，僵仆铃与驹。
颇尝见使君，有客如此不。欲别不忍言，惨惨集百忧。念我野夫兄，知名三十秋。
已得其为人，不待风马牛。他年林下见，倾盖如白头。

送笋芍药与公择二首

久客厌虏馐，蜀人谓东北人虏子。枵然思南烹。故人知我意，千里寄竹萌。骈头玉婴儿，一一脱锦。庖人应未识，旅人眼先明。我家拙厨膳，彘肉苇芜菁。送与江南客，烧煮配香粳。

今日忽不乐，折尽园中花。园中亦何有，芍药袅残葩。久旱复遭雨，纷披乱泥沙。不折亦安用，折去还可嗟。弃掷亮未能，送与谪仙家。还将一枝春，插向两髻丫。

和孙莘老次韵

去国光阴春雪消，还家踪迹野云飘。功名正自妨行乐，迎送才堪博早朝。虽去友朋亲吏卒，却辞馋谤得风谣。今年我亦江东去，不问繁雄与寂寥。

游张山人园

壁间一轴烟萝子，盆里千枝锦被堆。惯与先生为酒伴，不嫌刺史亦颜开。纤纤入麦黄花乱，飒飒催诗白雨来。闻道君家好井水，归轩乞得满瓶回。

杜介熙熙堂

崎岖世路最先回，窈窕华堂手自开。咄咄何曾书怪事，熙熙长觉似春台。白砂碧玉味方永，黄纸红旗心已灰。遥想闭门投辖饮，鸱弦铁拨响如雷。

次韵答刘泾

吟诗莫作秋虫声，天公怪汝钩物情，使汝未老华发生。芝兰得雨蔚青青，何用自播以出馨。细书千纸杂真行，新音百变口如莺。异义蜂起弟子争，舌翻涛澜卷齐城。万卷堆胸兀相撑，以病为乐子未惊。我有至味非煎烹，是中之乐吁难名。绿槐如山暗广庭，飞虫绕耳细而清。败席展转卧见经，亦自不嫌翠织成。意行信足无沟坑，不识五郎呼作卿。吏民哀我老不明，相戒毋复烦鞭刑。时临泗水照星星，微风不起镜面平。安得一舟如叶轻，卧闻邮签报水程。尊羹羊酪不须评，一饱且救饥肠鸣。

携妓乐游张山人园

大杏金黄小麦熟，堕巢乳鹊拳新竹。故将俗物恼幽人，细马红妆满山谷。提壶劝酒意虽重，杜鹃催归声更速。酒阑人散却关门，寂历斜阳挂疏木。

种德亭 并叙

处士王复家于钱塘，为人多技能而医尤精。期于活人而已，不志于利。筑室候潮门外，治园圃，作亭榭，以与贤士大夫游，惟恐不及，然终无所求。人徒知其接花艺果之勤，而不知其所种者德也，乃以名其亭，而作诗以遗之。

小圃旁城郭，闭门芝术香。名随市人隐，德与佳木长。元化善养性，仓公多禁方。所活不可数，相逢旋相忘。但喜宾客来，置酒花满堂。我欲东南去，再观双稽苍。山茶想出屋，湖橘应过墙。木老德亦熟，吾言岂荒唐。

文与可有诗见寄云待将一段鹅
溪绢扫取寒梢万尺长次韵答之

为爱鹅溪白茧光，扫残鸡距紫毫芒。世间那有千寻竹，月落庭空影许长。

闻辩才法师复归上天竺以诗戏问

道人出山去，山色如死灰。白云不解笑，青松有余哀。忽闻道人归，鸟语山容开。神光出宝髻，法雨洗浮埃。想见南北山，花发前后台。寄声问道人，借禅以为诙。何所闻而去，何所见而回。道人笑不答，此意安在哉。昔年本不住，今者亦无来。此语竟非是，且食白杨梅。

和子由送将官梁左藏仲通

雨足谁言春麦短，城坚不怕秋涛卷。日长惟有睡相宜，半脱纱巾落纨扇。芳草不锄当户长，珍禽独下无人见。觉来身世都是梦，坐久枕痕犹著面。城西忽报故人来，急扫风轩炊麦饭。徐州所出，伏波论兵初矍铄，中散谈仙更清远。南都从事亦学道，不恤肠空夸脑满。问羊他日到金华，应许相将游阆苑。黄初平之兄，寻其弟于金华山。

次韵秦观秀才见赠秦与孙
莘老李公择甚熟将入京应举

夜光明月非所投，逢年遇合百无忧。将军百战竟不侯，伯郎一斗得凉州。翘关负重君无力，十年不入纷华域。故人坐上见君文，谓是古人吁莫测。新诗说尽万物情，硬黄小字临黄庭。故人已去君未到，空吟河畔草青青。谁谓他乡各异县，天遣君来破吾愿。一闻君语识君心，短李髯孙眼中见。江湖放浪久全真，忽然一鸣惊倒人。从横所值无不可，知君不怕新书新。千金弊帚那堪换，我亦淹留岂长筹。山中既未决同归，我聊尔耳君其漫。

仆曩于长安陈汉卿家见吴道子画佛碎烂可惜
其后十余年复见之子鲜于子骏家则已装背
完好子骏以见遗作诗谢之

贵人金多身复闲，争买书画不计钱。已将铁石充逸少，殷铁石，梁武帝时人。今法帖大王书中有铁石字。更补朱繇为道玄。世所收吴画。多朱繇笔也。烟熏屋漏装玉轴，鹿皮苍壁知谁贤。吴生画佛本神授，梦中化作飞空仙。觉来落笔不经意，神妙独到秋毫颠。我昔长安见此画，叹惜至宝空潜然。素丝断续不忍看，已作胡蝶飞联翩。君能收拾为补缀，体质散落嗟神全。志公仿佛见刀尺，修罗天女犹雄妍。如观老杜飞鸟句，脱字欲补知无缘。问君乞

得良有意，欲将俗眼为洗滌。贵人一见定羞作，锦囊千纸何足捐。不须更用博麻缕，付与一炬随飞烟。

雨中过舒教授

疏疏帘外竹，浏浏竹间雨。窗扉静无尘，几砚寒生雾。美人乐幽独，有得缘无慕。坐依蒲褐禅，起听风瓠语。客来淡无有，洒扫凉冠屨。浓茗洗积昏，妙香净浮虑。归来北堂暗，一一微萤度。此生忧患中，一饷安闲处。飞鸢悔前笑，黄犬悲晚悟。自非陶静节，谁识此间趣。

次韵舒教授寄李公择

草书妙绝吾所兄，真书小低犹抗行。论文作诗俱不敌，看君谈笑收降旌。去年逾月方出昼，予去年留齐月余。为君剧饮几濡首，今年过我虽少留，寂寞陶潜方止酒。此行公择病酒，多不饮。别时流涕揽君须，悬知此欢堕空虚。松下从横余展齿，门前 轳想君车。怪君一身都是德，近之清润沦肌骨。细思还有可恨时，不许蓝桥见倾国。公择有婢，名云英，屡欲出不果。

送郑户曹

水绕彭祖楼，山围戏马台。古来豪杰地，千岁有余哀。隆准飞上天，重瞳亦成灰。白门下吕布，大星陨临淮。尚想刘德舆，置酒此徘徊。尔来苦寂寞，废圃多苍苔。河从百步响，山到九里回。山水自相激，夜声转风雷。荡荡清河壖，黄楼我所开。秋月堕城角，春风摇酒杯。迟君为坐客，新诗出琼瑰。楼成君已去，人事固多乖。他年君倦游，白首赋归来。登楼一长啸，使君安在哉。

次韵黄鲁直见赠古风二首

佳谷卧风雨，莫秀登我场。陈前漫方丈，玉食惨无光。大哉天宇间，美恶更臭香。君看五六月，飞蚊殷回廊。兹时不少假，俯仰霜叶黄。期君蟠桃枝，千岁终一尝。顾我如苦李，全生依路傍。纷纷不足愠，悄悄徒自伤。

空山学仙子，妄意笙箫声。千金得奇药，开视皆豨苓。不知市人中，自有安期生。今君已度世，坐阅霜中蒂。摩挲古铜人，岁月不可计。阆风安在哉，要君相指似。

次韵答舒教授观余所藏墨

异时长笑王会稽，野鹜臃腥污刀几。莫年却得庾安西，自厌家鸡题六纸。二子风流冠当代，顾与儿童争愠喜。秦王十八已龙飞，嗜好晚将蛇蚓比。我生百事不挂眼，时人缪说云工此。世间有癖念谁无，倾身障麓尤堪鄙。一生当著几两屐，定心肯为微物起。此墨足支三十年，但恐风霜侵发齿。非人磨墨磨人，瓶应未罄壘先耻。逝将振衣归故国，数亩荒园自锄理。作书寄君君莫笑，但觅来禽与青李。一螺点漆便有余，万灶烧松何处使。君不见永宁

第中捣龙麝，列屋闲居清且美。倒晕连眉秀岭浮，双鸦画鬓香云委。时间五斛赐蛾绿，不借千金求獭髓。闻君此诗当大笑，寒窗冷砚冰生水。

送郑户曹赋席上果得榷子

彼美玉山果，粲为金盘实。瘴雾脱蛮溪，清樽奉佳客。客行何以赠，一语当加璧。祝君如此果，德膏以自泽。驱攘三彭仇，已我心腹疾。愿君如此木，凛凛做霜雪。所为君倚几，滑净不容削。物微兴不浅，此赠毋轻掷。

送胡掾

乱叶和凄雨，投空如散丝。流年一如此，游子去何之。节义古所重，艰危方自兹。他时著清德，仍复畏人知。

答仲屯田次韵

秋来不见溱陂岑，千里诗盟忽重寻。大木百围生远籁，朱弦三叹有遗音。清风卷地收残暑，素月流天扫积阴。欲遣何人赓绝唱，满阶桐叶候虫吟。

密州宋国博以诗见纪 在郡杂咏次韵答之

吾观二宋文，字字照缣素。渊源皆有考，奇险或难句。后来邈无继，嗣子其殆庶。胡为尚流落，用舍真有数。当时苟悦可，慎勿笑秋杜。斫窗谁赴救，袖手良优裕。山城辱吾继，缺短烦遮护。昔年缪陈诗，无人聊瓦注。子今赓绝唱，外重中已惧。何当附家集，击壤追咸 。

答范祖禹

吾州下邑生刘季，谁数区区张与李。来时有张仆射、李临淮之句。重瞳遗迹已尘埃，惟有黄楼临泗水。郡有厅事，俗谓之霸王厅，相传不可坐，仆拆之以盖黄楼。而今太守老且寒，侠气不洗儒生酸。犹胜白门穷吕布，欲将鞍马事曹瞒。

次韵答王定国

每得君诗如得书，宣心写妙书不如。眼前百种无不有，知君一以诗驱除。传闻都下十日雨，青泥没马街生鱼。旧雨来人今不来，油然独酌卧清虚。堂名。我虽作郡古云乐，山川信美非吾庐。愿君不废重九约，念此衰冷勤呵嘘。

芙蓉城 并叙

世传王迥字子高，与仙人周瑶英游芙蓉城。元丰元年三月，余始识子高，问之信然，乃作此诗，极其情而归之。正亦变风止乎礼义之意也。

芙蓉城中花冥冥，谁其主者石与丁。珠帘玉案翡翠屏，云舒霞卷千僊停。中有一人长眉青，炯如微云淡疏星。往来三世空练形，竟坐误读黄庭经。天门夜开飞爽灵，无复白日乘云軿。俗缘千劫磨不尽，翠被冷落凄余馨。因过缙山朝帝廷，夜闻笙箫弭节听。飘然而来谁使令，皎如明月入窗棂。忽然而去不可执，寒衾虚幌风泠泠。仙宫洞房本不扁，梦中同蹑凤凰翎。径渡万里如奔霆，玉楼浮空耸亭亭。天书云篆谁所铭，绕楼飞步高矜嶷。仙风锵然韵流铃，蓬蓬形开如酒醒，芳卿寄谢空丁宁。一朝覆水不返瓶，罗中别泪空荧荧。春风花开秋叶零，世间罗绮纷膻腥。此生流浪随沧溟，偶然相值两浮萍。愿君收视观三庭，勿与嘉谷生蝗螟。从渠一念三千龄，下作人间尹与邢。

和鲜于子骏郢州新堂月夜二首 前次韵后不次

去岁游新堂，春风雪消后。池中半篙水，池上千尺柳。佳人如桃李，胡蝶入衫褱。山川今何许，疆野已分宿。岁月不可思，馥若船放溜。繁华真一梦，寂寞两荣朽。惟有当时月，依然照杯酒。应怜船上人，坐稳不知漏。

明月入华池，反照池上堂。堂中隐几人，心与水月凉。风萤已无迹，露草时有光。起观河汉流，步履响长廊。名都信繁会，千指调丝簧。先生病不饮，童子为烧香。独作五字诗，清绝如韦郎。诗成月渐侧，皎皎两相望。

送将官梁左藏赴莫州

燕南垂，赵北际，其间不合大如砺。至今父老哀公孙，蒸土为城铁作门。城中积谷三百万，猛士如云骄不战。一朝鼓角鸣地中，帐下美人空掩面。岂如千骑平时来，笑谈髣髴生风雷。葛巾羽扇红尘静，投壶雅歌清燕开。东方健儿虓虎样，泣涕怀思廉耻将。彭城老守亦凄然，不见君家雪儿唱。

次韵子由送赵 归觐钱塘遂赴永嘉

归舟转河曲，稍见楚山苍。候吏来迎客，吴音已带乡。言从谢康乐，先献鲁灵光。已击三千里，何须四十强。风流半刺史，清绝校书郎。到郡诗成集，寻溪水溅裳。芒鞋随采药，茧纸记流觴。海静蛟鼉出，山空草木长。宦游无远近，民事要更尝。愿子传家法，他年请尚方。

中秋月三首

殷勤去年月，澹澹古城东。憔悴去年人，卧病破窗中。徘徊巧相觅，窈窕穿房栊。月岂知我病，但见歌楼空。抚枕三叹息，扶杖起相从。天风不相哀，吹我落琼宫。白露入肝肺，夜吟如秋虫。坐令太白豪，化为东野穷。余年知几何，佳月岂屡逢。寒鱼亦不睡，竟夕相 喁。

六年逢此月，五年照离别。中秋有月，凡六年矣，惟去岁与子由会于此。歌君别时曲，满坐为凄咽。留都信繁丽，此会岂轻掷。熔银百顷湖，挂镜千寻阙。三更歌吹罢，人影乱清樾。归来北堂下，寒光翻露叶。唤酒与妇饮，念我向儿说。岂知衰病后，空盏对梨栗。但见古河东，麦如铺雪。欲和去年曲，复恐心断绝。

舒子在汶上，闭门相对清。舒焕试举人郢州。郑子向河朔，郑仅赴北京户曹。孤舟连夜行。顿子虽咫尺，兀如在牢扃。顿起来徐试举人。赵子寄书来，水调有余声。今日得赵杲卿书，犹记余在东武中秋所作水调歌头。悠哉四子心，共此千里明。明月不解老，良辰难合并。回顾坐上人，聚散如流萍。尝闻此宵月，万里同阴晴。故人文生为余言，尝见海贾云：中秋有月，则是岁珠多而圆。贾人常以此候之。虽相去万里，他日会合，相问阴晴，无不同者，天公自著意，此会那可轻。明年各相望，俯仰今古情。

中秋见月寄子瞻兄子由

西风吹暑天益高，明月耿耿分秋毫。彭城闭门青嶂合，坐听百步鸣飞涛。史君携客登燕子，月色著人如著水。筵前不设鼓与钟，处处笛声相应起。浮云卷尽流金丸，戏马台西山郁蟠。杯中绿酒一时尽，衣上白露三更寒。扁舟明日浮古汴，回首逡巡陵谷变。河吞巨野入长淮，城没黄流只三板。明年筑城城似山，伐木为堤堤更坚。黄楼未成河已退，空有遗迹令人看。城头看月应更好，河流深处今生草。子孙免被鱼鳖食，歌舞聊宽史君老。南都从事者更贫，羞见青天月照人。飞鹤投笼不能出，曾是彭城坐中客。

和

明月未出群山高，瑞光千丈生白毫。一杯未尽银阙涌，乱云脱坏如崩涛。谁为天公洗眸子，应费明河千斛水。遂令冷看世间人，照我湛然心不起。西南火星如弹丸，角尾奕奕苍龙蟠。今宵注眼看不见，更许萤火争清寒。何人舫舟临古汴，千灯夜竹鱼龙变。曲折无心逐浪花，低昂赴节随歌板。是夜贾客舟中放水灯。青荧灭没转前山，浪飏风回岂复坚。明月易低人易散，归来呼酒更重看。堂前月色愈清好，咽咽寒螿鸣露草。卷帘推户寂无人，窗下呶呶惟楚老。近有一孙名楚老，南都从事莫羞贫，对月题诗有几人。明朝人事随日出，恍然一梦瑶台客。

答王巩巩将见过有诗自谓恶客戏之

汴泗绕吾城，城坚如削铁。中有李临淮，号令肝胆裂。古来彭城守，未省怕恶客。恶客云是谁，祥符相公孙。是家豪逸生有种，千金一掷颇黎盆。连车载酒来，不饮外酒嫌其村。子有千瓶酒，我有万株菊。任子满头插，团团见花不见目。醉中插花归，花重压折轴。问客何所须，客言我爱山。青山自绕郭，不要买山钱。此外有黄楼，楼下一河水。美哉洋洋乎，可以疗饥并洗耳。彭城之游乐复乐，客恶何如主人恶。

次韵王定国马上见寄

昨夜霜风入夹衣，晓来病骨更支离。疏狂似我人谁顾，坎坷怜君志未移。但恨不携桃叶女，尚能来趁菊花时。南台二谢无人继，直恐君诗胜义熙。二谢从宋武帝九日燕戏马台。

与顿起孙勉泛舟探韵得未字

窗前堆梧桐，床下鸣络纬。佳人尺书到，客子中夜喟。朝来一樽酒，晤语聊自慰。秋蝇已无声，霜蟹初有味。当为壮士饮，毗裂须磔猬。勿作儿女怀，坐念蠨蛸畏。山城亦何有，一笑泻肝胃，泛舟以娱君，鱼鳖多可饩。纵为十日饮，未遽主人费。吾侪俱老矣，耿耿知自贵。宁能傍门户，啼笑杂猩狒。要将百篇诗，一吐千丈气。萧条岁行莫。迫此霜雪未。明朝出城南，遗迹观楚魏。西风迫吹帽，金菊乱如沸。愿君勿言归，轻别吾所讳。

次韵答顿起二首

挽袖推腰踏破绅，旧闻携手上天门。相逢应觉声容似，欲话先惊岁月奔。新学已皆从许子，诸生犹自畏何蕃。殿庐直宿真如梦，犹记忧时策万言。顿君及第时，余为殿后编排官。见其答策语颇直，其后与子由试举人西京既罢，同登嵩山绝顶，尝见其唱酬诗十余首。顿诗中及之。

十二东秦比汉京，去年古寺共题名。去岁见之于青州。早衰怪我遽如许，苦学怜君大瘦生。茆屋拟归田二顷，金丹终扫雪千茎。何人更似苏司业，和遍新诗满洛城。

第十卷

诗七十七首

九日黄楼作

去年重阳不可说，南城夜半千沓发。水穿城下作雷鸣，泥满城头飞雨滑。黄花白酒无人间，日暮归来洗靴袜。岂知还复有今年，把盏对花容一呷。莫嫌酒薄红粉陋，终胜泥中千柄钺。黄楼新成壁未干，青河已落霜初杀。朝来白露如细雨，南山不见千寻刹。楼前便作海茫茫，楼下空闻橹鸦轧。薄寒中人老可畏，热酒浇肠气先压。烟消日出见渔村，远水鳞鳞山 。诗人猛士杂龙虎，坐客三十余人，多知名之士。楚舞吴歌乱鹅鸭。一杯相属君勿词，此境何殊泛清霄。

太虚以黄楼赋见寄作诗为谢

我在黄楼上，欲作黄楼诗。忽得故人书，中有黄楼词。黄楼高十丈，下建五丈旗。楚山以为城，泗水以为池。我诗无杰句，万景骄莫随。夫子独何妙，雨雹散雷椎。雄词杂今古，中有屈宋姿。南山多磐石，清滑如流脂。朱蜡为摹刻，细妙分毫厘。佳处未易识，当有来者知。

九日次韵王巩

我醉欲眠君罢休，已教从事到青州。鬓霜饶我三千丈，诗律输君一百筹。闻道郎君闭东阁，且容老子上南楼。相逢不用忙归去，明日黄花蝶也愁。

送顿起

客路相逢难，为乐常不足。临行挽衫袖，更赏折残菊。佳人亦何念，凄断阳关曲。酒阑不忍去，共接一寸烛。留君终无穷，归驾不免促。岱宗已在眼，一往继前躅。天门四十里，夜看扶桑浴。回头望彭城，大海浮一粟。故人在其下，尘土相逐蹴。惟有黄楼诗，千古配淇澳。顿有诗，记黄楼本末。

送孙勉

昔年罢东武，曾过北海县。白河翻雪浪，黄土如烝面。桑麻冠东方，一熟天下贱。是时累饥馑，常苦盗贼变。每怜追胥官，野宿风裂面。君为淮南秀，文采照金殿。君尝考中进士第一人。胡为事奔走，投笔腰羽箭。更被髯将军，豪篇来督战。其兄华老，以诗寄之，皆言战事。亲程三郡士，玉石不能街。欲知君得人，失者亦称善。君才无不可，要欲经百炼。吾诗堪咀嚼，聊送别酒咽。

李思训画长江绝岛图

山苍苍，江茫茫。大孤小孤江中央。崖崩路绝猿鸟去，惟有乔木搀天长。客舟何处来，掉歌中流声抑扬。沙平风软望不到，孤山久与船低昂。峨峨两烟鬟，晓镜开新妆。舟中贾客莫漫狂，小孤前年嫁彭郎。

次韵答王巩

我有方外客，颜如琼之英。十年尘土窟，一寸冰雪清。謁来从我游，坦率见真情。顾我无足恋，恋此山水清，新诗如弹丸，脱手不暂停。昨日放鱼回，衣中满浮萍。今日扁舟去，白酒载乌程。山头见月出，江路闻鼃鸣。莫作孺子歌，沧浪濯吾纓。吾诗自堪唱，相子棹歌声。

张安道见示近诗

人物一衰谢，微言难重寻。殷勤永嘉末，复闻正始音。清谈未足多，感时意殊深。少年有奇志，欲和南风琴。荒林蝮螫乱，废沼蛙蚓淫。遂欲掩两耳，临文但噫暗。萧然王郎子，来自缙山阴。其婿王巩携来。云见浮丘伯，吹箫明月岑。遗声落淮泗，蛟鼃为悲吟。愿公正王度，祈招继愔愔。

次韵王巩颜复同泛舟

沈郎清瘦不胜衣，边老便便带十围。躑躅身轻山上走，欢呼船重醉中归。舞腰似雪金钗落，谈辩如云玉尘麾。忆在钱塘正如此，回头四十二年非。

次韵张十七九日赠子由

千戈万槊拥毗篱，九日清樽岂复待。是日南都敕使按兵。官事无穷何日了，菊花有信不吾欺。逍遥琼馆真堪羨，取次尘纓未可縻。迨此暇时须痛饮，他年长剑拄君颐。

次韵王巩独眠

居士身心如槁木，旅馆孤眠体生粟。谁能相思琢白玉，服药千朝偿一宿。天寒日短银灯续，欲往从之车脱轴。何人吹断参差竹，泗水茫茫鸭头绿。

次韵王巩留别

去国已八年，敌人今有谁。当时交游内，未数蔡克儿。岂无知我者，好爵半已縻。争为东阁吏，不顾北山移。公子表独立，与世颇异驰。不词千里远，成此一段奇。蛾眉亦可怜，无奈思饼师。无人伴客寝，惟有支床龟。君归与何人，文字相娱嬉。持此调张子，一笑当脱颐。

登云龙山

醉中走上黄茆冈，满冈乱石如群羊。冈头醉倒石作床，仰看白云天茫茫。

歌声落谷秋风长，路人举首东南望，拍手大笑使君狂。

次韵僧潜见赠

道人胸中水镜清，万象起灭无逃形。独依古寺种秋菊，要伴骚人餐落英。人间底处有南北，纷纷鸿雁何曾冥。闭门坐穴一禅榻，头上岁月空峥嵘。今年偶出为求法，欲与慧剑加砮矟。云衲新磨山水出，霜髭不翦儿童惊。公侯欲识不可得，故知倚市无倾城。秋风吹梦过淮水，想见橘柚垂空庭。故人各在天一角，相望落落如晨星。彭城老守何足顾，枣林桑野相邀迎。千山不惮荒店远，两脚欲趁飞猿轻。多生绮语磨不尽，尚有宛转诗人情。猿吟鹤唳本无意，不知下有行人行。空阶夜雨自清绝，谁使掩抑啼孤惻。我欲仙山掇瑶草，倾筐坐叹何时盈。簿书鞭朴书填委，煮茗烧栗宜宵征。乞取摩尼照浊水，共看落月金盆倾。

次韵潜师放鱼

法师说法临泗水，无数天花随尘尾。劝将净业种西方，莫待梦中呼起起。哀哉若鱼竟坐口，远愧知几穆生醴。况逢孟简对卢仝，不怕校人欺子产。疲民尚作鱼尾赤，数署未除吾颡泚。法师自有衣中珠，不用辛苦沙泥底。

与舒教授张山人参寥师同游戏 马台书西轩壁兼简颜长道二首

古寺长廊院院行，此轩偏慰旅人情。楚山西断如迎客，汴水南来故绕城。路失玉钩芳草合，林亡白鹤古泉清。淡游何以娱庠老，坐听郊原琢磬声。

竹杖芒鞋取次行，下临官道见人情。天寒菽粟犹栖亩，日莫牛羊自入城。沽酒独教陶令醉，题诗谁似皎公清。更寻陋巷颜夫子，乞取微言继此声。

滕县时同年西园

人皆种榆柳，坐待十亩阴。我独种松柏，守此一寸心。君看闾里间，盛衰日骎骎。种木不种德，聚散如飞禽。老时吾不识，用意一何深。知人得数士，重义忘千金。西园手所开，珍木来千岑。养此霜雪根，迟彼鸾凤吟。池塘得流水，龟鱼自浮沉。幽桂日夜长，白花乱青衿。岂独富草木，子孙已成林。拱把不知数，会当出千寻。樊侯种梓漆，寿张富华簪。我作西园诗，以为里人箴。

次韵王廷老和张十七九日见寄

霜叶投空雀啅篱，上楼筋力强扶持。对花把酒未甘老，膏面染须聊自欺。无事亦知君好饮，多才终恐世相縻。请看平日衔杯口，会有金椎为控颐。

次韵参寥师寄秦太虚三绝 句时秦君举进士不得

秦郎文字固超然，汉武凭虚意欲仙。底事秋来不得解，定中试与问诸天。
一尾追风抹万蹄，昆仑玄圃谓朝回。回看世上无伯乐，却道盐车胜月题。
得丧秋毫久已冥，不须闻此气峥嵘。何妨却伴参寥子，无数新诗咳唾成。

与参寥师行园中得黄耳蕈

遣化何时取众香，法筵斋钵久凄凉。寒蔬病甲谁能采，落叶空畦半已荒。
老楮忽生黄耳菌，故人兼致白牙姜。萧然放箸东南去，又入春山笋蕨乡。

百步洪二首 并叙

王定国访余于彭城，一日掉小舟，与颜长道携盼、英、卿三子游泗水。北上圣女山，南下百步洪，吹笛饮酒，乘月而归。余时以事不得往，夜着羽衣仁立于黄楼上，相视而笑，以为李太白死，世间无此乐，三百余年矣。定国既去，逾月复与参寥师放舟洪下，追怀曩游，已为陈迹，喟然而叹。故作二诗，一以遗参寥，一以寄定国，且示颜长道舒尧文邀同赋云。

长洪斗落生跳波，轻舟南下如投梭。水师绝叫鳧雁起，乱石一线争磋磨。
有如兔走鹰隼落，骏马下注千丈坡。断弦离柱箭脱手，飞电过隙珠翻荷。
四山眩转风掠耳，但见流沫生千涡。嶮中得乐虽一快，何异水伯夸秋河。
我生乘化日夜逝，坐觉一念逾新罗。纷纷争夺醉梦里，岂信荆棘埋铜驼。
觉来俯仰失千劫，回视此水殊委蛇。君看岸边苍石上，古来篙眼如蜂窠。
但应此心无所住，造物虽驶如余何。回船上马各归去，多言晓晓师所呵。

佳人未肯回秋波，幼舆欲语防飞梭。轻舟弄水买一笑，醉中荡桨肩相磨。
不似长安閭里侠，貂裘夜走燕脂坡。独将诗句拟鲍谢，涉江共采秋江荷。
不知诗中道何语，但觉两颊生微涡。我时羽眼黄楼上，坐见织女初斜河。
归来笛声满山谷，明月正照金叵罗。奈何舍我入尘土，扰扰毛群欺卧驼。
不念空斋老病叟，退食谁与同委蛇。时来洪上看遗迹，忍见展齿青苔窠。
诗成不觉双泪下，悲吟相对惟羊何。欲遣佳人寄锦字，夜寒手冷无人呵。

送参寥师

上人学苦空，百念已灰冷。剑头惟一吷，焦谷无新颖。胡为逐吾辈，文字争蔚炳。
新诗如玉雪，出语便清警。退之论草书，万事未尝屏。忧愁不平气，一寓笔所骋。
颇怪浮屠人，视身如丘井。颓然寄淡泊，谁与发豪猛。细思乃不然，真巧非幻影。
欲令诗语妙，无厌空且静。静故了群动，空故纳万境。阅世走人间，观身卧云岭。
咸酸杂众好，中有至味永。诗法不相妨，此语当更请。

夜过舒尧文戏作

先生堂前霜月苦，弟子读书喧两庑。推门入室书纵横，纸灯笼晃云母。
先生骨清少眠卧，长夜默坐数更鼓。耐寒石砚欲生水，得火铜瓶如过雨。郎

君欲出先自赞，坐客敛衽谁敢侮。明朝阮籍过阿戎，应作羲之羨怀祖。

十月十五日观月黄楼席上次韵

中秋天气未应殊，不用红纱照坐隅。山下白云横匹素，水中明月卧浮图。未成短棹还三峡，已约轻舟泛五湖。为问登临好风景，明年还忆使君无。

答王定民

开缄弈弈满银饷，书尾题诗语更道。八法旧闻宗长史，五言今复拟苏州。笔踪好在留台寺，旗队遥知到石沟。欲寄鼠须并茧纸，请君章草赋黄楼。

次韵王廷老退居见寄二首

浪蕊浮花不辨春，归来方识岁寒人。回头自笑风波地，闭眼聊观梦幻身。北牖已安陶令榻，西风还避庾公尘。更搔短发东南望，试问今谁裹旧巾。接果移花看补篱，腰镰手斧不妨持。上都新事长先到，老圃闲谈未易欺。酿酒闭门开社瓮，杀牛留客解耕縻。何时得见玉，右手持杯左捧颐。

次颜长道韵送傅倅

两见黄花扫落英，南山山寺遍题名。宋成不独依岑范，鲁卫终当似弟兄。去岁云涛浮汴泗，与君泥土满衣纓。如今别酒休词醉，试听双洪落后声。

云龙山观烧得云字

丁女真水妃，寒山便火耘。陨霜知已杀，培户听初焚。束缊方熠熠，敲石俄氤氲。落点甘泉烽，横烟楚塞氛。穷蛇上乔木，潜蛟蹶浮云。惊飞堕伤雁，狂走迷痴麇。谷蛰起蝮燕，山妖窜夔夔。野竹爆哀声，幽桂飘冤芬。悲同秋照蟹，快若夏燎蚊。火牛入燕垒，燧象奔吴军。崩腾井陘口，万马皆朱幘。摇曳骊山阴，诸姨烂红裙。方随长风卷，忽值绝涧分。我本山中人，习见匪独闻。偶从二三子，来访张隐君。君家亦何有，物象移朝曛。把酒看飞烬，空庭落缤纷。行观农事起，畦垌如缣纹。细雨发春颖，严霜倒秋蕒。始知一炬力，洗尽狐兔群。

和田国博喜雪

畴昔月如昼，晓来云暗天。玉花飞半夜，翠浪舞明年。螟无遗种，流亡稍占田。岁丰君不乐，钟磬几时编。田有服不乐。

祈雪雾猪泉出城马上作赠舒尧文

三年走吴越，踏遍千重山。朝随白云去，莫与栖鸦还。翩如得木狢，飞步谁能攀。一为符竹累，坐老敲榜间。此行亦何事，聊散腰脚顽。浩荡城西

南，乱山如玦环。山下野人家，桑柘杂棒菅。岁晏风日暖，人牛相对闲。薄雪不盖土，麦苗稀可删。愿君发豪句，嘲诙破天擘。

次韵舒尧文祈雪雾猪泉

长笑蛇医一寸腹，衔冰吐雹何时足。苍鹅无罪亦可怜，斩颈横盘不敢哭。岂知泉下有猪龙，卧枕雷车踏阴轴。前年太守为旱请，雨点随人如撒菽。傅钦之曾祷此泉得雨。太守归国龙归泉，至今人咏淇园绿。我今又复罹此旱，凛凛疲民在沟渎。却寻旧迹叩神泉，坐客仍携王子渊。钦之时客惟舒在矣。看草中和乐职颂，新声妙语慰华颠。晓来泉上东风急，须上冰珠老蛟泣。怪词欲逼龙飞起，险韵不量吾所及。行看积雪厚埋牛，谁与春工掀百蛰。此时还复借君诗，余力汰辋仍贯笠。挥毫落纸勿言疲，惊龙再起震失匙。

石 炭 并 引

彭城旧无石炭，元丰元年十二月，始遣人访获于州之西南，白土镇之北，以冶铁作兵，犀利胜常云。

君不见，前年雨雪行人断，城中居民风裂骭。湿薪半束抱衾裯，日莫敲门无处换。岂料山中有遗宝，磊落如璧万车炭。流膏迸液无人知，阵阵腥风自吹散。根苗一发浩无际，万人鼓舞千人看。投泥泼水愈光明，烁玉流金见精悍。南山栗林渐可息，北山顽矿何劳鍛。为君铸作百炼刀，要斩长鲸为万段。

人日猎城南会者十人以身轻一鸟 过枪急万人呼为韵辄得鸟字

儿童笑使君，忧愠长悄悄。谁拈白接鬘，令跨金腰褭。东风吹湿雪，手冷怯清晓。忽发两鸣髯，相趁飞虻小。放弓一长啸，目送孤鸿矫。吟诗忘鞭辔，不语头自挑。归来仍脱栗，盐豉煮芹蓼。何似雷将军，两眼霜鹤皎。黑头已为将，百战意未了。马上倒银瓶，得兔不暇燎。少年负奇志，蹭蹬百忧绕。回首英雄人，老死已不少。青春还一梦，余年真过鸟。莫上呼鹰台，平生笑刘表。

将官雷胜得过字代作

胡骑入云中，急烽连夜过。短刀穿虏阵，溅血貂裘涴。一来鞞毂下，愁闷惟欲卧。今朝从公猎，稍觉天宇大。一双铁丝箭，未发手先唾。射杀雪毛狐，腰间余一个。

台头寺步月得人字

风吹河汉扫微云，步履中庭月趁人。浥浥炉香初泛夜，离离花影欲摇春。遥知金阙同清景，想见毡车辗暗尘。

回首旧游真是梦，一簪华发岸纶巾。

台头寺送宋希元

相从倾盖只今年，送别南台便黯然。入夜更歌金缕曲，他时莫忘角弓篇。
是日与宋君同栽松寺中。三年不顾东邻女，取宋玉。
二顷方求负郭田。取季子我欲归休君未可，茂先方议 龙泉。

种松得徠字

其四在怀古字其六在石经院

春风吹榆林，乱英飞作堆。荒园一雨过，戢戢千万栽。青松种不生，百株望一枚。一枚已有余，气压千亩槐。野人易斗粟，云自鲁徠徠。鲁人不知贵，万灶飞青煤。束缚同一车，胡为乎来哉。该然解其缚，清泉洗浮埃。枝伤叶尚困，生意未肯回。山僧者无子，养护如婴孩。坐待走龙蛇，清阴满南台。孤根裂山石，直排风雷。我今百日客，养此千岁材。时去替不百日。伏苓无消息，双鬓日夜摧。古今一俯仰，作诗寄余哀。

作诗寄王晋卿忽忆前年寒食北城之游走笔为此诗

北城寒食烟火微，落花胡蝶作团飞。王孙出游乐忘归，门前骢马紫金 。吹笙帐底烟霏霏，行人举头谁敢睇。扣门狂客君不麾，更遣倾城出翠帏。书生老眼省见稀，画图但觉周肥。别来春物已再菲，西望不见红日围。何时东山歌采薇，把盏一听金缕衣。

往在东武与人往反作粲字韵诗四首今黄鲁直亦次韵见寄复和答之

符坚破荆州，止获一人半。中郎老不遇，但喜识元叹。我今独何幸，文字厌奇玩。又得天下才，相从百忧散。阴求我辈人，规作林泉伴。宁当待垂老，仓卒收一旦。不见梁伯鸾，空对孟光案。才难不其然，妇女厕周乱。世岂无作者，于我如既盥。独喜诵君诗，咸韶音节缓。夜光一已多，矧获累累贯。相思君欲瘦，不往我真懦。吾侪眷微禄，寒夜抱寸炭。何时定相过，径就我乎馆。飘然东南去，江水清且暖。相与访名山，微言师忍粲。

雪 斋 杭僧法言作雪山于斋中

君不见蛾眉山西雪千里，北望城都如井底。春风百日吹不消，五月行人如冻蚁。纷纷市人争夺中，谁信言公似赞公。人间热恼无处洗，故向西斋作雪峰。我梦扁舟适吴越，长廊静院灯如月。开门不见人与牛，惟见空庭满山雪。言有诗见寄云：林下闲看水牯牛。

以双刀遗子由子由有诗次其韵

宝刀匣不见，但见龙雀钁。何曾斩蛟蛇，亦未切琅玕。胡为穿鞞辈，见

之要领寒。吾刀不汝问，有愧在其肝。念此乃自藏，包之虎皮斑。湛然如古井，终岁不复澜。不忧无所用，忧在用者难。佩之非其人，匣中自长叹。我老众所易，屡遭非意干。惟有王玄通，阶庭秀芳兰。知子后必大，故择刀所便。屠狗非不用，一岁六七刖。欲试百炼刚，要须更泥蟠。作诗铭其背，以待知者看。

游桓山会者十人以春水满四 泽夏云多奇峰为韵得泽字

东郊欲寻春，未见莺花迹。春风在流水，凫雁先拍拍，孤帆信溶漾，弄此半篙碧。舫舟桓山下，长啸理轻策。弹琴石室中，幽响清磔磔。吊彼泉下人，野火失枯腊。悟此人间世，何者为真宅。暮回百步洪，散坐洪上石。愧我非王襄，子渊肯见客。临流吹洞箫，水月照连璧。谓王氏兄弟也。此欢真不朽，回首岁月隔。想象斜川游，作诗继彭泽。

戴道士得四字代作

少小家江南，寄迹方外士。偶随白云出，卖药彭城市。雪霜侵鬓发，尘上污冠袂。赖此三尺桐，中有山水意。自从夷夏乱，七丝久已弃。心知鹿鸣三，不及胡琴四。使君独慕古，嗜好与众异。共吊桓魁宫，一洒孟尝泪。归来锁尘匣，独对断弦喟。挂名石壁间，寂寞千岁事。

次韵田国博部夫南京见寄二绝

岁月翩翩下坂轮，归来杏子已生仁。深红落尽东风恶，柳絮榆钱不当春。火冷饧稀杏粥稠，青裙缟袂饷田头。大夫行役家人怨，应羨居乡马少游。

月夜与客饮酒杏花下

杏花飞帘散余春，明月入户寻幽人。褰衣步月踏花影，炯如流水涵青苹。花间置酒清香发，争挽长条落香雪。山城薄酒不堪饮，劝君且吸杯中月。洞箫声断月明中，惟忧月落酒杯空。明朝卷地春风恶，但见绿叶栖残红。

送蜀人张师厚赴殿试二首

忘归不觉鬓毛斑，好事乡人尚往还。断岭不遮西望眼，送君直过楚王山。云龙山下试春衣，放鹤亭前送落晖。一色杏花三十里，新郎君去马如飞。

再次韵答田国博部夫还二首

西郊黄土没车轮，满面风埃笑路人。已放役夫三万指，从教积雨洗残春。枝上稀疏地上稠，忍看红糝落墙头。风流别乘多才思，归趁西园秉烛游。

田国博见示石炭诗

有铸剑斩佞臣之句次韵答之

楚山铁炭皆奇物，知君欲斫奸邪窟。属镂无眼不识人，楚国何曾斩无极。
玉川狂直古遗民，救月裁诗语最真。千里妖蟆一寸铁，地上空愁虬虱臣。

答郡中同僚贺雨

水旱行十年，饥疫遍九土。奇穷所向恶，岁岁祈晴雨。虽非为己求，重
请终愧古。鬼神亦知我，老病入腰膂。何曾拜向人，此意难不许。重云凄已
合，微润先流础。萧萧止还作，坐听及三鼓。天明将吏集，泥土满靴屨。登
城望 麦，绿浪风掀舞。愧我贤友生，雄篇斗新语。君看大熟岁，风雨占十
五。天地本无功，祈禳何足数。渡河不入境，岂若无蝗虎。而况刑白鹅，下
策君勿取。

罢徐州往南京马上走笔寄子由五首

吏民莫扳援，歌管莫凄咽。吾生如寄耳，宁独为此别。别离随处有，悲
恼缘爱结。而我本无恩，此涕谁为设。纷纷等儿戏，鞭灯遭割截。道边双石
人，几见太守发。有知当解笑，抚掌冠缨绝。

父老何自来，花枝裊长红。洗盥拜马前，请寿使君公。前年无使君，鱼
鳖化儿童。举鞭谢父老，正坐使君穷。穷人命分恶，所向招灾凶。水来非吾
过，去亦非吾功。

古汴从西来，迎我向南京。东流入淮泗，送我东南行。暂别还复见，依
然有余情。春雨涨微波，一夜到彭城。过我黄楼下，朱栏照飞甍。可怜洪上
石，谁听月中声。

前年过南京，麦老樱桃熟。今来旧游处，樱麦半黄绿。岁月如宿昔，人
事几反覆。青衫老从事，坐稳生髀肉。联翩阅三守，迎送如转毂。归耕何时
决，田舍我已卜。

卜田向何许，石佛山南路。下有尔家川，千畦种秔稌。山泉宅龙窟，平
地走膏乳。异时亩一金，近欲为逃户。逝将解簪绂，卖剑买牛具。故山岂不
怀，废宅生蒿藿。便恐桐乡人，长祠仲卿墓。

次韵曹九章见赠

蘧瑗知非我所师，流年已似手中蓍。正平独肯从文举，中散何曾靳孝尼。
卖剑买牛真欲老，得钱沽酒更无疑。鸡豚异日为同社，应有千篇唱和诗。

书泗州孙景山西轩

落日明孤塔，青山绕病身。知君向西望，不愧塔中人。

过淮三首赠景山兼寄子由

好在长淮水，十年三往来。功名真已矣，归计亦悠哉。今日风怜客，平

时浪作堆。晚来洪泽口，捍索响如雷。

过淮山渐好，松桧亦苍然。蔼蔼藏孤寺，泠泠出细泉。故人真吏隐，小槛带岩偏。却望临淮市，东风语笑传。

回首滩阳幕，簿书高没人。何时桐柏水，一洗庚公尘。此去渐佳境，独游长惨神。待君诗百首，来写浙西春。

舟中夜起

微风萧萧吹菰蒲，开门看雨月满湖。舟人水鸟两同梦，大鱼惊窜如奔狐。夜深人物不相管，我独形影相嬉娱。暗潮生清吊寒蚓，落月挂柳看悬蛛。此生忽忽忧患里，清境过眼能须臾。鸡鸣钟动百鸟散，船头击鼓还相呼。

余去金山五年而复至次旧诗韵赠宝觉长老

谁能斗酒博西凉，但爱斋厨法鼓香。旧事真成一梦过，高谈为洗五年忙。清风偶与山阿曲，明月聊随屋角方。稽首愿师怜久客，直将归路指茫茫。

游惠山 并叙

余昔为钱塘倅，往来无锡，未尝不至惠山。既去五年，复为湖州，与高郵秦太虚、杭僧参寥同至，览唐处士王武陵宝群、朱宿所赋诗，爱其语清简，萧然有出尘之姿，追用其韵，各赋三首。

梦里五年过，觉来双鬓苍。还将坐上足，一步漪澜堂。俯窥松桂影，仰见鸿鹤翔。炯然肝肺间，已作冰玉光。虚明中有色。清净自生香。还从世俗去。永与世俗忘。

薄云不遮山，疏雨不湿人。萧萧松径滑，策策芒鞋新。嘉我二三子，皎然无淄磷。胜游岂殊昔，清句仍绝尘。吊古泣旧史。疾谗歌小。哀哉扶风子。难与巢许邻。谓宾群。

敲火发山泉，烹茶避林樾。明窗倾紫盏，色味两奇绝。吾生眠食耳，一饱万想灭。颇笑玉川子，饥弄三百月。岂如山中人，睡起山花发。一瓯谁与共，门外无来辙。

赠惠山僧惠表

行遍天涯意未阑，将心到处遣人安。山中老宿依然在，案上楞严已不看。欹枕落花余几片，闭门新竹自千竿。客来茶罢空无有，卢橘杨梅尚带酸。

赠钱道人

书生苦信书，世事仍臆度。不量力所负，轻出千钧诺。当时一快意，事过有余作。不知几州铁，铸此一大错。我生涉忧患，常恐长罪恶。静观殊可喜，脚浅犹容却。而况钱夫子，万事初不作。相逢更何言，无病亦无药。

与秦太虚参寥会于松江而关彦长

徐安中适至分韵得风字二首

吴越溪山兴未穷，又扶衰病过垂虹。浮天自古东南水，送客今朝西北风。
绝境自忘千里远，胜游难复五人同。舟师不会留连意，拟看斜阳万顷红。

二子缘诗老更穷，人间无处吐长虹。平生睡足连江雨，昼日舟横擘岸风。
人笑年来三黜惯，天教我辈一樽同。知君欲写长相忆，更送银盘尾鬣红。

次韵关令送鱼

举网惊呼得巨鱼，馋涎不易忍流酥。更烦赤脚长须老，来趁西风十幅蒲。

第十一卷

诗七十二首

次韵秦太虚见戏耳聋

君不见诗人借车无可载，留得一钱何足赖。晚年更似杜陵翁，右臂虽存耳先聩。人将蚁动作牛斗，我党风雷真一噫。闻尘扫尽根性空，不须更枕清流派。大朴初散失混沌，六凿相攘更胜败。眼花乱坠酒生风，口业不停诗有债。君知五蕴皆是贼，人生一病今生差。但恐此心终未了，不见不闻还是碍。今君疑我特佯聋，故作嘲诗穷验怪。须防额痒出三耳，莫放笔端风雨快。

端午遍游诸寺得禅字

肩輿任所适，遇胜辄留连。焚香引幽步，酌茗开净筵。微雨止还作，小窗幽更妍。盆山不见日，草木自苍然。忽登最高塔，眼界穷大千。卞峰照城郭，震泽浮云天。深沉既可喜，旷荡亦所便。幽寻未云毕，墟落生晚烟。归来记所历，耿耿清不眠。道人亦未寝，孤灯同夜禅。

送刘寺丞赴余姚

中和堂后石楠树，与君对床听夜雨。玉笙哀怨不逢人，但见香烟横碧缕。讴吟思归出无计，坐想蟋蟀空房语。明朝开锁放观潮，豪气正与潮争怒。银山动地君不看，独爱清香生雪雾。别来聚散如宿昔，城郭空存鹤飞去。我老人间万事休，君亦洗心从佛祖。手香新写法界观，眼净不觑登伽女。余姚古县亦何有，龙井白泉甘胜乳。千金买断顾渚春，似与越人降日注。

李公择过高邮见施大夫与孙草老赏花 诗忆与仆去岁会于彭门折花馈笋故事 作诗二十四韵见戏依韵奉答亦以一戏 公择云尔

汝阳真天人，绢帽著红槿。缠头三百万，不买一微哂。共夸青山峰，曲尽花不限。当时谪仙人，逸韵谢封畛。诗成天一笑，万象解寒窘。惊开小桃杏，不待雷发轡。余波尚涓滴，乞与居易稔。尔来谁复见，前辈风流尽。寂寞两涛人，残红对樱笋。饥肠得一醉，妙语传不泯。君来恨不与，更复相牵引。我老心已灰，空烦扇余烬。天游照六凿，虚室扫充牣。悬知色竟空，那复嗜乌吻。萧然一方丈，居士老庞蕴。散花从满袂，不答天女问。故人犹故目，怨句写余恨。疑我此心在，遮防费拦楯。应虞已毙蛇，折尾时一蠢。厌闻孟光贤，未学处仲忍。开阁放出。事见本传。寄招应已足，左右侍云鬓。何时花月夜，羊酒谢不敏。此生如幻耳，戏语君勿愠。应同亡是公，一对子虚听。

王巩清虚堂

清虚堂里王居士，闭眼观身如止水。水中照见万象空，敢问堂中谁隐几。吴兴太守老且病，堆案满前长渴睡。愿君勿笑反自观，梦幻去来殊未已。长疑安石恐不免，未信犀首终无事。勿将一念住清虚，居士与我盖同耳。

和孙同年卞山龙洞祷晴

吴兴连月雨，釜甑生鱼蛙。往问卞山龙，易不安厥家。梯空上巉绝，俯视惊谿砦。神井涌云盖，阴崖垂藓花。交流百道泉，赴谷走群蛇。不知落何处，隐隐如纛车。我来叩石户，飞鼠翻白鸦。寄语洞中龙，睡味岂不嘉。雨师少弭节，雷师亦停榭。积水得反壑，稻苗出泥沙。农夫免菜色，龙亦饱豚豢。看君拥黄綢，高卧放晚衙。

乘舟过贾收水阁收不在见其子三首

爱酒陶元亮，能诗张志和。青山来水槛，白雨满渔蓑。泪垢添丁面，贫低举案蛾。不知何所乐，竟夕独酣歌。

嫋嫋风蒲乱，猗猗水荇长。小舟浮鸭绿，大杓泻鹅黄。得意诗酒社，终身鱼稻乡。乐哉无一事，何处不清凉。曳杖青苔岸，系船枯柳根。德公方上冢，季路独留言。已占蒲鱼港，更开松菊园。从兹来往数，儿女自应门。

次韵孙秘丞见赠

感慨清哀似变风，老于诗句耳偏聪。迂疏自笑成何事，冷淡谁能用许功。不怕飞蚊如立豹，肯随白鸟过垂虹。吟哦相对忘三伏，拟泛水溪入雪宫。湖州多蚊，豹脚有毒。垂虹，吴江亭名。

与客游道场何山得鸟字

清溪到山尽，飞路盘空小。红亭与白塔，隐见乔木杪。中休得小庵，孤绝寄云表。洞庭在北户，云水天渺渺。庵僧俗缘尽，净业洗未了。十年画鹊竹，益以诗自绕。高堂俨像设，禅室各深窈。奔泉何处来，华屋过溪沼。何山隔幽谷，去路清且悄。长松度翠蔓，绝壁挂啼鸟。我友自杭来，尚叹所历少。归涂风雨作，一洗红日燎。俄惊万窍号，黑雾卷蓬蓼。舟人纷变色，坐羨轻鸥矫。我独换酒杯，醉死胜流殍。书生例强很，造物空烦扰。更将掀舞势，把烛画风筱。美人为破颜，正似腰支嫋。明朝便陈迹，清景堕空香。作诗记余欢，万古一昏晓。

仆去杭五年吴中仍岁大饥疫故人往往逝去闻湖上僧舍不复往日繁丽独净慈本长老学者益盛作此诗寄之

来往三吴一梦间，故人半作冢累然。独依旧社传真法，要与遗民度厄年。赵曳近闻还印缓，竺翁先已返林泉。何时杖策相随去，任性逍遥不学禅。

舶趁风 并引

吴中梅雨既过，飒然清风弥旬，岁岁如此，湖人谓之舶趁风。是时海舶初回，云此风自海上与舶俱至云尔。

三旬已过梅黄雨，万里初来舶趁风。几处萦回度山曲，一时清馥满江东。惊飘蔌蔌先秋叶，唤醒昏昏嗜睡翁。欲作兰台快哉赋，却嫌分别问雌雄。

丁公默送蝥蛄

溪边石蟹小如钱，喜见轮囷赤玉盘。半壳含黄宜点酒，两螯斫雪劝加餐。蛮珍海错闻名久，怪雨腥风入座寒。堪笑吴兴馋太守，一诗换得两尖团。

送孙著作赴考城兼寄钱醇老 李邦直二君于孙处有书见及

使君闲如云，欲出谁肯伴。清风独无事，一啸亦可唤。来从白蘋洲，吹我明月观。门前远行客，青衫流白汗。问子何匆匆，王事不可缓。故人钱与李，清庙雨圭瓒。蔚为万乘器，尚记沟中断。于亦东南珍，价重不可算。别情何以慰，酒尽对空案。惟持一榻凉，劝子巾少岸。此风那复有，尘土飞灰炭。欲寄二大夫，发发不可绊。

泛舟城南会者五人分韵 赋诗得人皆苦炎字四首

城中楼阁似鱼鳞，不见清风起白蘋。试选苕溪最深处，仍呼我辈不羁人。窥船野鹤何曾下，见烛飞虫空自驯。绕郭荷花一千顷，谁知六月下塘春。

苦热诚知处处皆，何当危坐学心斋。海螯要共诗人把，溪月行遭雾雨霾。乡国飘零断书信，弟兄流落隔江淮。便应筑室苕溪上，荷叶遮门水浸阶。

紫蟹鲈鱼贱如土，得钱相付何曾数。碧箫时作象鼻弯，白酒微带荷心苦。运时风生看斫脍，随刀雪落惊飞缕。不将醉语作新诗，饱食应惭腹如鼓。

桥上游人夜未厌，共依水槛立风檐。楼中煮酒初尝芡，月下新妆半出帘。南郭清游继颜谢，北窗归卧等羲炎。人间寒热无穷事，自笑疏顽不受店。

次韵李公择梅花

诗入固长贫，日午饥未动。偶然得一饱，万象困嘲弄。寻花不论命，爱雪长忍冻。天公非不怜，听饱即喧哄。君为三郡守，所至满宾从。江湖常看在眼里，诗酒事豪纵。奉使今折磨，清比于陵仲。永怀茶山下，携妓修春贡。更忆槛泉亭，插花云髻重。萧然卧灞麓，愁听春禽啭。忽见早梅花，不饮但孤讽。诗成独寄我，字字愈头痛。嗟君本侍臣，笔橐从上雍。脱靴吟芍药，给札赋云梦。何人慰流落，嘉花天为种。杯倾笛中吟，帽拂果下鞞。感时忘羁旅，此意吾侪共。故山亦何有，桐花集么凤。君亦忆匡庐，归扫藏书洞。何当种此花，各抱汉阴甕。

送渊师归径山

我昔尝为径山客，至今诗笔余山色。师住此山三十年，妙语应须得山骨。溪城六月水云蒸，飞蚊猛捷如花鹰。羨师方丈冰雪冷，兰膏不动长明灯。山中故人知我至，争来问讯今何似。为言百事不如人，两眼犹能书细字。径山夏无蚊，余旧诗云。问龙乞水归洗眼。欲看细字消残年。

送表忠观钱道士归杭

先王旧德在民心，著令称忠上意深。堕泪行看会祠下，挂名争欲刻碑阴。凄凉破屋尘凝座，憔悴云孙雪满簪。未信诸豪容郭解，却从他县施千金。

次韵周开祖长官见寄

俯仰东西阅数州，老于歧路岂伶优。初闻父老推谢令，旋见儿童迎细侯。政拙年年祈水旱，民劳处处避嘲讴。河吞巨野那容塞，盗入蒙山不易搜。仕道固应惭孔孟，扶颠未可责求由。渐谋田舍犹怀禄，未脱风涛且傍洲。罔罔可怜真丧狗，时时相触是虚舟。謁来震泽都如梦，只有苕溪可倚楼。斋酿酸甜如蜜水，乐工零落似风瓠。远思颜柳并诸谢，近忆张子野。陈令举。与老刘孝叔。风定轩窗飞豹脚，雨余栏槛上蜗牛。旧游到处皆苍藓。同甲惟君尚黑头。忆昔湖山共寻胜，相逢杯酒两忘忧。醉看梅雪清香过，夜掉风船骇汗流。百首共成山上集，三人俱作月中游。海南未起垂天翼，涧底仍依径寸麻。已许秋风归过我，预忧诗笔老难酬。此生岁月行飘忽，晚节功名亦纓悠。犀首正缘无事饮，冯欢应为有鱼留。从今便踏青州麴，薄酒知君笑督邮。

林子中以诗寄文与可及余与可既没追和其韵

斯人所甚厌，投界每不受。欲其少须臾，夺去惟恐后。云谁尸此职，无乃亦假守。赋才有巨细，无异斜与斗。胡不安其分，但听物所诱。时来各飞动，意合无妍丑。坐令鸡栖车，长载朱伯厚。平生无一旅，既死咤万口。自闻与可亡，胸臆生堆阜。悬知临绝意，要我一执手。相望五百里，安得自其牖。遗文付来哲，后事待诸友。伶俜稽绍孤，老病孟光偶。世人贱目见，争笑千金帚。君诗与楚词，识者当有取。但知爱墨竹，此欢吾已久。故人多厚禄，能复哀君否。不见林与苏，饥寒自奔走。

与王郎昆仲及儿子迈绕城观荷花登观山亭晚入飞英寺分韵得月明星稀四首

昨夜雨鸣渠，晓来风袭月。萧然欲秋意，溪水清可啜。环城三十里，处处皆住绝，蒲莲浩如海，时见舟一叶。此间真避世，青萌低白发。相逢欲相问，已逐惊鸥没。

清风定向物，可爱不可名。所至如君子，草木有嘉声。我行本无事，孤舟任斜横。中流自偃仰，适与风相迎。举杯属浩渺，乐此两无情。归来两溪

间，云水夜自明。

苔水如汉水，鳞鳞鸭头青。吴兴胜襄阳，万瓦浮青溟。我非羊叔子，愧此岷山亭。悲伤意则同，岁月如流星。从我两王子，高鸿插修翎。湛辈何足道，当以德自铭。

吏民怜我懒，斗讼日已稀。能为无事饮，可作不夜归。复寻飞英游，尽此一寸晖。撞钟履声集，颠倒云山衣。我来无时节，杖屦自推扉。莫作使君看，外似中已非。

城南县尉水亭得长字

两尉郁相望，东南百步场。插旗蒲柳市，伐鼓水云乡。已作观鱼槛，仍开射鸭堂。全家依画舫，极目乱红妆。澹微波头细，疏疏雨脚长。我来闲濯足，溪涨欲浮床。泽国山围裹，孤城水影傍。欲知归路处，苇外记风墙。

与胡祠部游法华山

陂湖欲尽山为界，始见寒泉落高派。道人未放泉出山，曲折虚堂泻清快。使君年老尚儿戏，绿掉红船舞澎湃。一笑翻杯水溅裙，余惧濯足波生隘。长松搀天龙起立，苍藤倒谷云崩坏。仰穿蒙密得清旷，一览震泽吁可怪。谁云四万八千顷，渺渺东尽日所晒。归涂千里尽风荷，清唱一声闻露薤。是日乐工有作此声者。嗟余少小慕真隐，白发青衫天所械。忽逢佳士与名山，何异枯杨便马疥。君犹惊鹤偶飘堕，六翩如云岂长铗。不将新句纪兹游，恐负山中清净债。

又次前韵赠贾耘老

具区吞灭三州界，浩浩汤汤纳千派。从来不著万斛船，只许渔舟恣奔快。仙坛古洞不可到，空听余澜鸣澎湃。今朝偶上法华岭，纵观始觉人寰隘。山头卧褐吊孤冢，下有至人僵不坏。空余白棘网秋虫，无复青莲出幽怪。事见本院碑，我来徙倚长松下；欲掘伏苓亲洗晒。闻道山中富奇药，往往灵芝杂葵薤。诗人空腹待黄精，三事只看长柄械。杜子美诗云，长褐短镰白木柄。我生托子以为命。今年大熟期一饱，食叶微虫真癣疥。耘云，今岁有小虫食根叶，不甚为害。白花半落紫穗香，攘臂欲助磨镰铗。安得山泉变春酒，与子一洗寻常债。

赵阅道高斋

见公奔走谓公劳，闻公隐退云公高。公心底处有高下，梦幻去来随所遭。不知高斋竟何义，此名之设缘吾曹。公年四十已得道，俗缘未尽余伊皋。功名富贵俱逆旅，黄金知系何人袍。超然已了一大事，挂冠而去真秋毫。坐看猿獠落置罔，两手未肯置所操。乃知贤达与愚陋，岂直相去九牛毛。长松百尺不自觉，企而羨者蓬与蒿。我欲赢粮往问道，未应举臂词卢敖。

送俞节推 尚之子尚字退翁

吴兴有君子，淡如朱丝琴。一唱三太息，至今有遗音。嗟余与夫子，相避如辰参。退翁官于蜀，余在京师，余归而退翁去。及余官于吴兴，则退翁亡矣。犹喜见诸郎，窈然清且深。异时多良士，末路丧初心。我生不有命，其肯枉尺寻。

次韵答孙侔

十年身不到朝廷，欲伴骚人赋落英。但得低头拜东野，不词中路伺渊明。舫舟若雷人安在，卜筑江淮计已成。千里论交一言足，与君盖亦不须倾。

重寄一首

凛然高节照时人，不信微官解浼君。蒋济谓能来阮籍，薛宣真欲吏朱云。好诗冲口谁能择，俗子疑人未遣闻。乞取千篇看俊逸，不将轻比鲍参军。

次韵和刘贡甫登黄楼见寄并寄予由二首

清派连淮上，黄楼冠海隅。此诗尤伟丽，夫子计魁梧。刘为人短小。世俗轻瑚琏，中箱袭砮砮。坐令乘传边，奔走为储须。邂逅我已失，登临谁与俱。贫贪仓氏粟，身听冶家抚。会合难前定，归休试后图。腴田未可买，穷鬼却须呼。本欲买田干泗上。近已不遂矣。二水何年到，双洪不受舻。至今清夜梦，飞轡策天吴。此诗寄刘。

与子皆去国，千年天一隅。数奇逢恶岁，计拙集枯梧。好士余刘表，穷交忆灌夫。不矜持汉节，犹许揽桓须。清句金丝合，高楼雪月俱。吟哦出新意，指画想前杭。子由初赴南京，送之出东门，登城上览山川之胜，云此地可作楼观。于是始有改筑之意。自写千言赋，新裁六幅图。近以绢自写子由黄楼赋为六幅图，甚妙。传看一坐耸，劝著尺书呼。莫使骚人怨，东游不到吴。此诗寄予由。

陈州与文郎逸民饮别携手河堤上作此诗

白酒无声滑泻油，醉行堤上散吾愁。春风料峭羊角转，河水渺绵瓜蔓流。君已思归梦巴峡，我能未到说黄州。此生聚散何穷已，未忍悲歌学楚囚。

子由自南都来陈三日而别

夫子自逐客，尚能哀楚囚。奔驰二百里，径来宽我忧。相逢知有得，道眼清不流。别来未一年，落尽骄气浮。嗟我晚闻道，款启如孙休。至言虽久服，放心不自收。悟彼善知识，妙药应所投。纳之忧患场，磨以百日愁。冥顽虽难化，镌发亦已周。平时种种心，次第去莫留。但余无所远，永与夫子游。此别何足道，大江东西州。畏蛇不下榻，睡足吾无求。便为齐安民，何必归故丘。

正月十八日蔡州道上遇雪次子由韵二首

兰菊有生意，微阳回寸根。方忧集莫雪，复喜迎朝暾。忆我故居室，浮光动南轩。松竹半倾泻，未数葵与萱。三径瑶草合，一瓶井花温。至今行吟处，尚余履舄痕。一朝出从仕，永愧李仲元。晚岁益可羞，犯雪方南奔。山城买废圃，槁叶手自掀。长使齐安人，指说故侯园。

铅膏染髭须，旋露霜雪根。不如闭目坐，舟府夜自嗽。谁知忧患中，方寸寓羲轩。大雪从压屋，我非儿女萱。平生学踵息，坐觉两鞔温。下马作雪诗，满地鞭捶痕。位立望原野，悲歌为黎元。道逢射猎子，遥指狐兔奔。踪迹尚可寻，窟穴何足掀。寄谢李丞相，吾将反丘园。

过新息留示乡人任师中 任时知泸州 亦坐事对狱

昔年尝羨任夫子，卜居新息临淮水。怪君便尔忘故乡，稻熟鱼肥信清美。竹破雁起天为黑，小竹陂在县北。桐柏烟横山半紫。桐北庙在县南。知君坐受儿女困，悔不先归弄清泚。尘埃我亦失收身，此行蹭蹬尤可鄙。寄食方将依白足，附书未免烦黄耳。往虽不及来有年，诏恩倘许归田里。却下关山入蔡州，为买乌犍三百尾，黄州出永牛。

过 淮

朝离新息县，初乱一水碧。莫宿淮南村，已渡千山赤。麇鼯号古戍，雾雨暗破驿。回头梁楚郊，永与中原隔。黄州在何许，想像云梦泽。吾生如寄耳，初不择所适。但有鱼与稻，生理已自毕。独喜小儿子，少小事安佚。相从艰难中，肝肺如铁石。便应与晤语，何止寄衰疾。时家在子由虞，独与儿子迈南来。

书磨公诗后 并序

过加祿镇南二十五里大许店，休焉于逆旅祁宗祥家。见壁上有幅纸题诗云：满院秋光浓欲滴，老僧倚杖青松侧。只怪高声问不应，瞋余踏破苍苔色。其后题云：澄水僧宝磨。宗祥谓余此光黄间狂僧也。年百三十，死于熙宁十年，既死，人有见之者。宗祥言其异事甚多，作是诗以识之。磨公本名清戒，俗谓之戒和尚云。

磨公昔未化，来往淮山曲。寿逾两甲子，气压诸尊宿。但嗟浊恶世，不受龙象蹴。我来不及见，怅望空遗躅。霜颅隐白毫，锁骨埋青玉。皆云似达磨，只履还天竺。壁间余清诗，字势颇拔俗。为吟五字偈，一洗凡眼肉。

游净居寺 并叙

寺在光山县南四十里，大苏山之南，小苏山之北。寺僧居仁为余言：齐天保中，僧思惠过此，见父老问其姓，曰苏氏，又得二山名。乃叹曰：吾师告我，遇三苏则住。遂留结庵。而父老竟无有，盖山神也。其后僧

智头见思于此山而得法焉，则世所谓思大和尚智者大师是也。唐神龙中道岸禅师始建寺于其地，广明庚子之乱，寺废于兵火，至乾兴中乃复，而赐名曰梵天云。

十载游名山，自制山中衣。愿言毕婚嫁，携手老翠微。不悟俗缘在，失身蹈危机。刑名非夙学，陷阱损积威。遂恐死生隔，永与云山违。今日复何日，芒鞋自轻飞。稽首两足尊，举头双涕挥。灵山会未散，八部犹光辉。愿从二圣往，一洗千劫非。袈回竹溪月，空翠摇烟霏。钟声自送客，出谷犹依依。回首吾家山，岁晚将焉归。

梅花二首

春来幽谷水潺潺，的皪梅花草棘间。一夜东风吹石裂，半随飞雪渡关山。

何人把酒慰深幽，开自无聊落更愁。幸有清溪三百曲，不词相送到黄州。

戏作种松

我昔少年日，种松满东冈。初移一寸根，琐细如插秧。二年黄茅下，一一攒麦芒。三年出蓬艾，满山散牛羊。不见十余年，想作龙蛇长。夜风波浪碎，朝露珠玑香。我欲食其膏，已伐百本桑。煮松脂法用桑柴灰水。人事多乖迂，神药竟渺茫。謁来齐安野，夹路须髯苍。会开龟蛇窟，不惜斤斧疮。纵未得伏苓，且当拾流肪。釜盎百出入，皎然散飞霜。槁死三彭仇，澡换五谷肠。青骨凝绿髓，丹田发幽光。白发何足道，要使双瞳方。却后五百年，骑鹤还故乡。

万松亭 并叙

麻城县令张毅，植万松于道周以芘行者，且以名其亭。去未十年，而松之存者，十不及三四。伤来者之不嗣其意也，故作是诗。

十年栽种百年规，好德无人助我仪。古语云，一年之计，树之以谷。十年之计，树之以木。百年之计，树之以德。县令若同仓庚氏，亭松应长子孙枝。天公不救斧斤厄，野火解怜冰雪姿。为问几株能合抱，殷勤记取角弓诗。

张先生 并叙

先生不知其名，黄州故县人，本姓卢，为张氏所养。阳狂垢汗，寒暑不能侵，常独行市中，夜或不知其所止。往来者欲见之，多不能致。余试使人召之，欣然而来。既至，立而不言，与之言不应，使之坐不可，但俯仰熟视传舍堂中，久之而去。夫孰非传舍者，是中竟何有乎？然余以有思惟心，追躡其意，盖未得也。

熟视空堂竟不言，故应知我未天全。肯来传舍人皆说，能致先生子亦贤。脱展不妨眠粪屋，流撕争看浴冰川。土廉岂识桃椎妙，妄意称量未必然。

陈季常所畜朱陈村嫁娶图二首

何年顾陆丹青手，画作朱陈嫁娶图。闻道一村惟两姓，不将门户买崔卢。
我是朱陈旧使君，劝耕曾入杏花村。而今风物那堪画，县吏催钱夜打门。
朱陈村在徐州萧县。

少年时尝过一村院见壁上有诗云夜凉疑
有雨院静似无僧不知何人诗也宿黄州禅
智寺寺僧皆不在夜半雨作偶记此诗故作
一绝

佛灯渐暗饥鼠出，山雨忽来修竹鸣。知是何人旧诗句，已应知我此时情。

初到黄州

自笑平生为口忙，老来事业转荒唐。长江绕郭知鱼美，好竹连山觉笋香。
逐客不妨贞外置，诗人例作水曹郎。只惭无补丝毫事，尚费官家压酒囊。检
校官例，折支多得退酒袋。

定惠院寓居月夜偶出

幽人无事不出门，偶逐东风转良夜。参差玉宇飞木末，缭绕香烟来月下。
江云有态清自媚，竹露无声浩如泻。已惊弱柳万丝垂，尚有残梅一枝亚。清
诗独吟还自和，白酒已尽谁能借。不词青春忽忽过，但恐欢意年年谢。自知
醉耳爱松风，会拣霜林结茅舍。浮浮大甑长炊玉，溜溜小槽如压蔗。饮中真
味老更浓，醉里狂言醒可怕。但当谢客对妻子，倒冠落佩从嘲骂。

次韵前篇

去年花落在涂州，对月酣歌美清夜。去年余州花下对月，与张君厚，王
子忠兄弟饮酒，作蘋字韵诗。今年黄州见花发，小院闭门风露下。万事如花
不可期，余年似酒那禁泻。忆昔还乡溯巴峡，落帆樊口在黄州南岸。高桅亚。
长江袞袞空自流，白发纷纷宁少借。竟无五亩继沮溺，空有千篇陵鲍谢。至
今归计负云山，未免孤衾眠客舍。少年辛苦真食萝，老景清闲如啖蔗。饥寒
未至且安居，忧患已空犹梦怕。穿花踏月饮村酒，免使醉归官长骂。

安国寺浴

者来百事懒，身垢犹念浴。衰发不到耳，尚烦月一沐。山城足薪炭，烟
雾濛汤谷。尘垢能几何，翛然脱羁梏。披衣坐小阁，散发临修竹。心困万缘
空，身安一床足。岂惟忘净秽，无以洗荣辱。默归无多谈，此理观要熟。

安国寺寻春

卧闻百舌呼春风，起寻花柳村村同。城南古寺修竹合，小房曲槛欹深红。

看花叹老忆年少，对酒思家愁老翁。病眼不羞云母乱，鬓丝强理茶烟中。遥知二月王城外，玉仙洪福花如海。薄罗匀雾盖新妆，快马争风鸣杂珮。玉川先生真可怜，一生耽酒终无钱。病过春风九十日，独抱添丁看花发。

寓居定惠院之东杂花满山
有海棠一株土人不知贵也

江城地瘴蕃草木，只有名花苦幽独。嫣然一笑竹篱间，桃李漫山总粗俗。也知造物有深意，故遣佳人在空谷。自然富贵出天姿，不待金盘荐华屋。朱唇得酒晕生脸，翠袖卷纱红映肉。林深雾暗晓光迟，日暖风轻春睡足。雨中有泪亦凄枪，月下无人更清淑。先生食饱无一事，散步逍遥自扪腹。不问人家与僧舍，拄杖敲门看修竹。忽逢绝艳照衰朽，叹息无言揩病目。陋邦何处得此花，无乃好事移西蜀。寸根千里不易到，衔子飞来定鸿鹄。天涯流落俱可念，为饮一樽歌此曲。明朝酒醒还独来，雪落纷纷那忍触。

次韵乐著作野步

老来几不辨西东，秋后霜林且强红。眼晕见花真是病，耳虚闻蚁定非聪。酒醒不觉春强半，睡起常惊日过中。植杖偶逢为黍客，披衣闲咏舞雩风。仰看落蕊收松粉，俯见新芽摘杞丛。楚雨还昏云梦泽，吴潮不到武昌宫。黄州对岸武昌县，有孙权故宫。废兴古郡诗无数，寂寞闲窗易粗通。解组归来成二老，风流他日与君同。

二月二十六日雨中熟睡至晚强
起出门还作此诗意思殊昏昏也

卯酒困三杯，午餐便一肉。雨声来不断，睡味清且熟。昏昏觉还卧，展转无由足。强起出门行，孤梦犹可续。泥深竹鸡语，村暗鸠妇哭。明朝看此诗，睡语应难读。

雨晴后步至四望亭下鱼池上
遂自乾明寺前东冈上归二首

雨过浮萍合，蛙声满四邻。海棠真一梦，梅子欲尝新。拄杖闲挑菜，秋千不见人。殷勤木芍药，独自殿余春。

高亭废已久，下有种鱼塘。暮色千山入，春风百草香。市桥人寂寂，古寺竹苍苍。鹤鹤来何处，号鸣满夕阳。

雨中看牡丹三首

雾雨不成点，映空疑有无。时于花上见，的皪走明珠。秀色洗红粉，暗香生雪肤。黄昏更萧瑟，头重欲相扶。

明日雨当止，晨光在松枝。清寒入花骨，肃肃初自持。午景发秾丽，一笑当及时。依然暮还敛，亦自惜幽姿。

幽姿不可惜，后日东风起。酒醒何所见，金粉抱青子。千花与百草，共尽无妍鄙。未忍污泥沙，牛酥煎落蕊。

次韵乐著作送酒

少年多病怯杯觞，老去方知此味长。万斛羁愁都似雪，一壶春酒若为汤。

次韵乐著作天庆观醮

浊世纷纷肯下临，梦寻飞步五云深。无因上到通明殿，只许微闻玉佩音。

王齐万秀才寓居武昌县刘郎 洑正与伍洲相对伍子胥奔吴所从渡江也

君家稻田冠西蜀，捣玉扬珠三万斛。塞江流株起书楼，碧瓦珠栏照山谷。倾家取乐不论命，散尽黄金如转烛。惟余旧书一百车，方舟载入荆江曲。江上青山亦何有，伍洲遥望刘郎藪。明朝寒食当过君，请杀耕牛压私酒。与君饮酒细论文，酒酣访古江之渍。仲谋公瑾不须吊，一酹波神英烈君。杭州伍子胥庙。封英烈王。

杜沂游武昌以酴醾花菩萨泉见饷二首

酴醾不争春，寂寞开最晚。青蛟走玉骨，羽盖蒙珠幃。不妆艳已绝，无风香自远。凄凉吴宫关，红粉埋故苑。至今微月夜，笙箫来绝巘。余妍入此花，千载尚清婉。怪君呼不归，定为花所挽。昨宵雷雨恶，花尽君应返。

君言西山顶，自古流白泉。上为千牛乳，下有万石铅。不愧惠山味，但无陆子贤。愿君扬其名，庶托文字传，寒泉比吉士，清浊在其源。不食我心恻，于泉非所患。嗟我本何有，虚名空自缠。不见子柳子，余愚污溪山。

陈季常自峻亭见访郡中及旧州诸 豪争欲邀致之戏作陈孟公诗一首

孟公好饮宁论斗，醉后关门防客走。不妨闲过左阿君，百谪终为贤太守。老居闾里自浮湛，笑问柏松何若心。忽然载酒从陋巷，为爱杨雄作酒箴。长安富儿求一过，千金寿君君笑唾。汝家安得客孟公，从来只识陈惊座。

第十二卷

诗八十九首

游武昌寒溪西山寺

连山蟠武昌，翠木蔚樊口。我来已百日，欲济空搔首。坐看鸥鸟没，梦逐麈尾走。今朝横江来，一苇寄衰朽。高谈破巨浪，飞屐轻重阜。去人曾几何，绝壁寒溪吼。风泉两部乐，松竹三益友。徐行欣有得，艺术在蓬莠。西上九曲亭，众山皆培塿。却看江北路，云水渺何有。离离见吴宫，莽莽真楚薮。空传孙郎石，无复陶公柳。尔来风流人，惟有漫浪叟。买田吾已决，乳水况宜酒。所须修竹林，深处安井臼。相将踏胜绝，更裹三日糗。

武昌铜剑歌并叙

供奉官郑文尝官于武昌，江岸裂出古铜剑，文得之以遗余，冶铸精巧，非鍛冶所成者。

雨余江清风卷沙，雷公蹶云捕黄蛇。蛇行空中如枉矢，电光煜煜烧蛇尾。或投以块铿有声，雷飞上天蛇入水。水上青山如削铁，神物欲出山自裂。细看两胁生碧花，犹是西江老蚊血。苏子得之何所为，蒯缙弹铗咏新诗。君不见凌烟功臣长九尺，腰间玉具高拄颐。

定惠颙师为余竹下开啸轩

啼 催天明，喧喧相诋讦。暗蛩泣夜水，唧唧自相吊。饮风蝉至洁，长吟不改调。食土蚓无肠，亦自终夕叫。鸢贪声最鄙，鹊喜意可料。皆缘不平鸣，恸哭等嬉笑。阮生已粗率，孙子亦未妙。道人开此轩，清坐默自照。冲风振河海，不能号无窍。累尽吾何言，风来竹自啸。

石 芝 并叙

元丰三年五月十一日癸酉夜，梦游何人家。开堂西门有小园古井，井上皆苍石，石上生紫藤如龙蛇，枝叶如赤箭，主人言此石芝也。余率尔折食一枝，众皆惊笑，其味如鸡苏而甘，明日作此诗。

空堂明月清且新，幽人睡息来初匀。了然非梦亦非觉，有人夜呼祁孔实。披衣相从到何许，朱栏碧井开琼户。忽惊石上堆龙蛇，玉芝紫笋生无数。锵然敲折青珊瑚，味如蜜藕和鸡苏。主人相顾一抚掌，满堂坐客皆卢胡。亦知洞府嘲轻脱，终胜嵇康羨王烈。神山一合五百年，风吹石髓坚如铁。

今年正月十四日与子由别于陈州 五月子由复至齐安未至以诗迎之

惊尘急雪满貂裘，泪洒东风别宛丘。又向邯郸枕中见，却来云梦泽南州。睽离动作三年计，牵挽当为十日留。早晚青山映黄发，相看万事一时休。柳

子厚别刘梦得诗云：圣恩若许归田去，黄发相看万事休。

迁居临皋亭

我生天地间，一蚁寄大磨。区区欲右行，不救风轮左。虽云走仁义，未免违寒饿。剑米有危炊，针毡无隐坐。岂无佳山水，借眼风雨过。归田不待老，勇决凡几个。幸兹废弃余，疲马解鞍驮。全家古江驿，绝境天为破。饥贫相乘除，未见可吊贺。淡然无忧乐，苦语不成些。

晓至巴河口迎子由

去年御史府，举动触四壁。幽幽百尺井，仰天无一席。隔墙闻歌呼，自恨计之失。留诗不忍写，苦泪渍纸笔。余生复何幸，乐事有今日。江流镜面静，烟雨轻羃羃。孤舟如凫鹭，点破千顷碧。闻君在磁湖，欲见隔咫尺。朝来好风色，旗尾西北掷。行当中流见，笑眼青光溢。此拜疑可老，修竹带泉石。欲买柯氏林，兹谋待君必。

与子由同游寒溪西山

散人出入无町畦，朝游湖北暮淮西。高安酒官虽未上，两脚垂欲穿尘泥。与君聚散若云雨，共惜此日相提携。千摇万兀到樊口，一箭放溜先凫鹭。层层草木暗西岭，浏浏霜雪鸣寒溪。空山古寺亦何有，归路万顷青玻璃。我今漂泊等鸿雁，江南江北无常栖。幅中不拟过城市，欲踏径路开新溪。路有直入寒溪。不过武昌者。却忧别后不忍到，见子行迹空余凄。吾侪流落岂天意，自坐迂阔非人挤。行逢山水辄羞叹，此去未免勤盐。何当一遇李八百，相哀白发分刀圭。李八百宅在笏门。

次韵答子由

平生弱羽寄冲风，此去归飞识所从。好语似珠穿一一，妄心如膜退重重。山僧有味宁知子，泷吏无言只笑侬。尚有读书清净业，未容春睡敌千钟。

和何长官六言次韵

作邑君真伯厚，去官我岂曼容。一廛愿托仁政，六字难赅变风。
五噫已出东洛，三复愿比南容。学道未从潘盎，南海谓狂为盎。潘近世
得道者也。草书犹似杨风。杨凝式也。
石渠何须反顾，水驿幸足相容。长江大欲见庇，探支八月凉风。
清风初号地籁，明月自写天容。贫家何以娱客，但知抹月批风。
青山自是绝色，无人谁与为容。说向市朝公子，何殊马耳东风。

观张师正所蓄辰砂

将军结发战蛮溪，篋有殊珍胜象犀，漫说玉床收箭镞，何曾金鼎识刀圭。

近闻猛士收丹穴，欲助君王铸 蹄。多少空岩人不见，自随初日吐虹霓。

五禽言 并叙

梅圣俞尝作四禽言，余谪黄州，寓居定惠院，绕舍皆茂林脩竹，荒池蒲苇。春夏之交，鸣鸟百族，土人多以其声之似者名之，遂用圣俞体作五禽言。

使君向蕲州，更唱蕲州鬼。我不识使君，宁知使君死。人生作鬼会不免，使君已老知何晚。王元之自黄移蕲州闻啼鸟，问其名，或对曰：此名蕲州鬼。元之大恶之，果卒于蕲。

南山昨夜雨，西溪不可渡。溪边布谷儿，劝我脱破裤。不词脱裤溪水寒，水中照见催租瘢。土人谓布谷为脱却破裤。

去年麦不熟，挟弹规我肉。今年麦上场，处处有残粟。丰年无象何处寻，听取林间快活吟。此鸟声云：麦饭熟，即决活。

力作力作，蚕丝一百箔。垆上麦头昂，林间桑子落。愿依一箔千两丝，缫丝得蛹饲尔雏。此鸟声云。蚕丝一百箔。

姑恶姑恶，姑不恶，妾命薄。君不见，东海孝妇死作三年干，不如广汉庞姑去却还。姑恶，水鸟也。俗云：妇以姑虐死，故其声云。

次韵子由病酒肺疾发

忆子少年时，肺喘疲坐卧。喊呀或终日，势若风雨过。虚阳作浮涨，客冷仍下堕。妻孥恐怅望，脍炙不登坐。终年禁晚食，半夜发清饿。胃强鬲若满，敛腹辄破。三彭恣啖啮，二竖肯逋播。寸田可治生，谁劝耕黄燠。新法方田。谓上腴为黄燠。探怀得真药，不待君臣佐。初如雪花积，渐作樱珠大。隔墙闻三咽，隐隐如转磨。自兹失故疾，阳唱阴辄和。神仙多历试，中路或坎坷。平生不尽器，痛饮知无那。旧人眼看尽，老伴余几个。残年一斗粟，待子同春簸。云何不自珍，醉病又一挫。真源结梨枣，世味等糠莩。耕耘当待获，愿子勤自课。相将赋远游，仙语不用些。

正月二十日往岐亭郡人潘古 郭三人送余于女王城东禅庄院

十日春寒不出门，不知江柳已摇村。稍闻泱泱流冰谷，尽放青青没烧痕。数亩荒园留我住，半瓶浊酒待君温。去年今日关山路，细雨梅花正断魂。

铁拄杖 并叙

柳真龄字安期，闽人也。家宝一铁拄杖，如概栗木，牙节宛转天成，中空有簧，行辄微响。柳云：得之浙中。相传王审知以遗钱镠，镠以赐一僧，柳偶得之，以遗余。作此诗谢之。

柳公手中黑蛇滑，千年老根生乳节。忽闻铿然爪甲声，四坐惊顾知是铁。含簧腹中细泉语，迸火石上飞星裂，公言此物老有神，自昔闽王饷吴越。不知流落几人手，坐看变灭如春雪。忽然赠我意安在，两脚未许甘衰歇。便寻

辙迹访崆峒，径渡洞庭探禹穴。披榛觅药采芝菌，刺虎 蛟 蛇蝎。会教化作两钱锥，归来见公未华发。问我铁君无恙否，取出摩挲向公说。

与潘三失解后饮酒

千金弊帚人谁买，半额蛾眉世所妍。顾我自为都眊矐，怜君欲斗小蝉娟。青云岂易量他日，黄菊犹应似去年。醉里未知谁得丧，满江风月不论钱。

东坡八首 并叙

余至黄二年，日以困匮。故人马正卿，哀予乏食，为于郡中请故营地数十亩，使得躬耕其中。地既久荒，为茨棘瓦砾之场，而岁又大旱，垦辟之劳，筋力殆尽，释耒而叹。乃作是诗，自愍其勤。庶几来岁之入，以忘其劳焉。

废垒无人顾，颓垣满蓬蒿。谁能捐筋力，岁晚不偿劳。独有孤旅人，天穷无所逃。端来拾瓦砾，岁旱土不膏。崎岖草棘中，欲刮一寸毛。喟焉释耒叹，我廩何时高。

荒田虽浪莽，高库各有适。下隰种粳，东原蒔枣栗。江南有蜀土，桑果已许乞。好竹不难栽，但恐鞭横逸。仍须卜佳处，规以安我室。家僮烧枯草，走报暗井出。一饱未敢期，瓢饮已可必。

自昔有微泉，来从远岭背。穿城过聚落，流恶壮蓬艾。去为柯氏陂，十亩鱼枯萍会。岁旱泉亦竭，萍蒲粘破块。昨夜南山云，雨到一犁外。泠然寻故渌，知我理荒苍。泥芹有宿根，一寸嗟独在。雪芽何时动，春鸠行可脍。蜀人贵芹芽。脍鸡鸠肉作之。

种稻清明前，乐事我能数。毛空暗春泽。针水闻好语。蜀人以细雨为雨毛，稻初生时。农夫相语稻针水矣。分秧及初夏，渐喜风叶举。月明看露上，一一珠垂缕。秋来霜穗重，颠倒相撑拄。但闻畦垌间，蚱蜢如风雨。蜀中稻熟时。蚱蜢群飞田间，如小蝗状，而不害稻。新春便入甑，玉粒照筐筥。我久食官仓，红腐等泥上。行当知此味，口腹吾已许。

良农惜地力，幸此十年荒。桑拓未及成，一麦庶可望。投种未逾月，覆块已苍苍，农夫告我言，勿使苗叶昌。君欲富饼饵，要须纵牛羊。再拜谢苦言，得饱不敢忘。

种枣期可剥，种松期可斫。事在十年外，吾计亦已悫。十年何足道，二载如风雹。旧闻李衡奴，此策疑可学。我有同舍郎，官居在灞岳。李公择也。遗我三寸柑，照坐光卓牵。百栽傥可致，当及春冰渥。想见竹篱间，青黄垂屋角。

潘子久不调，沽酒江南村。邻生本将种，卖药西市垣。古生亦好事，恐是押牙孙。家有十亩竹，无时容叩门。我穷交旧绝，三子独见存。从我于东坡，劳饷同一飧。可怜杜拾遗，事与朱阮论。吾师卜子夏，四海皆弟昆。

马生本穷士，从我二十年。日夜望我贵，求分买山钱。我今反累生，借耕辍兹田。刮毛龟背上，何时得成毡。可怜马生痴，至今夸我贤。众笑终不悔，施一当获千。

题织锦图上回文三首

春晚落花余碧草，夜凉低月半枯桐。人随远雁边城莫，雨映疏帘绣阁空。
红手素丝千字锦，故人新曲九回肠。风吹絮雪愁索骨，泪洒缣书恨见郎。
羞看一首回文锦，锦似文君别恨深。头白自吟悲赋客，断肠愁是断弦琴。

侄安节远来夜坐三首

南来不觉岁峥嵘，夜拨寒灰听雨声。遮眼文书原不读，伴人灯火亦多情。
嗟予潦倒无归日，今汝蹉跎已半生。免使韩公悲世事，白头还对短灯檠。
心哀面改瘦峥嵘，相见惟应识旧声。永夜思家在何处，残年知汝远来情。
畏人默坐成痴钝，问旧惊呼半死生。梦断酒醒山雨绝，笑看饥鼠上灯檠。
落第汝为中酒味，吟诗我作忍饥声。便思绝粒真无策，苦说归田似不情。
腰下牛闲方解佩，洲中奴长足为生。大弔一何缘馥，已觉翻翻不受檠。

冬至日赠安节

我生几冬至，少小如昨日。当时事父兄，上寿拜脱膝。十年阅凋谢，白发催衰疾。
瞻前惟兄三，顾后子由一。近者隔涛江，远者天一壁。今朝复何幸，见此万里姝。
忆汝总角时，啼笑为梨栗。今来能慷慨，志气坚铁石。诸孙行复尔，世事何时毕。
诗成却超然，老泪不成滴。

岐亭道上见梅花戏赠季常

蕙死兰枯菊亦摧，返魂香入岭头梅。数枝残绿风吹尽，一点芳心雀啅开。
野店初尝竹叶酒，江云欲落豆稽灰。行当更向钗头见，病起乌云正作堆。

乐全先生生日以铁拄杖为寿二首

先生真是地行仙，住世因循五百年。每向铜人话畴昔，故教铁杖斗清坚。
入怀冰雪生秋思，倚壁蛟龙护昼眠。遥想人天会方丈，众中惊倒野狐禅。
二年相伴影随身，踏遍江湖草木春。撻石旧痕犹作眼，闭门高节欲生鳞。
畏涂自卫真无敌，捷径争先却累人。远寄知公不嫌重，笔端犹自斡千钧。

杭州故人信至齐安

昨夜风月清，梦到西湖上。朝来闻好语，扣户得吴饷，轻圆白晒荔，脆
醃红螺酱。更将西庵茶，劝我洗江瘴。故人情义重，说我必西向。一年两仆
夫，千里问无恙。相期结书社，故人相约，醮钱雇仆，未一岁再至黄。未怕
供诗帐。仆顷以诗得罪，有司移杭取境内所留诗，杭州供数百首，谓之诗帐。
还将梦魂去，一夜到江涨。江涨，杭州桥名。

送牛尾狸与徐使君 时大雪中

风卷飞花自入帷，一樽遥想破愁眉。泥深厌听鸡头鹧，蜀人谓泥滑滑为鸡头鹧。酒浅欣赏牛尾狸。通印子鱼犹带骨，披绵黄雀漫多脂。殷勤送去烦纤手，为我磨刀削玉肌。

四时词

春云阴阴雪欲落，东风和冷惊罗幕。渐看远水绿生漪，未放小桃红入萼。佳人瘦尽雪肌肤，眉敛春愁知为谁。深院无人剪刀响，应将白纻作春衣。

垂柳阴阴日初永，蔗浆酪粉金盘冷。帘额低垂紫燕忙，蜜脾已满黄蜂静。高楼睡起翠眉颦，枕破斜红未肯匀。玉腕半擅云碧袖，楼前知有断肠人。

新愁旧恨眉生绿，粉汗余香在蕲竹。象床素手熨寒衣，烁烁风灯动华屋。夜香烧罢掩重局，香雾空濛月满庭。抱琴转轴无人见，门外空闻裂帛声。

霜叶萧萧鸣屋角，黄昏斗觉罗衾薄。夜风摇动镇帷犀，酒醒梦回闻雪落。起来呵手画双鸦，醉脸轻匀衬眼霞。真态香生谁画得，玉奴纤手嗅梅花。

太守徐君猷通守孟亨之 皆不饮酒以戏之云

孟嘉嗜酒桓温笑，徐邈狂言孟德疑。公独未知其趣尔，臣今时复一中之。风流自有高人识，通介宁随薄俗移。二子有灵应抚掌，吾孙还有独醒时。

雪后到乾明寺遂宿

门外山光马亦惊，阶前屐齿我先行。风花误入长春苑，云月长临不夜城。未许牛羊伤至絮，且看鸦鹊弄新晴。更须携被留僧榻，待听摧檐泻竹声。

伯父送先人下第归蜀诗云人稀 野店休安枕路入灵关稳跨驴安 节将去为诵此句因为以韵作小 诗十四首送之

索漠齐安郡，从来着放臣。如何风雪里，更送独归人。
瘦骨寒将断，衰髯摘更稀。未甘为死别，犹恐得生归。
日上气噉江，雪晴光眩野。记取到家时，锄耕吾正把。
月明穿破裘，霜气涩孤剑。归来闭户坐，默数来时店。
诸兄无可寄，一语会须酬。晚岁俱黄发，相看万事休。
故人如念我，为说瘦栾栾。尚有身为患，已无心可安。
吾兄喜酒人，今汝亦能饮，一杯归诵此，万事邯郸枕。
东阡在何许，寒食江头路。哀哉魏城君，宿草荒新墓。
临分亦泫然，不为穷途泣。东阡时一到，莫遣牛羊入。
我梦随汝去，东阡松柏青。却入西州门，永愧北山灵。
乞糴何足羨，负来可忘艰。莫为无车马，含羞入剑关。
我坐名过实，欢哗自招损。汝幸无人知，莫厌家山稳。
竹篙与练裙，随时毕婚嫁。无事若相思，征鞍还一跨。

万里却来日，一庵仍独居。应笑谋生拙，团团如磨驴。

和王巩六首并次韵

君谈阳朔山，不作一钱直。岩藏两头虺，瘴落千仞翼。雅宜欢兜放，颇讶虞舜陟。暂来已可畏，览镜忧面黑。况子三年囚，苦雾变饮食。吉人终不死，仰荷天地德。我来黄冈下，欹枕江流碧。江南武昌山，向我如咫尺。春蔬黄土软，冻笋苍崖拆，此行我累吾，乃反得安宅。遥知丹穴近，为 岫嵒石。他年分刀圭，名字挂仙籍。君许惠桂州丹砂。

少年带刀剑，但识从军乐。老大服犁锄，解佩付熔铄。虽无献捷功，会赐力田爵。敲水春捣纸，刈苇秋织箔。栋林斩冬炭，竹坞收夏箨。四时俯有取，一饱天所酢。君生纨绔间，欲学非其脚。左右玉玳玳，束薪谁为缚。勿令闻此语，翠黛颦将恶。笑我一间茆，妇姑纷六凿。

欲结千年实，先摧二月花。故教穷到骨，要使寿无涯。久已逃天网，何须服日华。宾州在何处，为子上栖霞。楼名。

邻里有异趣，何妨倾盖新。殊方君莫厌，数面自成亲。默坐无余事，回光照此身。他年赤墀下，玉立看垂绅。

平生我亦轻余子，晚岁人谁念此翁。巧语屡曾遭惹恼，庾词聊复托芎蒭。子还可责同元亮，妻却差贤胜敬通。若问我贫天所赋，不因迁谪始囊空。

君家玉臂贯铜青，下客何时见目成。勤把铅黄记官样，莫教弦管作蛮声。薰衣渐叹衙香少，拥髻遥怜夜语清。记取北归携过我，南江风浪雪山倾。君自南江赴任，不一过我。

记梦回文二首 并叙

十二月二十五日，大雪始晴。梦人以雪水烹小团茶，使美人歌以饮。余梦中为作回文诗，觉而记其一句云：乱点余花唾碧衫。意用飞燕唾花故事也。乃续之为二绝句云。

施颜玉碗捧纤纤，乱点余花唾碧衫。歌咽水云凝静院，梦惊松雪落空岩。空花落尽酒倾缸，日上山融雪涨江。红焙浅瓯新火活，龙团小碾斗晴窗。

三朵花并叙

房州通判许安世，以书遗余，言吾州有异人。常戴三朵花，莫知其姓名，郡人因以三朵花名之。能作诗皆神仙意，又能自写真人。有得之者，许欲以一本见惠，乃为作此诗。

学道无成鬓已华，不劳千劫漫蒸砂。归来且看一宿觉，未暇远寻三朵花。两手欲遮瓶里雀，四条深怕井中蛇。画图要识先生面，试问房陵好事家。

次韵陈四雪中赏梅

腊酒诗催熟，寒梅雪斗新。杜陵休叹老，韦曲已先春。独秀惊凡目，遗英卧逸民。高歌对三白，迟莫慰安仁。

正月二十日与潘郭二生出郊寻春忽
记去年是日同至女王城作诗乃和前韵

东风未肯入东门，走马还寻去岁村。人似秋鸿来有信，事如春梦了无痕。
江城白酒三杯配，野老苍颜一笑温。已约年年为此会，故人不用赋招魂。

是日偶至野人汪氏之居有神降于其室自称天
人李全字德通善篆字用笔奇妙而字不可识云
天篆也与予言有所会者复作一篇仍用前韵

酒渴思茶漫扣门，那知竹里是仙村。已闻龟策通神语，更看龙蛇落笔痕。
色瘁形枯应笑屈，道存目击岂非温。归来独扫空斋卧，犹恐微言入梦魂。

浚井

古井没荒莱，不食谁为恻。瓶罍下两绠，蛙蚓飞百尺。腥风被泥滓，空
响闻点滴。上除青青芹，下洗凿凿石。沾濡愧童仆，杯酒暖寒栗。白水渐汛
泓，青天落寒碧。云何失旧秽，底处来新洁。井在无有中，无来亦无失。

红梅三首

怕愁贪睡独开迟，自恐冰容不入时。故作小红桃杏色，尚余孤瘦雪霜姿。
寒心未肯随春态，酒晕无端上玉肌。诗老不知梅格在，更看绿叶与青枝。石
曼卿红梅诗云：认桃无绿叶，辨杏有青枝。

雪里开花却是迟，何如独占上春时。也知造物含深意，故与施朱发妙姿。
细雨衰残千颗泪，轻寒瘦损一分肌。不应便杂夭桃杏，半点微酸已著枝。

幽人自恨探春迟，不见檀心未吐时。丹鼎夺胎那是宝，朱砂红银，谓之
不夺胎色。玉人頰颊更多姿。抱丛暗蕊初含子，落盏秋香已吐肌。乞与徐熙
新画样，竹间璀璨出斜枝。

和子由寄题孔平仲草庵次韵

逢人欲觅安心法，到处先为问道庵。卢子不须从若士，盖公当自过曹参。
羨君美玉经三火，笑我枯桑困八蚕。犹喜大江同一味，故应千里共清甘。

二虫

君不见水马儿，步步逆流水。大江东流日千里，此虫趯趯长在此。君不
见鷄滥堆，决起随冲风。随风一去宿何许，逆风还落蓬蒿中。二虫愚智俱莫
测，江边一笑无人识。

陈季常见过三首

仕宦常畏入，退居还喜客。君来辄馆我，未觉鸡黍窄。东坡有奇事，已

种十亩麦。但得君眼青，不词奴饭白。

送君四十里，只使一帆风。江边千树柳，落我酒杯中。此行非远别，此乐固无穷。但愿长如此，来往一生同。

闻君开龟轩，东槛俯乔木。人言君畏事，欲作龟头缩。我知君不然，朝饭仰肠谷。余光幸分我，不死安可独。

寒食雨二首

自我来黄州，已过三寒食。年年欲惜春，春去不容惜。今年又苦雨，雨月秋萧瑟。卧闻海棠花，泥污燕脂雪。暗中偷负去，夜半真有力。何殊病少年，病起头已白。

春江欲入户，雨势来不已。小屋如渔舟，濛濛水云里。空庖煮寒菜，破灶烧湿苇。那知是寒食，但见乌衔纸。君门深九重，坟墓在万里。也拟哭涂穷，死灰吹不起。

徐史君分新火

临皋亭中一危坐，三见清明改新火。沟中枯木应笑人，钻研不然谁似我。黄州使君怜久病，分我五更红一朵。从来破釜跃江鱼，只有清诗嘲饭颗。起携蜡炬绕空屋，欲事烹煎无一可。为公分作无尽灯，照破十方昏暗锁。

次韵答元素余旧有赠元素云天涯同是伤
流落元素以为今日之先兆且悲当时六客
之存亡六客盖张子野刘孝叔陈令举李公
择及元素与余也

不愁春尽絮随风，但喜丹砂入颊红。流落天涯先有讖，摩挲金狄会当同。蘧蘧未必都非梦，了了方知不落空。莫把存亡悲六客，已将地狱等天宫。

第十三卷

诗八十一首

蜜酒歌 并叙

西蜀道士杨世昌，善作蜜酒，绝醇醪。余既得其方，作此歌遗之。
真珠为浆玉为醴，六月田夫汗流讹。不如春瓮自生香，蜂为耕耘花作米。
一日小沸鱼吐沫，二日眩转清光活。三日开瓮香满城，快泻银瓶不须拨。百钱一斗浓无声，甘露微浊醒酬清。君不见南园采花蜂似雨，天教酿酒醉先生。
先生年来穷到骨，问人乞米何曾得。世间万事真悠悠，蜜蜂大胜监河侯。

又一首答二犹子与王郎见和

脯青苔，炙青蒲，烂蒸鹅鸭乃瓢壶。煮豆作乳脂为酥，高烧油烛斟蜜酒，
贫家百物初何有。古来百巧出穷人，搜罗假合乱天真。诗书与我为曲蘖，
酝酿老夫成滑绅。质非文是终难久，脱冠还作扶犁叟。不如蜜酒无燠寒，
冬不加甜夏不酸。老夫作诗殊少味，爱此三篇如酒美。封胡羯未已可怜，
不知更有王郎子。

谢陈季常惠一措中

夫子胸中万斛宽，此中何事小团团。半升仅漉渊明酒，二寸才容子夏冠。
好带黄金双得胜，可怜白纈一生酸。臂弓腰箭何时去，直上阴山取可汗。

赠黄山人

面颊照人元自赤，眉毛覆眼见来乌。倦游不拟谈玄牝，示病何妨出白须。
绝学已生真定惠，说禅长笑老浮屠。东坡若肯三年佳，亲与先生看药炉。

问大冶长老乞桃花茶栽东坡

周诗记苦茶，茗饮出近世，初缘厌粱肉，假此雪昏滞。嗟我五亩园，桑
麦苦蒙翳。不令寸地闲，更乞茶子艺。饥寒未知免，已作太饱计。庶将通有
无，农未不相戾。春来冻地裂，紫笋森已锐。牛羊烦河叱，筐筥未敢腺。江
南老道人，齿发日夜逝。他年雪堂品，空记桃花裔。

鱼蛮子

江淮水为田，舟楫为室居。鱼虾以为粮，不耕自有余。异哉鱼蛮子，本
非左在徒。连排入江住，竹瓦三尺庐。于焉长子孙，戚施且侏儒。孽水取魴
鲤，易如拾诸途。破釜不着监，雪鳞芼青蔬。一饱便甘寝，何异獭与狙。人
间行路难，踏地出赋租。不如鱼蛮子，驾浪浮空虚。空虚未可知，会当筹舟
车，蛮子叩头泣，勿语桑大夫。

吊李台卿 并叙

李台卿字明仲，庐州人，貌陋甚，性介不群，而博学强记，罕见其比。好左氏，有史学，考正同异，多所发明。知天文律历，千载之日，可坐数也。轼埒居黄州，台卿为麻城主簿，始识之。既罢居于庐，而曹光州演甫以书报其亡。台卿光州之妻党也。

我初未识君，人以君为笑。垂头若病鹤，烟雨霾七窍。弊衣来过我，危坐若持钓。褚褰半面新，黻蔑一语妙。徐徐涉其澜，极望不得徼。却观元妩媚，士固难轻料。看书眼如月，罅隙靡不照。我老多遗忘，得君如再少。从横通杂艺，甚博且知要。所恨言无文，至老幽不耀。其生世莫识，已死谁复吊。作诗遗故人，庶解俗子讪。

曹既见和复次其韵

造物本儿戏，风噫雷电笑。谁令妄惊怪，失匕号万窍。人人走江湖，一一操网钓。偶然连六鳌，便谓此手妙，空令任公子，三岁蹲海檝。长贫固不词，一死实未料。难将耆草筹，除用佛眼照。何人嗣家学，恨子儿尚少。嗟我与曹公，衰老世不要。空言今无救，奇志后必耀。吟公五字诗，义重千金吊。收藏慎勿出，免使群儿讪。

次韵孔毅甫集古人句见赠 五首

羨君戏集他人诗，指呼市人如使儿。天边鸿鹄不易得，便令作对随家杂。退之惊笑子美泣，问君久假何时归。世间好句世人共，明月自满千家墀。

紫驼之峰人莫识，杂以鸡豚真可惜。今君坐致五侯鲭，尽是猩唇与熊白。路傍拾得半断枪，何必开炉铸矛戟。用之如何在我耳，入手当令君丧魄。

天下几人学杜甫，谁得其皮与其骨。划如太华当我前，跛欲上惊崕崕。名章俊语纷交衡，无人巧会当时情。前生子美只君是，信手拈得俱天成。

诗人雕刻闲草木，搜抉肝肾神应哭。不如默诵千万首，左抽右取谈笑足。夜吟石鼎声悲秋，可怜好事刘与侯。何当一醉百不问，我欲眠矣君休休。

膏明兰臭俱自焚，象牙翠羽戕其身。多言自古为数穷，微中有时堪解纷。痴人但数羊羔儿，不知何者是左慈。千章万句卒非我，急走投君应已迟。

六年正月二十日复出东门仍用前韵

乱山环合水侵门，身在淮南尽处村。五亩渐成终老计，九重新扫旧巢痕。岂惟见惯沙鸥熟，已觉来多钓石温。长与东风约今日，暗香先返玉梅魂。

食 柑

一双罗帕未分珍，林下先尝愧逐臣。露叶霜枝剪寒碧，金盘玉指破芳辛。清泉蔽蔽先流齿，香雾霏霏欲噀人。坐客殷勤为收子，千奴一掬奈吾贫。

大寒步至东坡赠巢三

春雨如暗尘，春风吹倒人。东坡数间屋，巢子谁与邻。空床敛败絮，破灶爵生薪。相对不言寒，哀哉知我贫。我有一瓢酒，独饮良不仁。未能頹我颊，聊复濡子唇。故人千钟禄，馭吏醉吐茵。那知我与子，坐作寒螿呻。努力莫怨天，我尔皆天民。行看花柳动，共享无边春。

元修菜 并叙

菜之美者，有吾乡之巢故人。巢元修嗜之，余亦嗜之。元修云：使孔北海见，当复云吾家菜邪。因谓之元修菜。余去乡十有五年，思而不可得。元修适自蜀来，见余于黄，乃作是诗，使归致其子，而种之东坡之下云。

彼美君家菜，铺田绿茸茸。豆荚圆且小，槐芽细而丰。种之秋雨余，耀秀繁霜中。欲花而未萼，一一如青虫。是时青裙女，采撷何忽忽。蒸之复湘之，香色蔚其饌。点酒下盐鼓，缕橙芼姜葱。那知鸡与豚，但恐放箸空。春尽苗叶老，耕翻烟雨丛。润随甘泽化，暖作青泥融。始终不我负，力与粪壤同。我老忘家舍，楚音变儿童。此物独妩媚，终年系余胸。君归致其子，囊盛勿亟封。张骞移苜蓿，适用如葵菘。马援载薏苡，罗生等蒿蓬。悬知东坡下，堦卤化千钟。长使齐安人，指此说两翁。

二月三日点灯会客

江上东风浪接天，苦寒无赖破春妍。试开云梦羔儿酒，快泻钱塘药玉船。蚕市光阴非故国，马行灯火记当年。冷烟湿雪梅花在，留得新春作上元。

上巳日与二三子携酒出游随所见 辄作数句明日集之为诗故词无论次

薄云霏霏不成雨，杖藜晓入千花坞。柯丘海棠吾有诗，独笑深林谁敢侮。三杯卯酒人径醉，一枕春睡日亭午。竹间老人不读书，留我闭门谁教汝。出檐藜枳十围大，写真素壁千蚊舞。东坡作塘今几尺，携酒一劳农工苦。却寻流水出东门，坏垣古堦花无主。卧开桃李为谁妍，对立鸚鵡相媚妩。开瓶籍草劝行路，不惜春衫污泥土。褰裳共过春草亭，扣门却入韩家圃。辘轳绳断井深碧，秋千索挂人何所。映帘空复小桃枝，乞浆不见应门女。南上古台临断岸，雪阵翻空迷仰俯，故人馈我玉叶羹，火冷烟消准为煮。崎岖东蕴下荒径，姬媵隔花闻好语。更随落景尽余樽，却傍孤城得僧宇。主人劝我洗足眠，倒床不复闻钟鼓。明朝门外泥一尺，始悟三更雨如许。平生所向无一遂，兹游何事大不阻。固知我友不终穷，岂弟君子神所予。

日日出东门

日日出东门，步寻东城游。城门抱关卒，笑我此何求。我亦无所求，驾

言写我忧。意适忽忘返，路穷乃归休。悬知百岁后，父老说故侯。古来贤达人，此路谁不由。百年寓华屋，千载归山丘。何事羊公子，不肯过西州。

南堂五首

江上西山半隐堤，此邦台馆一时西。南堂独自西南向，卧看千帆落浅溪。莫年眼力嗟犹在，多病颠毛却未华。故作明窗书小字，更开幽室养丹砂。他时雨夜困移床，坐厌愁声点客肠。一听南堂新瓦响，似闻东坞小荷香。山家为割千房蜜，稚子新畦五亩蔬。更有南堂堪著客，不忧门外故人车。扫地焚香闭阁眠，簟纹如水帐如烟。客来梦觉知何处，拄起西窗浪接天。

次韵子由种杉竹

吏散空庭雀噪檐，闭门独宿夜厌厌。似闻梨枣同时种，应与杉篁刻日添。糟曲有神薰不醉，雪霜夸健巧相沾。先生坐待清阴满，空使人人叹滞淹。

孔毅甫妻挽词

结 记初欢，同冗期晚岁。择夫得温峤，生子胜王济。高风相宾友，古义仍兄弟。从君吏隐中，穷达初不计。云何抱沉疾，俯仰便一世。幽阴栖房枕，芳泽在中袂。百年纵得满，此路行亦逝。那将有限身，长泻无益涕。君文照今古，不比山石脆。当观千字诔，宁用百金瘞。

次韵孔毅甫久旱已而甚雨三首

饥人忽梦饭甑溢，梦中一饱百忧失。只知梦饱本来空，未悟真饥定何物。我生无田食破砚，尔来砚枯磨不出。去年太岁空在西，傍舍壶浆不容乞。今年旱势复如此，岁晚何以黔吾突。青天荡荡呼不闻，况欲稽首号泥佛。瓮中蝎蜥尤可笑，趿趿脉脉何等秩。阴阳有时雨有数，民是天民天自恤。我虽穷苦不如人，要亦自是民之一。形容可似丧家狗，未肯饵耳争投骨。倒冠落帻谢朋友，独与蚊雷共圭萆。故人嗔我不开门，君视我门谁肯屈。可怜明月如泼水，夜半清光翻我室。风从南来非雨候，且为疲人洗蒸爵。褰裳一和快哉谣，未暇饥寒念明日。

去年东坡拾瓦砾，自种黄桑三百尺。今年刈草盖雪堂，日炙风吹面如墨。平生懒惰今始悔，老大勤农天所直。沛然例赐三尺雨，造化无心恍难测。四方上下同一云，甘霡不为龙所隔。俗有分龙日。蓬蒿下湿迎晓未，灯火蜀凉催夜织。老夫作罢得甘寝，卧听墙东人响屐。奔流未已坑谷平，折苇枯荷恣漂溺。腐儒粗粝支百年，力耕不受众目怜。破肢漏水不耐旱，人力未至求天全。会当作塘径千步，横断西北遮山泉。四邻相率助举杵，人人知我囊无钱。明年共看决渠雨，饥饱在我宁关天。谁能伴我田间饮，醉倒准有支头砖。

天公号令不再出，十日愁霖并为一。君家有田水冒田，我家无田忧入室。不如西州杨道士，万里随身惟两膝。沿流不恶溯亦佳，一叶扁舟任漂突。山芎麦曲都不用，泥行露宿终无疾。夜来饥肠如转雷，旅愁非酒不可开。杨生自言识音律，洞箫入手清且哀。不须更待秋井塌，见人白骨方衔杯。

初秋寄子由

百川日夜逝，物我相随去。惟有宿昔心，依然守故处。忆在怀远驿，闭门秋暑中。藜羹对书史，挥汗与子同。西风忽凄厉，落叶穿户牖。子起寻夹衣，感叹执我手。朱颜不可恃，此语君勿疑。别离恐不免，功名定难期。当时已凄断，况此两衰老。失涂既难追，学道恨不早。买田秋已议，筑室春当成。雪堂风雨夜，已作对床声。

和黄鲁直食笋次韵

饱食有残肉，饥食无余菜。纷然生喜怒，似被狙公卖。尔来谁独觉，凛凛白下宰。太和，古白下。一饭在家僧，至乐甘不坏。多生味蠹简，食笋乃余债。萧然映樽俎，未肯谁藩芥。君著霜雪姿，童稚已耿介。胡为遭暴梭，三嗅不忍嘍。朝来忽解箨，势迫风雷噫。尚可怕三间，饭筒缠五采。

闻子由为郡僚所掎恐当去官

少学不为身。宿志固有在。虽然敢自必，用舍置度外。天初若相我，发迹造宏大。岂敢负所付，捐躯欲投会。宁知事大缪，举步得狼狈。我已无可言，坠甑难追悔。子虽仅自免，肋安足赖。低回畏罪署，邑俯敢言退。若人疑或使，为子得微罪。时哉归去来，共抱东坡来。

次韵王巩南迁初归二首

问君滴南宾，治葛食几尺。逢人瘴发黄，入市胡眼碧。三年不易过，坐脱倚天壁。归来貌如故，妙语仍破镜。那能废诗酒，亦未妨禅寂。愿为尚书郎，还赐尚方局。

江家旧池台，修竹围一尺。归来万事非，惟见秦淮碧。平生痛饮处，遗墨鸦栖壁。西来故父客，金印杂鸣镝。三槐老更茂，花絮春寂寂。中微未可料，家庙藏赤舄。

孔毅甫以诗戒饮酒问买田且乞墨竹次其韵

酒中真复有何好，孟生虽贤未闻道。醉时万虑一扫空，醒后纷纷如宿草。十年揩洗见真妄，石女无儿焦谷槁。此身何异贮酒瓶，满辄予人空自倒。武昌痛饮岂吾意，性不违人遭客恼。君家长松十亩阴，借我一庵聊洗心。我田方寸耕不尽，何用百顷糜千金。枕书熟睡呼不起，好学怜君工杂拟。且将墨竹换新诗，润色何须待东里。

任师中挽词

大任刚烈世无有，疾恶如风朱伯厚。小任温毅老更文，聪明慈爱小冯君。

两任才行不须说，畴昔并友吾先人。相看半作晨星没，可怜太白与残月。大任先去冢未干，小任相继呼不还。强寄一樽生死别，樽中有泪酒应酸。贵贱贤愚同尽耳，君家不尽缘贤子。人间得丧了无凭，只有天公终可倚。

子由作二颂颂石台长老同公手写莲经字如
黑蚁且诵万遍胁不至席二十余年于亦作二首

眼前扰扰黑虬蟀，口角靠靠白唾珠。要识吾师无碍处，试将烧却看嗔无。眼睛心地两虚圆，胁不沾床二十年。谁信吾师非不睡，睡蛇已死得安眠。

邓忠臣母周挽词

微生真草木，无处谢天力。慈颜如春风，不见桃李实。古今把此恨，有志俯仰失。公子岂先知，战战常惜日。吾君日月照，委曲到肝膈，哀哉人子心，吾何爱一邑。家庭拜前后，粲然发笑色。岂比黄壤下，焚瘞千金壁。若人道德人，视此亦戏剧，聊偿曾闵意，遽与仙佛寂。孤累卧江诸，永望坟墓隔。作诗相楚挽，感恸泪载滴。

徐君猷挽词

一舸南游遂不归，清江赤壁照人悲，请看行路无从涕，尽是当年不忍欺。雪后独来栽柳处，竹间行复采茶时。山城散尽樽前客，旧恨新愁只自知。

和蔡景繁海州石室

芙蓉仙人石曼卿也。旧游处，苍藤翠壁初无路。戏将桃核裹黄泥，石间散掷如风雨。坐令空山出锦绣，倚天照海花无数。花间石室可容车，流苏宝盖窥灵字。何年霹雳起神物，玉棺飞出王乔墓。当时醉卧动千日，至今石缝余糟醕。仙人一去五十年，花老室空谁作主。手植数松今偃盖，苍髯白甲低琼户。我来取酒酹先生，后车仍载胡琴女。一声水铁散岩谷，海为澜翻松为舞。尔来心赏复何人，持节中郎醉无伍，独临断岸呼出日，红波碧嶂相吞吐。径寻我语觅余声，拄杖彭铿叩铜鼓。长篇小字远相寄，一唱三叹神凄楚。江风海雨入牙颊，似听石室胡琴语。我今老病不出门，海山岩洞知何许，门外桃花自开落，床头酒瓮生尘土。前年开阁放柳枝，今年洗心参佛祖。梦中旧事时一笑，坐觉俯仰成今古。愿君不用刻此诗，东海桑田真旦莫。

和秦太虚梅花

西湖处士骨应槁，只有此诗君压倒。东坡先生心已灰，为爱君诗被花恼。多情立马待黄昏，残雪消迟月出早。江头千树春欲暗，竹外一枝斜更好。孤山山下醉眠处，点缀裙腰纷不扫。万里春随逐客来，十年花送佳人老。去年花开我已病，今年对花还草草。不如风雨卷春归，收拾余香还界昊。

再和潜师

化工未议苏群槁，先向寒梅一倾倒。江南无雪春瘴生，为散冰花除热恼，
风清月落无人见，洗妆自趁霜钟早。惟有飞来双白鹭，五羽琼枝斗清好。吴
山道人心似水，眼净尘空无可扫。故将妙语寄多情，横机欲试东坡老。东坡
习气除未尽，时复长篇书小草。且撼长条餐落英，忍饥未拟穷呼昊。

橄 榄

纷纷青子落红盐，正味森森苦且严。待得微甘回齿颊，已输崖蜜十分甜。

海 棠

东风嫋嫋泛崇光，香雾霏霏月转廊。只恐夜深花睡去，更烧高烛照红妆。

东 坡

雨洗东坡月色清，市人行尽野人行。莫嫌牵确坡头路，自爱铿然曳杖声。

生日王郎以诗见庆次其韵并寄茶二十一斤

折杨新曲万人趋，独和先生于 于，但信椽藏终自售，岂知碗脱本无杭。
揭从冰曳来游宦，肯伴 仙亦号儒。棠棣并为天下土，芙蓉曾到海边郭。不
嫌雾谷霾松柏，终恐虹梁荷栋桴。高论无穷如锯屑，小诗有味似连珠。感君
生日遥称寿，祝我余年老不枯。未办报君青玉案，建溪新饼截云腴。

别黄州

病疮老马不任 ，犹向君王得敝帷。桑下岂无三宿恋，樽前聊与一身归。
长腰尚载撑肠米，阔领先裁盖瘦衣。投老江湖终不失，来时莫遣收人非。

过江夜行武昌山上闻黄州鼓角

清风弄水月衔山，幽人夜渡吴王岷。黄州鼓角亦多情，送我南来不词远。
江南又闻出塞曲，半杂江声作悲健。谁言万方声一概，鼙愤龙愁为余变。我
记江边枯柳树，未死相逢真识面。他年一叶溯江来，还吹此曲相迎饯。

自兴国往筠宿石田驿南二十五里野人舍

溪上青山三百叠，快马轻衫来一抹。倚山修竹有人家，横道清泉知我渴。
芒鞋竹杖自轻软，蒲荐松床亦香滑。夜深风露满中庭，惟见孤萤自开阖。

将至筠先寄迟适远三犹子

露宿风食六百里，明朝饮马南江水。未见丰盈犀角儿，先逢玉雪王郎子。

时道逢王郎于建昌，方北行也。对床欲作连夜语，念汝还须戴星起。夜来梦见小放菟，还小名苑儿。犹是宪髻垂两耳。忆过济南春未动，三子出迎残雪里。我时移守古河东，酒肉淋漓浑舍喜。而今樵悴一羸马，逆旅担夫相汝尔。出城见我定惊嗟，身健穷愁不须耻。我为乃翁留十日，掣电一欢何足恃。惟当火急作新诗，一醉两翁胜酒美。

端午游真如迟适远从子由在酒局

一与子由别，却数七端午。身随彩丝系，心与昌歇苦。今年疋马来，佳节日夜数。儿童喜我至，典衣具鸡黍。水饼既怀乡，饭筒仍愍楚。谓言必一醉，快作四川语。宁知是官身，糟曲困薰煮。独携三子出，古刹访禅祖。高谈付梁罗，诗律到阿虎。归来一调笑，慰此长蛆龋。梁罗，迟适小名。

别子由三首 兼别迟

知君念我欲别难，我今此别非他日，风里杨花虽未定，雨中荷叶终不湿。三年磨我费百书。一见何止得双壁，愿君亦莫叹留滞，六十小劫风雨疾。

先君昔爱洛城居，我今亦过蒿山麓。水南上宅吾岂敢，试向伊川买修竹。又闻缙山好泉眼。傍市穿林泻冰玉。遥想茆轩照水开，两翁相对清如鹤。

两翁归隐非难事，惟要传家好儿子。忆昔汝翁如汝长，笔头一落三千字。世人闻此皆大笑，慎勿生儿两翁似。不知樗栋荐明堂，何似盐车压千里。

初别子由至奉新作

双鹄先我来，飞上东轩背。书随好梦到，人与佳节会。一欢难把玩，回首了无在。却渡来时溪，断桥号浅濑。茫茫暑天阔，蔼蔼孤城背。青山眊躁中，落日凄凉外。盛衰岂吾意，离合非所碍。何以解我忧，粗了一事大。

同年程筠德林求先坟二诗

思成堂

宰树连山谷，祠堂照路隅。养松无触鹿，助祭有驯乌。归梦先寒食，儿啼到白须。遥知邻里化，醉叟道争扶。

归真亭

旧笑桓司马，令师郑大夫。不知祖岁月，空觉老揪梧。祭礼传家法，阡名载版图。会看千字诛，木抄见龟趺。

过建昌李野夫公择故居

彭蠡东北源，庐阜西南麓。何人修水上，种此一双玉。思之不可见，破宅余修竹。四邻戒莫犯，十亩森似束。我来仲夏初，解箨呈新绿。幽鸟向我

鸣，野人留我宿。衰回不忍去，微月挂乔木。遥想他年归，解组巾一幅，对床老兄弟，夜雨鸣竹屋。卧听邻寺钟，书窗耿残烛。

初入庐山三首

青山若无素，偃蹇不相亲。要识庐山面，他年是故人。山南，山面也。
自昔怀清赏，神游杳蔼间。如今不是梦，真个在庐山。
芒屨青竹杖，自挂百钱游。可怪深山里，人人识故俟。

圆通禅院先君旧游也四月二十四日晚至宿焉明日忌日也乃手写宝积献盖颂佛一偈以赠长老仙公仙拊掌笑曰昨夜梦宝盖飞下著处辄出火岂此祥乎乃作是诗院有蜀僧宣逮事讷长老识先君云

石耳峰头路接天，梵音堂下月临泉。此生初饮庐山水，他日徒参雪窦禅。袖里宝书犹未出，梦中飞盖已先传。何人更识秘中散，野鹤昂藏未是仙。

子由在筠作东轩记或戏之为东轩长老其婿曹焕往筠余作一绝句送曹以戏子由曹过庐山出以示圆通慎长老慎欣然亦作一绝送客出门归入室跌坐化去子由闻之乃作二绝一以答予一以答慎明年余过圆通始得其诗乃追次慎韵

君到高安几日回，一时得薺旧尘埃。赠君一笼牢收取，盛取东轩长老来。余送曹诗。

东轩长老未相逢，已见黄州一信通。何必扬眉资目击，须知千里事同风。慎老和余韵。

东轩只似虚空样，何处人家笼解盛。纵使盛来无处著，雪堂自有老师兄。子由答予诗。

担头挑得黄州笼，行过圆通一笑开。却到山前人已寂，亦无一物可担回。子由答慎诗。

大士何曾有生死，小儒低处觅穷通。偶留一映千山上，散作人间万窍风。余和慎诗。

余过温泉壁上有诗云直待众生总元垢我方清冷混常流问人云长老可遵作遵已退居圆通亦作一绝

石龙有口口无根，自在流泉谁吐吞。若信众生本无垢，此泉何处觅寒温。

世传徐凝瀑布诗云一条界破青山色至为尘陋又伪作乐天诗称美此甸有赛不得之

语乐天虽涉浅易然岂至是哉乃戏作一绝

帝遣银河一派垂，古来惟有滴仙词，飞流溅沫知多少，不与徐凝洗恶诗。

书李公择白石山房

偶寻流水上崔嵬，五老苍颜一笑开。若见谪仙烦寄语，匡山头白早归来。

赠东林总长老

溪声便是广长舌，山色岂非清净身。夜来八万四千偈，他日如何举似人。

题西林壁

横看成岭侧成峰，远近高低无一同，不识庐山真面目，只缘身在此山中。

庐山二胜 并叙

余游庐山南北，得十五六，其胜殆不可胜纪，而懒不作诗，独择其尤者作二首。

开先漱玉亭

高岩下赤日，深谷来悲风。掌开青山峡，飞出两白龙。乱沫散霜雪，古潭摇清空。余流滑无声，快写双石欲。我来不忍去，月出飞桥东。荡荡白银关，沉沉水精宫。愿随琴高生，脚踏赤公。手持白芙蓉，跳下清冷中。

栖贤三峡桥

吾闻太山石，积日穿线溜。况此百雷霆，万世与石斗。深行九地底，验出三峽右。长输不尽溪，欲满无底窦。跳波翻潜鱼，震响落飞狖。清寒入山骨，草木尽坚瘦。空濛烟霜间，瀕洞金石奏。弯弯飞桥出，潏潏半月毅。玉渊神龙近，雨雹乱晴昼。垂瓶得清甘，可咽不可漱。

陶驥子骏佚老堂二首

文举与元礼，尚得称世旧。渊明吾所师，夫子乃其后。挂冠不待年，亦岂为五斗。我歌归来引，余增损渊明归去来，以就声律，谓之归来引。千载信尚友。相逢黄卷中，何似一杯酒。君醉我且归，明朝许来否。

我从庐山来，目送孤飞云。路逢陆道士，知是千岁人。试问当时友，虎溪已埃尘。似闻佚老堂，知是几世孙。能为五字诗，仍戴漉酒巾。人呼小靖节，自号葛天民。

和李太白 并叙

李太白有得阳紫极宫感秋诗，紫极宫今天庆观也。道士胡洞微以石本示予，盖其师卓死之所刻。玘有道术，节义过人，今亡矣。太白诗云：四十九年非，一往不可复。今予亦四十九，感之次其韵，玉芝一名琼田草，洞微种之七八年矣。云更数年可食，许以遗余，故并记之。

何处闻秋声，悄悄北窗竹。回薄万古心，揽之不盈掬。静坐观众妙，浩然媚幽独。白云南山来，就我檐下宿。懒从唐生决，差访季主卜。四十九年非，一往不可复。野情转萧散，世道有翻覆。陶令归去来，田家酒应熟。

寄卧虚寂堂，月明浸疏竹。伶然洗我心，欲饮不可掬。流光发永叹，自昔非予独。行年四十九，还此北窗宿，缅怀卓道人，白首寓医卜。谪仙固远矣，此士亦难复。世道如奕棋，变化不容覆。惟应玉芝老，待得蟠桃熟。

次韵道潜留别

为闻庐岳多真隐，故就高人断宿攀。已喜禅心无别语，尚嫌剃发有诗班。异同更莫疑三语，物我终当付八还。到后与君开北户，举头三十六青山。

第十四卷

诗七十九首

岐亭五首 并叙

元丰三年正月，余始谪黄州。至岐亭北二十五里，山上有白马青盖来迎者，则余故人陈糙季常也。为留五日，赋诗一篇而去。明年正月复往见之，季常使人劳余于中涂。余久不杀，恐季常之为余杀也，则以前韵作诗，为杀戒以遗季常，季常自尔不复杀，而岐亭之人多化之，有不食肉者。其后教往见之，往必作诗，诗必以前韵。凡余在黄四年，三往见季常，而季常七来见余，盖相从百余日也。七年四月，余量移汝州。自江淮祖维送者皆止慈湖，而季常独至九江。乃复用前韵通为五篇以赠之。

昨日云阴重，东风融雪汁。远林草木暗，近舍烟火湿。下有隐君子，啸歌方自得。知我犯寒来，呼酒意颇急。柑掌动邻里，绕村捉鹅鸭。房栊锵器声，蔬果照巾幘。久闻葵蒿美，初见新芽赤。洗盏酌鹅黄，磨刀削熊白。须臾我径醉，坐睡落中帙。醒时夜向阑，唧唧铜瓶泣。黄州岂云远，但恐朋友缺。我当安所主，君亦无此客。朝来静庵中，惟见峰峦集。

我哀篮中蛤。闭口护残汁。又哀网中鱼，开口吐微湿。剖肠彼交病，过分我何得。相逢未寒温，相劝此最急。不见卢怀慎，烝壶似烝鸭。坐客皆忍笑，髡然发其髻。不见王武子，每食刀机赤琉璃载烝豚，中有人乳白。卢公信寒陋，衰发得满帙。武子虽豪华，未死神已泣。先生万金壁，护此一蚁缺。一年如一梦，百岁真过客。君无废此篇，严诗编杜集。

君家蜂作窠，岁岁添漆汁。我身牛穿鼻，卷舌聊自湿。二年三过君，此行真得得。爱君似剧孟，叩门知缓急。家有红颊儿，能唱绿头鸭。行当隔帘见，花雾轻霏霏。为我取黄封，亲拆官泥赤。仍须烦素手，自点叶家白。乐哉无一事，十年不蓄帙。闭门弄添丁，哇笑杂呱泣。西方正苦战，谁补将帅缺。披图见八阵，合散更平声主客。不须亲戎行，坐论教君集。

酸酒如壶汤，甜酒如蜜汁。三年黄州城，饮酒但饮湿。我如更拣择，一醉岂易得。几思压茅柴，禁网日夜急。西邻推瓮盎，醉倒猪与鸭。君家大如掌。破屋无遮霏，何从得此酒，冷面妒君赤。定应好事人，千石供李白。为君三日醉，逢发不暇帙。夜深欲逾垣。卧想春瓮位。君奴亦笑我，鬢齿行秃缺。三年已四至，岁岁遭恶客。人生几两履，莫厌频来集。

枯松强钻膏，槁竹欲沥汁。两穷相值遇，相哀莫相湿。不知我与君，交游竟何得。心法幸相语，头然未为急。愿为穿云鸭，莫作将雏鸭。我行及初夏，煮酒映疏霏。故乡在何许，西望千山赤。兹游定安归，东泛万顷白。一欢宁复再，起舞花堕帙。将行出苦语，不用儿女位。吾非固多矣，君岂无一缺。各念别时言，闭户谢众客。空堂净扫地，虚白道所集。

郭祥正家醉画竹石壁上郭作 诗为谢且遗古铜剑二

空肠得酒芒角出，肝肺搓牙生竹石。森然欲作不可回，吐向君家雪色壁。

平生好诗仍好画，书墙惋壁长遭骂。不嗔不骂喜有余，世间谁复如君者。一双铜剑秋水光，两首新诗争剑铓。剑在床头诗在手，不知谁作蛟龙吼。

龙尾砚诗并引

余旧作风味石砚铭，其略云：苏子一见名风味，坐令龙尾羞牛后，已而求砚于敦。款人云：于自有风味，何以此为，盖不能平也。奉议郎方君彦德；有龙尾大砚，奇甚。谓余若能作诗少解前语者，当奉饷，乃作此诗。

黄琼白晡天不惜，顾恐贪夫死怀壁。君看龙尾岂石材，玉德金声寓于石。与天作石来几时，与人作砚初不辞。诗成鲍谢石何与，笔落钟王砚不知。锦茵玉匣俱尘垢，捣练支床亦何有。况嗔苏子风味铭，戏语相嘲作牛后，碧天照水风吹云，明窗大几清无尘。我生天地一闲物，苏子亦是支离人。粗言细语都不择，春蚓秋蛇随意画。愿从苏子老东坡，仁者不用生分别。

张近几仲有龙尾子石砚以铜剑易之

我家铜剑如赤蛇，君家石砚苍壁椭而洼。君持我剑向何许，大明宫里玉佩鸣冲牙。我得君砚亦安用，雪堂窗下尔雅笺虫虾。二物与人初不异，飘落高下随风花。崩缙玉具皆外物，视草草玄无等差。君不见秦赵城易壁，指图脱柱相矜夸。又不见二生妾换马，骄鸣嚼位思其家。不如无情两相与，水以为好，譬之桃李与琼华。

张作诗送砚反剑乃和其诗卒以剑归之

赠君长铗君当歌，每食无鱼叹委蛇。一朝得见暴公子，櫛具欲与冠争峨。岂比杜陵贫病叟，终日长镵随短蓑。斩蚊刺虎老无力，带牛佩犊吏所河。故将换砚岂无意，恐君雕琢伤天和。作诗反剑亦何谓，知君欲以诗相磨。报章若恨无好语，试向君砚求余波。诗成剑往砚应笑，那将屋漏供悬河。

去岁九月二十七日在黄州生子名
遁小名干儿欣然颖异至今年七月
二十八日病亡于金陵作二诗哭之

吾年四十九，羁旅失幼子。幼子真吾儿，眉角生已似。末期观所好，踰跼逐书史，摇头却梨栗，似识非分耻。吾老常鲜欢，赖此一笑喜。忽然遭夺去，恶业我累尔。衣薪那免俗，变灭须臾耳。归来怀抱空，老泪如泻水。

我泪犹可拭，日远当日忘。母哭不可闻，欲与汝俱亡。故衣尚悬架，涨乳已流床。感此欲忘生，一卧终日僵。中年忝闻道，梦幻讲已详。储药如丘山，临病更求方。仍将恩爱刃，割此衰老肠。知迷欲自反，一恸送余伤。

叶涛致远见和二诗复次其韵 涛颠倒元韵

平生无一女，谁复叹尔耳。滞留生此儿，足慰周南史。那知非真实，造

物聊戏尔。烦恼初无根，恩爱为种子。烦公为假说，反复相指似。欲除苦海浪，先干爱河水。弃置一寸鳞，悠然笑俟喜。为公写余习，瓶罍一时耻。

闻公少已悟，拄杖久倚床。笑我老而痴，负鼓欲求亡。庶几东门子，柱史安敢望。嗜毒戏猛兽，虑患先不详。囊破蛇已走，尚未省啮伤。妙哉两篇诗，洗我千结肠。黯蚕不作茧，未老辄自僵。永谢汤火厄，冷然超无方。

次荆公韵四绝

青李扶疏禽自来，清真逸少手亲栽。深红浅紫从争发，雪白鹅黄也斗开。所竹穿花破绿苔，小诗端为觅梢栽。细看造物初无物，春到江南花自开。骑驴渺渺入荒歧，想见先生未病时。劝我试求三亩宅，从公已觉十年迟。甲第非真有，闲花亦偶栽。聊为清净供，却对道人开。公病后。舍宅作寺。

张庖民挽词

东晋中车令，西京执戟郎。甘心向山水，结发事文章。故自轻千户，何曾羨一囊。天高鬼神恶，骨朽姓名芳。庾岭铭碣暗，秦淮旧宅荒。吾诗不用刻，妙语有黄香。黄鲁直作哀词。

次韵叶致远见赠

欲求五亩寄樵苏，所至迟留似贾胡。信命不须歌去汝，逢人未免叹犹吾。人皆劝我杯中物，我独怜君屋上乌。一技文章何足道，要言磨却是文殊。

次韵杭人裴维甫

余杭门外叶飞秋，尚记居人挽去舟。一别临平山上塔，五年云梦泽南州。凄凉楚些缘吾发，邂逅秦淮为子留。寄谢西湖旧风月，故应时许梦中游。

次韵段缝见赠

季子东周负郭田，须知力穡是家传。细思种蕘五十本，大胜取禾三百廛，若得与君连北巷，故应终老忘西川。短衣疋马非吾事，只拟关门不问天。

题孙思邈真

先生一去五百载，犹在峨眉西嶠中。自为天仙足官府，不应尸解坐虻虫。

戏作鲟鱼一绝

粉红石首仍无骨，雪白河豚不药人。寄语天公与河伯，何妨乞与水精鳞。

同王胜之游蒋山

到郡席不暖，居民空偶然。好山无十里，遗恨恐他年。欲款南朝寺，同登北郭缸，朱门收画戟，纣字出青莲。荆公宅已为寺。夹路苍髯古，迎人翠麓偏。龙腰蟠故国，鸟爪寄曾巅。竹抄飞华屋，松根泣细泉，峰多巧障日，江远欲浮天。略构横秋水，浮屠插暮烟。归来踏人影，云细月娟娟。

至真州再和二首

老手王摩诘，穷交孟浩然。论诗曾伴直，话旧已忘年。北上难陪骥，东行且趁船。离亭花映肉，醉眼鹭窥莲。拖转三山没，风回五两偏。荒祠过瓜步，古甃堕松巅。闻道清香阁，新 白玉泉。莫教门掩夜，坐待月流天。小院檀槽闹，空庭桦燭烟。公诗便堪唱，为付小婵娟。

公颜如雪柏，干载故依然。笑我无根柳，空中不待年。肯留归阙旆，坐待逆风船。特许门传箭，那知箭起莲。相逢月上后，小语坐西偏。流落千帆侧，追思百尺巅。躬耕怀谷口，水石羨平泉。茅屋归元亮，霓裳醉乐天。行闻宣室召，归近御炉烟。未用歌池上，随宜教李娟。

次韵答宝觉

芒屨竹杖布行缠，遮莫千山更万山。从来无脚不解滑，谁信石头行路难。

眉子石砚歌 与胡间

君不见成都画手开十眉，横云却月争新奇，游人拍点小鬟处，中有渔阳胡马嘶。又不见王孙青琅横双碧，肠断浮空远山色。书生性命何足论，坐费千金买消渴。尔来丧乱愁天公，谪向君家书砚中。小窗虚幌相妩媚，令君晓梦生春红。毗那居士谈空处，结习已空花不住。试教天女为磨铅，千偈澜翻无一语。

以玉带施元长老元以纳裙相报次韵

病骨难堪玉带围。钝根仍落箭锋机。欲教乞食歌姬院，故与云山旧纳衣。此带阅人如传舍，流传到我亦悠哉。锦袍错落真相称。乞与 佯狂老万回。

次韵滕元发许仲途秦少游

二公诗格老弥新，醉后狂吟许野人。坐看青丘吞泽芥，自惭黄潦荐溪蘋。两邦旌纛光相照，十亩锄犁手自亲。何似秦郎妙天下，明年献颂请东巡。

送金山乡僧 归蜀开堂

撞钟浮玉山，迎我三千指。众中闻警咳，未语知乡里。我非个中人，何以默识子。振衣忽归去，只影千山外。涪江与中伶，共此一味水。冰盘荐琥

珀，何似糖霜美。

送沈这赴广南

嗟我与君皆丙子，四十九年穷不死。君随幕府战西羌，夜渡水河斫云垒。飞尘涨天箭洒甲，归对妻孥真梦耳。我谪黄罔四五年，孤舟出没烟波里。故人不复通问讯，疾病饥寒疑死矣。相逢握手一大笑，白发苍颜略相似。我方北渡脱重江，君复南行轻万里。功名如幻何足计，学道有涯真可喜。岫崦丹砂已付君，汝阳蠹蝨吾何耻。君归赴我鸡黍约，买田筑室从今始。

豆 粥

君不见呼沱流撕车折轴，公孙仓皇奉豆粥。湿薪破灶自燎衣，饥寒顿解刘文叔。又不见金谷敲水草木春，帐下烹煎皆美人。萍齏豆粥不传法，咄嗟而办石季伦。干戈未解身如寄，声色相缠心已醉。身心颠倒自不知，更识人间有真味。岂如江头千顷雪色，芦苑檐出没晨烟，孤地确春。粳光似玉，沙瓶煮豆软如酥。我老此身无着处，卖书来问东家住。卧听鸡鸣粥热时，逢头曳履君家去。

秦少游梦发殡而葬之者云是刘发之柩是 岁发首荐秦以诗贺之刘经亦作因次其韵

君看三代士执雉，本以杀身为小补。居官死职战死绥，梦尸得官真古语。五行胜已斯为官，官如草木吾如土。仕而未禄犹宾客，待以纯臣盖非古。馈焉曰献称寡君，岂比公卿相尔汝。世衰道微士失已，得丧悲惧友其故。草袍芦屨相妩媚，饮食嬉游事群聚。曲江船舫月灯毵，是谓舞殡而歌墓。看花走马到东野，余子纷纷何足数。二生年少两豪逸，诗酒不知轩冕苦。故令将仕梦发棺，劝子勿为官所腐。涂车刍灵皆假设，着眼细看君勿误。时来聊复一飞鸣，进隐不须烦伍举。

金山梦中作

江东贾客木绵裘，会散金山月满楼。夜半潮来风又熟，卧吹萧管到扬州。

次韵周種惠石铈

铜腥铁涩不宜泉，爱此苍然深且宽。蟹眼翻波汤已作，龙头拒火柄犹寒。姜新盐少茶初熟，水渍云蒸藓未干。自古函牛多折足，要知无脚是轻安。

次韵蒋颖叔

月明惊鹊未安枝，一棹飘然影自随。江上秋风无限浪，枕中春梦不多时。琼林花草闻前语，罨画溪山指后期。岂敢便为鸡黍约，玉堂金殿要论思。蒋诗、记及第时琼林宴，坐中所言，且约同卜居阳羨。

龟山辩才师

此生念念浮云改，寄语长淮今好在。故人宴坐虹梁南，新河巧出龟山背。木鱼呼客振林莽，铁凤横空飞彩绘。忽惊堂宇变雄深，坐觉风雷生警咳。美师游戏浮沔间，笑我荣枯弹指内。尝茶看画亦不恶，问法求诗了无碍。千里孤帆又独来，五年一梦谁相对。何当来世结香火，永与名山躬井硯。

赠潘谷

潘郎晓踏河阳春，明珠白璧惊市人。那知望拜马蹄下，胸中一斛泥与尘。何似墨潘穿破褐，琅琅翠饼敲玄笏。布衫漆黑手如龟，未害水壶贮秋月。世人重耳轻目前，区区张李争媿妍。一朝入海寻李白，空看人间画墨仙。

徐大正闲轩

冰吞不知寒，火鼠不知暑。知闲见闲地，已觉非闲侣。君看东坡翁，懒散谁比数。形骸堕醉梦，生事委尘土。早眠不见灯，晚食或欺午。卧看毡取盗，坐视麦漂雨。语希舌颊强，行少腰脚偻。五年黄州城，不踏黄州鼓。人言我闲客，置此闲处所。问闲作何味，如眼不自睹。颇讶徐孝廉，得闲能几许。介子愿奉使，翁归备文武。应缘不耐闲，名字挂庭宇。我诗为闲作，更得不闲语。君如汗血驹，转盼略燕楚。莫嫌銜貉重，终胜盐车苦。

蒜山松林中可卜居余欲僦其地地 属金山故作此诗与金山元长老

魏王大瓠无人识，种成何翅实五石。不词破作两大尊，只忧水浅江湖窄。我材菠落本无用，虚名惊世终何益。东方先生好自誉，孟贵子路并为一。杜陵布衣老且愚，信口自比契与稷。莫年欲学柳下惠，嗜好酸咸不相入。金山也是不羁人，早岁闻名晚相得。我醉而嬉欲仙去，旁人笑倒山谓实。问我此生何所归，笑拍浮休百年宅。蒜山幸有闲田地，招此无家一房客。

王中父哀词 并叙

仁宗朝以制策登科者十五人，轼忝冒时，尚有富彦国、张安道、钱子飞、吴长文、夏公西、陈令举、钱醇老、王中父、并轼与家弟辙，九人存焉。其后十有五年，哭中父于密州，作诗吊之，则子飞、长文、令举没矣。又八年，轼自黄州量移汝海，与中父之子沆之。相遇于京口，相持而泣，则十五人者，独三人存耳。盖安道及轼与家弟而已。呜呼，悲夫！乃复次前韵以遗沆之，时沆之亦以罪谪家于钱塘云。

生刍不独比前人，束藁端能废谢鲲。子达想无身后念，吾衰不复梦中论。已知毅豹为均死，未识荆凡定孰存。堪笑东坡痴钝老，区区犹记刻舟痕。

蔡景繁官舍小阁

使君不独东南美，典刑长记先君子。戏嘲王叟短辕车，肯为徐郎书纸尾。三年弭节江湖上，千首放怀风月里。手开东阁坐虚明，目净东溪照清泚。素琴浊酒容一榻，落霞孤鹜供千里。大舫何时系门柳，小诗屡欲书窗纸。文昌新构满鹓鸾，都邑正喧收杞梓。相逢一醉岂有命，南来寂寞君归矣。

高邮陈直躬处士画雁二首

野雁见人时，未起意先改。君从何处看，得此无人态。无乃槁木形，人禽两自在。北风振枯苇，微雪落璀璀。惨淡云水昏，晶荧沙砾碎。戈人怅何慕，一举渺江海。

众禽事纷争，野雁独闲絮。徐行意自得，俯仰老有节。我衰寄江湖，老伴鸡鹅鸭。作书问陈子，晓景画苔雪。依依聚圆沙，稍稍动斜月。先鸣独鼓翅，吹乱芦花雪。

和王旂二首 旂，平父子

异时长怪谪仙人，舌有风雷笔有神。闻道骑鲸游汗漫，忆尝们蛰话悲辛。气吞余子无全目，诗到诸郎尚绝伦。白发故交空掩卷，泪河东注问苍旻。

嫋嫋春风送渡关。娟娟霜月照生还。迟留岁莫江淮上，来往君家伯仲间。未厌冰滩吼新洛，且看松雪媚南山。野梅官柳何时动，飞盖长桥待子闲。

次韵张畹

新洛霜余两岸险，尘埃举袂识西风。临淮自古多名士，樽酒相从乐寓公。半日偷闲歌啸里，百年待尽往来中，知君不向穷愁老，尚有清诗气吐虹。

次韵王定国南迁回见寄

土晕铜花蚀秋水，要须悍石相砮砥。十年冰蘖战膏粱，万里烟波谬纨绮。归来诗思转清激，百丈空 数鲂鲤。逝将桂浦撷兰荪，不记槐堂收剑履。却思庾岭今何在，更说彭城真梦耳。来诗述彭城旧游。君知先謁是甘井，我愿得全如苦李。妄心不复九回肠，至道终当三洗髓。广陵阳羨何足较，只有无何真我里。余买田阳羨，来诗以为不如广陵。乐全老子今禅伯，张安道也，定国其婿。掣电机锋不容拟。心通岂复问云何，印可聊须答如是。相逢为我话留滞，桃花春涨孤舟起。

赠梁道人

采药壶公处处过，笑看金狄手摩挲。老人大父识君久，造物小儿如子何。寒尽山中无历日，雨斜江上一渔蓑。神仙护短多官府，未厌人间醉踏歌。

题雍秀才画草虫八物

促 织

月丛号耿耿，露叶泣清清。夜长不自暖，那忧公子寒。

蝉

蜕形浊污中，羽翼便翾好。秋来问何阔，已抱寒茎槁。

蝦蟆

悍目知谁瞋，蟠腹空自胀。慎勿困蜈蚣，饥蛇不汝放。

蝗

洪钟起暗室，飘瓦落空庭。谁言转丸手，能作殷床声。

天水牛

两角徒自长，空飞不服箱。为牛竟何事，利吻穴枯桑。

蝎 虎

跂跂有足蛇，脉脉无角龙。为虎君勿笑，食尽蚕尾虫。

蜗 牛

腥涎不满壳，聊足以自濡。升高不知回，竟作黏壁枯。

鬼 蝶

双眉卷铁丝，两翅晕金碧。初来花争妍，忽去鬼无迹。

泗州南山监仓萧渊东轩二首

偶随樵父采都梁，南山名都梁山，山出都梁香故也。竹屋松扉试乞浆。但见东轩堪隐几，不知公子是监仓。溪中乱石墙垣古，山下寒蔬匕箸香。我是江南旧游客，挂冠知有老萧郎。

北望飞尘苦昼霾，洗心聊复寄东斋。珍禽声好犹思越，野橘香清未过淮。有信微泉来远岭，无心明月转空阶。一官仓庾真堪老，坐看松根络断崖。

泗州除夜雪中黄师是送酥酒二首

莫雪纷纷投碎米，春流咽咽走黄沙。旧游似梦徒能说，逐客如僧岂有家。冷砚欲书先自冻，孤灯何事独成花。使君半夜分酥酒，惊起妻孥一笑哗。

关右土酥黄似酒，扬州云液却如酥。欲从元放觅拄杖，忽有曲生来座隅。
对雪不堪令饱暖，隔船应已厌歌呼。明朝积玉深三尺，高枕床头尚一壶。

章钱二君见和复次韵答之

黄昏已作风翻絮，半夜犹惊月在沙。照汴玉峰明佛刹，隔淮云海暗人家。
来 有信迎三白，詹匭无香散六花。詹匭，梔子花也，与雪花皆大出。欲唤
阿咸来守岁，林乌枥马斗喧哗。

分无纤手裁春胜，况有新诗点蜀酥。醉里冰髭失纓络，梦回布被起廉隅。
君应旅睫寒生晕，我亦饥肠夜自呼。明日南山春色动，不知谁佩紫微壶。

正月一日雪中过淮谒客回作二首

十里清淮上，长堤转雪龙。水崖落展齿，风叶乱裘茸。万顷穿银海，千
寻渡玉峰。从来修月手，合在广寒宫。

攒眉有底恨，得句不妨清。弄雾开寒谷，饥鸦舞雪城。桥声春市散，塔
影莫淮平。不用残灯火，船窗夜自明。

刘乙新作射亭 乙新尝知眉州

兰玉当年刺史家，双鞬驰射笑穿花。而今白首闲 马，只有清樽照画蛇。
寂寂小轩蛛网遍，阴阴垂柳雁行斜。手柔弓燥春风后，置酒看君中戟牙。

孙莘老寄墨四首

徂徕无老松，易水无良工。珍材取乐浪，妙手惟潘翁。潘谷作墨，杂用
高丽煤。鱼胞熟万杵，犀角盘双龙。墨成不敢用，进入蓬莱宫。蓬莱春昼永，
三殿明房栊。金笺洒飞白，瑞雾萦长虹。遥怜醉常侍，一笑开天容。

溪石琢马肝，剡藤开玉版。嘘嘘云雾出，奕奕龙蛇绾。此中有何好，秀
色纷满眼。故人归天禄，古漆窥蠹简。脩麈给尚方，老手擅编划。分余幸见
及，流落一叹 。

我贫如饥鼠，长夜空咬啮。瓦池研灶煤，苇管书柿叶。近者唐夫子，远
致乌玉块。唐林夫寄张遇墨半丸。先生又继之，圭壁烂箱篋。清窗洗砚坐，
蛇蚓稍蟠结。便有好事人，敲门求醉帖。

吾穷本坐诗，久服朋友戒。五年江湖上，闭口洗残债。今来复稍稍，快
疗如爬疥。先生不讥河，又复寄诗械。幽光发奇思，点黠出荒怪。诗成一自
笑，故疾逢虾蟹。

留题兰皋亭

雪后东风未肯和，扣门迁客夜经过。不知旧竹生新笋，但见清伊换浊河。
无复往来乘下泽，聊同笑语说东坡。明年我亦开三径，寂寂兼无雀可罗。

和人见赠

只写东坡不著名，此身已是一长亭。壮心无复春流起，衰鬓从教病叶零。
知有雪儿供笔砚，应嗤灶妇洗盆瓶。回来索酒公应厌，京口新传作客经。

和田仲宣见赠

头白江南醉司马，宽心时复唤殷兄。寒潮不应淮无信，客路相随月有情。
未许低头拜东野，徒言共饮胜公荣。好诗恶韵那容和，刻烛应须便置觥。

和王胜之三首

城上湖光暖欲波，美人唱我踏春歌。鲁公宾客皆诗酒，谁是神仙张志和。
斋酿如渑涨绿波，公诗句句可弦歌。流觞曲水无多日，更作新诗继永和。
要知太守怜孤客，不惜阳春和俚歌。坐睡樽前呼不应，为公雕琢损天和。

记梦并序

乐全先生，梦人以诗三篇示之，字皆旁行而不可识。旁有人道衣古貌，
为读其中一篇云：人事且常在，留质悟圆间。凡四句觉而忘其二。以告其客
苏轼，轼以私意广之云。

圆间有物物间空，岂有圆空入井中。不信天形真个样，故应眼力自先穷。
连环已解如神手，万窍犹号未济风。稽首问公公大笑，本来谁碍更求通。

第十五卷

诗七十二首

寄蕲簟与蒲传正

兰溪美箭不成笛，离离玉筋排霜脊。千沟万缕自生风，入手未开先惨慄。公家列屋闲蛾眉，珠帘不动花阴移。雾帐银床初破睡，牙签玉局坐弹棋。东坡病叟长羁旅，冻卧饥吟似饥鼠。倚赖春风洗破衾，一夜雪寒披故絮。火冷灯青谁复知，孤舟儿女自忧呻。皇天何时反炎燠，愧此八尺黄琉璃。愿公净扫清香阁，卧听风漪声满榻。习习还从两腋生，请公乘此朝闾阖。

寄怪石石斛与鲁元翰

山骨裁方斛，江珍拾浅滩。清池上几案，碎月落杯盘。老去怀三友，平生困一簟。坚姿聊自傲，秀色亦堪餐。好去髯卿舍，凭将道眼看。东坡最后供，霜雪照人寒。

渔父四首

渔父饮，谁家去，鱼蟹一时分付。酒无多少醉为期，彼此不论钱数。
渔父醉，蓑衣舞，醉里却寻归路。轻舟短棹任斜横，醒后不知何处。
渔父醒，春江午，梦断落花飞絮。酒醒还醉醉还醒，一笑人间今古。
渔父笑，轻鸥举，漠漠一江风雨。江边骑马是官人，借我孤舟南渡。

李宪仲哀词 并叙

同年友李君讳惇字宪仲，贤而有文，不幸早世。轼不及与之游也，而识其子廌有年矣。廌自阳翟见余于南京，泣白：吾祖母边母马前母张与君之丧皆未葬，贫不敢以饥寒为戚，顾四丧未举，死不瞑目矣。适会故人梁先古老闻余当归耕阳羨，以绢十匹丝百两为赙，辞之不可。乃以遗廌曰：此亦仁人之馈也。既又作诗以告知君与廌者，庶几皆有以助之。廌年二十五，其文晬然，气节不凡，此岂终穷者哉。

大梦行当觉，百年特来满。遑哀已逝人，长眠寄孤馆。念我同年生，意长日月短。监车因骐驎，烈火废圭瓚。后生有奇骨，出语已精悍。萧然野鹤姿，谁复识中散。有生寓大块，死者谁不窆。嗟君独久客，不识黄土暖。推衣助孝子，一溉滋汤旱。谁能脱左骖，大事不可缓。

赠眼医王生彦若

针头如麦芒，气出如车轴。间关络脉中，性命寄毛粟。而况清净眼，内景含天烛。琉璃贮沆瀣，轻脆不任触。而子于其间，来往施锋镞。笑谈纷自若，观者颈为缩。运铁如运斤。去翳如拆屋。常疑子善幻，他技杂符祝。子言吾有道，此理君未瞩。形骸一尘垢，贵贱两草木。世人方重外，妄见瓦与

玉。而我初不知，刺眼如刺肉。君看目与臀，是翳要非目。目翳苟二物，易分如麦菽。宁闻老农夫，去草更伤谷。鼻端有余地，肝胆分楚蜀。吾于五轮间，荡荡见空曲。如行九轨道，并驱无击毅。空花谁开落，明月自朏朋。请问乐全堂，忘年老尊宿。彦岩，乐全先生门下医也。

与欧育等六人饮酒

忽惊春色二分空，且看樽前半丈红。苦战知君便白羽，倦游怜我忆黄封。年来齿发者未老，此去江淮东复东。记取六人相会处，引杯看剑坐生风。

观杭州铃辖欧育刀剑战袍

青绫纳衫暖衬甲，红线勒巾光绕肋。秃襟小袖雕鹞盘，大刀长剑龙蛇插。两军鼓噪屋瓦坠，红尘白羽纷相戛。将军恩重此身轻，笑履锋铓如一掬。书生只肯坐帷幄，谈笑毫端弄生杀。叫呼击鼓催上竿，猛士应怜小儿黠。试问黄河夜偷渡，掠面惊沙寒霎霎。何如大舰日高眠，一枕清风过苔雪。

王伯 所藏赵昌画四首

梅 花

南行渡关山，沙水清练练。行人已愁绝，日暮集微霰。殷勤小梅花，仿佛吴姬面。暗香随我去，回首惊千片。至今开画图，老眼凄欲泫。幽怀不可写，归梦君家倩。

黄 葵

弱质困夏永，奇姿苏晓凉。低昂黄金杯，照耀初日光。檀心自成晕，翠叶森有芒。古来写生人，妙绝谁似昌。晨妆与午醉，真态含阴阳。君看此花枝，中有风露香。

芙 蓉

清飏已拂林，积水渐收潦。溪边野芙蓉，花水相媚好。坐看池莲尽，独伴霜菊槁。幽姿强一笑，莫景迫摧倒。凄凉似贫女，嫁晚惊衰草。谁写少年容，樵人剑南老。

山 茶

萧萧南山松，黄叶陨劲风。谁邻儿女花。散火冰雪中。能传岁寒姿，古来惟丘翁。赵叟得其妙，一洗胶粉空。掌中调丹砂，染此鹤顶红。何须夸落墨，独赏江南工。

寄吴德仁兼简陈季常

东坡先生无一钱，十年家火烧凡铅。黄金可成河可塞，只有霜鬓无由玄。龙丘居士亦可怜，谈空说有夜不眠。忽闻河东狮子吼，拄杖落手心茫然。谁似濮阳公子贤，饮酒食肉自得仙。平生寓物不留物，在家学得忘家禅。门前罢亚十顷田，清溪绕屋花连天。溪堂醉卧呼不醒，落花如雪春风颠。我游兰溪访清泉，已办布袜青行缠。稽山不是无贺老，我自兴尽回酒船。恨君不识颜平原，恨我不识元鲁山。铜驼陌上会相见，握手一笑三千年。

题王逸少帖

颠张醉素两秃翁，追逐世好称书工。何曾梦见王与钟，妄自粉饰欺盲聋。有如市倡抹青红，妖歌嫖舞眩儿童。谢家夫人谈丰容，萧然自有林下风。天门荡荡惊跳龙，出林飞鸟一扫空。为君草书续其终，待我他日不匆匆。

书林通诗后

吴依生长湖山曲，呼吸湖光饮山绿。不论世外隐君子，佣儿贩妇皆冰玉。先生可事绝俗人，神清骨冷无由俗。我不识君曾梦见，瞳子了然光可烛。遗篇妙字处处有，步绕西湖看不足。诗如东野不言寒，书似西台差少肉。

平生高节已难继，将死微言犹可录。自言不作封禅书，更看悲吟白头曲。通临终诗云：茂陵异日求遗草，犹喜初无封禅书。我笑吴人不好事，好作祠堂傍修竹。不然配食水仙王，一盏寒泉荐秋菊。

和伸伯达

归山岁月苦无多，尚有丹砂奈老何。绣谷只应花自染，镜潭长与月相磨。君方傍海看初日，我已横江击素波。人不我知斯我贵，不须雷雨起龙梭。

春日

鸣鸠乳燕寂无声，日射西窗泼眼明。午醉醒来无一事，只将春睡赏春晴。

赠袁陟

是身如虚空，万物皆我储。胡为强分别，百金买田庐。不见袁夫子，神马载尻舆。游于无何有，一饭不愿余。官湖为我池，学舍为我居。何以遗子孙，此身自遽蔭。薰风暗杨柳，秋水净芙蕖。应观我知子，不怪子知鱼。

苏子容母陈夫人挽词

苏陈甥舅真冰玉，正始风流起颓俗。夫人高节称其家，凛凛寒松映修竹。鸡鸣为善日日新，八十三年如一晨。岂惟家室宜寿母，实与朝廷生异人。忘躯殉国乃吾子，三仕何曾知愠喜。不烦拥笏强垂鱼，我视去来皆梦耳。诵诗相挽真区区，墓碑千字多遗余。他年太史取家传，知有班昭续汉书。

归宜兴留题竹西寺

十年归梦寄西风，此去真为田舍翁。剩觅蜀冈新井水，要携乡味过江东。道人劝饮鸡苏水，童子能煎菟栗汤。暂借藤床与瓦枕，莫教辜负竹风凉。此生已觉都无事，今岁仍逢大有年。山寺归来闻好语，野花啼鸟亦欣然。

与孟震同游常州僧舍

年来转觉此生浮，又作三吴浪漫游。忽见东平孟君子。梦中相对说黄州。湛湛清池五月寒，小山无数碧嶙峋。稚杉戢戢三千本，且作凌云合抱看。知君此去便归耕，笑指孤舟一叶轻。待向三苑乞灵雨，半篙流水赠君行。

赠常州报恩长老

碧玉碗盛红玛瑙，井花水养石菖蒲。也知法供无穷尽，试问禅师得饱无。荐福老怀真巧便，净慈两本更尖新。凭师为作铁门限，准备人间请话人。

次韵答贾耘老

五年一梦南司州，饥寒疾病为子忧。东来六月井无水，仰看古堰横奔牛。平生管鲍我知子，今日陈蔡谁从丘。夜航争路泥水涩，牵挽直欲来瓜洲。自言嗜酒得风痺，故乡不敢居温柔。空将泛爱救沟壑，衰病不复从前乐。今年太守真卧龙，笑语炎天出冰雹。时低九尺苍须髯，过我三间小池阁。故人改观争来贺，小儿不信犹疑错。为君置酒饮且哦，草间秋虫亦能歌。可怜老骥真老矣，无心更秣天山禾。

墨 花 并叙

世多以墨画山水竹石人物者，未有以画花者也。汴人尹白能之，为赋一首。

造物本无物，忽然非所难。花心超墨晕，春色散毫端。缥缈形才具，扶疏态自完。连风尽倾倒，杏雨半披残。独有狂居士，求为黑牡丹。兼书平子赋，归向雪堂看。

送竹几与谢秀才

平生长物扰天真，老去归田只此身。留我同行木上坐，赠君无语竹夫人。但随秋扇年年有，莫斗琼枝夜夜新。堪笑荒唐玉川子，莫年家口若为亲。

溪阴堂

白水满时双鹭下，绿槐高处一蝉吟。酒醒门外三竿日，卧看溪南十亩阴。

次韵许遵

蒜山渡口挽归艎，朱雀桥边看道装。供帐已应烦百两，击鲜无久溷诸郎。
问禅时到长干寺，载酒闲过绿野堂，此味只忧儿辈觉，逢人休道北窗凉。

赠章默 并叙

章默居士字志明，生公侯家，才性高爽，弃家求道。不蓄妻子，与世无累，而父母与兄之丧，贫不能举。以是眷眷世间，不能无求于人。余深哀其志，既有以少助之，又取其言为诗，以赠其行，庶几有哀之者。章子亲未葬，余生抱羸疾。朝吟噎邻里，夜泪腐茵席。前年黑花生，今岁白发出。身随日月逝，恨与天地毕。愿求不毛田，亲筑长夜室。难从王孙裸，未忍夏后墾。五陵多豪士，百万付一掷。心知义财难，甘就贫友乞。不词毛粟施，行自丘山积。此志苟朝遂，夕死真不戚。誓求无生理，不践有为迹。弃身尸阡林，乌鸟任狼籍。

送穆越州

江海相忘十五年，羨君松柏蔚苍颜。四朝耆旧冰霜后，雨郡风流水石间。旧政犹传蜀父老，先声已振越溪山。樽前俱是逢莱守，莫放高楼雪月闲。

赠葛苇

竹椽茆屋半摧倾，肯向蜂窠寄此生。长恐波头卷室去，欲将船尾载君行。小诗试拟孟东野，大草闲临张伯英。消遣百年须底物，故应怜我不归耕。

赠王寂

与君暂别不须嗟，俯仰归来鬓未华。记取江南烟雨里，青山断处是君家。

南都妙峰亭

千寻挂云阙，十顷含风湾。开门弄清泚，照见双铜环。池台半禾黍，桃李余榛菅。无人肯回首，日暮车班班。史君非世人，心与古佛闲。时邀声利客，来洗尘埃颜。新亭在东阜，飞字凌通阓。古磬磨翠壁，霜林散烟鬣。孤云抱商丘，芳草连杏山。俯仰尽法界，逍遥寄人寰。亭亭妙高峰，了了蓬艾间。五老压彭蠡，三峰照潼关。均为拳石小，配此一掬慳。烦公为標拍，免使勤跻攀。

神宗皇帝挽词三首

文武固天纵，钦明又日新。化民何止圣，妙物独称神。政已三王上，言皆六籍醇。巍巍本无象，刻画愧孤臣。

未易名尧德，何须数舜功。小心仍致孝，余事及平戎。典礼从周旧，官

仪与汉隆。谁知本无作，千古自承风。

接统真千岁，膺期止一章。周南稍留滞，宣室送凄凉。病马空嘶枥，枯葵已泫霜。余生卧江海，归梦泣嵩邙。

金山妙高台

我欲乘飞车，东访赤松子。蓬莱不可到，弱水三万里。不如金山去，清风半帆耳。中有妙高台，云峰自孤起。仰观初无路，谁信平如砥。台中老比丘，碧眼照窗几。嶮嶮玉为骨，凛凛霜入齿。机锋不可触。千偈如翻水。何须寻德云，即此比丘是。长生未暇学，请学长不死。

赠杜介 并叙

元丰八年七月二十五日，杜几先自浙东还，与余相遇于金山，话天台之异，以诗赠之。

我梦游天台，横空石桥小。松风吹露，翠湿香嫋嫋。应真飞锡过，绝涧度云鸟。举意欲从之，翛然已松杪。微言粲珠玉，未说意先了。觉来如堕空，耿耿窗户晓。群生陷迷网，独达从古少。杜叟予何人，长啸万物表。妻孥空四壁，振策念轻矫。遂为赤城游，飞步凌缥缈，问禅不归舍，屡为瓠壶绕。何人识此志，佛眼自照燎。我梦君见之，卓尔非魔娆。仙葩癸茗碗，剪刻分葵藿。从今更不出，闭户闲騷。时从佛顶岩，驰下双莲沼。

次韵孙莘老斗野亭寄子由在邵伯堰

落帆谢公渚，日脚东西平。孤亭得小憩，莫景含余清。坐待斗与牛，错落挂南甍。老僧如夙昔，一笑意已倾。新诗出故人，旧事疑前生。吾生七往来，送老海上城。逢人辄自哂，得鱼不忍烹。似闻绩溪老，复作东都行。小诗如秋菊，艳艳霜中明。过此感我言，长篇发春荣。

送杨杰 并叙

无为子尝奉使，登泰山绝顶，鸡一鸣见日出。又尝以事过华山，重九日饮酒莲花峰上。今乃奉诏与高丽僧统游钱塘，皆以王事而从方外之乐，善哉未曾有也。作是诗以送之。

天门夜上宾出日，万里红波半天赤。归来平地看跳丸，一点黄金铸秋橘。太华峰头作重九，天风吹滟黄花酒。浩然驰下腰带鞬，醉舞崩崖一挥手。神游八极万缘虚，下视蚊雷隐污渠。大千一息八十返，笑厉东海骑鲸鱼。三韩王子西求法，凿齿弥天两劲敌。过江风急浪如山，寄语舟人好看客。

次韵送徐大正

别时酒盏照灯花，知我归期渐有涯。去岁渡江萍似斗，今年并海枣如瓜。多情明月邀君共，无价青山为我赊。千首新诗一竿竹，不应空钓汉江槎。

杨康功有石状如醉道士为赋此诗

楚山固多猿，青者点如寿。化为狂道士，山谷恣腾蹂。误入华阳洞，窃饮苑君酒。君命囚岩间，岩石为械杻。松根络其足。藤蔓缚其时。苍苔眯其目，丛棘哽其口。三年化为石，坚瘦敌琼玖。无复号云声，空余舞杯手。樵夫见之笑，抱卖易升斗。杨公海中仙，世俗那得友。海边逢姑射。一笑微俯首。胡不载之归，用此顽且丑。求诗纪其异，本末得细剖。吾言岂妄云，得之亡是叟。

遥作淮口遇风诗戏用其韵

我诗如病骥，悲鸣向衰草。有儿真骥子，一喷群马倒。养气勿吟哦，声名忌太早。风涛借笔力，势逐孤云扫。何如陶家儿，绕舍觅梨枣。君看押强韵，已胜郊与岛。

次韵徐积

杀鸡未肯邀季路，裹饭先须问子来。但见中年隐槐市，岂知平日赋兰台。海山入梦方东去，风雨留人得暂陪。若说蛾眉眼前是，故乡何处不堪回。

元丰七年有诏京东淮南筑高
丽亭馆密海二州骚然有逃亡者
明年轼过之叹其壮丽留一绝云

檐楹飞舞垣墙外，桑柘萧条斤斧余。尽赐昆耶作奴婢，不知偿得此人无。

过密州次韵赵明叔乔禹功

先生依旧广文贫，老守时遭醉尉嗔。汝辈何曾堪一笑，吾侪相对复三人。黄鸡催晓凄凉曲，白发惊秋见在身。一别胶西旧朋友，扁舟归钓五湖春。

再过常山和昔年留别诗

伛偻山前叟，迎我如迎新。那知梦幻躯，念念非昔人。江湖久放浪，朝市谁相亲。却寻泉源去，桃花逢避秦。

再过超然台赠太守霍翔

昔饮雩泉别常山，天寒岁在龙蛇间。山中儿童拍手笑，问我西去何当还。十年不赴竹马约，扁舟独与渔蓑闲。重来父老喜我在，扶孳老幼相遮攀。当时襁褓皆七尺，而我安得留朱颜。问今太守为谁欤，护羌充国鬓未斑。翔自言在燕河作屯田有功。躬持牛酒劳行役，无使杞菊嘲寒慳。超然置酒寻旧迹，尚有诗赋饯坚顽。孤云落日在马耳。照耀金碧开烟鬟。却淇自古北流水，跳波下濑鸣玫环。愿公谈笑作石埭，坐使城郭生溪湾。

海市 并叙

予闻登州海市旧矣。父老云：常出于春夏，今岁晚不复见矣。予到官五日而去，以不见为恨，祷于海神广德王之庙，明日见焉。乃作此诗。

东方云海空复空，群仙出没空明中。荡摇浮世生万象，岂有贝阙藏珠宫。心知所见皆幻影，敢以耳目烦神工。岁寒水冷天地闭，为我起蛰鞭鱼龙。重楼翠阜出霜晓，异事惊倒百岁翁。人间所得容力取，世外无物谁为雄。率然有请不我拒，信我人厄非天穷。潮阳太守南迁归，喜见石廩堆祝融。自言正直动山鬼，岂知造物哀龙钟。信眉一笑岂易得，神之报汝亦已丰，斜阳万里孤鸟没，但见碧海磨青铜，新诗绮语亦安用，相与变灭随东风。

登州孙氏松堂

万松谁种已 ，半岭苍云映此邦。露重珠缨蒙翠盖，风来石齿碎寒江。浮空两竹横南阁，倒景扶桑射北窗。坐待夕烽传海峤，重城归去踏逢逢。

过莱州雪后望三山

东海如碧环，西北卷登莱。云光与天色，直到三山回，我行适冬仲，薄雪收浮埃。黄昏风絮定，半夜扶桑开。参差太华顶，出没云涛堆。安期与羡门，乘龙安在哉。茂陵秋风客，劝尔麾一杯。帝乡不可期，楚些招归来。

遗直坊 并叙

富郑公之客，李君讳常登人也。故太守李公讳师中，榜其间曰遗直，而其子大方求诗于轼，为赋一首。

使君不浪出，羔雁亲扣门。先生但请坐，薤水已多言。当时邦人化，市无晨饮豚。岁月曾几何，客主皆九原。鲁经有余叹，楚些无归魂。我作遗直诗，过者式其藩。

次韵赵令铤

东坡已报六年穰，惆怅红尘白首郎。枕上溪山犹可见，门前冠盖已相望。故人年少真琼树，落笔风生战堵墙。端向瓮间寻吏部，老来专以醉为乡。

次韵王定国得颖倅二首

仙风入骨已凌云，秋水为文不受尘。一噫固应号地籁，余波犹足挂天绅。买牛但自捐三尺，射鼠何劳挽六钧。莫向百花潭上去，醉翁不见与谁春。

滔滔四海我知津，每愧先生植杖芸。自少多言晚闻道，从今闭口不论文。湘翻白兽樽中酒，归煮青泥坊底芹。要识老僧无尽处，床前牛蚁不曾闻。

次韵赵令铎惠酒

神山无石髓，生世悲暂寓。坐待玉膏流，千载真旦暮。青州老从事，高上非所部。惠然肯见从，知我憎市酤。开瓶自洗盏，肴核谁与具。门前听剥啄，烹鱼得尺素。

送范纯粹守庆州

才大古难用，论高常近迂。君看赵魏老，乃为滕大夫。浮云无根蒂，黄潦能须臾。知经几成败，得见真贤愚。羽旄照城阙，谈笑安边隅。当年老使君，赤手降放菟。诸郎更何事，折箠鞭其雏。吾知邓平叔，不斗月支胡。

次韵王震

携文过我治平间，雾豹当时始一斑。闻道吹嘘借余论，故教流落得生还。清篇带月来霜夜，妙语先春发病颜。诗酒暮年犹足用，竹林高会许时攀。

次韵王定国谢韩子华过饮

楚有孙叔敖，长城隐千里。哀哉练裙子，负薪蹶破履。岂无故交亲，逝去如覆水。不如老优孟，谈笑托谐美。世家不可恃，如倚折足几。祥符有贤相，手握天下砥。懿敏亦名公，三贵德爵齿。盖棺今几日，公子谁料理。谁要卿料理，欲说且止止。宅相开府公，久为苍生起。如何垂老别，冰盘债苍耳。亲嫌妨鸚荐，相对发微泚。新诗如弹丸，脱手不移晷。我亦老宾客，苦语落纨绮。莫词三上章，有道贫贱耻。

惠崇春江晓景二首

竹外桃花三两枝，春江水暖鸭先知。蒌蒿满地芦芽短，正是河豚欲上时。两两归鸿欲破群，依依还似北归人。遥知朔漠多风雪，更待江南半月春。

次韵周邠

南迁欲举力田科，三径初成乐事多。岂意残年踏朝市，有如疲马畏陵坡。羨君同甲心方壮，笑我无聊鬓已皤。何日西湖寻旧赏，淡烟疏雨暗渔蓑。

次韵胡完夫

青山别泪尚斓斑。十载江湖困抱关。老去上书还北阙，朝来拄笏望西山。相从盃酒形骸外，笑说平生醉梦间。万事会须咨伯始，白头容我占清闲。

次韵钱穆父

老入明光踏旧班，染须那复唱阳关。故人飞上金銮殿，迁客来从饭颗山。

大笔推君西汉手，一言置我二刘间。便须置酒呼同舍，看赐飞龙出帝闲。

再次韵答完夫穆父
二公自言先世同在西掖

掖垣老吏识郎君，并辔天街两绝尘。汗血固应生有种，夜光那复困无因。
岂知西省深严地，也著东坡病瘦身。免使谪仙明月下，狂歌对影只三人。

次韵答满思复

自甘茅屋老三间，岂意彤廷缀两班。纸落云烟供醉后，诗成珠玉看朝还。
谁言载酒山无贺，记取啼鸟巷有颜。但恐跛随赤骥，青云飞步不容攀。

第十六卷

诗八十八首

送戴蒙赴成都玉局观将老焉

拾遗被酒行歌处，野梅官柳西郊路。闻道华阳版籍中，至今尚有城南杜。我欲归寻万里桥，水花风叶暮萧萧。芋魁径尺谁能尽，桤木三年已足烧。百岁风狂定何有，羨君今作峨眉叟。纵未家生执戟郎，也应世出埋轮守。莫欺老病未归身，玉局他年第几人。会待子猷清兴发，还须雪夜去寻君。

送陈睦知潭州

华清缥渺浮高栋，上有缣林藏石瓮。一杯此地初识君，千岩夜上同飞鞚。君时年少面如玉，一饮百觚嫌未痛。白鹿泉头山月出，寒光泼眼如流汞。朝元阁上酒醒时，卧听风銮鸣铁凤。旧游空在人何处，二十三年真一梦。我得生还雪髯满，君亦老嫌金带重。有如社燕与秋鸿，相逢未稳还相送。洞庭青草渺无际，天柱紫盖森欲动。湖南万古一长嗟，付与骚人发嘲弄。

用前韵答西掖诸公见和

双猊蟠础龙缠栋，金井辘轳鸣晓瓮。小殿垂帘白玉钩，大宛立仗朱丝鞚。风驭宾天云雨隔，孤臣忍泪肝肠痛。羨君意气风生坐，落笔纵横盘走汞。上樽日日写黄封，赐茗时时开小凤。闭门怜我老太玄，给札看君赋云梦。金奏不知江海眩，木瓜屡费瑶琼重，岂惟蹇步困追攀，已觉侍史疲奔送。春还宫柳腰支活，雨入御沟鳞甲动。借君妙语发春容，顾我风琴不成弄。

次韵王觐正言喜雪

圣人与天通，有诏宽狱市。好语夜喧街，湿云朝覆砌。纷然退朝后，色映宫槐媚。欲夸剪刻工，故上朱蓝袂。我方执笔待，未敢书上瑞。君犹伏阁争，高论亦少慰。靠靠止还作，盎盎风与气。神龙久潜伏，一怒势必倍。行当见三白，拜舞欢万岁。归来饮君家，酣咏追既醉。

和蒋发运

夜雨翻千偈，书来又一言。此身真佛祖，何处不羲轩。船稳江吹坐，楼空月入樽。遥知思我处，醉墨在颓垣。

送表弟程六知楚州

炯炯明珠照双壁，当年三老苏程石。里人下道避鸠杖，刺史迎门倒皂舄。我时与子皆儿童，狂走从人觅梨栗。健如黄犊不可恃，隙过白驹那暇惜。醴泉寺古垂橘柚，石头山高暗松栝。诸孙相逢万里外，一笑未解千扰积。子方

得郡古山阳，老手风生谢刀笔。我正含毫紫微阁，病眼昏花困书檄。莫教印缓系余年，去扫坟墓当有日。功成头白早归来，共藉梨花作寒食。

和人假山

上党挽天碧玉环，绝河千里抱商颜。试观烟雨三峰外，都在灵仙一掌间。造物何如童子戏，写真聊发使君闲。何当挈取西征去，画作围床六曲山。

送王伯 守虢

华山东麓秦遗民，当时依山来避秦。至今风俗含古意，柔桑绿水招行人。行人掉臂不回首，争入崤函土囊口。惟有使君千里来，欲饮三堂无事酒。三堂本来一事无，日长睡起闻投壶。床头砚石开云月，涧底松根雪腴。山棚盗散人安寝，劝买耕牛发陈廩。归来只作水衡卿，我欲携壶就君饮。

道者院池上作

下马逢佳客，携壶傍小池。清风乱荷叶，细雨出鱼儿。井好能水齿，茶甘不上眉。归涂更萧瑟，真个解催诗。

次韵子由送千之侄

江上松楠深复深，满山风雨作龙吟。年来老干都生菌，下有孙枝欲出林。白发未成归隐计，青衫犹有济时心。闭门试草三千牍，仄席求人少似今。

书文与可墨竹并叙

亡友文与可有四绝：诗一，楚词二，草书三，画四。与可尝云：世无知我者，惟子瞻一见识吾妙处。既没七年，睹其遗迹而作是诗。笔与子皆逝，诗今谁为新。空遗运斤质，却吊断弦人。

次韵钱舍人病起

床下龟寒且耐支，杯中蛇去未应衰。殿门明日逢王傅，櫺具争先看不疑。坐觉香烟携袖少，独愁花影上廊迟。何妨一笑千痾散，绝胜仓公饮上池。

次韵和王巩

谪仙窜夜郎，子美耕东屯。造物岂不借，要令工语言。王郎年少日，文如瓶水翻。争锋虽剽甚，闻鼓或惊奔。天欲成就之，使触羝羊藩。孤光照微陋，耿如月在盆。归来千首诗，倾写五石樽。却疑彭泽在，颇觉苏州烦。君看邹忌子，廉折配春温。知音必无人，坏壁挂桐孙。

用王巩韵送其侄震知蔡州

九门插天开，万马先朝屯。举鞭红尘中，相见不得言。夜走清虚宿，扣门惊鹊翻。君家汾阳家，永巷车雷奔。夕郎方不夕，列乾以自藩。相逢开月阁，画檐低金盆。至今梦中语，犹举灯前樽。阿戎修玉牒，未惮笔削烦。君归助献纳，坐继岑与温。我客二子间，不复寻诸孙。子美诗云：权门多噂醕，且复寻诸孙。

虢国夫人夜游图

佳人自鞚玉花骝，翩如惊燕踏飞龙。金鞭净道宾钗落，何人先入明光宫。宫中羯鼓催花柳，玉奴弦索花奴子。坐中八姨真贵人，走马来看不动尘。明眸皓齿谁复见，只有丹青余泪痕。人间俯仰成今古，吴公台下雷塘路。当时一笑潘丽华，不知门外韩擒虎。

用旧韵送鲁元翰知 州

我在东坡下，躬耕三亩园。君为尚书郎，坐拥百吏繁。鸣蛙与鼓吹，等是俗物喧。永谢十年旧，老死三家村。惟君绋袍信，到我雀罗门。缅怀故人意，欲使薄夫敦。新年对宣室，白首代尧言。相逢问前辈，所见多后昆。道馆虽云乐，冷卿当复温。还持刺史节，却驾朱轮轩。黄发方用事，白须宜少存。嗣圣真生知，拯民如救燔。初囚羽渊魄，尽返湘江魂。坐忧东郡决，老守思王尊。北流桑柘没，故道尘埃翻。知君一寸心，可敌千步垣。流云自栖止，老幼忘崩奔。得闲闭阁坐，勿使道眼浑。聊乘应舍笈，直泝无生源。归来成二老，夜榻当重论。

次韵朱光庭初夏

朝罢人人识郑崇，直声如在履声中。卧闻疏响梧桐雨，独咏微凉殿阁风。谏苑君方续承业，醉乡我欲访无功。陶然一枕谁呼觉，牛蚁新除病后聪。

次韵朱光庭喜雨

久苦赵盾日，欣逢傅说霖。坐知千里足，初觉两河深。破屋常持伞，无薪欲爨琴。清诗似庭燎，虽美未忘箴。

奉敕祭西太一和韩川韵四首

圣主新除祕祝，侍臣来乞丰年。寿宫神君欲至，半夜灵风肃然。玉玺亲题御笔，金童来侍天香。礼罢祝融参乘，前驱已过衡湘。解剑独行残月，披衣困卧清风。梦蝶犹飞旅枕，粥鱼已响枯桐。降水初含晓绿，稻花半作秋香。阜盖却迎朝日，红云正遶宫墙。

西太一见王荆公旧诗偶次其韵二首

秋早川原净丽，雨余风日清酣。从此归耕剑外，何人送我池南。
但有樽中若下，何须墓上征西。闻道乌衣巷口，而今烟草萋迷。

次韵子由送陈侗知陕州

谁能如铁牛，横身负黄河。滔天不能没，尺箠未易诃。世俗自无常，徐公故逶迤。别来不可说，事与浮云多。当时无限人，毁誉即墨阿。虚声了无实，夜虫鸣机梭。相逢一笑外，奈此白发何。天骥皆云，长鸣饱刍禾。王庭旅百实，大具随弓戈。君独一麾去，欲赓五袴歌。甘棠古乐国，白酒金叵罗。知君不久留，治行中新科。过客足嗔喜，东堂记分鹅。此外但坐啸，后生工揣摩。

送贾讷倅眉二首

当年入蜀叹空回，未见峨眉肯再来。童子遥知颂襦袴，使君先已洗樽罍。李大夫眉之贤守也鹿头北望应逢雁，人日东郊尚有梅。人日出东郊，渡江游蟆颐山，眉之故事也。我老不堪歌乐职，后生试觅子渊才。

老翁山下玉渊回，手植青松三万栽。父老得书知我在，小轩临水为君开。试看一一龙蛇活，更听萧萧风雨哀。便与甘棠同不翦，苍髯白甲待归来。先君葬于蟆颐山之东二十余里，地名老翁泉。若许为一往，感叹之深，故及。

送程建用

先生本舌耕，文字浩千顷。空仓付公子，坐待发苜颖。十年困新说，儿女争捕影。凿垣种蒿蓬，嘉谷谁复省。空余南陔意，太息北堂冷。织屨随方进，采薪教韦逞。辛勤守一经，菽水贤五鼎。今年闻起废，鲁史复光景。公子亦改官，三就繁马颈。归来一笑粲，素发飒垂领。会看金花诏，汤沐奉朝请。天公不吾欺，寿与龟鹤永。

次韵李修孺留别二首

十年流落敢言归，鱼鸟江湖只自知。岂意青天扫云雾，尽呼黄发寄安危。风流吾子真前辈，人物他年记一时。我欲折纁留此老，缁衣谁作好贤诗。

此生别袖几回麾，梦里黄州空自疑。何处青山不堪老，当年明月巧相随。穷通等是思家意，衰病难堪送客悲。好去江鱼煮江水，剑南归路有姜诗。

次韵黄鲁直赤目

诵诗得非子夏学，网史正作丘明书。天公戏人亦薄相，略遣幻翳生明珠。赖君年来屏鲜腴，百千灯光同一如。书成自写蝇头表，端就君王觅镜湖。

和周正孺坠马伤手

平生学道已神完，岂复儿童私自怜。醉坠何曾伤内守，色忧当为念先传。

书空渐觉新诗健，把蟹行看乐事全。卖却老驄为酒直，大呼乡友作新年。

戏周正孺二绝

折臂三公未可知，会当千镒访权奇。劝君鬻酪犹闲事，肠断闺中杨柳枝。
天厩新颁玉鼻骅，故人共弊亦常情。相如虽老犹能赋，换马还应继二生。

题文与可墨竹 并叙

故人文与可，为道师王执中作墨竹，且谓执中勿使他人书字，待苏子瞻来令作诗其侧。与可既没八年，而轼始还朝见之。乃赋一首。

斯人定何人，游戏得自在，诗鸣草圣余，兼入竹三昧。时时出木石，荒怪轶象外。举世知珍之，赏会独余最。知音古难合，奄忽不少待。谁云死生隔，相见如龚隗。

潘推官母李氏挽词

南浦凄凉老逐臣，东坡还往尽幽人。杯盘惯作陶家客，弦诵常叨孟母邻。
尚有升堂他日约，岂知负土一阡新。今年我欲江湖去，莫雨连山宰树春。

玉堂栽花周正孺有诗次韵

故山桃李半荒榛，粗报君恩便乞身。竹簟暑风招我老，玉堂花蕊为谁春。
纤纤翠蔓诗催发，皎皎霜葩发斗新。只有来禽青李帖，他年留与学书人。

杜介送鱼

新年已赐黄封酒，旧老仍分頰尾鱼。陋巷关门负朝日，小园除雪得春蔬。
病妻起斫银丝鲙，稚子谨寻尺素书。醉眼眈眈觅归路，松江烟雨晚疏疏。

送杜介归扬州

再入都门万事空，闲看清洛漾东风。当年帷幄几人在，回首觚稜一梦中。
采药会须逢蓟子，问禅何处识庞翁。归来邻里应迎笑，新长淮南旧桂丛。

秋咏石屏

霏霏点轻素，眇眇开重阴。风花乱紫翠，雪外有烟林。雪近势方壮，林
远意殊深。会有无事人，支颐识此心。

和黄鲁直烧香二首

四句烧香偈子，随香遍满东南。不是闻思所及，且令鼻观先参。
万卷明窗小字，眼花只有斓斑。一炷烟消火冷，半生身老心闲。

再和二首 来诗言饮酒画竹石草书

置酒未逢休沐。便同越北燕南。且复歌呼相和，隔墙知是曹参。
丹青已自前世，竹石时窥一斑。五字当还静节，数行谁似高闲。

武昌西山并叙

嘉祐中，翰林学士承旨邓公圣求为武昌令，常游寒溪西山，山中人至今能言之。轼谪居黄冈，与武昌相望，亦常往来溪山间。元祐元年十一月二十九日，考试馆职，与圣求会宿玉堂，偶话旧事，圣求尝作元次山洼樽铭，刻之岩石，因为此诗，请圣求同赋，当以遗邑人，使刻之铭侧。

春江绿涨蒲荡醅，武昌官柳知谁栽。忆从樊口载春酒，步上西山寻野梅。西山一上十五里，风驾两掖飞崔嵬。同游困卧九曲岭，褰衣独到吴王台。中原北望在何许，但见落日低黄埃。归来解剑亭前路，苍崖半入云涛堆。浪翁醉处今尚在，石臼杯饮无樽罍。尔来古意谁复嗣，公有妙语留山隈。至今好事除草棘，常恐野火烧苍苔。当时相望不可见，玉堂正对金銮开。岂知白首同夜直，卧看椽烛高花摧。江边晓梦忽惊断，铜环玉锁鸣春雷，山人帐空猿鹤怨，江湖水生鸿雁来。请公作诗寄父老，往和万壑松风哀。

再用前韵

朱颜发过如春醅，胸中梨枣初未栽。丹砂未易扫白发，赤松却欲参黄梅。寒溪本自远公社，白莲翠竹依崔嵬。当时石泉照金像，神光夜发如五台。饮泉鉴面得真意，坐视万物皆浮埃。欲收暮景返田里，远泝江水穷离堆。还朝岂独羞老病，自叹才尽倾空罍。诸公渠渠若夏屋，吞吐风月清隅隈。我如废井久不食，古甃缺落生阴苔。数诗往复相感发，汲新除旧寒光开。遥知二月春江阔，云浪倒卷云峰摧。石中无声水亦静，云何解转空山雷。欲就诸公评此语，要识忧喜何从来。愿求南宗一勺水，往与屈贾湔余哀。韦应物诗云：水性本云静，石中固无声，如何雨相激，雷转空山惊。

送杨孟容

我家峨眉阴，与子同一邦。相望六十里，共饮玻璃江。江山不违人，遍满千家窗。但苦窗中人，寸心不自降。子归治小国，洪钟噫微撞。我留侍玉坐，弱步敬丰扛，后生多高才，名与黄童双。不肯入州府，故人余老庞。慙勤与问讯，爱惜霜眉厖。何以待我归，寒醅发春缸。

见子由与孔常父唱和诗辄次其韵余昔在馆中
同舍出入辄相聚饮酒赋诗近岁不复讲故终篇
及之庶几诸公稍复其旧亦太平盛事也。

君先鲁东家，门户照千古。文章固应尔，须鬣余似处。虽非蒙俱状，尚有历国苦。诵书口澜翻，布谷杂杜宇。十年困奔走，栉沐饱风雨。吾道其非耶，野处岂兕虎。灞陵闲老将，柏直口尚乳。自君兄弟还，鼎立知有补。蓬山耆旧散，故事谁删去。来迎冯翊传，出饯会稽组。吾犹及前辈，诗酒盛册府。愿君唱此风，扬觝斯杜举。

赵令晏崔白大图幅径三丈

扶桑大茧如瓮盎，天女织绡云汉上。往来不遣凤衔梭，谁能鼓臂投三丈。人间刀尺不敢裁，丹青付与濠梁崔。风蒲半折寒雁起，竹间的皪横江梅。画堂粉壁翻云幕，十里江天无处着。好卧元龙百尺楼，笑看江水拍天流。

次韵张昌言给事省宿

冯颠久已欹残雪，戎眼何曾眩落晖。朔野按行犹雀跃，东台瞑坐觉乌飞。道家有乌飞入兔宫之说。漫夸年少容吾在，乐天诗云：犹有夸张少午处，笑呼张文唤殷兄。若斗樽前举世稀。待向崧阳求水竹，一犁烟雨伴公归。

和三舍人省上 三月二十九日作明日驾幸景灵宫

纷纷荣瘁何能久，云雨从来翻覆手。恍如一梦堕枕中，却见三贤起江右。曾子开、刘贡父、孔经父，皆江西人。嗟君妙质皆瑚璉，顾我虚名但箕斗，明朝冠盖蔚相望，共扈翠辇朝宣光。武皇已老白云乡，正与群帝骖龙翔。独留杞梓扶明堂。

送钱承制赴广南路分都监

当年我作表忠碑，坐觉江山气未衰。舞凤尚从天目下，收驹时有渥洼姿。据床到处堪吹笛，横架何人解赋诗。知是丹霞破佛手，先声应已慑群夷。广西僧寺，顷有佛动之异，钱君碎而投之江中。

次韵曾子开从驾二首

街槐绿暗雨初匀，瑞雾香风满后尘。清庙幸同观济济，丰年喜复接陈陈。雍容已履天庖赐，俯伏初尝贡茗新。辇路归来闻好语，共惊尧颡类高辛。

入仗魂惊愧草莱，一声清蹕九门开。晖晖日傍金舆转，习习风从玉宇来。流落生还真一芥，周章危立近三槐。学士班近执政。道傍傥有山中旧，问我收身早晚回。

再 和

眼花错莫鬓霜匀，病马羸驹只自尘。奉引拾遗叨侍从，思归少傅羨朱陈。衰年壮观空惊目，峻韵清诗苦斗新。最后数篇君莫厌，捣残椒桂有余辛。

忆观沧海过东莱，日照三山迤邐开。挂观飞楼凌雾起，仙幢宝盖拂天来。不闻宫漏催晨箭，但觉檐阴转古槐。供奉清班非老处，会稽何日乞方回。时方开会稽守。

次韵刘贡父省上

密云今日破郊西，疏雨翛翛未作泥。要及清闲同笑语，行看衰病费扶持。花前白酒倾云液，户外青 响月题。不用临风苦挥泪，君家自与竹林齐。贡父诗中有不及与其兄原父同时之叹；然其兄子仲冯，今为起居舍人。

再 和

当年曹守我胶西，共厌 糟与汨泥。自古赤丸成习俗，因公黄犊免提携。生还各有青山兴，病起犹能小字题。莫怪歌吁数相和，曾将狱市寄全齐。贡父为曹州，盗贼皆奔邻境，盖尝有诗云：从来晋盗稍奔秦。

送顾子敦奉使河朔

我友顾子敦，躯胆两俊伟。便便十围腹，不但贮书史。容君数百人，一笑万事已。十年卧江海，了不见愠喜。磨刀向猪羊、酾酒会邻里。归来如一梦，丰颊愈茂美。平生批敕手，依墨写黄纸。会当勒燕然，廊庙登剑履。翻然向河朔，坐念东郡水。河来屹不去，如尊乃勇耳。

次韵子由送家退翁知怀安军

吾州同年友，粲若琴上星。当时功名意，岂止拾紫青。事既与愿违，天或不假龄。今如图中鹤，俯仰在一庭。吾州同年友十三人，今存者六人而已，故有“琴上星”、图中鹤之语。退翁守清约，霜菊有余馨。鼓笛方入破，朱弦微莫听。西南正春早，废沼黏枯萍。翩然一麾去，想见灵雨零。我无谪仙句，待诏沉香亭。空骑内厩马，天仗随云骈。竟无丝毫补，春焉谁汝令。永愧旧山叟，恁君寄丁宁。

诸公饯子敦辄以病不往复次前韵

君为江南英，面作河朔伟。人间一好汉，谁似张长史。上书苦留君，言拙辄报已。置之勿复道，出处俱可喜。攀舆共六尺，食肉飞万里。谁言远近殊，等是朝廷美。遥知送别处，醉墨争淋纸。我以病杜门，商颂空振履。后会知何日，一欢如覆水。善保千金躯，前言戏之耳。

和张昌言喜雨

二圣忧勤忘寝食，百神奔走会风云。禁林夜直鸣江濑，清洛朝回起穀纹。梦觉酒醒闻好句，帐空簟冷发余薰。秋来定有丰年喜，剩作新诗准备君。

次韵刘贡父西省种竹

要知西掖承平事，记取刘郎种竹初。旧德终呼名字外，后生谁续笑谈余。昔李公择种竹馆中，戏语同舍，后人指此竹，必云李文正手植。贡父笑曰：“文正不独系笔，亦知种竹耶？”时有笔工李文正。成阴障日行当见，取笋供庖计已疏。白首林间望天上，平安时报故人书。李卫公北都童子寺竹，寺僧日报平安。

偶与客饮孔常父见访方设席延请忽上马 驰去已而有诗戏用其前韵答之

扬雄他文不皆奇，独称观瓶居并眉。酒客法士两小儿，陈遵张竦曾何知。主人有酒君独辞，蟹螯何不左手持。岂复见吾横气机，遣人追君君绝驰，尽力去花君自痴。醍醐与酒同一卮，请君更问文殊师。

次韵子由书李伯时所藏韩干马

潭潭古屋云幕垂，省中文书如乱丝。忽见伯时画天马，朔风胡沙生落锥。天马西来从西极，势与落日争分驰。龙膺豹股头八尺，奋迅不受人间羁。元狩虎脊聊可友，开元玉花何足奇。伯时有道真吏隐，饮啄不羨山梁雌。丹青弄笔聊尔耳，意在万里谁知之。干惟画肉不画骨，而况失实空余皮。烦君巧说腹中事，妙语欲遣黄泉知。君不见韩生自言无所学，厩马万匹皆吾师。

次韵刘贡父独直省中

明窗畏日晓先暝，高柳鸣蝉午更喧。笔老新诗疑有物，心空客疾本无根。隔墙我亦眠风榻，上马君先琐月轩。共喜早归三伏近，解衣盘礴亦君恩。

轼以去岁春夏侍立迓英而秋冬之交子由 相继入侍次韵绝句四首各述所怀

曈曈日脚晓犹清，细细槐花暖自零。坐阅诸公半廊庙，时看黄色起天庭。仆射吕公、门下韩公、左丞刘公，皆自讲席大用。

上尊初破早朝寒，茗碗仍沾讲舌干。陛楯诸郎空雨立，故应惭悔不儒冠。两鹤摧颓病不言，年来相继亦乘轩。误闻九奏聊飞舞，可得裴回为啄吞。微生偶脱风波地，晚岁犹存铁石心。定似香山老居士，世缘终浅道根深。乐天自江州司马，除忠州刺史，旋以主客郎中知制诰，遂拜中书舍人。轼虽不敢自比，然谪居黄州，起知文登，召为仪曹，遂忝侍从，出处老少，大略相似，庶几复享此翁晚节闲适之乐焉。

送宋朝散知彭州迎侍二亲

东来谁迎使君车，知是丈人屋上乌。丈人今年二毛初，登楼上马不用扶，

使君负署为前驱，蜀人不复谈相如。老幼化服一事无，有鞭不施安用蒲。春波如天涨平湖，鞞红照坐香生肤。帑上寿白玉壶，公堂登歌凤将雏。诸孙笑争挽须，蜀人画作西湖图。

郭熙画秋山平远 潞公为跋尾

玉堂昼掩春日闲，中有郭熙画春山。鸣鸠乳燕初睡起，白波青嶂非人间。离离短幅开平远，漠漠疏林寄秋晚。恰似江南送客时，中流回头望云岫。伊川佚老鬓如霜，卧看秋山思洛阳。为君纸尾作行草，炯如嵩洛浮秋光。我从公游如一日，不觉青山映黄发。为画龙门八节滩，待向伊川买泉石。

次韵张昌言喜雨

千里黄流失故居，年来赤地到青徐。遥闻争诵十行语，无异亲巡六尺舆。精贯天人一言足，云与岳读万灵趋。爱君谁似元和老，贺雨诗成即谏书。

书晁补之所藏与可画竹三首

与可画竹时，见竹不见人。岂独不见人，嗒然遗其身。其身与竹化，无穷出清新。庄周世无有，谁知此疑神。

若人今已无，此竹宁复有。那将春蚓笔，画作风中柳。君看断崖上，瘦节蛟蛇走。何时此霜竿，复入江湖手。

晁子拙生事，举家闻食粥。朝来又绝倒，谀墓得霜竹。可怜先生槃，朝日照苜蓿。吾诗固云尔，可使食无肉。吾旧诗云：可使食无肉，不可居无竹。

戏用晁补之韵

昔我尝陪醉翁醉，今君但吟诗老诗。清诗咀嚼那得饮，瘦竹潇洒令人饥。试问凤凰饥食竹，何如弩马肥苜蓿。知君忍饥空诵诗，口颊澜翻如布谷。

书皇亲画扇

十年江海寄浮沈，梦遶江南黄苇林。谁谓风流贵公子，笔端还有五湖心。

书李世南所画秋景

野木参差落涨痕，疏林欹倒出霜根。扁舟一掉归何处，家在江南黄叶村。人间斤斧日创夷，谁见龙蛇百尺姿。不是溪山曾独往，何人解作挂猿枝。

书鄱陵王主簿所画折枝二首

论画以形似，见与儿童邻。赋诗必此诗，定非知诗人。诗画本一律，天工与清新。边鸾雀写生，赵昌花传神。何如此两幅，疏澹含精匀。谁言一点红，解寄无边春。

瘦竹如幽人，幽花如处女。低昂枝上雀，摇荡花间雨。双翎决将起，众叶纷自举。可怜采花蜂，清蜜寄两股。若人富天巧，春色入毫楮。悬知君能诗，寄声求妙语。

昨见韩丞相言王定国今日玉堂独坐有怀其人

画卧玉堂上，微风举轻纨。铜瓶下碧井，百尺鸣飞澜。俯仰清梦余，受此一掬寒。似予平生友，苦语凉肺肝。秀眉玉两颊，矫矫如翔鸾。置之江淮交，清诗洗江湍。红鳞对白酒，信美非所安。丞相功业成，还家酒杯宽。人间有此客，折简呼不难。相将扣东阁，起舞尽余欢。

和张耒高丽松扇

可怜堂堂十八公，老死不入明光宫。万牛不来难自献，裁作团团手中扇。屈身蒙垢君一洗，挂名君家诗集里。犹胜汉宫悲婕妤，网虫不见乘鸾子。

故李承之待制六丈挽词

青青一寸松，中有梁栋姿。天骥堕地走，万里端可期。世无阿房宫，可建五丈旗。又无穆天子，西征燕瑶池。材大古难用，老死亦其宜。丈夫恐不免，岂患莫已知。公如松与骥，少小称伟奇。俯仰自廊庙，笑谈无羌夷。清朝竟不用，白首仍忧时。愿斩横行将，请烹干没儿。言虽不见省，坐折奸雄窥。嗟我去公久，江湖生白髭。归来耆旧尽，零落存者谁。比公嵇中散，龙性不可羁。疑公李北海，慷慨多雄词。凄凉五君咏，沉痛八哀诗。邪正久乃明，人今属公思。九原不可传，千古有余怨。

次韵孔常父送张天觉河东提刑

送君应典鹓鹓裘，恁仗千钟洗别愁。脱帽风流余长史，君喜草书而不工，故以此为戏。埋轮家世本留侯。张綱，子房七世孙也。犍为武阳人，墓在今彭山，君岂其后耶？子河骏马方争出，麟府马出于河汉。昭义疲兵亦少休。唐称昭义步兵，盖泽潞弓箭手。定向秋山得嘉句，故关黄叶满行辀。

送张天觉得山字

西登太行岭，北望清凉山。晴空浮五髻，暎蔼乡云间。余光入岩石，神草出茅菅。何人相指似，稍稍落人寰。能念坠指儿，虬髯茁冰颜。祝君如此草，为民已痍。我亦老且病，眼花腰脚顽。念当勤致此，莫作河东悭。

次韵王定国倅扬州

此身江海寄天游，一落红尘不易收。未许相如还蜀道，空教何逊在扬州。又惊白酒催黄菊，尚喜朱颜映黑头。火急著书千古事，虞卿应未厌穷愁。

第十七卷

诗八十八首

赠李道士 并叙

驾部员外郎李君宗固，景祐中良吏也。守汉州。有道士尹可元，精练善画，以遗火得罪，当死。君缓其狱，会赦，获免。时可元年八十一，自誓且死，必为李氏子以报。可元既死二十余年，而君子世昌之妇，梦可元入其室，生子曰得柔，小名蜀孙。幼而善画，既长，读庄、老，喜之，遂为道士，赐号妙应，事母以孝谨闻。其写真，盖妙绝一时云。

世人只数曹将军，谁知虎头非痴人。腰间大羽何足道，颊上三毛自有神。平生狎侮诸公子，戏著幼舆岩石里。故教世世作黄冠，布袜青鞋弄云水。千年鼻祖守关门，一念还为李耳孙。香火旧缘何日尽，丹青余习至今存。五十年初过二，衰颜记我今如此。他时要指集贤人，知是香山老居士。

次韵张舜民自御史出俯虢州留别

玉堂给札气如云，初喜湘累复佩银。樊口凄凉已陈迹。昔与张同游武昌樊口，来诗中及之。班心突兀见长身。台吏谓御史立处为班心。江湖前日真成梦，鄂杜他年恐卜邻。此去若容陪坐啸，故应客主尽诗人。

次韵米黻二王书跋尾二首

三馆曝书防蠹毁，得见来禽与青李。秋蛇春蚓久相杂，野鹜家鸡定谁美。玉函金籀天上来，紫衣敕使亲临启。纷纶过眼未易识，磊落挂壁空云委。归来妙意独追求，坐想蓬山二十秋。怪君何处得此本，上有桓玄寒具油。巧偷豪夺古来有，一笑谁似痴虎头。君不见长安永宁里，王家破垣谁复修。

元章作书日千纸，平生自苦谁与美。画地为饼未必似，要令痴儿出馋水。锦囊玉轴来无趾，粲然夺真疑圣智。忍饥看书泪如洗，至今鲁公余乞米。

次韵宋肇惠澄心纸二首

诗老囊空一不留，百番曾作百金收。永叔以澄心百幅遗圣俞，圣俞有诗。知君也厌雕肝肾，分我江南数斛愁。

君家家学陋相如，宜与诸儒论石渠。古纸无多更分我自应给札奏新书。

郭熙秋山平远二首

目尽孤鸿落照边，遥知风雨不同川。此间有句无人见，送与襄阳孟浩然。木落骚人已怨秋，不堪平远发诗愁。要看万壑争流处，他日终烦顾虎头。

送欧阳辩监澶州酒

汗血驾鼓车，何从致千里。纷纷糟曲间，欲试贤公子。君家江南英，濯足沧浪水。揭渡旧黄河，涨沙埋马耳。由来付造物，倚伏何穷已。当念楚子文，三仕无愠喜。

九月十五日迎英讲论语终篇赐执政讲读
史官燕于东宫又遣中使就赐御书诗各一
首臣轼得紫薇花绝句其词云丝纶阁下文
书静钟鼓楼中刻漏长独坐黄昏谁是伴紫
薇花对紫薇郎翌日各以表谢又进诗一篇
臣轼诗云

绣裳画袞云垂地，不作成王翦桐戏。日高黄繖下西清，风动槐龙舞交翠。迺英阁前有双槐，樛枝属地如龙形。壁中蠹简今千年，漆书蝌蚪光射天。诸儒不复忧吻燥，东宫赐酒如流泉。酒酣复拜千金赐，一纸惊鸾回凤宇。苍颜白发便生光，袖有骊珠三十四。臣所赐诗并题目及臣姓名，凡三十四字。归来车马已喧阗，争看银钩墨色鲜。人间一日传万口，喜见云章第一篇。上前此，未尝以御书赐群臣。玉堂昼掩文书静，铃索不摇钟漏永。莫言弄笔数行书，须信时平由主圣。犬羊散尽沙漠空，捷烽夜到甘泉宫。似闻指麾筑上郡，已觉谈笑无西戎。时熙河新获鬼章。是日，泾原复奏夏贼数十万人皆遁去。文思天子师文母，终闭玉关辞马武。小臣愿对紫薇花，试草尺书招赞普。谨按：唐制：翰林学士带知制诰，许缀中书舍人班。今臣以知制诰待罪禁林，故得以紫薇为故事。

和王晋卿 并叙

驸马都尉王诰晋卿，功臣全彬之后也。元丰二年，予得罪贬黄冈，而晋卿亦坐累远谪，不相闻者七年。予既召用，晋卿亦还朝，相见殿门外。感叹之余，作诗相属，托物悲慨，厄穷而不怨，泰而不骄。佳其贵公子，有志如此，故次其韵。

先生饮东坡，独舞无所属。当时挹明月，对影三人足。醉眠草棘间，虫虺莫予毒。醒来送归雁，一寄千里目。怅马怀公子，旅食久不玉。欲书加餐字，远托西飞鹄。谓言相濡沫，未足救沟渎。吾生如寄耳，何者为祸福。不如两相忘，昨梦那可逐。上书得自便，归老湖山曲。躬耕二顷田，自种十年木。岂知垂老眼，却对金莲烛。公子亦生还，仍分刺史竹。贤愚有定分，尊俎守尸祝。文章何足云，执技等医卜。朝廷方西顾，羌虜骄未伏。遥知重阳酒，白羽落黄菊。羨君真将家，浮面气可掬。袁天纲谓窦轨，君语则赤气浮面，为将勿多杀人。何当请长纓，一战河湟复。

谢王泽州寄长松兼简张天觉二首

莫道长松浪得名，能教覆额两眉青。便将径寸同千尺，知有奇功似茯苓。
恁君说与埋轮使，速寄长松作解嘲。送张天觉诗有“埋轮”及“河东悭”之语。无复青黏和漆叶，在将钟乳敌仙茅。

次韵刘贡父所和韩康公忆持国二首

梦觉真同鹿覆蕉，相君脱屣自参寥。颜红底事发先白，室迩何妨人自遥。狂似次公应未怪，醉推东阁不须招。援毫欲作衣冠表，盛事终当继八萧。唐萧氏，自瑀及遘，八宰相。

闭户端居念独深，小轩朱槛忆同临。燎须谁识英公意，英公为其姊作粥，燎须。曰：“吾与姊皆老矣，能几进粥。”黄发聊知子建心。子建与楚其爱王彪别诗云：王玉体，共享黄发期。已托西风传绝唱，且邀明月伴孤斟。他年内集应呼我，下客先判平醉堕簪。

次韵刘贡父叔侄扈驾

玉堂孤坐不胜清，长羨枚邹接长卿。只许隔墙闻置酒，时因议事得联名。机云似我多遗俗，广受如君不治生。共托属车尘土后，钧天一饷梦中荣。

次韵韩康公置酒见留

庭下黄花一醉同，重来雪嶽已穷窿。不应屡费讥安石，但使毋多酌次公。钟乳金钗人似玉，鶺鴒弦铁拨坐生风。少卿尚有车茵在，颇觉宽容胜弱翁。

次韵王都尉偶得耳疾

君知六凿皆为赘，我有一言能决疣。病客巧闻床下蚁，痴人强觑棘端猴。聪明不在根尘里，药饵空为婢仆忧。但试周郎看聾否，曲音小误已回头。

送乔全寄贺君六首 并叙

旧闻靖长官、贺水部，皆唐末五代人，得道不死。章圣皇帝东封，有谒于道左者，其谒云：晋水部员外郎贺亢。再拜而去，上不知也。已而阅谒，见之大惊，物色求之不可得。天圣初，又使其弟子喻澄者诣阙进佛道像，直数千万。张公安道与澄游，具得其事。又有乔全者，少得大风疾，几死。贺使学道，今年八十，益壮盛。人无复见贺者，而全数见之。元祐二年十二月，全来京师十许日。余留之，不可，曰：贺以上元期我于蒙山；又曰：吾师尝游密州，识君于常山道上，意若喜君者。作是诗以送之，且作五绝句以寄贺。

君年二十美且都，初得恶疾堕眉须。红颜白发惊妻孥，览镜自嫌欲弃躯。结茅穷山啖松腴，路逢逃秦博士卢。方瞳照野清而臞，再拜未起烦一呼。觉知此身了非吾，炯然莲花出泥涂。随师东游渡潍邾，潍、邾，密州二水名。山头见我两轮朱。岂知仙人混屠沽，尔来八十胸垂胡。上山如飞瞋人扶，东归有约不敢渝。新年当参老仙儒，秋风西来下双凫，得枣如瓜分我无？

生长兵间早脱身，晚为元祐太平人。不惊渤澥桑田变，来看龟蒙漏泽春。曾谒东封玉辂尘，幅巾短褐亦逡巡。行宫夜奏空名姓，帐望云霞缥眇人。垂老区区岂为身，微言一发重千钧。始知不见高皇帝，正是商山四老人。旧闻父老晋郎官，已作飞腾变化看。闻道东蒙有居处，愿供薪水看烧丹。

千古风流贺季真，最怜嗜酒谪仙人。狂吟醉舞知无益，粟饭藜羹问养神。

送家安国教授归成都

别君二十载，坐失两鬓青。吾道虽艰难，斯文终典刑。屡作退飞鹤，羞看乾死萤。一落戎马间，五见霜叶零。夜谈空说剑，春梦犹横经。新科复旧贯，童子方乞灵。须烦凌云手，去作入蜀星。苍苔高朕室，古柏文翁庭。初闻编简香，始觉锋镝腥。岷峨有雏凤，梧竹养修翎。呜呼应嶰律，飞舞集虞廷。吾侪便归老，亦足慰余龄。

和子由除夜元日省宿致斋三首

江淮流落岂关天，禁省相望亦偶然。等是新年未相见，此身应坐不归田。白发苍颜五十三，家人强遣试春衫。朝回两袖天香满，头上银幡笑阿咸。当年踏月走东风，坐看春闱锁醉翁。自发门生几人在，却将新句调儿童。

次韵答张天觉二首

车轻马稳辔衔坚，但有蚊虻喜扑缘。截断口前君莫怪，人间差乐胜巢仙。驭风骑气我何劳，且要长松作土毛。亦如诃佛丹霞老，却向清凉礼白毫。

次韵黄鲁直画马试院中作

少年鞍马勤远行，卧闻乾草风雨声。见此忽思短策横，十年髀肉磨欲透。那更陪君作诗瘦，不如芋魁归饭豆。门前欲嘶御史，诏恩三日休老翁，羨君怀中双橘红。黄有老母。

余与李廌方叔相知久矣领贡举事而李不得第愧甚作诗送之

与君相从非一日，笔势翩翩疑可识。平时谩说古战场，过眼终迷日五色。我惭不出君大笑，行止皆天子何责。青袍白纻五千人，知子无怨亦无德。买羊沽酒谢玉川，为我醉倒春风前。归家但草凌云赋，我相夫子非癯仙。

和王晋卿送梅花 次韵

东坡先生未归时，自种来禽与青李。五年不踏江头路，梦逐东风泛苹芷。江梅山杏为谁容，独笑依依临野水。此间风物君未识，花浪翻天雪相激。明年我复在江湖，知君对花三叹息。

和宋肇游西池 次韵

汉皇慈俭不开边，尚教千艘下濂船。贪看艨艟飞斗舰，不知鼙鼓舞钧天。故山西望三千里，往事回思二十年。自笑区区足官府，不如公子散神仙。

书艾宣画四首

竹 鹤

此君何处不相宜，况有能言老令威。谁识长身古君子，犹将缁布缘深衣。

黄精鹿

太华西南第几峰，落花流水自重重。幽人只采黄精去，不见春山鹿养茸。

杏花白鹧

天工翦刻为谁妍，袍蕊游蜂自作团。把酒惜春都是梦，不如闲客此闲看。

莲 龟

半脱莲房露压欹，绿荷深处有游龟。只应翡翠兰苕上，独见玄夫曝日时。

仆领贡举未出钱穆父雪中作诗见及三月二十 日同游金明池始见其诗次韵 为答

雪知我出已全消，花待君来未敢飘。行避门生时小饮，忽逢骑吏有嘉招。鱼龙绝枝来千里，斑白遗民数四朝。知有黄公酒垆在，苍颜华发自相遥。

次韵子由五月一日同转对

跪奉新书笏在腰，谈王正欲伴耕樵。晋阳岂为一门事，唐高祖谓温大推兄弟云：我起义晋阳，止为卿一门耳。宣政聊同五月朝。正元中，诏曰，自今后五月一日，御宣政殿，与文武百僚相见。忧患半生联出处，归休上策早招要。后生可畏吾衰矣，刀笔从来错料尧。

韩康公挽词三首

故国非乔木，兴王有世臣。嗟予后死者，犹及老成人。德业经文武，风流表缙绅。空余行乐地，处处位遗民。再世忠清德，三朝翼赞勋。功成不归国，就访敢忘君。旧学严诗律，余威靖寒氛。何当继韩奕，故吏总能文。西第开东阁，初筵点后尘。笙歌邀白发，灯火乐青春。扶路三更罢，回头一梦新。赋诗犹墨湿，把卷独沾巾。

柏石图诗 并叙

陈公弼家藏《柏石图》，其子慥季常传宝之，东坡居士作诗以为之铭。

柏生两石间，天命本如此。虽云生之艰，与石相终始。韩子俯仰人，但爱平地美。土膏杂粪壤，成坏几何耳。君看此槎牙，岂有可移理。苍龙转玉骨，黑虎抱金柅。画师亦可人，使我毛发起。当年落笔意，正欲讥韩子。

庆源宣义王丈以累举得官为洪雅主簿雅
州户椽遇吏民如家人人安乐之既谢事居
眉之青神瑞草桥放怀自得有书来求红带
既以遗之且作诗为戏请黄鲁直学士秦少
游贤良各为赋一首为老人 光华

青衫半作霜叶枯，遇民如儿吏如奴。吏民莫作官长看，我是识字耕田夫。妻啼儿号刺史怒，时有野人来挽须。拂衣自注下下考，芋魁饭豆吾岂无。归来瑞草桥边路，独游还佩平生壶。慈母岩前自唤渡，青衣江上人争扶。今年蚕市数州集，中有遗民怀袴襦。邑中之黔相指似，白髯红带老不癯。我欲西归卜邻舍，隔墙拊掌容歌呼。不学山王乘驷马，回头空指黄公垆。

次许冲元韵送成都高士敦钤辖

移中老监本虚名，懒作燕山万里行。余与高君奉使契丹，辞免，不行。坐看飞鸿迎使节，归来骏马换倾城。高才本不缘勋阀，余力还思治蜀兵。西望雪山烽火尽，不妨樽酒寄平生。

次前韵送程六表弟

君家兄弟真连璧，门十朱轮家万石。竹使犹分刺史符，尚方行赐尚书舄。前年持节发仓凛，到处卖力收玺栗。归来闭口不论功，却是度江谁复惜。君才不用如涧松，我老得全犹社栎。青衫莫厌百僚底，白首上有千薪积。忆昔江湖一钓舟，无数云山供点笔。未应便障西风扇，只恐先移北山檄。恁君寄谢江南叟，念我空见长安日。浮江泝蜀有成言，江水在此吾不食。

和王晋卿题李伯时画马

督邮有良马，不为君所奇。顾收纸上影，骏骨何由归。一朝见綦策，蚁封惊肉飞。岂惟马不遇，人已半生痴。

送钱穆父出守越州绝句二首

簿书常苦百忧集，樽酒今应一笑开。京兆从教思广汉，会稽聊喜得方回。若耶溪水云门寺，贺监荷花空自开。我恨今犹在泥滓，劝君莫棹酒缸回。

戏书李伯时画御马好头赤

山西战马饥无肉，夜嚼长秸如嚼竹。蹄间三丈是徐行，不信天山有坑谷。岂如厩马好头赤，立仗归来卧斜日。莫教优孟卜葬地，厚衣薪糲入铜历。

送程七表弟知泗州

江湖不在眼，尘土坐满颜。系舟清洛尾，初见淮南山。淮山相媚好，晓镜开烟鬟。持此娱使君，一笑簿领间。使君如天马，朝燕莫荆蛮。时无王良手，空老十二闲。聊当出毫末，化眼狡与顽。勿谓无人知，古佛临涛湾。赤子视万类，流萍阅人寰。但使可此人，余事真茆菅。

送曹辅赴闽漕

曹子本儒侠，笔势翻涛澜。往来戎马间，边风裂儒冠。诗成横槊里，楯墨何曾乾。一旦事远游，红尘隔岩滩。平生羊炙口，并海搜咸酸。一从荔枝饮，岂念苜蓿槃。我亦江海人，市朝非所安。常恐青霞志，坐随白发阑。渊明赋归去，谈笑便解官。今我何为者，索身良独难。恁君问清淮，秋水今几竿。我舟何时发，霜露日已寒。

次韵王郎子立风雨有感

百年一俯仰，寒暑相主客。稍增裘褐气，已觉团扇厄。不须计荣辱，此丧彼有获。我琴终不败，无攫故无释。后生不自牧，呻吟空挟策。握苗不待长，卖菜苦求益。此郎独静退，门外无行迹。但恐陶渊明，每为饥所迫。凄风弄衣结，小雪穿门席。愿君付一笑，造物亦戏剧。朝来赋云梦，笔落风雨疾。为君裁春衫，高会开桂籍。

次韵黄鲁直嘲小德小德鲁直子其母 微故其诗云解著潜夫论不妨无外家

进馔客争起，小儿那可涯。莫欺东方星，三五自横斜。名驹已汗血，老蚌空泥沙。但使伯仁长，还兴络秀家。

书林次中所得李伯时归去来阳关二图后二首

不见何戡唱渭城，旧人空数米嘉荣。龙眠独识殷勤处，画出阳关意外声。雨本新图宝墨香，樽前独唱小秦王。为君翻作归来引，不学阳关空断肠。

送真道士归庐山

物之有知盖恃息，孰居无事使出入。心无天游室不空，六凿相攘妇争席。法师逃人入庐山，山中无人自往还。往者一空还者失，此身正在无还间。绵绵不绝微风里，内外丹成一弹指。人间俯仰三千秋，骑鹤归来与子游。

卧病逾月请郡不许复直玉堂十一月 一日鑠院是日苦寒诏赐官烛法酒书 呈 同院

微霰疏疏点玉堂，词头夜下揽衣忙。分光御烛星辰烂，拜赐官壶雨露香。
醉眼有花书字大，老人无睡漏声长。何时却逐桑榆暖，社酒寒灯乐未央。

送周朝议守汉州

茶为西南病，氓俗记二李。杞与稷也。何人折其锋，矫矫六君子。思道与侄正孺、张永徽、吴醇翁、吕元钧、宋文辅也。君家尤出力，流落初坐此。谓当收桑榆，华发看剑履。胡为犯风雪，岁晚行未已。念归诚得计，顾自为谋耳。吾闻江汉间，疮痍有未起。莫轻龚遂老，君王付尺箠。召还当有诏，挽袖谢邻里。犹堪作水衡，供张园林美。

木山二首 并叙

吾先君子尝蓄木山三峰，且为之记与诗。诗人梅二丈圣俞见而赋之。今三十年矣，而犹子千乘，又得五峰，益奇。因次圣俞韵，使并刻之其侧。

圣俞诗

空山枯楠大蔽牛，霹雳夜落鱼鳧洲。鱼鳧水射几千秋，蠹肌烂随沙荡流。惟存坚骨蛟龙馗，形侔三山中雄酋。左右两峰相挟翼，尊奉君长无慢尤。苏夫子见之惊且喜，买于溪叟恁貂裘。因嗟大不为梁栋，又叹残不为薪栖。雨侵藓涩得石瘦，宜与夫子归隐丘。

次 韵

木生不愿回万牛，愿终天年仆沙洲。时来幸逢河伯秋，掀然见怪推不流。蓬婆雪领巧雕馗，蛰虫行蚁为豪酋。阿咸大胆忽持去，河伯好事不汝尤。城中古沼浸坤轴，一林瘦竹吾菟裘。二顷良田不难买，三年桤木行可樵。会将白发对苍岷，鲁人不厌东家丘。

送千乘千能两侄还乡

治生不求富，读书不求官。譬如饮不醉，陶然有余欢。君看庞德公，白首终泥蟠。岂无子孙念，顾独遗以安。鹿门上冢回，床下拜龙鸾。躬耕竟不起，耆旧节独完。念汝少多难，冰雪落绮纨。五子如一人，奉养真色难。烹鸡独馈母，自飧苜蓿槃。口腹恐累人，宁我食无肝。西来四千里，敝袍不言寒。秀眉似我兄，亦复心闲宽。忽然舍我去，岁晚留余酸。我岂轩冕人，青云意先阑。汝归蒔松菊，环以青琅玕。桤阴三年成，可以挂我冠。清江入城郭，小圃生微澜。相从结茆舍，曝背谈金盃。

送周正孺知东川

得郡书生荣，还家昔人重。而况东西川，千骑许上冢。里门下车入，父老自惊耸。端如何武贤，不事长卿宠。清时养材杰，杞梓方培拥。未应遗合抱，取用及把拱。如君尚出麾，顾我宜耕垄。告归谢先手，求去悔不勇。岂云慕廉退，实自知衰冗。为君扫棠阴，画像或相踵。蜀中太守无不画像者。

题李伯时画赵景仁琴鹤图二首

清献先生无一钱，故应琴鹤是家传。谁知默鼓无弦曲，时向珠宫舞幻仙。丑石寒松未易亲，聊将短曲调长人。乘轩故自非明眼，终日傲傲舞爨薪。

次前韵再送周正孺

东川得望郎，坐与西争重。高风倾石室，旧学鄙文冢。蜀人安使君，所至野不耸。竹马迎细侯，大钱送刘宠。遥知句溪路，老稚相扶拥。看画古丛祠，百怪朝幽拱。牛头与兜率，云木蔚堆垅。醉乡追旧游，笔阵贾余勇。聊将诗酒乐，一扫簿书冗。西风吹好句，珠玉本无踵。刘蜕文冢铭在梓州。

书王定国所藏烟江叠嶂图 王晋卿画

江上愁心千叠山，浮空积翠如云烟。山耶云耶远莫知，烟空云散山依然。但见两崖苍苍暗绝谷，中有百道飞来泉。索林络石隐复见，下赴谷口为奔川。川平山开林麓断，小桥野店依山前。行人稍度乔木外，渔舟一叶江吞天。使君何从得此本，点缀毫末分清妍。不知人间何处有此境，径欲往置二顷田。君不见武昌樊口幽绝处，东坡先生留五年。春风摇江天漠漠，暮云卷雨山娟娟。丹枫翻鸦伴水宿，长松落雪惊醉眠。桃花流水在人世，武陵岂必皆神仙。江山清空我尘土，虽有去路寻无缘。还君此画三叹息，山中故人应有招我归来篇。

次韵王定国会饮清虚堂

何逊扬州又几年，官梅诗兴故依然。何人可复问季孟，与子不妨中圣贤。卜筑君方淮上郡，归心我已剑南川。此身正似蚕将老，更尽春光一再眠。

兴龙节侍宴前一日微雪与子由同访王定
国小饮清虚堂定国出数诗皆佳而五言尤
奇子由又言昔与孙巨源同过定国感念存
没悲叹久之夜归稍醒各赋一篇明日朝中
以示定国也

天风渐渐飞玉沙，诏恩归沐休早衙。遥知清虚堂里雪，正是檐卜林中花。出门自笑无所诣，呼酒持劝惟君家。踏冰凌兢战疲马，扣门剥啄惊寒鸦。羹吾五字入诗律，欲与六出争天葩。头风已倩檄手愈，背痒恰得仙爪爬。银瓶泻油浮蚁酒，紫碗铺粟盘龙茶。幅巾起作鸕鹚舞，叠鼓谁掺渔阳挝。九衢灯火杂梦寐，十年聚散空咨嗟。明朝握手殿门外，共看银阙瞰晨霞。

王晋卿所藏著色山二首

缥缈营丘水墨仙，浮空出没有无间。尔来一变风流尽，谁见将军著色山。
牵确何人似退之，意行无路欲从谁。宿云解驳晨光漏，独见山红涧碧时。

次韵黄鲁直效进士作岁寒知松柏诗

龙蛰虽高卧，鸡鸣不废时。炎冷徒自变，茂悦两相知。已负栋梁质，肯为儿女姿。那忧霜，未喜日迟迟。难与夏虫语，永无秋实悲。谁知此植物，亦解秉天彝。

王晋卿作烟江叠嶂图仆赋诗十四韵晋卿和之语特奇丽因复次韵不独纪其诗画之美亦为道其出处契阔之故而终之以不忘在莒之戒亦朋友忠爱之义也

山中举头望日边，长安不见空云烟。归来长安望山上，时移事改应潸然。管弦去尽宾客散，惟有马埕编金泉。渥洼故自千里足，要饱风雪轻山川。屈居华屋啖枣脯，十年俯仰龙旅前。却因病瘦出奇骨，盐车之厄宁非天。风流文采磨不尽，水墨自与诗争妍。画山何必山中人，田歌自古非知田。郑虔三绝君有二，笔势挽回三百年。欲将岩谷乱窈窕，盾峰修嫫夸连娟。人间何有春一梦，此身将老蚕三眠。山中幽绝不可久，要作平地家居仙。能令水石长生眼，非君好我当谁缘。愿君终不忘在莒，乐时更赋囚山篇。柳子厚有《囚山赋》。

夜直玉堂携李之仪端叔诗 百余首读至夜半书其后

玉堂清冷不成眠，伴直难呼孟浩然。暂借好诗消永夜，每逢佳处辄参禅。愁侵砚滴初含冻，喜入灯花欲斗妍。寄语君家小儿子，他时此句一时编。

景仁和赐酒烛诗复次韵 谢之 时公方进新乐

笙磬分均上下堂，旧说堂上之乐皆受签均，堂下之乐皆受磬均。游鱼舞兽自奔忙。朱弦初识孤桐韵，旧乐金石声高而丝声微，今乐金石与丝声皆著。玉琯犹闻柷黍香。旧法以尺生律，今以黍定律，以律生尺。万事今方启伯始，一斑我亦愧真长。此生会见三雍就，无复寥寥叹未央。

次韵刘贡父春日赐幡胜

宽诏随春出内朝，二军喜气挟狐貂。镂银错落翻斜月，翦彩缤纷舞庆霄。腊雪强飞才到地，前日微雪晓风偷转不惊条。脱冠径醉应归卧，便腹从人笑

老韶。是日幕次赐酒。

再 和

与君流落偶还朝，过眼纷纶七叶貂。莫笑华颠飘彩胜，几人黄壤隔青霄。
行吟未许穷骚雅，坐啸犹能出教条。记取明年江上郡，五更春枕梦春韶。

叶公秉王仲至见和次韵答之

衿絺方暑亦堪朝，岁晚凄风忆阜貂。共喜鹤鸾归禁御，心知日月在重霄。
君如老骥初遭络，我似枯桑不受条。强镊霜须簪彩胜，苍颜得酒尚能韶。

再 和

衰迟何幸得同朝，温劲如君合珥貂。谁惜异材蒙径寸，自惭枯枿借凌霄。
光风泛泛初浮水，红糝离离欲缀条。后日一樽何处共，奉常端冕作咸韶。

次韵王晋卿惠花栽栽所寓张退传第中一首

坐来念念失前人，共向空中寓一尘。若问此花谁是主，天教闲客管青春。

次韵王晋卿上元侍燕端门

月上九门开，星河绕露台。君方枕中梦，我亦化人来，光动仙球缒，香
余步辇回。相从穿万马，衰病若为陪。

王郑州挽词 克臣

羨君华发起琳官，右辅初还鼓角雄，千里农桑歌子产，一时冠盖慕萧嵩。
那知聚散春粮外，便有悲欢过隙中。京兆同僚几人在，犹思对案笔生风。予
为开封幕与子难同厅

书王定国所藏王晋卿画著色山二首

白发四老人，何曾在商颜。烦君纸上影，照我胸中山。山中亦何有，木
老土石顽。正赖天日光，润谷纷斓斑。我心空无物，斯文定何间，君看古井
水，万象自往还。

君归岭北初逢雪，我亦江南五见春。寄语风流王武子，三人俱是识山人。

送吕昌明知嘉州

不羨三刀梦蜀都，聊将八咏继东吴。卧看古佛凌云阁，敕赐诗人明月湖。
得句会应缘竹鹤，思归宁复为莼鲈。横空好在修眉色，头白犹堪乞左符。

次韵黄鲁直寄题郭明父府推颖州西斋二首

树头啄木常疑客，客去而嗔定不然。脱籍已应生井沫，解衣聊复起庖烟。
平生诗酒真相污，此去文书恐独贤。早晚西湖映华发，小舟翻动水中天。

寂寞东京月旦州，德星无复缀珠旒。莫嗟平輿空神物，尚有西斋接胜流。
春梦屡寻湖十顷，家书新报橘千头。雪堂亦有思归曲，为谢平生马少游。輿
音预。

第十八卷

诗一百一十七首

次韵秦少章和钱蒙仲

碧畦黄陇稻如京，岁美人和易得情。鉴里移舟天外思，地中鸣角古来声。
山围故国城空在，潮打西陵意未平。二子有如双白鹭，隔江相照雪衣明。

次韵钱越州

髯尹超然定逸群，南游端为访云门。谪仙归侍玉皇案，老鹤来乘刺史轡。
已觉簿书哀老子，故知筯豆有司存。年来齿颊生荆棘，习气因君又一言。

同秦仲二子雨中游宝山

平明已报百吏散，半日来陪二子闲。立鹄低昂烟雨里，行人出没树林间。

去杭十五年复游西湖用欧阳察判韵

我识南屏金鲫鱼，重来拊槛散斋余。还从旧社得心印，似省前生觅手书。
葑合平湖久芜漫，人经丰岁尚凋疏。谁怜寂寞高常侍，老去狂歌忆孟诸。

与莫同年雨中饮湖上

到处相逢是偶然，梦中相对各华颠。还来一醉西湖雨，不见跳珠十五年。

送子由使契丹

云海相望寄此身，那因远适更沾巾。不词驸骑凌风雪，要使天骄识凤麟。
沙漠回看清禁月，湖山应梦武林春。单于若问君家世，莫道中朝第一人。

次韵答刘景文左藏

我老诗坛仆鼓旗，借君佳句发良时。但空贺监杯中物，莫示孙郎帐下儿。
夜烛催诗金烬落，秋芳压帽露华滋。故应好语如爬痒，有味难名只自知。

坐上复借韵送奇岚军通判叶朝奉

云间踏白看缠旗，莫忘西湖把酒时。梦里吴山连越峤，樽前羌妇杂胡儿。
夕烽过后人初醉，春雁来时雪未滋。为问从军真乐否，书来粗遣故人知。

轼始于文登海上得白石数升如芡
实可作枕闻梅丈嗜石故以遗其子

子明学士子明有诗次其韵

海隅荒怪有谁珍，零落珊瑚泣季伦。法供坐令微物重，轼旧有怪石供。色难归致孝心纯。只疑薏苡来交趾，未信螾珠出泗滨。愿子聚为江夏枕，不劳麾扇自宁亲。

次韵钱越州见寄

莫将牛弩射羊群，卧治何妨昼掩门。稍喜使君无疾病，时因送客见车轡。搔头白发秋无数，闭眼丹田夜自存。欲息波澜须引去，吾侪岂独坐多言。

文登蓬莱阁下石壁千丈为海浪所战时有碎
裂淘洒岁久皆圜熟可爱土人谓此弹子过也
取数百枚以养石昌蒲且作诗遗垂慈堂老人

蓬莱海上峰，玉立色不改。孤根捍滔天，云骨有破碎。阳侯杀廉角，阴火发光采。累累弹丸间，琐细或珠琲。阎浮一沓耳，真妄果安在。我持此石归，袖中有东海。垂慈老人眼，俯仰了大块。置之盆盎中，日与山海对。明年菖蒲根，连络不可解。傥有蟠桃生，旦莫犹可待。

次韵毛滂法曹感雨诗

江南佳公子，遗我锦绣端。揽之温如春，公子焉得寒。兴雨自有时，肤寸便濛濛。敛藏以自润，牛斗何足干。空庭月与影，强结三友欢。我岂不足欵，要此清团团。所欢在一醉，常恐樽中乾。舍酒尚可乐，明珠如弹丸。但恐千仞雀，匆匆发虚弹。迨子闲暇时，种子田中丹。一朝涉世故，空腹容欺谩。我顷在东坡，秋菊为夕餐。永愧坡间人，布褐为我完。雪堂初覆瓦，上簟无不莞。时时亦设客，每醉筒辄殫。一笑便倾倒，五年得轻安。公子岂我徒，衣钵传一箒，定非郊与岛，笔势江河宽。悲吟古寺中，穿帷雪漫漫。他年记此味，芋火对懒残。

送邓宗古还乡

广汉有姜子，孝弟行里间。赤眉虽豺虎，弛兵过其墟。至今空清泉，无复双鲤鱼。南郑有李邰，得妙甘公书，夜坐指流星，惊倒两使车。抱关不肯仕，布褐蒙璠玕。西南固多士，君得二子余。凛凛忠文公，搜士及樵渔。涧溪有幽讨，蘋芷真嘉蔬。岁晚终不食，心恻当何如。

参寥上人初得智果院会者 十六人分韵赋诗轼得心字

涨水返旧壑，飞云思故岑。念君忘家客，亦有怀归心。三间得幽寂，数步藏清深。攒金卢橘坞，散火杨梅林。茶笋尽禅味，松杉真法音。云崖有浅井，玉醴常半寻。遂名参寥泉，可濯幽人襟。相携横岭上，未觉衰年侵。一

眼吞江湖，万象涵古今。愿君更小筑，岁晚解我簪。

哭王子立次儿子遥韵三首

彭城初识子，照眼白而长。异梦成先兆，予为密州，子立未尝相识，忽告同舍生曰：“吾梦为密州婿，何也？”已而果以子由之子妻之。清言得未尝。岂惟知礼意，遂欲补诗亡。子立能诗而有礼学。咄咄真相逼，诸生敢雁行。

非无伯鸾志，独有子云悲。恨子非天合，犹能使我思。儿曹莫凄恻，老眼欲枯萎。会哭皆豪杰，谁为感旧诗。子立与黄鲁直、张文潜、晁无咎、秦少游、陈无己皆友善。

龙困尝鱼服，羊僮或虎蒙。匆匆成鬼录，愤愤到天公。偶落藩墙上，同游羿毂中。回看十年事，黄叶卷秋风。

异 鹊 并叙

熙宁中，柯侯仲常通守漳州，以救饥得民。有二鹊栖其厅事，讫侯之去，鹊亦送之，漳人异焉。为赋此诗。

昔我先君子，仁孝行于家。家有五亩园，么凤集桐花。是时乌与鹊，巢榘可俯拿。忆我与诸儿，饲食观群呀。异人惊瑞异，野老笑而嗟。云此方乳哺，甚畏鸯与蛇。手足之所及，二物不敢加。主人若可信，众鸟不我遇。故知中孚化，可及鱼与豶。柯侯古循吏，烦恼真无华。临漳所全活，数等江干沙。仁心格异族，两鹊栖其衙。但恨不能言，相对空楂楂。善恶以类应，古语良非夸。君看彼酷吏，所至号鬼车。

次韵詹适宣德小饮巽亭

君方梦谪仙，来诗记李白郎官湖。我亦吊文园。江上同三黜，天涯又一樽。涛雷殷白昼，梅雪耿黄昏。归去多情雨，应随御史轩。詹为御史主簿。

东川清丝寄鲁冀州戏赠

鹅溪清丝清如冰，上有千岁交枝藤。藤生谷底饱风雪，岁晚忽作龙蛇升。嗟我虽为老侍从，骨寒只受布与缯。床头锦衾未还客，坐觉芒刺在背膺。岂如髯卿晚乃贵，福祿正似川方增。醉中倒着紫绮裘，下有半臂出缥绫。封题不敢妄裁剪，刀尺自有佳人能。遥知千骑出清晓，积雪未放游尘兴。白须红带柳丝下，老弱空巷人相登。但放奇纹出领袖，吾髯虽老无人憎。

怡然以垂云新茶见饷报以大龙团仍戏作小诗

妙供来香积，珍烹具太官。拣芽分雀舌，赐茗出龙团。晓日云庵暖，春风浴殿寒。聊将试道眼，莫作两般看。

次韵王忠玉游虎丘绝句三首

当年太白此相浮，老守娱宾得二丘。郡人有间丘公太守，王规父尝云：不谒虎丘，即谒间丘。规父，忠玉伯父也。白发重来故人尽，空余丛桂小山幽。

青盖红旗映玉山，新诗小草落玄泉。风流使者人争看，知有真娘立道边。虎丘中路有真娘墓。

舞衣歌扇转头空，只有青山杏靄中。莫共吴王斗百草，使君未敢借惊鸿。

寄蔡子华

故人送我东来时，手栽荔子待君归。荔子已丹吾发白，犹作江南未归客。江南春尽水如天，肠断西湖春水船。想见青衣江畔路，白鱼紫笋不论钱。霜髯三老如霜桧，旧交零落今谁辈。莫从唐举问封侯，但遣麻姑更爬背。

和钱四寄其弟和

再见涛头涌玉轮，烦君久驻浙江春。年来总作维摩病，堪笑东西二老人。

卧病弥月闻垂云花开顺 阴梨以诗见招次韵答之

道人心似水，不碍照花妍。燕坐春强半，清阴月屡迁。平生无起灭，一念有陈鲜。嫋嫋风枝举，离离日萼蔫。病吟终少味，老醉不成颠。何必邀头出，湖中有散仙。

故周茂叔先生濂溪 溪在庐山下

世俗眩名实，至人疑有无。怒移水中蟹，爱及屋上乌。坐令此溪水，名与先生俱。先生本全德，廉退乃一隅。因抛彭泽米，偶似西山夫。遂即世所知，以为溪之呼。先生岂我辈，造物乃其徒。应同柳州柳，聊使愚溪愚。

次韵子由使契丹至涿州见寄四首

老人痴钝已逃寒，子复辞行理亦难。要到卢龙看古塞，投文易水吊燕丹。余昔年辞免使北。

胡羊代马得安眠，穷发之南共一天才。又见子卿持汉节，遥知遗老泣山前。

毡毳年来亦甚都，时时 舌问三苏。予与子由入京时，北使已问所在。后余馆伴，北使屡诵三苏文。那知老病浑无用，欲问君王乞镜湖。

始忆庚寅降屈原，旋看蜡凤戏僧虔。随翁万里心如铁，此子何劳为买田。时犹子迟侍行

雪后便欲与同僚寻春一病弥月杂花都尽 独牡丹在耳刘景文左藏和顺闍梨

诗见赠次韵答之

残花怨久病，剩雨泣余妍。不见双旌出，空今九陌迁。开园市井皆入。知君音寂寞，妙语嚼芳鲜。浅紫从争发，浮红任早蔫。天葩尚青萼，国色待华颠。载酒邀诗将，臞儒不是仙。

次韵刘景文周次元寒食同游西湖

絮飞春减不成年，老境同乘下濂船。蓝尾忽惊新火后，乐天寒食诗云：三杯蓝尾酒，一楪胶牙饧。邀头要及浣花前。成都太守，自正月二日出游。至四月十九日浣花乃止。山西老将诗无敌，洛下书生语更妍。共向北山寻二士，画挠鼉鼓聒清眠。

连日与王忠玉张全翁游西湖访北山清顺道潜二诗僧，登垂云亭饮参寥泉最后过唐州陈使君夜饮忠玉有诗次韵答之

北山非自高，千仞付我足。西湖亦何有，万象生我目。云深人在坞，风静响应谷。与君皆无心，信步行看竹。竹间逢诗鸣，眼色夺湖绿。百篇成俯仰，二老相追逐。故应千顷池，养此一双鹄。山高路已断，亭小膝屡促。夜寻三尺井，渴饮半瓯玉。明朝闹丝管，寒食杂歌哭。使君坐无聊，狂客来不速。载酒有鸱夷，扣门非啄木。浮蛆滌金碗，翠羽出华屋。须臾便陈迹，觉梦那可续。及君未渡江，过我勤秉烛。一笑换人爵，百年终鬼录。

新茶送签判程朝奉以 馈其母有诗相谢次韵答之

缝衣付与溧阳尉，舍肉怀归颖谷封。闻道平反供一笑，会须难老待千钟。火前试焙分新胯，雪里头纲辍赐龙。从此升堂是兄弟，一瓯林下记相逢。

次韵送张山人归彭城

羨君飘荡一虚舟，来作钱塘十日游。水洗禅心都眼净，山供诗笔总眉愁。雪中乘兴真聊尔，春尽思归却罢休。何日五湖从范蠡，种鱼万尾橘千头。

次韵林子中王彦祖唱酬

早知身寄一沤中，晚节尤惊落木风。近闻莘老，公择皆逝，故有此句。昨梦已论三世事，岁寒犹喜五人同。轼与子中、彦祖、子敦、完夫同试举人景德寺，今皆健。雨余北固山围座，春尽西湖水映空。差胜四明狂监在，更将老眼犯尘红。

寿星院寒碧轩

清风肃肃摇窗扉，窗前修竹一尺围。纷纷苍雪落夏簟，冉冉绿雾沾人衣。
日高山蝉抱叶响，人静翠羽穿林飞。道人绝粒对寒碧，为问鹤骨何缘肥。

书刘景文所藏王子敬帖绝句

家鸡野鹜同登俎，春蚓秋蛇总入奁。君家两行十二字，气压邺侯三万签。

书刘景文所藏宗少文一笔画

宛转回纹锦，萦盈连理花。何须郭忠恕，匹素画缣车。

真觉院有洛花花时不暇往四月 十八日与刘景文同往赏枇杷

绿暗初迎夏，红残不及春。魏花非老伴，卢橘是乡人。井落依山尽，岩
崖发兴新。岁寒君记取，松雪看苍鳞。

又和刘景文韵

牡丹松桧一时栽，付与春风自在开。试问壁间题字客，几人不为看花来。

西湖寿星院此君轩

卧听谡谡碎龙鳞，俯看苍苍立玉身。一舸鸣夷江海去，尚余君子六千人。

仲天贶王元直自眉山来见余 钱塘留半岁既行作绝句五首送之

仲君岂弟多学，王子清修寡言。病后空惊鹤瘦，时来或作鹏骞。
海角烦君远访，江源与我同来。剩作数诗相送，莫教万里空回。
三人一旦同行，二子与秦少章同寓高斋，复同舟北行。留下高斋月明。
遥想扁舟京口，尚余孤枕潮声。
更欲留君久住，念君去国弥年。空使犀颅玉颊，长怀髯舅凄然。
为予远致殷勤，瑞草桥边老人。红带雅宜华发，白醪光泛新春。老人，
王庆源也。

赠善相程杰

心传异学不谋身，自要清时阅搢绅。火色上腾虽有数，急流勇退岂无人。
书中苦觅元非诀，醉里微言却近真。我似乐天君记取，华颠赏遍洛阳春。

次韵林子中蒜山亭见寄

奇逸多闻老敬通，何人慷慨解怜翁。十年簿领催衰白，一笑江山发醉红。

闻道赋诗临北固，未应举扇向西风。叩头莫唤无家客，归扫岷峨一亩宫。

再和并答杨次公

毗卢海上妙高峰，二老遥知说此翁。聊复舸舟寻紫翠，不妨持节散陈红。高怀却有云门兴，好句真传雪窦风。唱我三人无谱曲，冯夷亦合舞幽宫。

次韵刘景文送钱蒙仲三首

谁识天闲老骥，不争日暮长途。送尽青云九子，归去扁舟五湖。寄语竹林社友，同书桂籍天伦。王郎独为鬼录，世间无此玉人。五字古原春草，千金汉殿长门。经纬尚余三策，典刑留与诸孙。

菩提寺南漪堂杜鹃花

南漪杜鹃天下无，披香殿上红氍毹。鹤林兵火真一梦，不归阆苑归西湖。

题杨次公春兰

春兰如美人，不采羞自献。时闻风露香，蓬艾深不见。丹青写真色，欲补离骚传。对之如灵均，冠佩不敢燕。

题杨次公蕙

蕙本兰之族，依然臭味同。曾为水仙佩，相识楚词中。幻色虽非实，真香亦竟空。云何起微馥，鼻观已先通。

次韵曹辅寄壑源试焙新芽

仙山灵雨湿行云，洗遍香肌粉末匀。明月来投玉川子，清风吹破武林春。要知玉雪心肠好，不是膏油首面新。戏作小诗君一笑，从来佳茗似佳人。

次韵袁公济谢芎椒诗

燥吻时时著酒濡，要令卧疾致文殊。河鱼溃腹空号楚，汗水流骹始信吴。吴真君服椒法云：半年脚心汗如水。自笑方求三岁艾，不如长作独眠夫。羨君清瘦真仙骨，更助飘飘鹤背躯。

次韵和杨次公惠径山龙井水 龙井水洗病眼有效

漏尽鸡号厌夜行，年来小器溢瓶罍。弃官纵未归东海，罢郡犹堪作水衡。幻色将空眼先暗，胜游无碍脚殊轻。空烦远致龙渊水，宁复临池似伯英。

次韵刘景文登介亭

泽国梅雨余，衰年困蒸溽。高堂磨新塼，颇觉利腰足。松根百尺井，两绠飞净淥。流觴聚儿童，一笑为捧腹。清风信可驭，刚气在岩麓。始知共此世，物外无三伏。长歌入云去，不待弦管逐。西湖真西子，烟树点眉目。涛江少酝藉，高浪翻雪屋。俯仰拊四海，百世飞鸟速。远追钱氏余，近吊祖俟躅。吾生如寄耳，寸晷轻尺玉。谁似刘将军，逸韵谢边幅。千言一挥手，五车不再读。春岩彩鸡舞，月峡哀猿哭。朝先啼起，莫与寒螿续。我老废吟哦，赖君时击触。从今事远览，发轫此幽谷。清游得三昧，至乐谢五欲。莫作狂道士，气压刘师服。

袁公济和刘景文登介亭诗复次韵答之

昏昏堕醉梦，奈此六月溽。君诗如清风，吹我朝睡足。登临得佳句，江白照湖淥。袖手独不言，默藁已在腹。是时风雨过，蔼蔼云归麓。疏星带微月，金火争见伏。惜哉此清景，变灭不可逐。归来读君诗，耿耿犹在目。却思少年日，声价争场屋。文如翻水成，赋作义手速。秋风起鸿雁，我亦继华躅。那知君蹭蹬，独泣荆山玉。相见南新道，青衫垂破幅。早知事大缪，恨不十年读。莫嫌冯唐老，终胜贾谊哭。今年复为僚，旧好许重续。升沉何足道，等是蛮与触。共为湖山主，出入穷涧谷。众驰君不争，人弃我所欲。何时神武门，相约挂冠服。

介亭饯杨杰次公

篮舆西出登山门，嘉与我友寻仙村。丹青明灭风篁岭，环珮空响桃花源。郡人谓介亭山下为桃源路。前朝欲上已蜡屐。黑云白雨如倾盆。今晨积雾卷千里，岂畏触热生病根。在家头陲无为子，久与青山为弟昆。孤峰尽处亦何有，西湖镜天江抹坤。临高麾手谢好佳，清风万壑传其言。风回响答君听取，我亦到处随君轩。

次京师韵送表弟程懿叔赴夔州运判

与子甥舅氏，摧颓各苍颜。并为东诸侯，长此佳江山。寒松无时花，安得插髻鬟。惟将老不死，一笑荣枯间。我甚似乐天，但无素与蛮。挂冠及未耄，当获一纪闲。子亦拙进取，才高命坚顽。譬如万斛舟，行此九折湾。仲氏新得道，一泓目尘寰。君之兄德孺，自言近于佛法有得，岁晚家乡路，莫遣生榛菅。

叶教授和溽字韵诗复次韵为戏记龙井之游

先生鲁诸儒，饮食清不溽。空肠出秀句，吟嚼五味足。华堂闹丝管，眸子涨春淥。先生疾走避，面冷毒在腹。归来煮瓠叶，弟子歌旱麓。声淫及灵台，中有麀鹿伏。功名一走兔，何用千人逐。故应容我辈，清座时闭目。高亭石排衙，木杪挂飞屋。我来无时节，客亦不待速。似闻雪髯叟，西岭访遗躅。朝阳入潭洞，金碧涵水玉。泉扉夜不扃，云袂本无幅。慈皇付宝偈，神

侣得幽读。讷庵有老人，宴坐天魔哭。时来献纒络，法供灯相续。吾侪诗酒污，欲往无乃触。斋厨费晨炊，车骑满山谷。愿闻第一义，钵饭非所欲。便投切云冠，予幼好奇服。

次韵林子中见寄

飘零洛杜数遗民，诗酒当年困恶宾。元亮本无适俗韵，孝章要是有名人。蒜山小隐虽为客，江水西来亦带岷。卷却西湖千顷葑，笑看鱼尾更莘莘。

安州老人食蜜歌 赠僧仲殊

安州老人心似铁，老人心肝小儿舌。不食五谷惟食蜜，笑指蜜蜂作檀越。蜜中有诗人不知，千花百草争含姿。老人咀嚼时一吐，还引世间痴小儿。小儿得诗如得蜜，蜜中有药治平百病。正当狂走促风时，一笑看诗百忧失。东坡先生取人廉，几人相欢几人嫌。恰似饮茶甘苦杂，不如食蜜中边甜。佛云。吾言譬如食蜜中，边皆甜。因君寄与双龙饼，镜空一照双龙影。三吴六月水如汤，老人心似双龙井。

次韵钱穆父紫薇花二首

虚白堂前合抱花，秋风落日照横斜。阅人此地知多少，物化无涯生有涯。虚白堂前紫薇两株，俗云乐天所种。

折得芳蕤两眼花，题诗相报字倾斜。篋中尚有丝纶句，坐觉天光照海涯。乐天诗云：丝纶阁下文书静，钟鼓楼中刻漏长，独坐黄昏谁是伴，紫薇花对紫薇郎。上尝书此诗以赐轼。

送张嘉州

少年不愿万户侯，亦不愿识韩荆州。颇愿身为汉嘉守，载酒时作凌云游。虚名无用今白首，梦中却到龙泓口。浮云轩冕何足言，惟有江山难入手。峨眉月半轮秋，影入平羌江水流。谪仙此语谁解道，请君见月时登楼。笑谈万事真何有，一时付与东岩酒。佛峡人家白酒旧有名，归来还受一大钱，好意莫违黄发叟。

次韵苏伯固主簿重九

云间朱袖拂云和，知是长松挂女萝。髻重不嫌黄菊满，手香新喜绿橙搓。墨翻衫袖吾方醉，纸落云烟子患多。只有黄鸡与白发，玲珑应识使君歌。

送李陶通直赴清溪

忠文文正二大老，司马温公、范蜀公，君之师友。苏李广平三舍人。苏子容、宋次道与先公才元。熙宁中封还李定词头，天下谓之三舍人。喜见通家贤子弟，自言得邑少风尘。从来势利关心薄，此去溪山琢句新。肯向西湖

留数月，钱塘初识小麒麟。

次韵杨公济奉议梅花十首

梅梢春色弄微和，作意南枝翦刻多。月黑林间逢缟袂，霸陵醉尉误谁何。相逢月下是瑶台，藉草清樽连夜开。明日酒醒应满地，空令饥鹤啄莓苔。绿发寻春湖畔回，万松岭上一枝开。而今纵老霜根在，得见刘郎又独来。月地云阶漫一樽，玉奴终不负东昏。临春结绮荒荆棘，谁信幽香是返魂。日出冰湖散水花，野梅官柳渐欹斜。西郊欲就诗人饮，黄四娘东子美家。君知早落坐先开，莫著新诗句句催。岭北霜枝最多思，忍寒留待使君来。

冰盘未荐含酸子，雪岭先看耐冻枝。应笑春风木芍药，丰肌弱骨要人医。寒雀喧喧冻不飞，绕林空啁未开枝。多情好与风流伴，不到双双燕语时。蛟绡翦碎玉簪轻，檀晕妆成雪月明。肯伴老人春一醉，悬知欲落更多情。缟裙练帔玉川家，肝胆清新冷不邪。秣李争春犹办此，更教踏雪看梅花。

赠刘景文

荷尽已无擎雨盖，菊残犹有傲霜枝。一年好处君须记，最是橙黄橘绿时。

谢关景仁送红梅栽二首

年年芳信负红梅，江畔垂垂又欲开。珍重多情关令尹，直和根蒂送春来。为君栽向南堂下，记取他年著子时。酸醎不堪调众口，使君风味好攒眉。

辩才老师退居龙并不复出入辄往见之常
出至风篁岭左右惊曰远公复过虎溪矣辩
才笑曰杜子美不云乎与子成二老来往亦
风流因作亭岭上名之曰过溪亦曰二老谨
次辩才韵赋诗一首

日月转变毂，古今同一丘。惟此鹤骨老，凛然不知秋。去住两无碍，人大争挽留。去如龙出山，雷雨卷潭湫。来如珠还浦，鱼鳖争骈头。此生暂寄寓，常恐名实浮。我比陶令愧，师为远公优。送我还过溪，溪水当逆流。聊使此山人，永记二老游。大千在掌握，宁有离别忧。

送程之邵签判赴阙

夜光不自献，天骥良难知。从来一狐腋，或出五羖皮。贤哉江东守，收此幕中奇。无华岂易识，既得不自随。留君望此府，助我怜其衰。二年促膝语，一旦长挹辞。林深伏猛在，岸改潜珍移。去此当安从，失君徒自悲。念君瑚琏质，当今台阁宜。去矣会有合，岂常怀其私。

寄题梅宣义园亭

仙人子真后，还隐吴市门。不借十年力，治此五亩园。初期橘为奴，渐见桐有孙。清池压丘虎，异石来湖鼇。敲门无贵贱，遂性各琴尊。我本放浪人，家寄西南坤。敝庐虽尚在，小圃谁当樊。羨君欲归去，奈此未报恩。爱予幸僚友，久要疑弟昆。明年过君西，饮我空瓶盆。

熙宁中轼通守此郡除夜直都厅囚系皆满
日莫不得返舍因题一诗于壁今二十年矣
衰病之余复黍郡寄再经除夜庭事萧然三
圃皆空盖同僚之力非拙朽所致因和前篇
呈公济子侔二通守

前 诗

除日当早归，官事乃见留。执笔对之泣，哀此系中囚。小人营猴粮，堕网不知羞。我亦恋薄禄，因循失归休。不须论贤愚，均是为食谋。谁能暂纾遣，闷默愧前修。

今 和

山川不改旧，岁月逝肯留。百年一俯仰，五胜更平王囚。同僚比岑范，德业前人羞。坐令老钝守，啸诺获少休。却思二十年，出处非人谋。齿发付天公，缺坏不可修。

游宝云寺得唐彦献为杭州日送客舟中手
书一绝句云山雨霏微不满空画船来往疾
轻鸿谁知独卧朱帘里一榻无尘四面风明
日送彦猷之子垵赴鄂州舟中遇微雨感叹
前事因和其韵作两首送之且归其书唐氏

二妙凋零笔法空，忽惊云海戏群鸿。清诗不敢私囊篋，人道黄门有父风。黄门，卫桓也。

出处荣枯一笑空，十年社燕与秋鸿。谁知白首长河路，还卧当时送客风。

送江公著知吉州

三吴行尽干山水，犹道桐庐更清美。岂惟浊世隐狂奴，时平亦出佳公子。初冠惠文读城旦，晚入奉常陪剑履。方将华省起弹冠，忽忆钓台归洗耳。未应良木弃大匠，要使名驹试千里。奉亲官舍当有择，得郡江南差可喜。白粲连樯一万艘，红妆执乐三千指。簿书期会得余闲，亦念人生行乐耳。二耳义不同，故得重用。

闻钱道士与越守穆父饮酒送二壶

龙根为脯玉为浆，下界寒醅亦漫尝。一纸鹅经逸少醉，他年鹏赋谪仙狂。
金丹自足留衰鬓，苦泪何须点别肠。吴越旧邦遗泽在，定应符竹付诸郎。

次韵刘景文路分上元

华灯闕艰岁，冷月挂空府，三吴重时节，九陌自歌舞。云从月几望，遂至一百五。嘉辰可屈指，乐事相继武。今宵扫云阵，极目净天宇。嬉游各忘归，阗咽顷未睹。飞球互明灭，激水相吞吐。老去反儿童，归来尚饶鼓。新年消暗雪，旧岁添丝缕。何时九江城，相对两渔父。予旧欲卜居庐山，景文近买宅江州。

再和杨公济梅花十绝

一枝风物便清和，看尽千林未觉多。结习已空从著袂，不须天女问云何。
天教桃李作舆台，故遣寒梅第一开。恁仗幽人收艾纳，国香和雨入青苔。
白发思家万里回，小轩临水为花开。故应剩作诗千首，知是多情得得来。
人去残英满酒樽，不堪细雨湿黄昏。夜寒那得穿花蝶，知是风流楚客魂。
春入西湖到处花，裙腰芳草抱山斜。盈盈解佩临烟浦，脉脉当垆傍酒家。
莫向霜晨怨未开，白头朝夕自相催。斩新一朵含风露，恰似西厢待月来。
洗尽铅华见雪肌，要将真色斗生枝。檀心已作龙涎吐，玉颊何劳獭髓医。
湖面初惊片片飞，尊前吹折最繁枝。何人会得春风意，怕见梅黄雨细时。
长恨漫天柳絮轻，只将飞舞占清明。寒梅似与春相避，未解无私造物情。
北客南来岂是家，醉看参月半横斜。他年欲识吴姬面，秉烛三更对此花。

与叶淳老侯敦夫张秉道同相视新河秉道有诗次韵二首

君不见元帅府前罗万戴，涛头未顺千弩射。至今凤皇山下路，长借一箭开两翼。我凿西湖还旧观，一眼已尽西南碧。又将回夺浮山险，千艘夜下无南北。坐陈三策本人谋，惟留一诺待我画。老病思归真暂寓，功名如幻终何得。从来自笑画蛇足，此事何殊食鸡肋。怜君嗜好更迂阔，得我新诗喜折展。江湖粗了我径归，余事后来当润色。一庵闲卧洞霄宫，并有丹沙水长赤。

荆溪父老愁三害，下斩长蛟本无赖。平生倔强韩退之，文字犹为鳄鱼戒。石门之役万金耳，首鼠不为吾已隘。江湖开塞古有数，两鹄飞来告成坏。劝农使者非常人，一言已破黎民骇。上饶使君更超逸，坐脱浮山如累块。髯张乃我结袜生，诗酒淋漓出狂怪。我作水衡生作丞，他日归朝同此拜。

棕 笋 并叙

棕笋状如鱼，剖之得鱼子，味如苦笋而加甘芳。蜀人以饌佛，僧甚贵之，而南方不知也。笋生肤桑中，盖花之方孕者。正二月间可剥取，过此苦涩不可食矣。取之无害于木，而宜于饮食。法当蒸熟，所施略与笋同。蜜煮酢浸，可致千里外。今以饷殊长老。

赠君木鱼三百尾，中有鹅黄子鱼子。夜义剖瘦欲分甘，箨龙藏头敢言美。

愿随蔬果得自用，勿使山林空老死。问君何事食木鱼，烹不能鸣固其理。

次韵曹子方龙山真觉院瑞香花

幽香结浅紫，来自孤云岑。骨香不自知，色浅意殊深。移栽青莲字，遂冠薝卜林。纫为楚臣佩，散落天女襟。君持风霜节，耳冷歌笑音。一逢兰蕙质，稍回铁石心。置酒要妍暖，养花须晏阴。及此阴暗间，恐致慳啬霖。彩云知易散，鸚鵡优先吟。明朝便陈迹，试著丹青临。

次韵曹子方运判雪中同游西湖

词源滟滟波头展，清唱一声岩谷满。未容雪积句先高，岂独湖开心自远。云山已作歌眉浅，山下碧流清似眼。尊前侑酒只新诗，何异书鱼餐蠹简。

次韵仲殊雪中游西湖二首

夜半幽梦觉，稍闻竹苇声。起续冻折弦，为鼓一再行。曲终天自明，玉楼已峥嵘。有怀二三子，落笔先飞霰。共为竹林会，身与孤鸿轻。秀语出寒饿，身穷诗乃亨。禅老复何为，笑指孤烟生。我独念粲者，谁与予目成。

宝云楼阁闹千门，林静初无一鸟喧。闭户莫教风扫地，卷帘疑有月临轩。水光潋潋犹浮碧，山色空濛已敛昏。乞得汤休奇绝句，始知盐絮是陈言。

次韵参寥同前

朝来处处白毡铺，楼阁山川尽一如。总是烂银并白玉，不知奇货有谁居。

送小本禅师赴法云

寓形天宇间，出处会有役。澹然都无营，百年何由毕。山林等忧患，轩冕亦戏剧。我未即归休，师宁便安逸。王城满豪杰，议论分黑白。圣谛第一义，对面谁不识。师来亦何事，孤月挂空碧。是身如浮云，安可限南北。出岫本无心，既雨归亦得。珠泉有旧约，何年挂瓶锡。

书浑令公燕鱼朝恩图

咸宁英气似汾阳，夜饮军容出红妆。不须缠头万匹锦，知卿来办作吕强。

第十九卷

诗三首

息壤诗 并叙

淮南子曰：鯀堙洪水，盗帝之息壤，帝使祝融杀之于羽渊。今荆州南门外，有状若屋宇，陷入地中，而犹见其脊者，旁有石记云不可犯。畚鍤所及，辄复如故，又颇以致雷雨。岁大旱，屡发有应。予感之，乃为作诗，其词曰：

帝息此壤，以藩幽台。有神司之，随取而培。帝敕下民，无敢或开。惟帝不言，以雷以雨。惟民知之，幸帝之怒。帝茫不知，谁敢以告。帝怒不常，下土是震。使民前知，是役于民，无是坟者，谁取谁干。惟其的之，是以射之。

新渠诗 并叙

庚子正月，予过唐州，太守赵侯始复三陂疏召渠，招怀远人，散耕于唐。予方为旅人，不得亲执壶浆箪食，以与侯劝逆四方之来者，独为新渠诗五章，以告于道路，致侯之意其词曰：

新渠之水，其来舒舒。溢流于野，至于通衢。渠成如神，民始不知。问谁为之，邦君赵侯。新渠之田，在渠左右。渠来奕奕，如赴如湊。如云斯积，如屋斯溜。嗟唐之人，始识稂秬。新渠之民，自淮及潭。挈其妇姑，或走而颠。王命赵侯，宥我新民。无与王事，以讫七年。侯谓新民，尔既来止。其归尔邑，告尔邻里。良田千万，尔择尔取。尔耕尔食，遂为尔有。筑室于唐，孔硕且坚，生为唐民，饱粥与饘。死葬于唐，祭有雉豚。天子有命，我惟尔安。

颜乐亭诗 并叙

颜子之故居，所谓陋巷者，有井存焉，而不在颜氏久矣。胶西太守孔君宗翰始得其地，浚治其井，作亭于其上，命之日颜乐。昔夫子以草食瓢饮贤颜子，而韩子乃以为哲人之细事，何哉？苏子曰：古之观人也，必于其小焉观之，其大者容有伪焉。人能碎千金之壁，不能无失声于破釜；能搏猛虎，不能无变色于蜂蛰，孰知草食瓢饮之为哲人之大事乎？乃作颜乐亭诗，以遗孔君，正韩子之说。且以自警云。

天生烝民，为之鼻口。美者可嚼，芬者可嗅。美必有恶，芬必有臭。我无天游，六凿交斗。鹜而不友，跬步商受。伟哉先师，安此微陋。孟贲股栗，虎豹却走。眇然其身，中亦何有。我求至乐，千载无偶。执瓢从之，忽焉在后。

词十三首

太白词五首 并叙

岐下频年大旱，祷于太白山辄应，故作迎送神词，一篇五章。

雷阗阗，山昼晦。风振野，神将驾。载云罕，从玉料。旱既甚，蹙往救，道阻修兮。

旌旗翻，疑有无。日惨变，神在涂。飞赤篆，许闾阖。走阴传，行羽檄，万灵集兮。

风为幄，云为盖。满堂烂，神既至。纷醉饱，锡以雨。百川溢，施沟渠，歌且舞兮。

骑裔裔，车班班。鼓萧悲，神欲还。轰振凯，隐林谷。执妖厉，归献馘，千里肃兮。

神之来，怅何晚。山重複，路幽远。神而去，飘莫追。德未报，民之思，永万祀兮。

上清辞 以宫名名篇

南山之幽，云冥冥兮。孰居此者？帝侧之神君。君胡为乎山之幽，顾宫殿兮久淹留。又曷为一朝去此而不顾兮，悲此空山之人也。来不可得而知兮，去固不可得而讯也。君之来兮天门空，从千骑兮驾飞龙。隶辰星兮役太岁，俨昼降兮雷隆隆。朝发兮帝庭，夕弭节兮山宫。扩有妖兮虐下土，精为星兮气为虹。爰流血之滂沛兮，又嗜疟疔与螟虫。啸盲风而涕淫雨兮，时又吐旱火之熾融。衔帝命以下讨兮，建千仞之修锋。乘飞霆而追逸景兮，歛害扫灭而无踪。忽崩播其来会兮，走海岳之神公。龙车兽鬼不知其数兮，旗纛掩霭而冥蒙。渐俯偻以旅进兮，锵剑佩之相聒。司杀生之必信兮，知上帝之不汝容。既约束以反职兮，退战栗而愈恭。泽充塞于四海兮，独澹然其无功。君之去兮天门开，款闾阖兮朝玉台。群仙迎兮塞云汉，严前导兮纷后陪。历玉阶兮帝迎劳，君良苦兮马厄颓。阅人世兮迫隘，陈下土兮帝所哀。返琼宫之嵯峨兮，役万灵之喧逐。默清静以无为兮，时节狩于斗魁。诣通明而献黜陟兮，轶荡荡其无回。忽表里之焕霍兮，光下烛于九陔。时游目以下览兮，五岳为豆，四溟为杯。俯故宫之千柱兮，若毫端之集埃。来非以为乐兮，去非以为悲。谓神君之既返兮，曾颜咫尺之不违。升秘殿以内悸兮，魂凛凛而上驰。忽寤寐以有得兮，敢沐浴而献辞。是邪非邪，臣不可得而知也。

归来引 送王子立归筠州

归去来兮，世不汝求胡不归。汹北望之横流兮，渺西顾之尘霏。纷野马之决骤兮，幸余首之未鞿。出彭城而南骛兮，眷丘垤而增欷。乱清淮而俯鉴兮，惊昔容之是非。念东坡之遗老兮，轻千里而款余扉。共雪堂之清夜兮，揽明月之余辉。曾鸡黍之未熟兮，叹空室之蚳蚋。我挽袖而莫留兮，仆夫在门歌式微。归去来兮，路渺渺其何极。将税驾于何许兮，北江之南，南江之北。于此有人兮，俨峨峨其丰硕。孰居约而尔肥兮，非糠核其何食。久抱一而不试兮，愈温温而自克。吾居世之荒浪兮，视昏昏而听默默。非之子莫振吾过兮，久不见恐自贼。吾欲往而道无由兮，子何畏而不即。将以彼为玉人兮，以子为之璞也。

黄泥坂词

出临臯而东骛兮，并藁词而北转。走雪堂之坡陀兮，历黄泥之长坂。大江汹以左缭兮，渺云涛之舒卷。草木层累而右附兮，蔚柯丘之葱蒨。余旦往而夕还兮，步徙倚而盘桓。虽信美不可居兮，苟娱余于一眄。余幼好此奇服兮，袭前人之诡幻。老更变而自晒兮，悟惊俗之来患。释宝璐而被缁絮兮，杂市人而无辨。路悠悠其莫往来兮，守一席而穷年。时游步而远览兮，路穷尽而旋反。朝嬉黄泥之白云兮，莫宿雪堂之青烟。喜鱼鸟之莫余惊兮，幸樵苏之我嫚。初被酒以行歌兮，忽放杖而醉偃。草为茵而块为枕兮，穆华堂之清晏。纷坠露之湿衣兮，升素月之团团。感父老之呼觉兮，恐牛羊之予践。于是蹶然而起，起而歌曰：月明兮星稀，迎余往兮饯余。归岁既晏兮草木胖，归来归来兮，黄泥不可以久嬉。

清溪词

大江南兮九华西，泛秋浦兮乱清溪。水渺渺兮山无溪，路重复兮居者迷。烂青红兮粲高低，松十里兮稻千畦。山无人兮云朝跻，蔼濛濛兮淦凄凄。啸林谷兮号水泥，走鼉鼉兮下凫鹭。忽孤垒兮隐重堤，杏冥茫兮闻犬鸡。郁万瓦兮鸟翼齐，浮轩楹兮飞拱榭。雁南归兮寒蛩嘶，弄秋水兮挹玻璃。朝市合兮杂毫，挟箠瓢兮佩锄犁。鸟兽散兮相扶携，隐惊雷兮骛长霓。望翠微兮古招提，挂木抄兮翔云梯。若有人兮帐幽栖，石为门兮云为闺。块虚堂兮法喜婁，呼猿狙兮子鹿麕。我欲往兮奉杖藜，独长啸兮谢阮嵇。

李仲蒙哀词

河南李君仲蒙，以司封郎直史馆为记室。岐王府熙宁二年七月丙戌，终于京师。家贫丧不时举，其僚相与贖之，既敛而归。十月丙申，葬于缙氏柏峪山西。其孤吁使来告轼曰：呜呼，吾先友人也。哭之，其可无辞。昔吾先君始仕于太常，君以博士，朝夕往来相好。先君于人少所与，独称君为长者。君为人敦朴恺悌，学博而通，长于毛氏诗、司马氏史。善与人交，虽见犯不报。尝有与君为姻者，无故决去，闻者为之不平，君恬不以为意。先君以是称其难。始举进士甲科，为毫、润、邠三郡职官，后为应天府录曹。勤力趋事，长吏有不喜者，欲以事困之而不能。既为博士，议礼据正不屈。晚入岐府，以经术辅导，笃实不阿。其言多验于后。君讳育，其先河内人，自高祖徙于猴氏，没时年五十。辞曰：中心乐易，气淑均兮。内外纯一，言可信号，无怨无恶。善友人兮学诗达礼，敏而文兮翱翔王藩。仕弗振兮宜寿黄耆，隕中身兮两不一获。归怨神兮我怀先君，涕酸辛兮顾嗟众人。诞失真兮矫矫牵牵，自贵珍兮欺世幻俗。内弗安兮久而不堪，厌则遁兮惑者冰解。明者晒兮嗟卒不悟，惟彼贤兮浑朴简易。弃弗申兮往者不还，我思君兮。

钱君倚哀词

大江之南兮，震泽之北。吾行四方而无归兮，逝将此焉止息。岂其土之不足食兮，将其人之难偶。非有食无人之为病兮，吾何适而不可。独裴回而

不去兮，眷此邦之多君子。有美一人兮，瞭然而清。顾然而瘦亮直多闻兮，古之益友。带规矩而蹈绳墨兮，佩芝兰而服明月。载而之世之人兮，世捍坚而不答。虽不答其何丧兮，超方扬而自得。吾将观子之进退以自卜兮，相行止以效清浊。子奄忽而不返兮，世混混吾焉则。升空堂而拒遗像兮，吊凝坐于几席。苟律我者之信亡兮，吾居此其何益。行徬徨而无徒兮，悼舍此而奚响。岂存者之举无其人兮，辽辽如晨星之相望。吾比年而三哭兮，堂堂皆国之英。苟处世之恃交兮，几如是而吾不亡。临大江而长叹兮，吾不济其有命。

伤春词 并叙

去岁十二月，虞部郎吕君文甫，丧其妻安氏。二月以书遗余曰：安氏甚美，而有贤行，念之不忘。思有以为不朽之托者，愿求一言以吊之。余悲其意，乃为作伤春词云。

佳人与岁皆逝兮，岁既复而不返。付新春于居者兮，独安适而愈远。昏昏其如醉兮，夜耿耿而不眠。居兀兀不自觉兮，纷过前之物变。雪霜尽而鸟鸣兮，陂塘该其流暖。步荒园而访遗迹兮，翦百草之生满。风泛泛而微度兮，日迟迟而愈妍。眇飞絮之无穷兮，烂夭桃之欲然。燕晓晓而稚娇兮，鸠谷谷其老怨。蝶群飞而相值兮，蜂抱蕊而更平罐。善万物之得时兮，痛伊人之罹此冤。众族出而侣游兮，独向壁而永叹。泪荧荧而栖睫兮，花摇摇而增眩。昼出门而不敢归兮，畏空室之漫漫。忽入门而欲语兮，嗟犹意其今存。役魂魄于宵梦兮，追仿佛而无缘。访临邓之道士兮，从稠桑之老人。纵可得而复见兮，恐荒忽而非真。求余文以写哀兮，余亦枪恨而不能言。夫既其身之不顾兮，尚安用于斯文。

苏世美哀词

有美一人，长而髯兮， 欹历落，进趋檐兮。达于从政，敏而廉兮。如求与由。艺果兼兮。魁然丈夫，色悍严兮，奋须抵几，走群纤兮。闻名见像，已痒店兮。敬事友生，小心谦兮。诲养贫弱，语和甜兮。刚柔适中。畏爱企兮。孤直无依，众枉嫌兮。何辜于神，寿复殀兮。死无甌石。突不黔兮。孰为故人，孰视怙兮。我窜于黄。岁将淹兮。于后八年。梦复覘兮。曰吾子钩。甘藿盐兮。冬月负薪，衣不缣兮。觉而长吁。涕流沾兮。永言告钩，守穷潜兮。苦心危肠。自磨赚兮。天不吾欺。有速淹兮。岂若人子。老閤閤兮。生欢死忘。我言砭兮。

后 集
第 一 卷

诗六十四首

次韵刘景文西湖席上

二老长身屹两峰，常撞大吕应黄钟。将辞邺下刘公干，却见云间陆士龙。
自发怜君略相似，青山许我定相从。吾今官已六百石，惭愧当年邴曼容。

次前韵答马忠玉

坡陀巨麓起连峰，积累当年庆自钟。灵运子孙俱得凤，慈明兄弟孰非龙。
河梁会作看云别，诗社何妨载酒从。只有西湖似西子，故应宛转为君容。

予去杭十六年而复来留二年而去平生自
觉出处老少粗似乐天虽才名相远而安分
寡求亦庶几马三月六日来别南北山诸道
人而下天竺惠净师以丑石赠行作三绝句

当年衫鬓两青青，强说重临慰别情。衰发只今无可白，故应相对话来生。
出处依稀似乐天，敢将衰朽较前贤。便从洛社休官去，犹有闲居二十年。
在郡依前六百日，山中不记几回来。还将天竺一峰去，欲把云根到处栽。

次韵答黄安中兼简林子中

老去心灰不复然，一麾江海意方坚。那堪黄散付子度，空羡杭苏养乐天。
病肺一春难白酒，别肠三夜绕朱弦。群仙政欲吾归去，共把清风借玉川。

留别蹇道士拱辰

黑月在浊水，何曾不清明。寸田满荆棘，梨枣无从生。何时反吾真，岁
月今峥嵘。屡接方外士，早知俗缘轻。庚桑托鸡鹄，未肯化南荣。晚识此道
师，似有宿世情。笑指北山云，诃我不归耕。仙人汉阴马，微服方地行。咫
尺不往见，烦子通姓名。愿持空手去，独控横江鲸。

次韵子由书王晋卿画山水二首

老去君空见画，梦中我亦曾游。桃花纵落谁见，水到人间伏流。
山人昔与云俱出，俗驾今随水不回。赖我胸中有佳处，一樽时对画图开。

又书王晋卿画四首

山阴陈迹

当年不识此清真，强把先生拟季伦。等是人间一陈迹，聚蚊金谷本何人。

雪溪乘兴

溪山雪月两佳哉，宾主谈锋夜转雷。犹言不见戴安道，为问适从何处来。

四明狂客

毫端偶集一微尘，何处溪山非此身。狂客思归便归去，更求敕赐枉天真。

西塞风雨

斜风细雨到来时，我本无家何处归。仰看云天真弱笠，旋收江海入蓑衣。

破琴诗 并引

旧说房琯开元中，尝宰卢氏与道士邢和璞出游。过夏口村，入废佛寺，坐古松下。和璞使人凿地得瓮，中所藏娄师德与永禅师书，笑谓琯曰：颇忆此耶？琯因怅然，悟前生之为永师也。故人柳子玉宝此画，云是唐本，宋复古所临者。元祐六年三月十九日，予自杭州还朝，宿吴松江，梦长老仲殊挟琴过。予弹之，有异声，就视琴颇损，而有十三弦。予方叹惜不已，殊曰：虽损尚可修。曰：奈十三弦何？殊不答，诵诗云，度数形名本偶然，破琴今有十三弦。此生若遇邢和璞，方信秦箏是响泉。予梦中了然识其所谓，既觉而忘之。明日昼寝，复梦殊来，理前语，再诵其诗，方惊觉而殊适至，意其非梦也。问之殊盖不知。是岁六月见子玉之子子文京师，求得其画，乃作诗并书所梦其上。子玉名谨，善作诗，及行草书，复古名迪，画山水草木，盖妙绝一时。仲殊本书生，弃家学佛，通脱无所着，皆奇士也。

破琴虽未修，中有琴意足。谁云十三弦，音节如佩玉。新琴空高张，丝声不附木。宛然七弦箏，动与世好逐。陋矣房次律，因循堕流俗。悬知董庭兰，不识无弦曲。

题王晋卿画后

丑石半蹲山下虎，长松倒卧水中龙。试君眼力看多少，数到云峰第几重。

听武道士弹贺若

清风终日自开帘，凉月今宵肯挂檐。琴里若能知贺若，诗中定合爱陶潜。

元祐六年六月自杭州召还汶公馆我
于东堂阅旧诗卷次诸公韵三首

半熟黄粱日未斜，玉堂阴合手栽花。却寻三十年前味，未饭钟声已饭茶。
梦觉还惊屣响廊，故人来炷影前香。鬓须白尽成何事，一帖空存老遂良。
法帖中有褚遂良书，云即日遂良须发尽白。

尺一东来唤我归，衰年已迫故山期。文章曹植今堪笑，却卷波澜入小诗。

次韵子由书王晋卿画 山水一首而晋卿和二首

误点故教同子敬，杂篇真欲拟汤休。垆云寄我山中信，雪月迫君溪上舟。
会看飞仙虎头篋，却来颠倒拾遗裘。子美诗云：天吴与紫凤，颠倒在短褐。
王孙办作玄真子，纲雨斜风不湿鸥。

此境眼前聊妄想，几人林下是真休。我今心似一潭月，君已身如万斛舟。
看画题诗双鹤鬓，归田送老一羊裘。明年兼与土龙去，万顷苍波没两鸥。

感旧诗 并引

嘉祐中，予与子由同举制策，寓居怀远驿，时年二十六，而子由二十三耳。一日，秋风起，雨作，中夜愴然，始有感慨离合之意。自尔宦游四方，不相见者十常七八。每夏秋之交，风雨作，木落草衰，辄凄然有此感，盖三十年矣。元丰中，谪居黄冈，而子由亦贬筠州，尝作诗以记其事。元祐六年，予自杭州召还，寓居子由东府数月，复出领汝阴，时予年五十六矣。乃作诗，留别子由而去。

床头枕驰道，双阙夜未央。车毂鸣枕中，客梦安得长。新秋入梧叶，风雨惊洞房。独行残月影，怅马感初凉。筮仕记怀远，谪居念黄冈。一往三十年，此怀未始忘。扣门呼阿同，子由一字同叔。安寝已太康。青山映华发，归计三月粮。我欲自汝阴，径上潼江章。想见冰槃中，石蜜与柿霜。予欲请东川而归。二物皆东川所出。怜子遇明主，忧患已再尝。报国何时毕，我心久已降。

西湖秋涸东池鱼窘甚因会客呼网师 迁之西池为一笑之乐夜归被酒不能 寐戏作放鱼

东池浮萍半粘块，裂碧跳青出鱼背。西池秋水尚涵空，舞阔摇深吹蒋带。
吾僚有意为迁居，老守纵馋那忍脍。纵横争看银刀出，灑灑初惊玉花碎。但愁数罟损鳞鬣，未信长堤隔涛濑。濺濺发发须臾间，围圉洋洋寻丈外。安知中无蛟龙种，尚恐或有风云会。明年春水涨西湖，好去相忘渺淮海。

复次放鱼前韵答赵承议陈教授

扰扰万生同大块，抢榆不羨培风背。青丘已吞云梦芥，黄河复缭天门带。
长讥韩子隘且陋，一饱鲸鱼何足脍。东坡也是可怜人，披抉泥沙收细碎。
逝将归修八节滩，又欲往钓七里濑。正似此鱼逃网中，未与造物游数外。
且将新句调二子，湖上秋高风月会。为君更唤木肠儿，脚扣两舷歌小海。

九月十五日观月听琴西湖一首示坐客

白露下众草，碧空卷微云。孤光为谁来，似为我与君。水天浮四坐，河汉落酒樽。使我冰雪肠，不受麴蘖薰。尚恨琴有弦，出鱼乱湖纹。哀弹本旧曲，妙耳非昔闻。良时失俯仰，此见宁朝昏。悬知一生中，道眼无由浑。

复次前韵谢赵景肌陈履常见和兼简欧叔弼兄弟

能诗李长吉，识字杨子云。端能望此府，坐献获两君。逝将江湖去，浮我五石樽。眷焉复少留，尚为世所醺。或劝莫作诗，儿辈工织纹。朱弦寄三叹，未害俗耳闻。共寻两欧阳，伐薪照黄昏。是家有甘井，汲多终不浑。

送欧阳主簿赴官韦城四首

凤雏骥子日相高，白发苍颜笑我曹。读遍牙签三万轴，却来小邑试牛刀。出处年来恨不齐，一樽临水记分携。江湖咫尺吾将老，汝颖东流子却西。白马津头春水来，白鱼犹喜似江淮。使君已复冰堂酒，更劝重新画舫斋。道傍垂白定沾巾，正似当年绿发新。故国依然乔木在，典刑复见老成人。

泛 颖

我性喜临水，得颖意甚奇。到官十日来，九日河之湄。吏民笑相语，使君老而痴。使君实不痴，流水有令姿。绕郡十余里，不驶亦不迟。上流直而清，下流曲而漪，画船俯明镜，笑问汝为谁。忽然生鳞甲，乱我须与眉。散为百东坡，顷刻复在兹。此岂水薄相，与我相娱嬉。声色与臭味，颠倒眩小儿。等是儿戏物，水中少磷淄。赵陈两欧阳，同参天人师。观妙各有得，共赋泛颖诗。

六观堂老人草书诗

物生有象象乃滋，梦幻无根成斯须。方其梦时了非无，泡影一失俯仰殊。清露未晞电已徂，此灭灭尽乃真吾。云如死灰实不枯，逢场作戏三昧俱，化身为医忘其躯，草书非学聊自娱。落笔已唤周越奴，苍鼠奋髯饮松腴。刻藤玉板开雪肤，游龙天飞万人呼，莫作羞涩羊氏妹。六观，取金刚经梦幻等六物也。老人惜了性，精于医，而善草书，下笔有远韵，而人莫知贵。故作此诗。

次韵刘景文见寄

淮上东来双鲤鱼，巧将诗信渡江湖。细看落墨皆松瘦，想见掀髯正鹤孤。烈士家风安用此，书生习气未能无。莫因老骇思千里，醉后哀歌缺唾壶。

次韵赵景貺督两欧阳诗破陈酒戒

商也哀未散，岁月忽已秋。祥琴虽未调，余悲不敢留，矧此乃韵语，未入金石流。羲之生五之，总角出银钩。吾家有二许，下笔两不休。君言不能诗，此语人信不。千钟斯为尧，百榼斯为丘。陋矣陶士衡，当以太白浮。酒中那有失，醉则不惊鸥。明当罚二子，已洗两玉舟。

叔弼云履常不饮故不作诗劝履常饮

我本畏酒人，临觴未常诉。平生坐诗穷，得句忍不吐。吐酒茹好诗，肝胃生滓汗。用此较得丧，天岂不足付。吾济非二物，岁月谁与度。悄焉得长愁，为什已大误。二欧非无诗，恨子不饮故。强为釂一酌，将非作愁具。成言如皎日，援笔当自赋。他年五君咏，山王一时数。

臂痛谒告作三绝句示四君子

公退清闲如致仕，酒余欢适似还乡。不妨更有安心病，卧看萦帘一炷香。心有何求遣病安，年来古井不生澜。祇愁戏瓦闲童子，却作泠泠一水看。小阁低窗卧晏温，了然非默亦非言。维摩示病吾真病，谁识东坡不二门。

到颖未几公帑已竭斋厨索然戏作数句

我昔在东武，吏方谨新书。斋空不知春，客至先愁予。采杞聊自诳，食菊不敢余。岁月今几何，齿发日向疏。幸此一郡老，依然十年初。梦饮本来空，真饱竟亦虚。尚有赤脚婢，能烹頰尾鱼。心知皆梦耳，慎勿歌归欤。

景况履常屡有诗督叔弼 季默唱和已许诺矣复以此句挑之

君家文律冠西京，旋筑诗坛按酒兵。袖手莫轻真将种，致师须得老门生。明朝郑伯降谁受，昨夜条侯壁已惊。从此醉翁天下乐，还应一举百觴倾。文忠公赠苏梅诗云：我亦愿助勇，鼓旗噪其旁。快哉天下乐，一釂宜百觴。

赠月长老

天形倚一笠，地水转两轮。五霸之所连，毫端栖一尘，功名半幅纸，儿女浪苦辛。子有折足枪，中容五合陈。十年此中过，却是英特人。延我地炉坐，语软意甚真。白灰如积雪，中有红骐驎。勿触红骐驎，作灰维那瞋。拱手但默坐，墙壁方谆谆。今宵恨客多，汗子白氎巾。后夜当独来，不烦主与宾。蒲团坐纸帐，自要观我身。

次韵答钱穆父以轼得汝 阴用杭越唱酬韵作诗见寄

大耿疲劳已离群，小冯慈爱且当门。轼本以舍弟亲嫌请郡。玉堂不著扶

犁手，霜鬓偏宜画鹿鞦。豪杰虽无两王继，子直、深父。风流犹有二欧存。
叔弼、季默。清诗已入新歌舞，要使邦人识雅言。

韩退之孟郊墓铭云以昌其诗举此
问王定国当昌其身耶昌其诗也来
诗下语未契作此答之

昌身如饱腹，饱尽还当饥。昌诗如膏面，为人作容姿。不如昌其气，郁郁老不衰。虽云老不衰，劫坏安所之。不如昌其志，志一气自随。养之塞天地，孟轲不吾欺。人言魏勃勇，股栗向小儿。何如鲁连子，谈笑却秦师。慎勿怨谤讪，乃我得道资。淤泥生莲华，粪壤出菌芝。赖此善知识，使我枯生萸。吾言岂须多，冷暖子自知。

送欧阳推官赴华州监酒

我观文忠公，四子皆超越。仲也珠径寸，照夜光如月。好诗真脱兔，下笔先落鹞。知音如周郎，议论亦英发。文章乃余事，学道探玄窟。死为长白山主，名字书绛阙。熙宁之末，仲纯父见仆于京城之东，曰：“吾梦道士持告身授吾曰：上帝命汝为长白山主。此何祥也？”明年仲纯父没。伤心清颖尾，已伴白鸥没。喜见三少年，俱有千里骨。千里不难到，莫遣历块蹶。临分出苦语，愿子书之笏。

十月十四日以病在告独酌

翠柏不知秋，空庭失摇落。幽人得佳荫，露坐方独酌。月华稍澄穆，雾气尤清薄。小儿亦何知，相语翁正乐。铜炉烧柏子，石鼎煮山药。一杯赏月露，万象纷酬酢。此生独何幸，风缆欣初泊。逝逃颜蹠网，行赴松乔约。莫嫌风有待，漫欲戏寥廓。冷然心境空，仿佛来笙鹤。

独酌试药玉滑盏有怀诸君
子明日望夜月庭佳景不可失作诗招之

熔铅煮白石，作玉真自欺。琢削为酒杯，规摹定州瓷。荷心虽浅狭，镜面良渺弥。持此寿佳客，到手不容辞。曹侯天下平，定国岂其师。一饮至数石，温克颇似之。风流越王孙，诗酒屡出奇。喜我有此客，玉杯不徒施。请君洁欧陈，问疾来何迟。呼儿扫月榭，扶病及良时。

欧季默以油烟墨二丸见怕各长寸许戏作小诗

书窗拾轻煤，佛帐扫余馥。辛勤破千夜，收此一寸玉。痴人畏老死，腐朽同草木。欲将东山松，湮尽南山竹。墨坚人苦脆，未用叹不足。且当注虫鱼，莫草三千牍。

明日复以大鱼为馈重二十斤且求诗故复戏之

汉庭九尺人，谁似老方朔。那将一寸金，令足三冬学。饷鱼欲自洗，鳞尾光卓犖。我是骑鲸手，聊堪充鹿角。

和赵景旸栽桧

汝阴多老桧，处处屯苍云。地连丹砂井，物化青牛君。时有再生枝，颖之灵坛观。亦有再生桧。还作左纽纹。王孙有古意，书室延清芬。应怜四孺子，不堕凡木群。体备松柏姿，气含芝术薰。初扶鹤立骨，未出龙缠筋。巢根白蚁乱，网叶秋虫纷。乃知蔽帝初，甚要封植勤。他年皮三寸，狐鼠了不闻。

叶待制求先坟永慕亭诗

灵区有异产，化国无潜珍。承平百年问，簪纓半齐民。建溪富奇伟，叶氏初隐沦。森然见乔木，其下维德人。佳哉郁葱葱，气若凤与麟。联翩出儒将，岂惟十朱轮。新松无鹿触，旧柏有乌驯。待公归上冢，泪叶乃肯春。

与赵陈同过欧阳叔弼新治小斋戏作

江湖渺故国，风雨倾旧庐。东来三十年，愧此一束书。尺椽亦何有，而我常客居。羨君开此室，容膝真有余。拊床琴动摇，弄笔窗明虚。后夜龙作雨，天明雪填渠。时方祷雨龙祠，作此句时，星斗灿然，四更风雨大至，明日乃雪。梦回闻剥啄，谁乎赵陈予。添丁走沽酒，通德起挽蔬。主孟当啖我，玉鳞金尾鱼。一醉忘其家，此身自蘧蔭。

聚星堂雪 并叙

元祐六年十一月一日，祷雨张龙公，得小雪，与客会饮聚星堂。忽忆欧阳文忠公作守时，雪中约客赋诗，禁体物语，于艰难中特出奇丽，尔来四十余年，莫有继者。仆以老门生继公后，虽不足追配先生，而宾客之美殆不减当时，公之二子又适在郡，故辄举前令，各赋一篇。

窗前暗响鸣枯叶，龙公试手行初雪。映空先集疑有无，作态斜飞正愁绝。众宾起舞风竹乱，老守先醉霜松折。恨无翠袖点横斜，祇有微灯照明灭。归来尚喜更鼓暗，晨起不待铃索掣。未嫌长夜作衣棱，却怕初阳生眼缬。欲浮大白追余赏，幸有回飈惊落屑。模糊桧顶独多时，历乱瓦沟裁一瞥。汝南先贤有故事，醉翁诗话谁续说。当时号令君听取，百战不许持寸铁。

欧阳叔弼见访诵陶渊明事叹其绝 识叔弼既去感慨不已而赋此诗

渊明求县令，本缘食不足。束带向督邮，小屈未为辱。翻然赋归去，岂不念穷独。重以五斗米，折腰营口腹。云何元相国，万钟不满欲。胡树铢两多，安用八百觔。以此杀其身，何翅抵鹄玉。往者不可悔，吾其反自烛。

喜刘景文至

天明小儿更平传呼，髯刘已到城南隅。尺书真是髯手迹，起坐熨眼知有无。今人不作古人事，今世有此古丈夫。我闻其来喜欲舞，病自能起不用扶。江淮早久尘土恶，朝来清雨濯鬓须。相看握手了无事，千里一笑无乃迂。平生所乐在吴会，老死欲葬杭与苏。过江西来二百日，冷落山水愁吴妹。新堤旧井各无恙，参寥六一岂念吾。别后新诗巧摹写，袖中知有钱塘湖。

祷雨龙公既应刘景文有诗次韵

张公晚为龙，抑良龙中来。伊昔风云会，咄嗟潭洞开。精诚苟可贯，宾主真相陪。洞箫振羽舞，白酒浮云壘。言从关雎妃，远会焦氏台。倒倾瓶中雨，一洗麦上埃。破旱不论功，乘云却空回。嗟龙与我辈，用意岂远哉。使君今子义，英风冠东莱。笑说龙为友，幽明莫相猜。

刘景文家藏乐天身心问答三首戏书一绝其后

渊明开神自我，乐天身心相物。而今月下三人，他日当成几佛。

西湖戏作一绝

一士千金未易偿，我从陈赵两欧阳。举鞭拍手笑山简，祇有并儿一葛强。

送欧阳季默赴阙

先生岂止一怀祖，郎君不减王文度。膝上几日今白须，令我眼中见此父。汝甫相从三晦朔，君去苦早我来莫。霜风凄紧正脱木，颖水清浅可立鹭。莫辞白酒泻香泉，已觉扁舟掠新渡。坐看士衡执别手，更遣梦得出奇句。郎君可是管库人，乃使骖骤随奏步。置之行矣无足道，贤愚岂在遇不遇。

用前韵作雪诗留景文

万松岭上黄千叶，载酒年年踏松雪。刘郎去后谁复来，花下有人心断绝。东斋夜坐搜雪句，两手龟拆霜须折。无情岂亦畏嘲弄，穿帘入户吹灯灭。纷纷儿女争所似，碧海长鲸君未掣。朝来云汉接天流，顾我小诗如点缀。欧阳赵陈在户外，急扫中庭铺木屑。交游虽似雪柏坚，聚散行作风花瞥。晴光融作一尺泥，归有何事真无说。泥干路稳放君去，莫倚马蹄如赔铁。

和刘景文见赠

元龙本志陋曹吴，豪气峥嵘老不除。失路今为啥等伍，作诗犹似建安初。西来为我风鬣面，独卧无人雪縞庐。留子非为十日饮，要令安世诵亡书。

和刘景文雪

占雨又得雪，龟宁欺我哉。似知吾辈喜，故及醉中来。童子愁冰砚，佳人苦胶杯。那堪李常侍，入蔡夜衔枚。

次前韵送刘景文

白云在天不可呼，明月岂肯留庭隅。怪君西行八百里，清坐十日一事无。路人不识呼尚书，但见凛凛雄千夫。君一马两仆，率然相访。逆旅多呼尚书，意谓君都头也。岂知入骨爱诗酒，醉倒正欲蛾眉扶。一篇向人写肝肺，四海知我霜鬓须。君前有诗见寄云：四海共知霜鬓满。重阳曾插菊花无。欧阳赵陈皆我有，岂谓夫子驾复迂。尔来又见三黜柳，共此暖热食毡苏。酒肴酸薄红粉暗，祇有颖水清而妹。一朝寂寞风雨散，对影谁念月与吾。郡中日与欧阳叔弼、赵景貺、陈履常相从，而景文复至，不数日柳戒之，亦见过宾客之盛，顷所未有，然不数日。叔弼景文戒之皆去矣。何时归帆泝江水，春酒一变甘棠湖。景文近卜居九江。近甘棠湖。

以屏山赠欧阳叔弼

漫郎天骨清，生与世俗异。学道新有得，为贫聊复仕。每于红尘中，常起青霞志。屏山辍赠子，莫遣污簪珥。寓目紫翠间，安眠本非睡。梦中化为鹤，飞入长松寺。

新渡寺席上次赵景肌陈履常韵送欧阳叔弼比来诸君唱和叔弼但袖手旁睨而已临别忽出一篇颇有渊明风制坐皆惊叹

神屠不目全，妙颊惟妆半。更刀乃挨庖，倚市必丑悍。平生魏公筹，忽斫郢人堦。诗书亦何用，适道须此馆。多言虽数穷，微中或排难。子诗如清风，寥寥发将旦。胡为久闭匿，绮语真自患。许时笑我痴，隔屋相咏叹。竟识彦道否，绝叫呼百万。清朝固多士，入门子皆冠。莫言清颖水，从此隔河汉。异时我独来，得鱼杨柳贯。持归不忍食，尺素解凄断。中有清圆句，铜丸飞柘弹。春愁结凌渐，正待一笑泮。百篇倘寄我，呻吟郑人缓。

第二卷

诗五十六首

次韵赵景贶春思且怀吴越山水

岁华来无穷，老眼久已静。春风如系马，未动意先骋，西湖忽破碎，鸟落鱼动镜。索城理枯读，放闸起胶艇，愿君营此乐，宦事何时竟。清河西湖三闸，督君成之。思吴信偶然，出处付前定。飘然不系舟，乘此无尽兴。醉翁行乐处，草木皆可敬。明朝游北渚，急扫黄叶径。白酒真到齐，红裙已放郑。酒尚有香泉一壶，为乐全先生服，不作乐也。

次韵陈履常张公龙潭

经明宣城宰，家此百尺澜。郑翁不量力，敢以非意干。玄黄杂两战，绛青表双蟠。事见龙公碑。烈气毙强敌，仁心恻饥寒。精诚祷必赴，苟简求亦难。萧条麦 枯，浩荡日月宽。念子无吏责，十日勤征鞍。春蔬得雨雪，少助先生槃。龙不惮往来，而我独宴安。闭阁默自责，神文清夜阑。

竹间享小酌怀欧阳叔 弼季默呈赵景贶陈履常

岁莫自急景，我闲方缓觴。醉余西湖晚，步转北渚长。地坐略少长，意行无涧冈。久知莽麦青，稍喜榆柳黄。盎盎春欲动，激激夜未央。水天鸥鹭静，月雾松桧香。抚景方婉婉，怀人重凄凉。岂无一老兵，坐念两欧阳。我意正麋鹿，君才亦圭璋。此会恐难久，此欢不可忘。

蜡梅一首赠赵景贶

天工点酥作梅花，此有蜡梅禅老家。蜜蜂采花作黄蜡，取蜡为花亦其物。天工变化谁得知，我亦儿嬉作小诗。君不见万松岭上黄千叶，玉蕊檀心两奇绝。醉中不觉度千山，夜闻梅香失醉眠。归来却梦寻花去，梦里花仙觅奇句。此间风物属诗人，我老不饮当付君。君行适吴我适越，笑指西湖作衣钵。

送王辣朝散赴阙

我家衡山公，清而畏人知。臧否不出口，默识如蓍龟。擢子拱把中，云有骥騄姿。胡为三十载，尚作穷苦词。文人不妄语，未效此可疑。娼来清颖上，泪湿中郎诗。怪我一年长，而作十年衰。同时几人在，岂敢怨白髭。愿言指松柏，永与霜雪期。伯父为衡州日，与君相知，有送行诗。

次韵致政张朝奉仍招晚饮

扫白非黄精，轻身岂胡麻。怪君仁而寿，未觉生有涯。曾经丹化米，亲

授枣如瓜。云烝作雾楷，火灭暎雨巴。自此养铅鼎，无穷走河车。至今许玉斧，犹事尊绿华。君曾见水州何仙姑得药饵之。人疑其以此寿也。故有丹化米尊绿华之句。皆女仙事。我本三生人，畴昔一念差。前生或草圣，习气余惊蛇。儒 谢赤松，佛缚惭丹霞。时时一篇出，扰扰四座哗。清诗得可惊，信美词多夸。回车入官府，治具随贫家。萍蘊与豆粥，亦可成咄嗟。

阎立本职责图

正观之德来万邦，浩如沧海吞河江。音容枪犴服奇尼，横绝岭海逾涛泷。珍禽瑰产争牵扛，名王解辔却盖幢。粉本遗墨开明窗，我唱而作心未降，魏征封伦恨不双。

次韵王滁州见寄

斯人何似似春雨，歌舞农夫怨行路。君看永叔与元之，坎轲一生遭口语。两翁当年鬓未丝，玉堂挥翰手如飞。教得滁人解吟咏，至今里巷嘲轻肥。君家联翩尽卿相，独来坐献溪山上。笑捐浮利一鸡肋，多取清名几熊掌。丈夫自重贵难售，两翁今与青山久。后来太守更风流，要伴前人作诗瘦。我倦承明苦求出，到处遗踪寻六一。凭君试与问琅那，许我来游莫难色。

赵景旻以诗求东斋榜铭昨日闻都下寄 酒来戏和其韵求分一壶作润笔也

王孙天骐驎，眸子奥而澈。囊空学愈富，屋陋人更杰。我老书益放，笔落座争掣。欲求东斋铭，要饮西湖雪。长瓶分未到，小砚干欲裂。不似淳于髡，一石要烛灭。

洞庭春色 并引

安定郡王。以黄柑酿酒，谓之洞庭春色，色香味三绝，以饷其犹子德麟。德麟以饮予，为作此诗。醉后信笔，颇有沓拖风气。

二年洞庭秋，香雾长暎手。今年洞庭春，玉色疑非酒。贤王文字饮，醉笔蛟蛇走。既醉念君醒，远饷为我寿。瓶开香浮座，盏凸光照牖。方倾安仁醪，潘岳空赋云，披黄苞以授柑，倾绿瓷以酌醪。莫遣公远颯。明皇食柑凡千余枚，皆阙一瓣。问进柑使者，云中涂尝有道士颯之。盖罗公远也。要当立名字，未用问升斗。应呼钓诗钩，亦号扫愁帚。君知蒲荡恶，正是嫫姆黝。须君湘海杯，浇我谈天口。

送路都曹 并引

乖崖公在蜀，有录曹参军老病废事，公责之曰：胡不归？明日参军求去，且以诗留别。其略曰：秋光都似宦情薄，山色不如归意浓。公惊谢之，曰：吾过矣，同僚有诗人，而吾不知。因留而慰荐之。予幼时闻父老言，恨不问其姓名。今都曹路君以小疾求致仕，予诵此语。留之，

不可，乃采前人意作诗送之，并送赵德麟陈履常各赋一篇。

积雪困桃李，春心谁为容。淮光酿山色，先作归意浓。我亦倦游者，君恩系疏慵。欲留耿介士，伴我衰迟踪。吏课升斗积，崎岖等铅春。那将露电身，坐待收千钟。结发空百战，市人看先封。谁能搔白首，抱关望夕烽。子意亮已成，我言宁复从。恨无乖崖老，一洗芥蒂胸。我田荆溪上，伏腊亦粗供。怀哉江南路，会作林下逢。

次韵陈履常雪中

可怜扰扰雪中人，饥饱终同寓一尘。老桧作花真强项，冻鸢储肉巧谋身。忍寒吟咏君堪笑，得煖欢呼我未贫。坐听展声知有路，拥裘来看玉梅春。

二鲜子君以诗文见寄作诗为谢

我怀元祐初，珪璋满清班。维时南隆老，奉使独未还。迂叟向我言，青齐岁方艰。斯人乃德星，遣出虚危间。司马温公谓轼曰子骏福星也。京东人困甚。且今往彼。召用既晚矣，天命良复悭。一朝失老骥，寂寞空帝闲。至今清夜梦，枕衾有余潜。喜闻二三子，结发师闵颜。高论已河汉，清诗鸣佩环。遥知三日雪，积玉埋崧山。谁念此幽桂，坐蒙棒与菅。故人在颖尾，投诗清冷湾。

次韵赵德麟雪中惜梅且饷柑酒三首

干花未分出梅余，遣雪摧残计已疏。卧闻点滴如秋雨，知是东风为扫除。阆苑千葩映玉宸，人间只有此花新。飞霰要欲先桃李，散作千林火迫春。蹀 娇黄不受鞿，东风暗与色香归。偶逢白堕争春手，遣入王孙玉笋飞。

和陈传道雪中观灯

新年乐事叹何曾，闭阁烧香一病僧。未忍便倾浇别酒，且来同看照愁灯。颖鱼跃处新亭近，湖雪消时画舫升。只恐模前无此客，清诗还有土龙能。

阅世亭诗赠任仲微

任公镇西南，尝赠绕朝策。当时若尽用，善阵无赫赫。凄凉十年后，邪正久已白。却留封德彝，天意眇难测。象贤真骥种，号诉甘百谪。岂云报私仇，祸福指络脉。高才食旧德，但恐里门窄。伤心千骑归，赠印黄壤隔。惟有亭前桧，阅世不改色。千年与并在，记此王粲宅。

新渡寺送任仲微

春阴欲落雪，野气方升云。我游清颖尾，想见翠被君。古来聚散地，与子复言分。倦游安税驾，瘦田失归耘。独宿古寺中，荒鸡乱鸣群。送子以晓角，幽幽醒时间。

送运判朱朝奉入蜀

蔼蔼青城云，娟娟峨眉月。随我西北来，照我光不灭。我在尘土中，白云呼我归。我游江湖上，明月湿我衣。岷峨天一方，云月在我侧。谓是山中人，相望了不隔。梦寻西南路，默数长短亭。似闻嘉陵江，跳波吹枕屏。送君无一物，清江饮君马。路穿慈竹林，父老拜马下。不用惊走藏，使者我友生。听讼如家人，细说为汝评。若逢山中友，问我归何日。为话腰脚轻，犹堪踏泉石。

病中夜读朱博士诗

病眼乱灯火，细书数尘沙。君诗如秋露，净我空中花。古语多妙寄，可识不可夸。巧笑在頰颊，哀音余掺挝。曾坑一掬春，紫饼供千家。悬知贵公子，醉眼无真茶。崎岖烂石上，得此一寸芽。緘封勿浪出，汤老客未嘉。

赵德麟饯饮湖上舟中对月

老守惜春意，主人留客情。官余闲日月，湖上好清明。新火发茶乳，温风散粥场。酒阑红杏暗，日落大堤平。清夜除灯坐，孤舟擘岸撑。逮君帙未堕，对此月犹横。

赠朱逊之 并引

元祐六年九月，与朱逊之会议于颖。或言洛人善接花，岁出新枝，而菊品尤多。逊之曰：菊当以黄为正，余可鄙也。昔叔向闻鬻蔑一言，知其为人，予于逊之亦云。

黄花候秋节，远自夏小正。坤裳有正色，鞠衣亦令名。一从人伪胜，遂与天力争。易性寓非族，改颜随所令。新奇既易售，粹驳宜相倾。疾恶逢伯厚，识真似渊明。君言我所印，世论谁改评。愿君为霜风，一扫紫与頰。

和赵德麟送陈传道

二陈既妙士，两欧惟德人。王孙乃龙种，世有策云鳞。五君从我游，倾泻出怪珍。俗物败人意，兹游实清醇。那知有聚散，佳梦失欠伸。我舟下清淮，沙水吹玉尘。君行踏晓月，疏木挂寸银。尚寄别后诗，剪刻淮南春。

上巳日与二子迨过游涂山荆山记所见

此生终安归，还軫天下半。謁来乘櫂庙，复作微禹叹。昔自南河赴杭州，过此。盖二十二年矣。从祠及彼狐，有启庙。像设偶此粲。谓涂山氏。秦祖当侑坐，谓怕翳。夏郊亦荐裸。有鲛庙。可怜淮海人，尚记弧矢旦。淮南人相传禹以六月六日生，是日数万人会山上。虽传记不载。然相传。如此。荆山碧相照，楚水清可乱。别人有余坑，美石肖温瓚。荆山下有卞氏采玉坑。

石色如玉，不受镌刻。取出山下，辄变色不复温莹。龟泉木抄出，牛乳石池漫。龟泉在荆山下，色白而甘，真陆羽所谓石池漫流者。有石记云。唐正元中，随白龟流出。小儿强好古，侍史笑流汗。归时蝙蝠飞，炬火记远岸。

淮上早发

澹月倾云晓角哀，小风吹水碧鳞开。此生定向江湖老，默数淮中十往来。

次韵徐仲车 仲车耳聋

恶衣恶食诗愈好，恰似霜松啜春鸟。苍蝇莫乱远鸡声，世上谁如公觉早。八年看我走三州，元丰八年，予赴登州，元祐四年赴杭州，今赴扬州，皆见仲车。月自当空水自流。人间扰扰真蝼蚁，应笑人呼作斗牛。

次韵林子中春日新堤书事见寄

东都寄食似孤云，幙被真成一宿宾。收得玉堂挥翰手，却为淮月弄舟人。羨君湖上斋摇碧，笑我花时甑有尘。为报年来杀风景，连江梦雨不知春。来诗有芍药春之句。扬州近岁率为此会。用花十余万枝。吏缘为奸，民极病之，故罢此会。

送陈伯修察院赴阙

裕陵固天纵，笔有云汉姿。尝重连山象，不数秋风辞。龙腾与虎变，狸豹复何施。我穷真有数，文字乃见知。闻君射策日，妙语发畴咨。一日喧万口，惊倒同舍儿。岂知二十年，道路犹迟迟。苦言如药石，瞑眩终见思。屈信反覆手，独于君可疑。四门方穆穆，行矣及此时。

送张嘉父长官

都城昔倾盖，骏马初服鞵。再见江湖间，秋鹰已难。于今三会合，每进不少留。豫章既可识，瑚璉谁当收。微官有民社，妙割无鸡牛。归来我益敬，器博用自周。百年子初筵，我已迫旅酬。但当记若语，高节贯白头。

轼在颍州与赵德麟同治西湖未成改扬州 三月十六日湖成德麟有诗见怀次韵

太山秋毫两无穷，巨细本出相形中。大千起灭一尘里，未觉杭颖谁雌雄。来诗云与杭争雄。我在钱塘拓湖渌，大堤士女争昌丰。六桥横绝天汉上，北山始与南屏通。忽惊二十五万丈，老葑席卷苍云空。竭来颖尾弄秋色，一水萦带昭灵宫。坐思吴越不可到，借君月斧修朧胧。二十四桥亦何有，换此十顷玻璃风。雷塘水干禾黍满，宝钗耕出余鸾龙。明年诗客来吊古，伴我霜夜号秋虫。德麟见约来扬寄居，亦有意求杨悴。

次韵赵德麟西湖新成见怀绝句

壶中春色谓洞庭春色也。饮中仙，骑鹤东来独惘然。犹有赵陈同李郭，不妨同泛过湖船。

再次韵赵德麟新开西湖

使君不用山麴穷，饥民自逃泥水中。欲将百读起凶岁，免使甑石愁杨雄。西湖虽小亦西子，萦流作态清而丰。千夫余力起三闸，焦陂下与长淮通。十年憔悴尘土窟，清澜一洗啼痕空。王孙本自有仙骨，平生宿卫明光宫。一行作吏人不识，正似云月初朦胧。时临此水照水雪，莫遣白发生秋风。定须却致两黄鹄，新与上帝开濯龙。湖成君归侍帝侧，灯花已缀钗头虫。予以颖人苦饥。奏乞留黄河夫万人。修境内沟洫。诏许之，因以余力浚治此湖。

到官病倦未尝会客毛正仲惠茶 乃以端午小集石塔戏作一诗为谢

我生亦何须，一饱万想灭。胡为设方丈，养此肤寸舌。尔来又衰病，过午食辄噎。缪为淮海帅，每愧厨传缺。囊无欲清人，奉使免内热。空烦赤泥印，远致紫玉玦。为君伐羔豚，歌舞菰黍节。禅窗丽午景，蜀井出冰雪。坐客皆可人，鼎器手自絮。金钗候汤眼，鱼蟹亦应诀。遂令色香味，一日备三绝。报君不虚授，知我非轻啜。

双石并引

至扬州，获二石，其一绿色，冈峦迤邐，有穴达于背；其一玉白可鉴。渍以盆水，置几案间，忽忆在颍州日，梦人请住一官府，榜曰仇池。觉而诵杜子美诗曰：万古仇池穴，潜通小有天。乃戏作小诗为僚友一笑。梦时良是觉时非，汲水埋盆故自痴。但见玉峰横太白，便从鸟道绝峨眉。秋风与作烟云意，晓日令涵草木安。一点空明是何处，老人真欲住仇池。

次韵和晁无咎学士相迎

少年独识晁新城，闭门却扫卷筛旌。胸中自有谈天口，坐却秦军发墨守。有子不为谋置锥，虹霓吞吐忘寒饥。端如太史牛马走，严徐不敢连尻脰。裴回未用疑相待，枉尺知君有家戒。避人聊复去瀛洲，伴我真能老淮海。梦中仇池千仞巖，便欲揽我青霞幘。且须还家与妇计，我本归路连西南。老人饮酒无人佐，独看红药倾白堕。每到平山忆醉翁，悬知他日君思我。路旁小儿笑相逢，齐歌万事转头空。赖有风流贤别驾，犹堪十里卷春风。

次韵范淳父送秦少章

宿缘在江海，世网如予何。西来庾公尘，已濯长淮波。十年淮海人，初见一麦禾。但欣争讼少，未觉舟车多。秦郎忽过我，赋诗如卷阿。句法本黄

子，谓鲁直也。二豪与揩磨。其兄少游与张文潜。嗟我久离群，逝将老西河。后生多名士，欲荐空悲歌。小范真可人，独肯勤收罗。瘦马识馱耳，枯桐得云和。近闻馆李生，李荐方叔。病鹤借一柯。赠行苦说我，妙语慰蹉跎。西羌已解仇，烽火连朝那。坐筹付公等，吾将寄潜沓。

灵隐前一首赠唐林夫

灵隐前，天竺后，两涧眷淙一灵鹫。不知水从何处来，跳波赴壑如奔雷。无情有意两莫测，肯向冷泉亭下相萦回。我在钱塘六百日，山中暂来不暖席。今君欲作灵隐居，葛衣草屣随僧蔬。能与冷泉作主一百日，不用二十四考书中书。

滕达道挽词二首

先帝知公早，虚怀第一人。至今诗礼将，惟数武宣臣。材大虽难用，时来亦少信。高平风烈在，威敏典刑新。公少受知于范希文。孙元规。空试乘边荣，宁留相汉身。凄凉旧部曲，泪湿塚前麟。

云梦连江雨，樊山落木秋。公方占贾鹏，我正买龚牛。共有江湖乐，俱怀畎亩忧。荆溪欲归老，浮玉偶同游。肮脏仪刑在，惊呼岁月道。回头杂歌哭，挽语不成讴。

次韵苏伯固游蜀冈送李孝博奉使岭表

新苗未没鹤，老叶方翳蝉。绿渠浸麻水，白板烧松烟。笑窥有红颊，醉卧皆华颠。家家机杼鸣，树树梨枣悬。野无佩犊子，府有骑鹤仙。观风峤南使，出相山东贤。渡江吊很石，过岭酌贪泉。与君步徙倚，望彼修连娟。愿及南枝谢，早随北雁翩。归来春酒熟，共看山樱然。

送晁美叔

我年二十无朋俦，当时四海一子由。君来扣门如有求，欣然病鹤清而修。醉翁遣我从子游，翁如退之蹈轲丘。尚欲放子出一头，嘉祐初，轼与子由寓兴国浴室。美叔忽见访云。吾从欧阳公游久矣，公令我来与子定交，谓子必名世。老夫亦须放他出一头地。酒醒梦断四十秋。病鹤不病骨愈蚪，惟有我颜老可羞。醉翁宾客散九州，几人白发还相收。我如怀祖拙自谋，正作尚书已过优。君求会稽实良筹，往看万壑争交流。君近乞越州。

王文玉挽词

才名谁似广文寒，月斧云斤琢肺肝。玄晏一生都卧病，子云三世不迁官。幽兰空觉香风在，宿草何曾泪叶干。犹喜诸郎有曹志，文章还复富波澜。

送芝上人游庐山

二年阅三州，我老不自惜。团团如磨牛，步步踏陈迹。岂知世外人，长与鱼鸟逸。老芝如云月，炯炯时一出。比年三见之，常若有所适。逝将走庐阜，计阔道愈密。吾生如寄耳，出处谁能必。江南千万峰，何处访子室。

送程德林赴真州

君为县令元丰中，吏贪功利以病农。君欲言之路无从，移书谏臣以自通。谏臣蹇受之也。元丰天子为改容，我时匹马江西东。问之逆旅言颇同，老人爱君如刘宠。小儿敬君如鲁恭，尔来明目达四聪。收拾骏马冀北空，君为赤令有古风。政声直入明光宫，天厩如海养群龙。并收其子岂不公，君之子祁举制策。文学行义，为时所称。白沙何必烦此翁。

谷林堂诗

深谷下窈窕，高林合扶疏。美哉新堂成，及此秋风初。我来适过雨，物至如娱予。稗竹真可人，霜节已专车。老槐苦无赖，风花欲填渠。山鸦争呼号，溪蝉独清虚。寄怀劳生外，得句幽梦余。古今正自同，岁月何必书。

予少年颇知种松手植数万株皆中梁柱矣 都梁山中见杜舆秀才求学其法戏赠二首

露宿泥行草棘中，十年春雨养髯龙。如今尺五城南杜，欲问东坡学种松。君方扫雪收松子，我已开棒得茯苓。为问何如插杨柳，明年飞絮作浮萍。

行宿泗间见徐州张天骥次旧韵

二年二蹶过淮舟，款假还逢马少游。无事不妨长好饮，著书自要且穷愁。孤松早偃元非病，倦鸟虽还岂是休。更欲河边几来往，祇今霜雪已蒙头。

次韵刘景文赠傅曦秀才

窃眇文章宜和寡，峥嵘肝肺亦交难。未能飞瓦弹清角，肯便投泥戏泼寒。忽见秋风吹洛水，遥知霜叶满长安。诗成送与刘夫子，莫遣孙郎帐下看。

在彭城日与定国为九日黄楼之会今复
以是日相遇于宋凡十五年忧乐出处有
不可胜言者而定国学道有得百念灰冷
而颜益壮顾予衰病心形俱瘁感之作诗

菊盖萸囊自古传，长房宁复是臞仙。应从宋武横刀日，数到刘公戏马年。对玉山人虽老矣，见恒河性故依然。王郎九日诗十首，今赋黄楼第二篇。

九日次定国韵

朝菌无晦朔，蟪蛄疑春秋。南柯已一世，我眠未转头，仙人视吾曹，何异蜂蚁稠。不知蛮触氏，自有两国忧。我观去来今，未始一念留。奔驰竟何得，而起无穷羞。王郎误涉世，屡献久不酬。黄金散行乐，清诗出穷愁。俯仰四十年，始知此生浮。轩裳陈道路，往往儿童收。封侯起大第，或是君家驹。似闻负贩人，中有第一流。炯然径寸珠，藏此百结裘。意行无车马，倏忽略九州。邂逅独见之，天与非人谋。笑我方醉梦，衣冠戏沐猴。力尽病骐驎，伎穷老伶优。北山有云根，寸田自可耰。会当无何乡，同作逍遥游。归来城郭是，空有累累丘。

召还至都门先寄子由

老身倦马河堤永，踏尽黄榆绿槐影。荒鸡号月未三更，客梦还家得俄顷。归老江湖无岁月，未填沟壑犹朝请。黄门殿中奏事罢，诏许来迎先出省。已飞青盖在河梁，定饷黄封兼赐茗。远来无物可相赠，一味丰年说淮颖。

次韵定国见寄

还朝如梦中，双阙眩金碧。复穿鹓鹭行，强寄麋鹿迹。劳生苦昼短，展转不能夕。默坐数更鼓，流水夜自逆。故人为我谋，此志何由毕。越吟知听否，谁念病庄舄。时方请越。

次韵蒋颖叔钱穆父从驾景灵宫二首

归来病鹤记城闉，旧踏松枝雨露新。半白不羞垂领发，软红犹恋属车尘。雨收九陌丰登后，日而三元下降辰。粗识君王为民意，不才何以助精神。前辈戏语，有西湖风月，不如东华软红香土。

与君并直记初元，白首还同入禁门。玉殿齐班容小语，霜庭稽首泫微温。适与穆父并拜廷中，地皆流湿，相与小语道之。病贪赐茗浮铜叶。老怯香泉滌宝樽，回首鹓行有人杰，坐知羌虏是游魂。

第三卷

诗六十六首

轼近以月石砚屏献子功中书公复以涵星
砚献纯父侍讲子功有诗纯父未也复以月
石风林屏赠之谨和子功诗并求纯父数句

紫潭出玄云，翳我潭中星。独有潭上月，倒挂紫翠屏。我老不看书，默坐养此昏花睛。时时一开眼，见此云月眼自明。久知世界一泡影，大小真伪何足评，笑彼三子欧苏梅，无事自作雪羽争。事见三人诗集。故将屏砚送两范，要使珠璧栖鹵根。大范忽长谣，语出月胁令人惊。皇甫湜云，穿天心。出月胁，意外惊人，语非寻常。小范当继之，说破星心如鸡鸣。孟郊闻鸡诗云：似闻孤月口，能说落星心。床头复一月，下有风林横。急送小范家，护此涵星泓。愿从少陵博一句，山木尽与洪涛倾。

次韵范纯父涵星砚月石风林屏诗

月次于房历三星，斗牛不神箕独灵。簸摇桑榆尽西靡，影落苏子砚与屏。天工与我两厌事，孰居无事为此形。与君持橐侍帷幄，同到温室观尧冥。自怜太史牛马走，技等卜祝均倡伶。欲留衣冠挂神武，便击云水归南溟。陶泓不称管城沐，醉石可助平泉醒。故持二物与夫子，欲使妙质留天庭。但令滋液到枯槁，勿遣光景生晦冥。上书挂名岂待我，独立自可当雷霆。我时醉眠风林下，夜与渔火同青荧。抚物怀人应独叹，作诗寄子谁当听。

次韵钱穆父会饮

弹冠恨不早，桂冠常苦迟。盛服每假寐，角阙时伏思。东门未祖道，西山空拄颐。逝将江海去，安此糜鹿姿。要当谋三径，何暇择一枝。与君几合散，得酒忘淳漓。君谈似落屑，我饮如奕棋。世有作诗如奕棋，奕棋如饮酒，饮酒乃天戒之语。仆此二事皆不能。居官不任事，造物真见私。主人独贤劳，金谷方流驰。行人亦结束，杖杜乃归期。公卿虽少安，河流正东酺。我得会稽去，方回良不痴。

次韵穆父尚书侍祠郊丘 瞻望天光退而相庆引满醉吟

千章杞梓荫云天，樗散谁收老郑虔。喜气到君浮白里，丰年及我挂冠前。令严钟鼓三更月，野宿貔貅万灶烟。太息何人知帝力，归来金帛看赭肩。

郊祀庆成诗

帝出乘昌运，天心予太平。文章三代继，制作七年成。大祀乾坤合，刚辰日月明。泰坛朝扫地，魄宝夜垂精。仰御圆苍盖，环观海岳城。北流吞朔

易，西极落搀抢。升燎灵光答，回銮瑞雾迎。需云遍枯槁，解雨达勾萌。可颂非天德，因箴亦下情。民言知有酌，帝谓本无声。富国由崇俭，新年在好生。无心斯格物，克己自消兵。化国安新政，孤臣反旧耕。还将清庙什，留与野人赓。

次韵奉和钱穆父蒋颖叔王仲至诗四首

见和西湖月下听琴

谡谡松下风，蔼蔼垆上云。聊将窃比我，不堪持寄君。半生寓轩冕，一笑当琴尊。良辰饮文字，晤语无由醺。我有凤鸣枝，背作蛇蚺纹。月明委静照，心清得奇闻。当呼玉润乎，一洗羯鼓昏。请歌南风曲，犹作虞书浑。家有雷琴甚奇古。玉润道人雀闲妙于雅声，当呼使弹。

见和仇池

上穷非想亦非非，下与风轮共一痴。翠羽若知牛有角，空瓶何必井之眉。还朝暂接鹓鸾翼，谢病行收麋鹿姿。记取和诗三益友，他年弭节过仇池。

玉津园

承平苑囿杂耕桑，六圣勤民计虑长。碧水东流还旧渚，玉津分药河上流，复合于下。紫坛南峙表连冈。不逢迟日莺花乱，空想疏林雪月光。千亩何时躬帝籍，斜阳寂历锁云庄。

藉田

窃脂方纪瑞，布谷未催耕。鱼沫依蘋渚，蜗涎上彩楹。江湖来梦寐，蓑笠负平生。琴里思归曲，因君一再行。

顷年杨康功使高丽还奏乞立海神庙板桥
仆嫌其地湫隘移书使迁之文登因古庙而
新之杨竟不从不知定国何从见此书作诗
称道不已仆不复记其云何也次韵答之

退之仙人也，游戏于斯文。谈笑出伟奇，鼓舞南海神。顷年三韩使，几为蛟鳄吞。归来筑祠宇，要使百贾奔。板桥商贾所聚。我欲迁其庙，下数浮空群。谓登州海市。移书竟不从，信非磊落人。公胡为拳拳，系此空中云。作诗颂其美，何异刻剑痕。我今已括囊，象在六四坤。

沐浴启圣僧舍与赵德麟邂逅

南山北涧两非真，东颖西湖迹已陈。季子来归初可喜，老聃新沐定非人。酒清不醉休休暖，睡稳如掸息息匀。自笑尘劳余一念，明年同泛越溪春。

次韵王仲至喜雪御筵

三军喜气铄飞花，睡起空惊月在沙。未集骅骝金腰袅，故残 鹊玉横斜。
偶还仗内身如寄，尚忆江南酒可赊。宣劝不多心自醉，强扶衰白拜君嘉。

仆所藏仇池石希代之宝也王晋卿以小诗 借观意在于夺仆不敢不借然以此诗先之

海石来珠宫，秀色如蛾绿。坡陀尺寸间，宛转陵峦足。连娟二华顶，空洞三茅腹。初疑仇池化，又恐瀛洲蹙。殷勤峽南使，饷饷淮东牧。仆在扬州，程德孺自岭南解官，以此石见遗。得之喜无寐，与汝交不渎。盛以高丽盆，藉以文登王。仆以高丽所铸大铜盆贮之。又以登州海石如碎玉者附其足。幽光先五夜，冷气压三伏。老人生如寄，衡茅久未卜。一夫幸可致，千里还相逐。风流贵公子，窜谪武当谷。见山应已厌，何事夺所欲。欲留嗟赵弱，宁许负秦曲。传观慎勿许，间道归更速。

次天字韵答岑岩起

一声清跸雾开天，百辟心庄岂貌虔。回顾惊君珠玉侧，同升愧我秕糠前。
裴回月色留坛影，缥缈松香泛蜡烟。近制以林烛松明易林盆。莫叹郎潜生白发，圣朝求旧鄙鸢肩。

石塔寺 并引

世传王播饭后钟诗，盖扬州石塔寺事也。相传如此，戏作此诗。

饥眼眩东西，诗肠忘蚤晏。虽知灯是火，不悟钟非饭。山僧异漂母，但可供一管。胡为三百年，记忆作此讪。斋厨养若人，无益祇遗患。乃知饭后钟，闍梨盖具眼。

次韵蒋颖叔二首

扈从景灵宫

道人幽梦晓初还，已觉笙箫下月坛。风伯前驱清宿雾，祝融骖乘破朝寒。
英姿连壁从多士，妙句锵金和八銮。已向词臣得颇牧，时颖叔集除熙何帅。
路人莫作者儒看。

凝祥池

似知金马客，时梦碧难坊。冰雪消残腊，烟波写故乡。鸣銮自容与，立
马久回翔。乞与三韩使，新图到乐浪。时高丽使在都下。每至胜境，辄图画
以归。

和叔盎画马次韵

天骥德力备，马外龙麟中。皇天不遣言，兀与图画同。駉骀饱官粟，未受一洗空。十驾均一至，何事策云风。

王晋卿示诗欲夺海石钱穆父王仲至蒋颖叔皆次韵穆至二公以为不可许独颖叔不然今日颖叔见访亲睹此石之妙遂悔前语轼以谓晋卿岂可终闭不予者若能以韩干二散马易之者盖可许也复次前韵

相如有家山，缥眇在眉绿。谁云千里远，寄此一龔足。平生锦绣肠，蚤岁藜苳腹。从教四壁空，未遣两峰蹙。吾今况衰病，义不忘樵牧。逝将仇池石，归泝岷山读。守子不贪宝，完我无瑕玉。故人诗相戒，妙语予所伏。一篇独异论，三占从两卜。君家画可数，天骥纷相逐。风鬣掠原野，电尾梢涧谷。君如许相易，是亦我所欲。今朝安西守，来听阳关曲。劝我留此峰，他日来不速。

轼欲以石易画晋卿难之穆父欲兼取二物颖叔欲焚画碎石乃复次前韵并解三诗之意

春冰无真坚，露叶失故绿。疑鹏万里，蚘笑夔一足。二豪争攘袂，先生一捧腹。明镜既无台，净瓶何用蹙。古蹴蹙通。盆山不可隐，画马无由牧。聊将置庭宇，何必弃沟渎。焚宝真爱宝，碎玉未忘玉。久知公子贤，出语耆年伏。欲观博物妙，故以求马卜。维摩既复舍，天女还相逐。授之无尽灯，照此久幽谷。定心无一物，法乐胜五欲。三峨吾乡井，万里君部曲。卧云行归休，破贼见神速。晋卿将种。常有此志。

生日蒙刘景文以古画松鹤为寿且贶嘉篇次韵为谢

问予一室间，宁有千里廓。尘心洗长松，远意发孤鹤。生朝得此寿，死籍疑可落。微言在参同，妙契藏九籥。故人有奇趣，逸想寄幽壑。霜枝谢寒暑，云翮无前却。何须构明堂，未羨巢阿阁。缅怀别时语，复作数日恶。诗腴固堪食，字瘦还可愕。高标忽在眼，清梦了如昨。君今啥等伍，志与湛辈各。岂待相顾言，方为不朽托。子云老执戟，长孺终主爵。吾当追乔松，子亦鄙卫霍。

程德孺惠海中柏石兼辱佳篇辄复和谢

岚薰瘴染却肤腴，笑饮贪泉独继吴。未欲连车收薏苡，肯教沉网取珊瑚。不知庾岭三年别，收得曹溪一滴无。但指庭前双柏石，要予临老识方壶。

次秦少游韵赠姚安世

帝城如海欲寻难，肯舍渔舟到杏坛。剥啄扣君容膝户，巍峨笑我切云冠。
问羊独怪初平在，牧豕应同德曜看。肯把参同较同异，小窗相对为研丹。

次丹元姚先生韵

浮生知几何，仅熟一釜羹。那干俯仰间，用此委曲情。自怜无他肠，偶亦得此生。悬知当去客，中有不亡存。但恐宿缘重，每为习气昏。似闻梅子真，近在吴市门。未能肩柑洪，但欲目击温。不敢扣门呼，恐作逾垣奔。且令介绍先，徐以方便论。不学刘更生，黄金铸尚方。不学房次律，身事问颖阳。王烈亦何人，叔夜未可量。独见神山开，遽餐石髓香。至道尚听莹，粗材终蹶张。先生喜而笑，幅巾登我堂。苦誓指黄壤，要言刻青琅。蓬莱在何许，弱水空相望。且当从嵇阮，聊复数山王。达人友四海，曲士守一疆。慎勿使形谍，儿童惊夜光。

次韵秦少游王仲至元日立春三首

省事天公厌两回，新年春日并相催。殷勤更下山阴雪，要与梅花作伴来。
已卯嘉辰寿阿同，愿渠无过亦无功。明年春日江湖上，回首觚棱一梦中。
子由亦字同叔。元日己卯。渠本命也。

词锋虽作楚骚寒，德意还同汉诏宽。好遣秦郎供帖子，尽驱春色入毫端。
立春日翰林学士供诗帖子。

上元侍饮楼上三首呈同列

淡月疏星绕建章，仙风吹下御炉香。侍臣鹄立通明观，一朵红云捧王皇。
薄雪初消野未耕，卖薪买酒看升平。吾君勤俭倡优拙，自是丰年有笑声。
老病行穿万马群，九衢人散月纷纷。归来一点残灯在，犹有传柑遗细君。
侍饮楼上。则贵戚争以黄柑遗近臣。谓之传柑。盖尚矣。

送蒋颖叔帅熙河诗 并引

颖叔出使临洮，轼与穆父仲至同饯之，各赋诗一篇，以今我来思为韵，致遄归之意，轼得我字。

西方犹宿师，论将不及我。苟无深入计，缓带我亦可。承明正须君，文字粲藻火。自荐虽云数，留行终不果。正坐喜论兵，临老付边琐。新诗出谈笑，僚友困掀簸。我欲歌杖杜，杨柳方婀娜。边风事首虏，所得盖么麽。愿为鲁连书，一射聊城笥。阴功在不杀，结草酬魏颗。

再送二首

使君九万击鹏鲲，肯为阳关一断魂。不用宽心九千里，安西都护国西门。
余刃西屠横海鲲，应予诗讖是游魂。归来趁别陶洪景，看挂衣冠神虎门。

次韵颖叔观灯

安西老守是禅僧，到处应然无尽灯。永夜出游从万骑，诸羌入看拥千层。
便因行乐令投甲，不用防秋更打冰。旅旅归来还侍燕，十分宣劝恐难胜。

次韵王晋卿奉诏押高丽燕射

北苑传呼陞楯郎，东夷初识令君香。天山自可三箭取，海国何劳一苇航。
宣劝不词金碗侧，醉归争看玉鞭长。锦囊诗草勤收拾，莫遣鸡林得夜光。

次韵钱穆父王仲至同赏田曹梅花

寒厅不知春，独立耿玉雪。闭门愁永夜，置酒及明发。忽惊庭户晓，未
受烟雨没。浮光风宛转，照影水方折。鬓霜未易扫，眉斧真自伐。惟当此花
前，醉卧黄昏月。

送襄阳从事李友谅归钱塘

居杭积五岁，自意本杭人。故山归无家，欲卜西湖邻。良田不难买，静
士谁当亲。髯张既超然，老潜亦绝伦。李子冰玉姿，文行两清淳。归从三人
游，便足了此身。公堤不改昨，姥岭行开新。幽梦随子去，松花落衣巾。

次韵吴传正枯木歌

天公水墨自奇绝，瘦竹枯松写残月。梦回疏影在东窗，惊怪霜枝连夜发。
生成变坏一弹指，乃知造物初无物。古来画师非俗士，妙想实与诗同出。龙
眠居士本诗人，能使龙池飞霹雳。君虽不作丹青手，诗眼亦自工识拔。龙眠
胸中有千驷，不独画肉兼画骨。但当与作少陵诗，或自与君拈秃笔。东南山
水相招呼，万象入我摩尼珠。尽将书画散朋友，独与长侠归来乎。

送黄师是赴两浙宪

世久无此士，我晚得王孙。宁非叔度家，岂出次公门。白首沈下吏，绿
衣有公言。哀哉吴越人，久为江湖吞。官自倒帑廩，饱不及黎元。近闻海上
港，渐出水底村。愿君五袴手，招此半菽魂。一见刺史天，稍忘狱吏尊。会
稽入吾手，镜湖小于盆。比我东来时，无复疮痍存。

送范中济经略侍郎分韵赋诗辄得 先字且赠以鱼枕杯四马箠一

梁李久乐祸，自焚岂非天。两鼠斗穴中，一胜亦偶然。谋初要百虑，善
后乃万全。庙堂选世将，范氏真多贤。仁风被宿麦，绿浪摇秦川。号令耸毛
羽，先声落虚弦。我家天一方，去路城西偏。投竿困障日，卖剑行归田。赠
君荆鱼杯，副以蜀马鞭。一醉可以起，毋令祖生先。

书晁说之考牧图后

我昔在田间，但知羊与牛。川平牛背稳，如驾百斜舟。舟行无人岸自移，我卧读书牛不知。前有百尾羊，听我鞭声如鼓鞮。我鞭不妄发，视其后者而鞭之。泽中草木长，草长病牛羊。寻山跨坑谷，腾趯筋骨强。烟蓑雨笠长林下，老去而今空见画。世间马耳射东风，悔不长作多牛翁。

吕与叔学士挽词

言中谋猷行中经，关西人物数清英。欲过叔度留终日，未识鲁山空此生。论议凋零三益友，功名分付二难兄。老来尚有忧时叹，此涕无从何处倾。

丹元子示诗飘飘然有谪仙 风气吴传正继作复次其韵

飞仙亦偶然，脱命瞬息中。惟诗不可拟，如写天日容。梦中哦七言，玉丹已入怀。一语遭虐綽，失身堕蓬菜。蓬菜至今空，护短不养才。上界足官府，谪仙应退休。可怜吴与苏，肮脏雪满头。雪满头，终当却与丹元子，笑指东海乘桴浮。

次王定国韵书丹元子宁极斋

仙人与吾辈，寓迹同一尘。何曾五浆馈，但有争席人。宁极无常居，此斋自随身。人那识鄙鉴，天不留封伦。误落世网中，俗物愁我神。先生忽扣户，夜呼祁孔宾。便欲随子去，著书未绝麟。愿挂神虎冠，往卜饮马邻。王郎濯纨绮，意与陋巷亲。南游苦不蚤，傥及药鲈新。

王仲至侍郎见惠稚栝种之礼曹北 垣下今百余日矣蔚然有生意喜而作诗

翠栝东南美，近生神岳阴。惜哉不可致，霜根络云岑。仙风振高标，香实陨平林。偶随樗栎生，不为樵牧侵。忽惊黄茅岭，稍出青玉针。好事虽力取，王城少知音。岂无换鹅手，但知觅来禽。高怀独夫子，一见捐囊金。得之喜不寐，赠我意殊深。公堂开后阁，凡木愧华簪。栽培一寸根，寄子百年心。常恐樊笼中，摧我鸾鹤衿。谁知积雨后，寒芒晓森森。恨我迫归老，不见汝十寻。苍皮护玉骨，旦莫视古今。何人风雨夜，卧听饥龙吟。

次韵钱穆父马上寄蒋颖叔二首

玉关不用一丸泥，自有长城鸟鼠西。剩与故人寻土物，腊糟红麴寄駝蹄。多买黄封作洗泥，使君来自陇山西。高才得兔人人羨，争欲寻踪觅旧蹄。

表弟程德孺生日

仗下千官散紫庭，时闻小语说苏程。长身自昔传甥舅，寿骨遥知是弟兄。予与君皆寿骨真耳，班列中多指予二人。不问而知其为中表也。曾活万人宁望报，君在楚州。予在杭州。皆遇饥岁。活数万人。祇求五亩却归耕。四朝遗老凋零尽，鹤发他年几个迎。

七年九月自广陵召还复馆于浴室东堂八年六月乞会稽将去汶公乞诗乃复用前韵

乞郡三章字半斜，庙堂传笑眼昏花。上人问我迟留意，待赐头纲八饼茶。尚书学士，得赐头纲龙茶，一斤八饼。今年纲到最迟。梦绕吴山却月廊，白梅卢橘觉犹香。杭州梵天寺有月廓数百间，寺中多白杨梅卢橘。会稽且作须臾意，从此归田荣最良。

东南此去几时归，倦鸟孤云岂有期。断送一生消底物，三年光景六篇诗。

吴子野将出家赠以扇山枕屏

峨峨扇中山，绝壁信天剖。谁施大圆镜，衡霍入户牖。得之老月师，画者一醉叟。常疑若人胸，自有云梦藪。千岩在掌握，用舍弹指久。低昂不自知，恨寄儿女手。短屏虽曲折，高枕谢奔走。出家非今日，法水洗无垢。浮游云释娇，燕坐柳生时。忘怀紫翠间，相与到白首。

东府雨中别子由

庭下梧桐树，三年三见汝。前年适汝阴，见汝鸣秋雨。去年秋雨时，我自广陵归。今年中山去，白首归无期。客去莫叹息，主人亦是客。对床定悠悠，夜雨空萧瑟。起折梧桐枝，赠汝千里行。重来知健否，莫忘此时情。

谢仲适坐上送王敏仲北使

冲风振河朔，飞雾失太行。相逢不相识，下马须眉黄。洗眼忽惊笑，见此玉节郎。喜有贤主人，共此灯烛光。聚散一梦中，人北雁南翔。吾生如寄耳，送老天一方。幸子遇明主，陈经入西厢。归期不可缓，倚相宜在傍。

书丹元子所示李太白真

天人几何同一沓，滴仙非滴乃其游。麾斥八极隘九州，化为两鸟鸣相酬。一鸣一止三千秋，开元有道为少留。靡之不可矧肯求，西望太白横峨岷。眼高四海空无人，大儿汾阳中令君。小儿天台坐忘真，生年不知高将军。手污吾足乃敢瞋，作诗一笑君应闻。

次韵曾仲锡承议食蜜渍生荔支

代北寒蠶捣韭萍，奇苞零落似晨星。逢盐久已成枯腊，得蜜犹应是薄刑。

欲就左慈求拄杖，便随李白跨沧溟。攀条与立新名字，儿女称呼恐不经。俗有十八琅荔支。

大行太皇太后挽词二首

至矣吾三后，功高汉已还。复推元祐冠，盖得永昭全。臣尝于经筵论奏仁宗皇帝谥曰明孝，若明而不仁，则民畏而不爱；仁而不明，则民爱而不畏。今大行太皇太后亦兼此二德，故天下思慕，庶几于仁宗也。有作犹非圣，无私乃是天。侍臣谈要道，家法信家传。宰相以下，尝于经筵论奏祖宗以来家法十余事，书于记注。

却狄安诸夏，先王社稷臣。固应祠百世，何止活千人。定策天知我，忘家帝念亲。万方何以报，得疾为勤民。

再和曾仲锡荔支

柳花着水万浮萍，荔实周天两岁星。柳至易成，飞絮落水中，经宿即为浮萍，荔支至难长，二十四五年乃实。本自玉肌非鸽浴，至今丹壳似猩刑。侍郎赋咏穷三峡，妃子烟尘动四溟。莫遣诗人说功过。且随香草附骚经。

次韵滕大夫三首

雪浪石

太行西来万马屯，势与岱岳争雄尊。飞狐上党天下脊，半掩落日先黄昏。削成山东二百郡，气压代北三家村。千峰右卷矗牙帐，崩崖凿断开土门。揭来城下作飞石，一炮惊落天骄魂。承平百年烽燧冷，此物僵卧枯榆根。画师争摹雪浪势，天工不见雷斧痕。离堆四面绕江水，坐无蜀士谁与论。老翁儿戏作飞雨，把酒坐看珠跳盆。此身自幻孰非梦，故园山水聊心存。

同前

我顷三章乞越州，欲寻万壑看交流。且凭造物开山骨，已见天吴出浪头。石中似有海兽形状。履道凿池虽可致，玉川卷地若为收。洛阳泉石今谁主，莫学痴人李与牛。

沉香石

壁立孤峰倚砚长，共疑沉水得顽苍。欲随楚客纫兰佩，谁信吴儿是木肠。山下曾逢化松石，玉中还有辟邪沓。早知百和俱灰烬，未信人言弱胜强。

石芝诗 并引

予昔梦食石芝，作诗记之，今乃真得石芝于海上，子由和前诗见寄。予顷在京师，有凿井得如小儿手以献者，臂指皆具，肤理若生。予闻之

隐者曰：此肉芝也。与子由烹而食之，追记其事。复次前韵。

上中一掌婴儿新，瓜指良是肌骨匀。见之怖走谁敢食，天赐我尔不及宾。旌阳远游同一许，长史玉斧皆门户。我家韦布三百年，祇有阴功不知数。跪陈八簋加六瑚，化人视之真块苏。肉芝烹熟石芝老，笑唾熊掌噉雕胡。老蚕作茧何时脱，梦想至人空激烈。古来大药不可求，真契当如磁石铁。

鹤 叹

园中有鹤驯可呼，我欲呼之立坐隅。鹤有难色侧睨予，岂欲臆对如鹏乎。我生如寄良畸孤，三尺长胫阁瘦躯。俯啄少许便有余，何至以身为子娱。驱之上堂立斯须，投以饼饵视若无。嘎然长鸣乃下趋，难进易退我不如。

送曾仲锡通判如京师

边城岁莫多风雪，强压春醒与君别。玉帐夜谈霜月苦，铁骑晓出冰河裂。断蓬飞叶卷黄沙，祇有千林鬣松花。应为王孙朝上国，珠幢玉节与排衙。左援公孝右孟博，我居其间啸且诺。仆夫为我催归来，要与北海春水争先回。

和钱穆父送别并求顿递酒次韵

联鑪接武雨长身，鹓鹭行中语笑亲。九子羨君门户壮，八州怜我往来频。仁闻东府开宾阁，便乞西湖洗塞尘。更向青齐觅消息，要知从事是何人。

第四卷

诗七十首

刘丑厮诗

刘生望都民，病羸寄空空。有子曰丑厮，十二行操瓢。墦间得余粒，雪中拾堕樵。饥饱共生死，水火同焚漂。病翁恃一褐，度此积雪宵。哀哉二暴客。掣去如饥鸱。翁既死于寒，客亦易此韶。崎岖走亭长，不惮雪径遥。我仇祝与苑，物色同遮邀。行路为出涕，二客竟就泉。 诉我庭，慷慨惊吾僚。曰此可名寄，追配柳之堯。恨我非柳子，击节为尔谣。官赐二万钱，无家可归娇。为媾他日妇，婉然初垂髻。洗沐作小史，裹头束其腰。笔砚耕学苑，戈矛战天骄。壮大随所好，忠孝福可徼。相国有折胁，封侯或吹箫。人事岂易料，勿轻此焦侥。

题毛女真

雾鬓风鬟木叶衣，山川良是昔人非。祇应闲过商颜老，独自吹箫月下归。

寄榴合刷瓶与子由

老人心事日摧颓，宿火通红手自焙。小甑短瓶良具足，稚儿娇女共燔煨。寄君东阁闲悉栗，知我空堂坐画灰。约束家僮好收拾，故山梨枣待翁来。

次韵子由清汶老龙珠丹

天公不解防痴龙，玉函宝方出龙宫。雷霆下索无处避，逃入先生衣袖中。先生不作金椎袖，玩世徜徉隐屠酒。夜光明月空自投，一鍛何劳纬萧手。黄门寡好心易足，荆棘不生梨枣熟。玄珠白璧两无求，无胫金丹来入腹。区区分别笑乐天，那知空门不是仙。

次韵子由书清汶老所传秦湘二女图

春风消冰失瑶玉，我本无身安有触。羊主得妇如得风，握手一笑未为辱。先生室中无天游，佩环何处鸣风匣。随魔未必皆魔女，但与分灯遣归去。胡为写真传世人，更要维摩一转语。丹元茅茨祇三间，太极老人时往还。点检凡心早除拂，方平神鞭常使物。

紫团参寄王定国

谿谿土门口，突兀太行顶。岂惟团紫云，实自俯倒景。刚风被草木，真气入曹颖。旧闻人衔芝，生此羊肠岭。纤纤虎豹鬣，蹙缩龙蛇瘦。蠢头试小嚼，龟息变方骋。矧予明真子，已造浮玉境。清宵月挂户，半夜珠落井。灰心宁复然，汗喘久已静。东坡犹故目，北药致遗秉。欲持一椹根，往有九转

鼎。为予置齿颊，岂不贤酒茗。

次韵刘焘抚句蜜渍荔支

时新满座闻名字，别久何人记色香。叶似杨梅蒸雾雨，花如卢橘傲风霜。
每怜蓴菜下盐豉，肯与蒲萄压酒浆。回首惊尘卷飞雪，诗情真合与君尝。

立春日小集呈李端叔

白发已十载，青春无一堪。不惊新岁换，聊与故人谈。牛健民声喜，鸦
娇雪意酣。霏微不到地，和暖要宜蚕。岁月斜川似，风流曲水惭。行吟老燕
代，坐睡梦江潭。丞掾颇哀援，歌呼谁怕参。衰怀久灰槁，习气尚馋贪。白
啖本河朔，红消真剑南。辛盘得青韭，腊酒是黄柑。归卧灯残帐，醒闻叶打
庵。须烦李居士，重说后三三。

次韵曾仲锡元日见寄

萧索东风两鬓华，年年幡胜剪宫花。愁闻塞曲吹芦管，喜见春槃得蓼芽。
吾国旧供云泽米，定武斋酒。用苏州米。君家新致雪坑茶。近得曾坑茶。燕
南异事真堪记，三寸黄柑擘永嘉。

子由生日以檀香观音像及新 合印香银篆槃为寿

梅檀婆律海外芬，西山老脐柏所薰。香螺脱麝来相群，能结缥眇风中云。
一灯如萤起微燄，何时度尽繆篆纹。缭绕无穷合复分，绵绵浮空散氤氲。东
坡持是寿卯君，君少与我师皇坟。旁资老聪释迦文，共厄中年点蝇蚊。晚遇
斯须何足云，君方论道承华勋。我亦旗鼓严中军，国恩当报敢不勤。但愿
不为世所醺，尔来白发不可耘。问君何时返乡扮，收拾散亡理放纷。此心实与
香俱煮，闻思大士应已闻。

次韵李端叔送保倅翟 安常赴阙兼寄子由

中山保塞两穷边，卧治雍容已百年。顾我迂愚分竹使，与君谈笑用蒲鞭。
松荒三径思元亮，草合平池忆惠连。白发归心凭说与，古来谁似两疏贤。

中山松醪寄雄守王引进

郁郁苍髯千岁姿，肯来杯酒作儿嬉。流芳不待龟巢叶，唐人以荷叶为酒
杯，谓知若笛酒。扫白聊烦鹤踏枝。醉里便成欹雪舞，醒时与作啸风辞。马
军走送非无意，玉帐人闲合有诗。

次韵李端叔谢送牛馱鸳鸯竹石图

闻君谈西戎，废食忘早晚。王师本不阵，贼垒何足划。守边在得士，此语要而简。知君论将口，似我识画眼。笑指尘壁间，此是老牛馘。平生师卫玠，非意常理遣。诉君定何人，未用市朝显。置之勿复道，世俗固多舛。归去亦何须，单车渡鞞澠。如虫得羽化，已脱安用茧。家书空万轴，凉曝困舒卷。念当扫长物，闭息默自煖。此画聊付君，幽处得小展。新诗勿纵笔，群吠惊邑犬。时来未可知，妙斫待轮扁。

次韵聪上人见寄

前身本同社，宿业独临边。一悟镜空老，始知圆泽贤。归心忘犊佩，生木寄羊鞭。不似欧阳子，空留六一泉。

次韵王雄州还朝留别

老李威名八十年，壁间精悍见遗颜。自闻出守风流似，稍觉承平气象还。但遣诗人歌杖屨，不妨侍女唱阳关。内朝接武知何日，白发羞归供奉班。

三月二十日多叶杏盛开

零露泫月蕊，温风散晴葩。春工了不睡，连夜开此花。芳心谁剪刻，天质自清华。恼客香有无，弄妆影横斜。中山古战国，杀气浮高牙。丛台余袷服，易水雄悲笳。自从此花开，玉肌洗尘沙。坐令游侠窟，化作温柔家。我老念江海，不饮空咨嗟。明年花开时，举酒望三巴。盖欲请梓州而归也。

三月二十日开园三首

雪髯霜鬓语猎猎，澹荡园林取次行。要识将军不凡意，从来祇啜小人羹。是日散父老酒食。

西园牡籥夜沉沉，尚有游人卧柳阴。鹤睡觉时风露下，落花飞絮满衣襟。

郁郁苍髯真道友，丝丝红萼是乡人。苍髯松也。红萼海棠。何时翠竹江村路，送我柴门月色新。

次韵王雄州送侍其泾州

威声又数中兴年，二虜行当一矢联。闻道名城得真将，故应惊羽落空弦。追锋归去雄三卫，授钺重来定十连。别酒回头便陈迹，号呶端合发初筵。

临城道中作 并引

予初赴中山，连日风埃，未尝了了见太行也。今将适岭表，颇以是为恨，过临城内丘，天气忽清彻，西望太行，草木可数，冈峦北走，崖谷秀杰。忽悟叹曰：吾南迁其速返乎，退之衡山之祥也。书以付迈，使志之。

逐客何人着眼看，太行千里送征鞍。未应愚谷能留柳，可独衡山解识韩。

过汤阴市得豌豆大麦粥示三儿子

朔野方赤地，河濡但黄尘。秋霖暗豆漆，夏旱臞麦人。逆旅唱晨粥，行庖得时珍。青班照匕筯，脆响鸣牙龈。玉食谢故吏，风飧便逐臣。漂零竟何适，浩荡寄此身。争劝加饮食，实无负吏民。何当万里客，归及三年新。

子由新修汝州龙兴寺吴画壁

丹青久衰工不蓺，人物尤难到今世。每摹市井作公卿，画手悬知是徒隶。吴生已与不传死，那复典刑留近岁。人间几处变西方，尽作波涛翻海势。细观手面分转侧，妙算毫厘得天契。始知真放本精微，不比狂花生客慧。似闻遗墨留汝海，古壁蜗涎可垂涕。力捐金帛扶栋宇，错落浮云卷新弄。使君坐歎清梦余，几叠衣纹数捻袂。他年吊古知有人，姓名聊记东坡弟。

过高邮寄孙君孚

过淮风气清，一洗尘埃容。水木渐幽茂，苑蒲杂游龙。可怜夜合花，青枝散红茸。美人游不归，一笑当谁供。故园在何处，已偃手种松。我行忽失路，归梦山千重。闻君有负郭，二顷收横从。卷野毕秋获，殷床闻夜舂。乐哉何所忧，社酒粥面醪。宦游岂不好，毋令到千钟。

仆所至未尝出游过长芦闻天禅师病甚不可不一问既见则有间矣明日阻风复留见之作三绝句呈闻复并请转呈参寥子各赋数首

亦知壶子不死，敢问老聃所游。瑟瑟寒松露骨，耿耿病虎垂头。莫言西蜀万里，且到南华一游。扶病江边送客，杖孥浦口回头。老去此生一诀，兴来明日重游。卧闻三老白事，半夜南风打头。

六月七日泊金陵阻风得钟山泉公书寄诗为谢

今日江头天色恶，炮车云起风欲作。独望钟山唤宝公，林间白塔如孤鹤。宝公骨冷唤不闻，却有老泉来唤人。电眸虎齿霹雳舌，为子吹散行峰云。南行万里亦何事，一酌曹溪知水味。他年若画蒋山图，为作泉公唤居士。

赠清凉寺和长老

代北初辞没马尘，江南来见卧云人。问禅不契前三语，施佛空留丈六身。老去山林徒梦想，雨余钟鼓更清新。会须一洗黄茅瘴，未用深藏白氎巾。

予前后守倅余杭凡五年夏秋之间蒸热不可过独中和堂东南颊下瞰海门洞视万里三伏常萧然也绍圣元年六月舟行赴岭外热甚忽忆此处而作是诗

忠孝王家千柱宫，东坡作吏五年中。中和堂上东南颊，独有人间万里风。

慈湖夹阻风五首

捍索桅竿立啸空，篙师酣寝浪花中。故应管蒯知心腹，弱缆能争万里风。

此生归路愈茫然，无数青山水拍天。犹有小船来卖饼，喜闻墟落在山前。我行都是退之诗，真有人家水半扉。千顷桑麻在船底，空余石发挂鱼衣。月轮亭午汗珠融，谁识南讹长养功。暴雨过云聊一快，未妨明月却当空。卧看落月横千丈，起唤清风得半帆。且并水村敬侧过，人间何处不巉岩。

过庐山下 并引

予过庐山下，云物腾涌，默有祷马。未午，众峰凜然，故作是诗。

乱云欲霾山，势与飘风南。群 相应和，勇往争骖驔。可怜苍蔚中，时出紫翠岚。雁没失东岭，龙腾见西龛。一时供坐笑，百态变立谈。暴雨破块圯，清飈扫浑酣。廓然归何处，陋矣安足勘。亭亭紫霄峰，窈窕白石庵。五老数松雪，双溪落天潭。虽云默祷应，顾有移文惭。

壶中九华诗 并引

湖口人李正臣，蓄异石九峰，玲珑宛转，若窗棂然。予欲以百金买之，与仇池石为偶，方南迁未暇也。名之曰壶中九华，且以诗记之。

清溪电转失云峰，梦里犹惊翠扫空。五岭莫愁千嶂外，九华今在一壶中。天池水落层层见，玉女窗明处处通。念我仇池太孤绝，百金归买碧玲珑。

江 西

江西山水真吾邦，白沙翠竹石底江。舟行十里磨九泂，篙声荦确相舂撞。醉卧欲醒闻淙淙，真欲一口吸老庞。何人得 窥鱼砭，举义绝叫尺鲤双。

秧马歌 并引

过庐陵，见宣德郎致仕曾君安止，出所作禾谱。文既温雅，事亦详实，惜其有所缺，不谱农器也。予昔游武昌，见农夫皆骑秧马。以榆枣为腹，欲其滑，以揪桐为背，欲其轻，腹如小舟，昂其首尾，背如覆瓦，以便两髀，雀跃于泥中，系束藁其首以缚秧。日行千畦，较之伛偻而作者，劳伏相绝矣。史记禹乘四载，泥行乘橇。解者曰橇形如箕，行泥上。岂秧马之类乎？作秧马歌一首，附于禾谱之末云。

春云濛濛雨凄凄，春秧欲老翠剡齐。嗟我妇子行水泥，朝分一垆莫干畦。腰如箜篌首啄鸡，筋烦骨殆声酸嘶。我有桐马手自提，头尻轩昂腹胁低。背如覆瓦去角圭，以我两足为四蹄。耸踊滑汰入声如舂鹜，纤纤束藁亦可贵。何用繁纓与月题，揭从畦东走畦西。山城欲闭闻鼓鼙，忽作的卢跃檀溪。归来挂壁从高栖，了无刍秣饥不啼。少壮骑汝逮老骥，何曾蹶辄防颠挤。锦鞞公子朝金闺，笑我一生蹋牛犁，不知自有木馱馱。

八月七日初入赣过惶恐滩

七千里外二毛人，十八滩头一叶身。山忆喜欢劳远梦，蜀道有错喜欢铺，在大散关上。地名惶恐位孤臣。长风送客添帆腹，积雨扶舟减石鳞。便合与官充水手，此生何止略知津。

郁孤台 以下四首皆虔州

八境见图昼，郁孤如旧游。山为翠浪涌，水作玉虹流。日丽崆峒晓，风酣章贡秋。丹青未变叶，鳞甲欲生洲。岚气昏城树，滩声入市楼。烟云侵岭路，草木半炎州。故国千峰外，高台十日留。他年三宿处，准拟系归舟。

廉泉

水性故自清，不清或挠之。君看此廉泉，五色烂摩尼。廉者为我廉，我以此名为。有廉则有贪，有慧则有痴。谁为柳宗元，孰是吴隐之。渔父足岂洁，许由耳何淄。纷然立名字，此水了不知。毁誉有时尽，不知无尽时。揭来廉泉上，持须看鬓眉。好在水中人，到处相娱嬉。

尘外亭

楚山澹无尘，赣水清可厉。散荣尘外游，麾手谢此世。山高惜人力，十步辄一憩。却立浮云端，俯视万井丽。幽人宴坐处，龙虎为斩剃。马驹独何疑，岂堕山鬼计。夜垣非助我，谬敬欲其逝。戏留一转语，千载起攘袂。

天竺寺并引

予年十二，先君自虔州归，为予言：近城山中天竺寺，有乐天亲书诗云：一山门作两山门，两寺元从一寺分。东涧水流西涧水，南山云起北山云。前台花发后台见，上界钟清下界闻。遥想吾师行道处，天香桂子落纷纷。笔势奇逸，墨迹如新，今四十七年矣。子来访之，则诗已亡，有刻石存耳。感涕不已，而作是诗。

香山居士留遗迹，天竺禅师有故家。空咏连珠吟叠璧，已亡飞鸟失惊蛇。林深野桂寒无子，雨浥山姜病有花。四十七年真一梦，天涯流落涕横斜。

过大废岭

一念失垢污，身心洞清净。浩然天地间，惟我独也正。今日岭上行，身世永相忘。仙人拊我顶，结发授长生。

宿建封寺晓登尽善亭望韶石三首

双阙浮空照短亭，至今猿鸟啸青荧。君王自此西巡狩，再使鱼龙舞洞庭。蜀人文赋楚人辞，尧在崇山舜九疑。圣主若非真得道，南来万里亦何为。岭海东南月窟西，功成天已锡玄珪。此方定是神仙宅，禹亦东来隐会稽。

月华寺

寺邻岑水场施者，皆坑户也，百年间盖三焚矣。

天公胡为不自怜，结土融石为铜山。万人采斫富媪泣，祇有金帛资豪奸。脱身献佛意可料，一瓦坐待千金还。月华二火岂天意，至今菱舍依榛营。僧言此地本龙象，兴废反掌曾何艰。高岩夜吐金碧气，晓得异石青斓斑。坑流窟发钱涌地，莫施百镒朝千镒。此山出宝以自贼，地脉已断天应慳。我愿铜山化南亩，烂漫黍麦苏恂鰥。道人修道要底物，破铛煮饭苑三间。

南华寺

云何见祖师，要识本来面。亭亭塔中人，问我何所见。可怜明上座，万法了一电。饮水既自知，指月无复眩。我本修行人，三世积精练。中间一念失，受此百年谴。抠衣礼真相，感动泪雨霰。借师锡端泉，洗我绮语砚。

碧落洞 在英州下十五里

槎牙乱峰合，晃荡绝壁横。遥知紫翠间，古来仙释并。阳崖射朝日，高处连玉京。阴谷扣白月，梦中游化城。果然石门开，中有银河倾。幽龕入窈窕，别户穿虚明。泉疏下珠琲，乳盖交纒纒。我行畏人知，恐为仙者迎。小语辄响答，空山自雷惊。策杖归去来，治具烦方平。

峡山寺

传奇所记孙恪袁氏事，即此寺，至今有人见白猿者。

天开清远峡，地转凝碧湾。我行无迟速，摄衣步孱颜。山僧本幽独，乞食况未还。云礁水自舂，松门风为关。石泉解娱客，琴筑鸣空山。佳人剑翁孙，游戏暂人间。忽忆啸云侣，赋诗留玉环。林空不可见，雾雨霾髻鬟。

舟行至清远县见顾秀才极谈惠州风物之美

到处聚观香案吏，此邦宜着玉堂仙。江云漠漠桂花湿，海雨翛翛荔子然。闻道黄柑常抵鹊，不容朱橘更论钱。恰从神虎来孤景，便向罗浮见稚川。

广州蒲涧寺

地产菖蒲，十二节，相传安期生之故居，始皇访之于此。

不用山僧导我前，自寻云外出山泉。千章古木临无地，百尺飞涛泻漏天。旧日菖蒲方士宅，后来詹葡祖师禅。而今祇有花含笑，笑道秦皇欲学仙。山中多含笑花。

赠蒲涧信长老

优钵昙花岂有花，问师此曲唱谁家。已从子美得桃竹，此山有桃竹可作杖，而土人不识，予始录子美诗遗之。不向安期觅枣瓜。燕坐林间时有虎，高眠粥后不闻鸦。胜游自古兼支许，为采松肪寄一车。

发 广 州

朝市日已远，此身良自如。三杯软饱后，渐人谓饮酒为软饱。一枕黑甜余。俗谓睡为黑甜。蒲涧疏钟外，黄湾落木初。天涯未觉远，处处各樵渔。

浴日亭在南海庙前

剑气峥嵘夜插天，瑞光明灭到黄湾。坐看赐谷浮金晕，遥想钱塘涌雪山。已觉沧凉苏病骨，更烦沆瀣洗衰颜。忽惊鸟动行人起，飞上千峰紫翠间。

游罗浮山一首示儿子过

人间有此白玉京，罗浮见日鸡一鸣。南楼未必齐日观，郁仪自欲朝朱明。刘梦得有诗，记罗浮夜半见日事。山不甚高而夜见日，此可异也。山有二石楼，今延祥寺在南楼下，朱明洞在冲虚观后，云是蓬莱第七洞天。东坡之师抱朴老，真契蚤已交前生。玉堂金马久流落，寸田尺宅今归耕。道华亦尝啖一枣，唐永乐道士侯道华，窃食邓天师药仙去。永乐有无核枣，人不可得，道华独得之，予在岐下。亦尝得食一枚，契虚正欲仇三彭。唐僧契虚，遇人导游稚川仙府。真人问曰：汝绝三彭之仇乎？契虚不能答。铁桥石柱连空横，山有铁桥石柱，人罕至者。杖藜欲趁飞猱轻。云溪夜逢瘖虎伏，山有哑虎巡山。斗坛书出铜龙狞。冲虚观复有朱真人朝斗坛，近于坛上获铜龙六、铜鱼一。小儿少年有奇志，中宵起坐存黄庭。近者戏作凌云赋，笔势仿佛离骚经。负书从我盍归去，群仙正草新宫铭。汝应奴隶蔡少霞，我亦季孟山玄撰。唐有梦书新宫铭者，云紫阳真人山玄卿祀。其略曰：良常西麓，原泽东泄。新宫宏宏，崇轩。又有蔡少霞者，梦人遣书碑略曰：公昔乘鱼车，今履瑞云，躅空仰涂，绮辂轮囷。其末题云：五云书阁吏蔡少霞书。还须略报老同叔，赢粮万里寻初平。子由一字同叔。

十月二日初到惠州

仿佛曾游岂梦中，欣然鸡犬识新丰。吏民惊怪坐何事，父老相携迎此翁。

苏武岂知还漠北，管宁自欲老辽东。岭南万户皆春色，岭南万户酒。会有幽人客寓公。

寓居合江楼

海山葱昞气佳哉，二江合处朱楼开。蓬莱方丈应不远，肯为苏子浮江来。江风初凉睡正美，楼上啼鸦呼我起。我今身世两相违，西流白日东流水。楼中老人日清新，天上岂有痴仙人。三山咫尺不归去，一杯付与罗浮春。予家酿酒，名罗浮春。

白水山佛迹岩 罗浮之东麓也在惠州东北二十里

何人守蓬莱，夜半失左股。浮山若鹏蹲，忽展垂天羽。根株互连络，崖峒争吞吐。神工自炉 ，融夜相缀补。至今余隙罅，流出千斛乳。方其吹合时，天匠麾月斧。帝觞分余沥，山骨醉后土。峰峦尚开阖，涧谷犹呼舞。海风吹未凝，古佛来布武。当时汪冈氏，投足不盖拇。青莲虽不见，千古落花雨。双溪汇九折，万马腾一鼓。奔雷溅玉雪，潭洞开水府。潜鳞有饥蛟，掉尾取渴虎。我来方醉后，濯足聊戏侮。回风卷飞霰，掠面过强弩。山灵莫恶剧，微命安足赌。此山吾欲老，慎勿厌求取。溪流变春酒，与我相宾主。当连青竹竿，下灌黄精圃。

咏汤泉 在白水山

积火焚大槐，蓄油灾武库。惊然丞相井，疑浣将军布。自怜耳目隘，未测阴阳故。郁攸火山裂，沸汤泉注。岂惟渴兽骇，坐使痴儿怖。安能长鱼鳖，仅可寻狐兔。山中惟木客，户外时芒屨。虽无倾城浴，幸免亡国污。

自 笑

予石如琢玉，远烟真削鬣。入我病风手，古语云：磨墨如病风手。玄云滄淒淒。是中有何好，而我喜欲迷。既似蜡展阮，又如鍛柳嵇。醉笔得天全，宛宛天投霓。多谢中书君，伴我此幽栖。

朝云诗并引

世谓乐天有粥骆马放杨柳枝词，嘉其主老病不忍去也。然梦得有诗云：春尽絮飞留不得，随风好去落谁家。乐天亦云：病与乐天相伴住，春随樊子一时归，则是樊素竟去也。予家有数妾，四五年相继辞去，独朝云者随予南迁。因读乐天集，戏作此诗。朝云姓王氏，钱塘人，尝有子日干儿，末期而夭云。

不似杨枝别乐天，恰如通德伴伶玄。阿奴络秀不同者，天女维摩总解禅。经卷药炉新活计，舞衫歌扇旧因缘。丹成逐我三山去，不作巫阳云雨仙。

寄虎儿

独倚枕榔树，闲挑草拔根。谋生看拙否，送老此蛮村。

十一月二十六日松风亭下梅花盛开

春风岭上淮南村，昔年梅花曾断魂。予昔赴黄州，清风岭上见梅花，有两绝句。明年正月往岐亭道中，赋诗云：去年今日关山路，细雨梅花正断魂。岂知流落复相见，蛮风蜒雨愁黄昏。长条半落荔支浦，卧树独秀恍榔园。岂惟幽光留夜色，直恐冷艳排冬温。松风亭下荆棘里，两株玉蕊明朝墩。海南仙云娇堕砌，月下缟衣来扣门。酒醒梦觉起绕树，妙意有在终无言。先生独饮勿叹息，幸有落月窥清樽。

再用前韵

罗浮山下梅花村，玉雪为骨冰为魂。纷纷初疑月挂树，耿耿独与参横昏。先生索居江海上，悄如病鹤栖荒园。天香国艳肯相顾，知我酒熟诗清温。蓬莱宫中花鸟使，绿衣倒挂扶桑墩。抱丛窥我方醉卧，故遣啄木先敲门。麻姑过君急洒扫，鸟能歌舞花能言。酒醒人散山寂寂，惟有落蕊黏空樽。岭南珍禽，有倒挂子，绿毛红喙，如鸚鵡而小，自海东来。非尘埃间物也。

新酿桂酒

捣香筛辣入瓶盆，盎盎春溪带雨浑。收拾小山藏社瓮，招呼明月到芳樽。酒材已遣门生致，菜把仍叨地主恩。烂煮葵羹斟桂醕，风流可惜在蛮村。

惠守詹君见和复次韵

已破谁能惜甌盆，颓然醉里得全浑。欲求公瑾一困米，试满庄生五石樽。三杯卯困忘家事，万户春浓感国恩。刺史不须邀半道，篮舆未暇走山村。

花落复次前韵

玉妃谪堕烟雨村，先生作诗与招魂。人间草木非我对，奔月偶桂成幽昏。暗香入户寻短梦，青子缀枝留小园。披衣连夜唤客饮，雪肤满地聊相温。松明照坐愁不睡，井花入腹清而嗽。先生年来六十化，道眼已入不二门。多情好事真习气，惜花未忍终无言。留连一物吾过矣，笑领百罚空罍樽。

第五卷

诗六十七首

江 郊 并引

惠州归善县治之北数百步，抵江少西，有盘石小潭，可以垂钓。作江郊诗云。

江郊葱昺，云水菑纒。碕岸斗人，洄潭轮转。先生悦之，布席间燕。初日下照，潜鳞俯见。意钓忘鱼，乐此竿线。优哉悠哉，玩物之变。

詹守携酒见过用前韵作诗聊复和之

箕踞狂歌老瓦盆，燎毛燔肉似羌浑。传呼草市来携客，洒扫渔矶共置樽。山下黄童争看舞，江干白骨已衔恩。时詹方议葬暴骨。孤云落日西南望，长羨归鸦自识村。

寄邓道士 并引

罗浮山有野人，相传葛稚川之隶也。邓道士守安，山中有道者也。尝于庵前。见其足迹，长二尺许。绍圣二年正月十日，予偶读韦苏州寄全椒山中道士诗云：今朝郡斋冷，忽念山中客。涧底东荆薪，归来煮白石。遥持一樽酒，远慰风雨夕。落叶满空山，何处寻行迹。乃以酒一壶，仍依苏州韵作诗寄之云。

一杯罗浮春，远饷采薇客。遥知独酌罢，醉卧松下石。幽人不可见，清啸闻月夕。聊戏庵中人，空飞本无迹。

上 元 夜

前年侍玉辇，端门万枝灯。壁月挂罽毼，珠星缀觚棱。去年中山府，老病亦宵兴。牙旗穿夜市，铁马响春冰。今年江海上，云房寄山僧。亦复举膏火，松间见层层。散策桄榔林，林疏月鬢鬢。使君置酒罢，箫鼓转松陵。狂生来索酒，贾道人也是一举辄数升。浩歌出门去，我亦归蓍腾。

正月二十四日与儿子过赖仙芝玉原秀才 僧昙颖行全道士何宗一同游罗浮道院及 栖禅精舍过作诗和其韵寄迈迨

断桥隔胜践，脱屣欣小揭。瘴花已繁红，官柳犹疏细。斜川二三子，悼叹吾年逝。凄凉罗浮馆，风壁颓雨砌。黄冠常苦饥，迎客羞破袂。仙山在何许，归鹤时堕毳。崎岖拾松黄，欲救齿发弊。坐令禅客笑，一梦等千岁。栖禅晚置酒，蛮果粲蕉荔。斋厨釜无羹，野饷篮有蕙。嬉游趁时节，俯仰了此世。犹当洗业障，更作临水袂。寄书阳羨儿，并语长头弟。门户各努力，先期毕租税。

正月二十六日偶与数客野步嘉祐僧舍东
南野人家杂花盛开扣门求观主人林氏媪
出应白发青裙少寡独居三十年矣感叹之
余作诗记之

缥蒂绡枝出蜂房，绿阴青子送春忙。涓涓泣露紫含笑，焰焰烧空红佛桑。
落日孤烟知客恨，短篱破屋为谁香。主人白发青裙袂，子美诗中黄四娘。

龙尾石砚寄犹子远

皎皎穿云月，青青出水荷。文章工点黝，忠义老研磨。伟节何须怒，宽
饶要少和。吾衰此无用，寄与小东坡。远为人类予。

赠王子直秀才

万里云山一破裘，杖端闲挂百钱游。五车书已留儿读，二顷田应为鹤谋。
水底笙歌蛙两部，山中奴婢橘千头。幅巾我欲相随去，海上何人识故侯。

次韵表兄程正辅江行见桃花

曲士赋怀沙，草木伤莽莽。德人无荆棘，坐失岭峤阻。我兄瑚璉姿，流
落瘴江浦。净眼见桃花，纷纷堕红雨。萧然振衣诚，笑问散花女。我观解语
花，粉色如黄土。一言破千偈，况尔初不语。可怜一转话，他日如何举。故
复此微吟，聊和鸥鸦橹。江边闲草木，闲客当为主。尔来子美瘦，正坐作诗
苦。袖手焚笔砚，清篇真漫与。愿兄理北轅，六轡去如组。上林桃花开，水
暖鸿北翥。

追饯正辅表兄至博罗赋诗为别

孤臣南游堕黄营，君亦何事来牧蛮。舫舟蜒户龙冈窟，置酒椰叶桄榔间。
高谈已笑衰语陋，杰句尤觉清诗屠。博罗小县僧舍古，我不忍去君忘还。君
应回望秦与楚，梦涉汉水愁秦关。我亦坐念高安客，神游黄蘗参洞山。何时
旷荡洗瑕谪，与君归驾相追攀。梨花寒食隔江路，两山遥对双烟鬟。归耕不
用一钱物，惟要两脚飞孱颜。玉床丹镞记分我，助我金鼎光斓斑。

再用前韵赋

乐天霜鬓如霜营，始知谢遣素与蛮。我兄绿发蔚如故，已了梦幻齐人间。
蛾眉劝酒聊尔耳，处仲太忍茂弘孱。三杯径醉便归卧，海上知复几往还。连
娟六么趁 鞠，沓吵三叠蔡阳关。酒醒梦断何所有，落花流水空青山。忽惊
铙鼓发半夜，明月不许幽人攀。赠行无物惟一语，莫遣瘴雾侵云鬟。罗浮道
人一倾盖，欲系白日留君颜。应知我是香案吏，他年许缀蓬莱班。

真一酒 并引

米麦水三，一而已，此东坡先生真一酒也。

拨雪披云得乳泓，蜜蜂又欲醉先生。真一色味，颇类予在黄州日所酝蜜酒也。稻垂麦仰阴阳足，器洁泉新表里清。晓日着颜红有晕，春风入髓散无声。人间真一东坡老，与作青州从事名。

游博罗香积寺 并引

寺去县七里，三山犬牙，夹道皆美田，麦禾甚茂。寺下溪水可作碓磨，若筑塘百步，闸而落之，可转两轮举四杵也。以属县令林，使督成之。

二年流落蛙鱼乡，朝来喜见麦吐芒。东风摇波舞净绿，初日泫露酣娇黄。汪汪春泥已没膝，刻刻秋耨初分秧。谁言万里出无友，见此二美喜欲狂。三山屏拥僧舍小，一溪雷转松阴凉。要令水力供臼磨，与相地脉增堤防。霏霏落雪看收面，隐隐叠鼓闻春糠。散流一啜云子白，炊裂十字琼肌香。岂惟牢九荐古味，束皙饼赋云：漫头薄持，起搜牢九。要使真一流仙浆。诗成捧腹便绝倒，书生说食真膏盲。

次韵定慧钦长老见寄八首

苏州定慧长老守钦，使其徒卓契顺来惠州，问予安否，且寄拟寒山十颂，语有粲忍之通，而诗无岛可之寒，吾甚嘉之，为和八首。

左角看破楚，南柯闻长滕。钩帘归乳燕，穴纸出痴蝇。为鼠常留饭，怜蛾不点灯。崎岖真可笑，我是小乘僧。

铁桥本无柱，石楼岂有门。舞空五色羽，吠云千岁根。松花酿仙酒，木客馈山飧。我醉君且去，陶云吾亦云。

罗浮高万仞，下看扶桑卑。默坐朱明洞，玉池自生肥。从来性坦率，醉语漏天机。相逢莫相问，我不记吾谁。

幽人白玉观，大士甘露灭。根尘各清净，心境两奇绝。真源未纯熟，习气余陋劣。譬如已放鹰，中夜时掣纵。

谁言穷巷士，乃窃造物权。所见皆我有，安居受其全。戏作一篇书，千古发争端。儒墨起相杀，予初本无言。

闲居蓄百毒，救彼跛与盲。依山作陶穴，掩此暴骨横。区区效一溉，岂能济含生。力恶不已出，时哉非汝争。

少壮欲及物，老闲余此心。微生山海间，坐受瘴雾侵。可怜邓道士，摄衣问呻吟。覆舟却私渡，断桥费千金。

净名毗耶中，妙喜恒沙外。初无往来相，二土同一在。云何定慧师，尚欠行脚债。请判维摩凭，一到东坡界。

三月十九日携白酒鲈鱼过詹

史君食槐叶冷淘

枇杷已熟粲金珠，桑落初尝湘玉蛆。暂借垂莲十分盏，一浇空腹五车书。

青浮卵碗槐芽饼，红点冰槃藿叶鱼。醉饱高眠真事业，此生有味在三余。

江涨用过韵

草木生故墟，牛羊满空读。春江围草市，夜浪浮竹屋。已连涨海白，尚带霍山绿。坎离更休王，鱼鳖横陵陆。得非昆仑囚，欲报陆浑衄。行看北风竞，来救南国蹙。长驱连山烧，一扫含沙毒。孤吟愍造化，何时停倚伏。当怜水旱氓，不作舟车蓄。江流傥席卷，社酒期苑缩。

连雨江涨二首

越井冈头云出山，柯江上水如天，床床避漏幽人屋，浦浦移家艇子船。龙卷鱼虾并雨落，人随鸡犬上墙眠。祗应楼下平阶水，长记先生过岭年。

急雨萧萧作晚凉，卧闻榕叶响长廊。微明灯火耿残梦，半湿帘帷浥旧香。高浪隐床吹薺盎，暗风惊树摆琳琅。先生不出晴无用，留向空阶滴夜长。

四月十一日初食荔支

南村诸杨北村卢，谓杨梅卢橘也。白花青叶冬不枯。垂黄缀紫烟雨里，特与荔支为先驱。海山仙人绛罗襦，红纱中单白玉肤。不须更待妃子笑，风骨自是倾城妹。不知天工有意无，遣此尤物生海隅。云山得伴松桧老，霜雪自困植梨粗。先生洗盏酌桂醕，冰槃荐此頰虬珠。似开江瑶斫玉柱，更洗河豚烹腹腴。予尝谓荔支厚味高格两绝，果中无比。惟江瑶柱河豚鱼近之耳。我生涉世本为口，一官久已轻莼鲈。人间何者非梦幻，南来万里真良图。

桄榔杖寄张文潜一首时 初闻黄鲁直迁黔南范淳父九疑也

睡起风清酒在亡，身随残梦两茫茫。江边曳杖桄榔瘦，林下寻苗萆拔香。独步傥逢岫嵒令，远来莫恨曲江张。遥知鲁国真男子，独忆平生盛孝章。

答周循州

蔬饭藜床破衲衣，扫除习气不吟诗，前生似是卢行者，后学过呼韩退之。未敢扣门求夜话，时叨送米续晨炊。知君清俸难多辍，且觅黄精与疗饥。

次韵程正辅游碧落洞

空山不难到，绝境未易名。何时谪仙人，来作钧天声。胸中几云梦，余地方恢宏。长庚与北斗，错落缀冠纓。黄公献紫芝，赤松馈青精。溪山久寂寞，请续离骚经。抱枝寒螿咽，绕耳飞蚊清。滴仙拊掌笑，笑此羽皇铭。我顷尝独游，自适孤云情。君今又继往，雾雨愁青冥。感君兄弟意，寻羊问初平。玉床分箭镞，不忍独长生。诗成辄寄我，妙绝陶谢并。孤鸿方避弋，老骥犹在垧。鸟兽如可群，永寄槁木形。何山不堪隐，饮水自修龄。

六月十二日酒醒步月理发而寝

羽虫见月争翻飞，我亦散发虚明轩。千梳冷快肌骨醒，风露气入霜蓬根。起舞三人漫相属，停杯一问终无言。曲肱薤 有佳处，梦觉琼楼空断魂。

荔支叹

十里一置飞尘灰，五里一候兵火催。颠坑仆谷相枕藉，知是荔支龙眼来。飞车跨山鹧横海，风枝露叶如新采。宫中美人一破颜，惊尘溅血流千载。永元荔支来交州，天宝岁贡取之涪。至今欲食林甫肉，无人举觞酹伯游。汉永元中，交州进荔支龙眼。十里一置。五里一候，奔驰死亡。罹猛兽毒虫之害者无数。唐羌字伯游，为临武长上书言状。和帝罢之。唐天宝中，盖取涪州荔支，自子午谷路进入。我愿天公怜赤子，莫生尤物为疮情。君不见武夷溪边粟粒芽，前丁后蔡相笼加。争新买宠各出意，今年斗品充官茶。吾君所乏岂此物，致养口体何陋耶。洛阳相君忠孝家，可怜亦进姚黄花。洛下贡花，自钱惟演始，大小龙茶，始于丁晋公而成于君谔。欧阳永叔间君谔进小龙团，惊叹曰：君谔士人也，何至作此事？今年闽中监司乞进斗茶许之。

江月五首 并引

岭南气候不常，吾尝云：菊花开时，乃重阳凉天，佳月即中秋，不须以日月为断也。今岁九月残暑方退，既望之后，月出愈迟，然予常夜起登合江楼，或与客游丰湖，入栖禅寺，扣罗浮道院，登逍遥堂，逮晓乃归。杜子美云：四更山吐月，残夜水明楼。此殆古今绝唱也。因其句，作五首，仍以残夜水明楼为韵。

一更山吐月，王塔卧微澜。正似西湖上，涌金门外看。冰轮横海阔，香雾入楼寒。停鞭且莫上，照我一杯残。

二更山吐月，幽人方独夜。可怜人与月，夜夜江楼下。风枝久未停，露草不可藉。归来掩关卧，唧唧虫夜话。

三更山吐月，栖鸟亦惊起。起寻梦中游，清绝正如此。驱云扫众宿，俯仰迷空水。幸可饮我牛，不须违洗耳。

四更山吐月，皎皎为谁明。幽人赴我约，坐待玉绳横。野桥多断板，山寺有微行。今夕定何夕，梦中游化城。

五更山吐月，窗迥室幽幽。玉钩还挂户，江练却明楼。星河淡欲晓，鼓角冷知秋。不眠翻五咏，清切变蛮讴。

闻正辅表兄将至以诗迎之

生逢尧舜仁，得作岭海游。虽怀跼然喜，岂免踣堕忧。莫雨侵重腿，晓烟腾郁攸。朝槃见蜜唧，夜枕闻鸱鸱。几欲烹郁屈，固尝馔钩辀。舌音渐变，面汗尝辟羞。赖我存黄庭，有时仍丹丘。日听不任耳，踵息殆废喉。稍欣素月夜，遂度黄苑秋。我兄清庙器，持节瘴海头。萧然三家步，横此万斛舟。人言得汉吏，天遣活楚囚。惠然再过我，乐哉十日留。但恨三语贤，忽

潜九原幽。万里傥同归，两鰥当对耜。轼丧妇已三年矣。正辅近亦有亡嫂之戚，故云。强歌非真达，何必师庄周。

再 和

稚川真长生，少从郑公游。孝章偶不死，免为文举忧。余龄会有适，独往岂相攸。由来警露鹤，不羨撮蚤鹞。愿加视后鞭，同驾躡空辀。宁餐堕齿堇，勿忆齐眉羞。何时遂纵壑，归路同首丘。着意寻弥明，长颈高结喉。东冈松柏老，西岭橘柚秋。无心逐定远，燕颌飞虎头。君方卒功名，一泛范蠡舟。我亦沾沛渥，渐解钟仪囚。宁须张子房，万户自择留。犹胜稽叔夜，孤愤甘长幽。南窗可寄傲，北山早归耜。此语君勿疑，老彭跨商周。

同正辅表兄游白水山

伟哉造物真豪纵，攫土搏沙为此弄。擘开翠峡走云雷，截破奔流作潭洞。因随化人履巨迹，得与仙兄蹑飞鞚。曳杖不知岩谷深，穿云但觉衣裘重。坐看惊鸟救霜叶，知有老蛟蟠石壑。金沙玉砾粲可数，古镜宝奩寒不动。念兄独立与世疏，绝境难到惟我共。永词角上两蛮触，一洗胸中九云梦。浮来山高回望失，武陵路绝无人送。筠篮擷翠爪甲香，素绠分碧银瓶冻。归路靠靠汤谷暗，野堂活活神泉涌。解衣浴此无垢人，身轻可试云间凤。

与正辅游香积寺

越山少松竹，常苦野火厄。此峰独苍然，感荷佛祖力。伏苓无人采，千岁化虎珀。幽光发中夜，见者惟木客。我岂无长鑱，真贖苦难识。灵苗与毒草，疑似在毫发。把玩竟不食，弃置长太息。山僧类有道，辛苦常谷汲。我惭作机舂，凿破混沌穴。幽寻恐不继，书板记岁月。

次韵正辅同游白水山

祇知楚越为天涯，不知肝胆非一家。此身如线自萦绕，左回右转随纒车。误抛山林入朝市，平地咫尺千褒邪。欲从稚川隐罗浮，先与灵运开永嘉。首参虞舜款韶石，次谒六祖登南华。仙山一见五色羽，雪树两摘南枝花。赤鱼白蟹筋屡下，黄柑绿橘筵常加。糖霜不待蜀客寄，荔支莫信闽人夸。恣倾白蜜收五棱，去声。细 黄土栽三桠。正辅分人参一苗归种韶阳，来诗本用字，惠州无书不见此字所出，故旦从木奉和。朱明洞里得灵草，翩然放杖凌苍霞。岂无轩车驾熟鹿，亦有鼓吹号寒蛙。仙人劝酒不用勺，石上自有樽壘注。径从此路朝玉阙，千里莫遣毫厘差。故人日夜望我归，相迎欲到长风沙。岂知乘槎天女侧，独倚云机看织纱。世间谁似老兄弟，笃爱不复相疵瑕。相携行到水穷处，庶几一见留子嗟。千年枸杞常夜吠，无数草棘工藏遮。但令凡心一洗濯，神人仙药不我遇。山中归来万想灭，岂复回顾双云鸦。

辙有白发近二十年矣然止百余茎不增不减虔州道人王正彦教令拔去以真水火养

之恐不复更生从其言已数月而白发不出
更年岁不见岂真不生耶子瞻兄示我月中
梳头诗戏次来韵言拔白之验

水上有车车自翻，悬流如线垂前轩。霜蓬已枯不再绿，有客劝我抽其根。
根根一去紫茸茁，珍重已试幽人言。纷纷华发不足道，当返六十过去魂。

和

夏畦流膏白雨翻，北窗幽人卧羲轩。风轮晓入春笋节，露珠夜上秋禾根。
或为予言草木之长，常在昧明间，蚤作而伺之，乃见其枝起数寸，竹笋尤甚。
又夏秋之交，稻方含秀，黄昏月出，露珠起于其根。累累然忽自腾上。若有
推之者，或入于茎心，或垂于叶端，稻乃秀实，验之信然。此二事与子由养
生之说契，故以此为寄。从来白发有公道，始信丹经非妄言。此身法报本无
二，他年妙绝兼形魂。传灯录有形神俱妙者。乃不复解化之事。

十一月九日夜梦与人论神仙道术因作一
诗八句既觉颇记其语录呈子由弟后四句
不甚明了今足成之耳

析尘妙质本来空，梦中于此句若了然有所得者。更积微阳一线功。照夜
一灯长耿耿，闭门千息自濛濛。养成丹灶无烟火，点尽人间有晕铜。寄语山
神停伎俩，不闻不见我何穷。

章质夫送酒六壶书至而酒不达戏作小诗问之

白衣送酒舞渊明，急扫风轩洗破觥。岂意青州六从事，化为乌有一先生。
空烦左手持新蟹，漫绕东篱嗅落英。南海使君今北海，定分百榼饷春耕。

小圃五咏

人 参

上党天下脊，辽东真井底。玄泉倾海腴，白露洒天醴。灵苗此孕毓，肩
肢或具体。移根到罗浮，越水灌清泚。地殊风雨隔，臭味终祖称。青桠缀紫
萼，圆实堕红米。穷年生意足，黄土手自启。上药无炮灸，齧啮尽根抵。开
心定魂魄，忧恚何足洗。糜身辅吾生，既食首重稽。

地 黄

地黄饲老马，可使光鉴人。吾闻乐天语，喻马施之身。我衰正伏枥，垂
耳气不振。移栽附沃壤，蕃茂争新春。沈水得稚根，重汤养陈薪。投以东阿
清，和以北海醇。崖蜜助甘冷，山姜发芳辛。融为寒食饧，咽作瑞露珍。丹
田自宿火，渴肺还生津。愿饷内热子，一洗胸中尘。

枸 杞

神药不自閼，罗生满山泽。日有牛羊忧，岁有野火厄。越俗不好事，过眼等茨棘。青萸春自长，绛珠烂莫摘。短篱护新植，紫笋生卧节。根茎与花实，收拾无弃物。大将玄吾鬢，小则饷我客。似闻朱明洞，中有千岁质。灵厖或夜吠，可见不可索。仙人傥许我，借杖扶衰疾。

甘 菊

越山春始寒，霜菊晚愈好。朝来出细粟，稍觉芳岁老。孤根荫长松，独秀无众草。晨光虽照耀，秋雨半摧倒。先生卧不出，黄叶纷可扫。无人送酒壶，空腹嚼珠宝。香风入牙颊，楚些发天藻。新萸蔚已满，宿根寒不槁。扬扬弄芳蝶，生死何足道。颇讶昌黎翁，恨尔生不蚤。

薏 苡

伏波饭薏苡，御瘴传神良。能除五溪毒，不救谗言伤。谗言风雨过，瘴疠久亦亡。两俱不足治，但爱草木长。草木各有宜，珍产骄南荒。絳囊悬荔支，雪粉剖桃榔。不谓蓬获姿，中有药与粮。春为芡珠圆，炊作菰米香。子美拾橡栗，黄精诳空肠。今吾独何者，玉粒照生光。

雨后行菜

梦回闻雨声，喜我菜甲长。平明江路湿，并岸飞雨浆。天公真富有，膏乳泻黄壤。霜根一著滋，风叶渐俯仰。未任筐宫载，已作杯案想。艰难生理窄，一味敢专飨。小摘饭山僧，清安寄真赏。芥蓝如菌章，脆美牙颊响。白菘类羔豚，冒土出躡掌。谁能视火候，小灶当自养。

残腊独出二首

幽寻本无事，独往意自长。钓鱼丰乐桥，采杞逍遥堂。罗浮春欲动，云日有清光。处处野梅开，家家腊酒香。路逢眇道士，疑是左元放。我欲从之语，恐复化为羊。

江边偶微行，诘曲背城市，平湖春草合，步到栖禅寺。堂空不见人，耆稚掩关睡。所营在一食，食已宁复事。客来岂无得，施子净扫地。风松独不静，送我作鼓吹。

新年五首

晓雨暗人日，春愁连上元。水生挑菜渚，烟湿落梅村。小市人归尽，孤舟鹤蹋翻。犹堪慰寂寞，渔火乱黄昏。

北渚集群鹭，新年何所之。尽归乔木寺，分占结巢枝。生物会有役，谋身各及时。何当禁毕弋，看引雪衣儿。

海国空自暖，春山无限清。冰溪结瘴雨，雪菌到江城。更待轻雷发，先催冻笋生，丰湖有藤菜，似可敌药羹。

小邑浮桥外，青山石岸东。茶枪烧后有，麦浪水前空。万户不禁酒，三年真识翁。结苑来此住，岁晚有谁同。

荔子几时熟，花头今已繁。探春先拣树，买夏欲论园。居士常携客，参军许扣门。明年更有味，怀抱带诸孙。

二月八日兴黄煮僧昙颖过 逍遥堂何道士宗一问疾

安心守玄牝，闭眼觅黄庭。问疾来三士，浇愁有半瓶。风松时落蕊，病鹤不梳翎。樽空我归去，山月照君醒。

次韵高要令刘湜峡山寺见寄

新闻妙无多，旧学闲可束。犹当隐季生，未遽逃梅福。空肠吐余思，静似蚕缀簇。寸田结初果，秀若铜生绿。荆棘扫诚尽，梨枣忧不熟。高人宁铸金，下士乃服玉。君看岭峽隘，我欲巾笥蓄。曾攀罗浮顶，亦到朱明谷。旋观真历块，归卧甘破屋。故人老犹仕，世味薄如毅。偶从越女笑，不怕蛮江浴。惊闻尺书到，喜有新诗辱。应怜五管客，曾作八州督。骨消谗口铄，胆破狱吏酷。拢云不易寄，江月乃可掬。遥知清远寺，不称空洞腹。蹇驴步武碎，短瑟弦柱促。仰看泉落佩，俯听石响毂。千峰泻清驶，一往无回跼。狂雷失晤语，过电不容目。要知僧长饥，正坐山少肉。人间无南北，蜗角空出缩。仇池九十九，仇池有九十九泉。予尝梦至有诗。嵩山三十六。子由近买田阳霍，北望嵩山甚近。天人同一梦，仙凡无两录。陋邦真可老，生理亦粗足。便回 天焰，长作照海烛。热天焰见退之诗，近黄鲁直寄诗云：莲花合里一寸烛，牝马海中烧百川，鲁直盖近有得也。

食荔支二首 并引

惠州太守东堂祠，故相陈文惠公。堂下有公手植荔支一株，郡人谓将军树。今岁大熟，赏吹之余，下逮吏卒。其高不可致者，纵猿取之。

丞相祠堂下，将军大树旁。炎云骈火实，瑞露酌天浆。烂紫垂先熟，高红挂远扬。分甘遍铃下，也到黑衣郎。

罗浮山下四时春，卢橘杨梅次第新。日啖荔支三百颗，不妨长作岭南人。

和子由盆中石菖蒲忽生九花

春萸秋英两须臾，神药人间果有无。无鼻何由识薝蔔，有花今始信菖蒲。芳心未饱两蛺蝶，寒意知鸣几蟋蟀。记取明年十二节，小儿休更策霜须。

迁 居

吾绍圣元年十月二日至惠州，寓合江楼，是月十八日迁于嘉祐寺，

二年三月十九日，复迁于合江楼，三年四月二十日复归于嘉祐寺。时方卜筑白鹤峰之上，新居成，庶几其少安乎？

前年家水东，回首夕阳丽。去年家水西，湿面春雨细。东西两无择，缘尽我辄逝。今年复东徙，旧馆聊一憩。已买白鹤峰，规作终老计。长江在北户，雪浪舞吾砌。青山满墙头。几云髻。虽惭抱朴子，金鼎陋蝉蜕。犹贤柳柳州，庙俎荐丹荔。吾生本无待，俯仰了此世。念念自成劫，尘尘各有际。下观生物息，相吹等蚊蚋。

两桥诗 并引

惠州之东，江溪合流，有桥多废坏，以小舟渡。罗浮道士邓守安，始作浮桥，以四十舟为二十舫，铁锁石碇。随水涨落，榜曰东新桥。州西丰湖上有长桥，屡作屡坏，栖禅院僧希固筑，进两岸为飞阁九间，尽用石监，木坚若铁石，榜曰西新桥。皆以绍圣三年六月毕工。作二诗落之。

东 新 桥

群鲸贯铁索，背负横空霓。首摇翻雪江，尾插崩云溪。机牙任信缩，涨落随高低。辘护卷巨索，青蛟挂长堤。奔舟免狂触，脱筏防撞挤。一桥何足云，欢传广东西。父老有不识，喜笑争攀跻。鱼龙亦惊逃，雷雹生马蹄。嗟此病涉久，公私困留稽。奸民食此险，出没如凫鹭。似卖失船壶，如去登楼梯。不知百年来，几人陨沙泥。岂知涛澜上，安若堂与闺。往来无晨夜，醉病休扶携。使君饮我言，妙割无牛鸡。不云二子劳，叹我捐腰犀。二士造桥，予尝助施犀带。我亦寿使君，一言听扶藜。常当修未坏，勿使后噬脐。

西新桥

昔桥本千柱，挂湖如断霓。浮梁陷积淖，破板随奔溪。笑看远岸没，坐觉孤城低。聊因三农隙，稍进百步堤。炎州无坚植，潦水轻推挤。千年谁在者，铁柱罗浮西。独有石盐木，白蚁不敢跻。似开铜驼峰，如凿铁马蹄。岌岌类鞭石，山川非会稽。嗟我久阁笔，不书纸尾鹭。萧然无尺捶，欲构飞空梯。百夫下一杙，涿此百尺泥。桥柱石礲之下，皆有坚木涿入泥中丈余，谓之顶桩。探囊赖故侯，宝钱出金闺。子由之妇史项入内，得赐黄金钱数十助施。父老喜云集，箠壶无空携。三日饮不散，杀尽西村鸡。似闻百岁前，海近湖有犀。桥下旧名鳄湖，盖尝有蛟鳄之类。那知陵谷变，枯渎生菱藜。后来勿忘今，冬涉水过脐。

悼朝云诗 并引

绍圣元年十一月，戏作朝云诗。三年七月五日，朝云病亡于惠州，葬之栖禅寺松林中，东南直大圣塔。予既铭其墓，且和前诗以自解。朝云始不识字，晚忽学书，粗有楷法，盖尝从泗上比丘尼义冲学佛，亦略闻大义，且死，诵金刚经四句偈而绝。

苗而不秀岂其天，不使童乌与我玄。驻景恨无千岁药，赠行唯有小乘禅。
伤心一念偿前债，弹指三生断后缘。归卧竹根无远近，夜灯勤礼塔中仙。

第六卷

诗六十七首

丙子重九二首

三年瘴海上，越峤真我家。登山作重九，蛮菊秋未花。唯有黄苑根，堆拢生物洼。蜒酒蘖众毒，酸甜如梨柀。何以侑一罇，邻翁馈蛙蛇。亦复强取醉，欢谣杂悲嗟。今年吁恶岁，僵仆如乱麻。此会我虽健，狂风卷朝霞。使我如霜月，孤光挂天涯。西湖不欲往，墓树号寒鸦。

穷涂不择友，过眼如乱云。余子谁复数，坐阅两使君。共饮去年堂，俯看秋水纹。此水与此人，相追两运运。老去各休息，造物嗟长勤。佳哉此令节，不惜与子分。何以娱我客，游鱼在清湫。水师三百指，鍃网欲掩群。获多虽一快，买放尤可欣。此乐真不朽，明年我归耘。

白鹤峰新居欲成夜过西邻翟秀才二首

林行婆家初闭户，翟夫子舍尚留关。连娟缺月黄昏后，缥缈新居紫翠间。系闷岂无罗带水，韩退之云：水作青罗带，山为碧玉簪。割愁还有剑铓山。柳子厚云：海上尖峰若剑铓，秋来处处割愁肠，皆岭南诗也。中原北望无归日，邻火村舂自往还。

甕间毕卓防偷酒，壁后匡衡不点灯。待凿平江百尺井，要分清暑一壶冰。佐卿恐是归来鹤，次律宁非过去僧。他日莫寻王粲宅，梦中来往本何曾。

次韵子由所居六咏

堂前种山丹，错落马脑盘。堂后种秋菊，碎金收辟寒。草木如有情，慰此芳岁阑。幽人正独乐，不知行路难。

诗人故多感，花发忆两京。石榴有正色，玉树真虚名。粲粲秋菊花，卓为霜中英。莫槃照重九，纈蕊两鲜明。

幽居有古意，义井分西墙。谁言三伏热，上须一杯凉。先生坐忍渴，群器自披猖。众散徐酌饮，逡巡味尤长。

先生饭土墼，无物与刘义。何以娱醉客，时嗅砌下花。井水分西邻，竹阴借东家。萧然行脚僧，一身寄天涯。

东斋手种柏，今复几尺长。知有桓司马，榛苑为遮藏。近闻南台松，新枝出余僵。年来此怀抱，岂复惊凡亡。

新居已覆瓦，无复风雨忧。桤栽与笼竹，小诗亦可求。尚欲烦贰师，刻山出飞流。应须凿百尺，两绁载一牛。

吴子野绝粒不睡过作诗戏之芝上人陆道士皆和予亦次其韵

聊为不死五通仙，终了无生一大缘。独鹤有声知半夜，老蚕不食已三眠。怜君解比人间梦，芝有梦斋，子由作铭。许我时逃醉后禅。会与江山成故事，

不妨诗酒乐新年。

次韵惠循二守相会

共借相从一寸阴，酒杯虽浅意殊深。且同月下三人影，莫作天涯万里心。
东岭近开松菊径，南堂初绝斧斤音。知君善颂如张老，犹望携壶更一临。

又次韵二守同访新居二首

数亩蓬蒿古县阴，晓窗清快夜堂深。也知卜筑非真宅，聊欲跼踖看此心。
闻道携壶问奇字，更因登木助微音。相娱北户江千顷，直下都无地可临。

此生真欲老墙阴，却扫都忘岁月深。拔薤已观贤守政，折蔬聊慰故人心。
风流贺监常吴语，憔悴钟仪独楚音。治状两邦俱第一，颖川归去肯重临。

循守临行出小鬟复用前韵

学语雏莺在柳阴，临行呼出翠帷深。通家不隔同年面，二守同年家。得
路方知异日心。趁着春衫游上苑，要求国手教新音。岭梅不用催归骑，截镫
须防旧所临。循守近为韶倅。

种 茶

松间旅生茶，已与松俱瘦。茨棘尚未容，蒙翳争交构。天公所遗弃，百
岁仍稚幼。紫笋虽不长，孤根乃独寿。移栽白鹤岭，土软春雨后。弥旬得连
阴，似许晚遂茂。能忘流转苦，歇戢出鸟味。未仕供臼磨，且作资摘嗅。千
团输太官，百饼街私斗。何如此一啜，有味出吾囿。

白鹤山新居凿井四十尺遇盘石石尽乃得泉

海国困烝溽，新居利高寒。以彼陟降劳，易此寝处干。但苦江路峻，常
惭汲腰酸。矻矻烦四夫，硠硠斫层峦。弥旬得寻丈，下有青石磐。终日但进
火，何时见飞澜。丰我粢与醪，利汝椎与钻。山石有时尽，我意殊未阑。今
朝僮仆喜，黄土复可转。晨瓶得雪乳，莫甕渟冰湍。我生类如此，何适不艰
难。一勺亦天赐，曲肱有余欢。

三月二十九日二首

南岭过云开紫翠，北江飞雨送凄凉。酒醒梦回春尽日，闭门隐几坐烧香。
门外橘花犹的砾，墙头荔子已斓斑。树暗草深人静处，卷帘欹枕卧看山。

吾谪海南子由雷州被命即行了不相知至 梧乃闻其尚在藤也旦夕当追及作此诗示之

九疑联绵属衡湘，苍梧独在天一方。孤城吹角烟树里，落月未落江苍茫。

幽人拊枕坐叹息，我行忽至舜所藏。江边父老能说子，白须红颊如君长。莫嫌琼雷隔云海，圣恩尚许遥相望。平生学道真实意，岂与穷达俱存亡。天其以我为箕子，要使此意留要荒。他年谁作輿地志，海南万古真吾乡。

行琼儋间肩輿坐睡梦中得句云千山动鳞甲
万谷酣笙钟觉而遇清风急雨戏作此数句

四州环一岛，百洞蟠其中。我行西北隅，如度月半弓。登高望中原，但见积水空。此生当安归，四顾真途穷。眇观大瀛海，坐咏谈天翁。茫茫太空中，一米谁雌雄。幽怀忽破散，永啸来天风。千山动鳞甲，万谷酣笙钟。安知非群仙，钧天宴未终。喜我归有期，举酒属青童，急雨岂无意，催诗走群龙。梦云忽变色，笑雷亦改容。应怪东坡老，颜衰语徒工，久矣此妙声，不闻蓬莱宫。

次前韵寄予由

我少即多难，遭回一生中。百年不易满，寸寸弯强弓。老矣复何言，荣辱今两空。泥丸尚一路，古语云，十方薄伽梵。一路涅槃门。所向余皆穷，似闻崆峒西，仇池迎此翁。胡为适南海，复驾垂天雄。下视九万里，浩浩皆积风。回望古合州，属此琉璃钟。离别何足道，我生岂有终。渡海十年归，方镜照两童。还乡亦何有，暂假壶公龙。峨眉向我笑，锦水为君容。天人巧相胜，不独数子工。措点昔游处，蒿莱生故宫。

安期生 并引

安期生，世知其为仙者也，然太史公曰：蒯通善齐人安期生，生尝以策于项羽，羽不能用，羽欲封此两人，两人终不肯受，亡去。予每读此，未尝不废书而叹、嗟乎，仙者非斯人而谁为之。故意战国之士，如鲁连虞卿皆得道者欤。

安期本策士，平日交蒯通。尝干重瞳子，不见隆准公。应如鲁仲连，抵掌吐长虹。难堪踞床洗，宁挹扛鼎雄。事既两大缪，飘然策遗风。乃知经世士，出世或乘龙。岂比山泽臞，忍饥啖柏松。纵使偶不死，正堪为仆僮。茂陵秋风客，望祖犹蚁蜂，海上如瓜枣，可闻不可逢。

夜 梦 并引

七月十三日至儋州，十余日矣。澹然无一事，学道未至静极生愁。夜梦如此，不免以书自怡。

夜梦嬉游童子如，父师检责惊走书。计功当毕春秋余，今乃始及桓庄初。但然悸寤心不舒，起坐有如挂钩鱼。我生纷纷婴百缘，气固多习独此偏。弃书事君四十年，仕不顾留书绕缠。自视汝与丘孰贤，易韦三绝丘犹然，如我当以犀革编。

迁居之夕闻邻舍儿诵书欣然而作

幽居乱蛙黾，生理半人禽。跽然已可喜，况闻弦诵音。儿声自圆美，谁家两青衿。且欣习齐淋，未敢笑越吟。九龄起韶石，姜子家日南。吾道无甫北，安知不生今。海阔尚挂斗，天高欲横参。荆棒短墙缺，灯火破屋深。引书兴相和，置酒仍独斟。可以情我醉，琅然如玉琴。

闻子由瘦 僮耳至难得肉食

五日一见花猪肉，十日一遇黄鸡粥。土人顿顿食薯芋，荐以熏鼠烧蝙蝠。旧闻蜜唧尝呕吐，稍近虾蟆缘习俗。十年京国厌肥 ，日日蒸花压红玉。从来此腹负将军，今者固宜安脱粟。俗谚云：大将军食饱，扞腹而叹曰：我不负汝。左右曰：将军固不负此腹，此腹负将军，未尝出少智虑也。人言天下无正味，即且未遽贤麋鹿。海康别驾复何为，帽宽带落惊僮仆。相看会作两臞仙，还乡定可骑黄鹄。

客俎经旬无肉又子由劝 不读书萧然清坐乃无一事

病怯腥膻不买鱼，尔来心腹一时虚。使君不复怜乌攫，属国方将掘鼠余。老去独收人所弃，游哉时到物之初。从今免被孙郎笑，绛帕蒙头读道书。

宥老楮

我墙东北隅，张王维老谷。树先樗栎大，叶等桑柘沃。流膏马乳涨，堕子杨梅熟。胡为寻丈地，养此不材木。蹶之得舆薪，规以种松菊。靖言求其用，略数得五六。肤为蔡侯纸，子入桐君录。黄缙练成素，黝面颊作玉。灌洒蒸生菌，腐余光吐烛。虽无做霜节，幸免狂醒毒。孤根信微陋，生理有倚伏。投斧为赋诗，德怨聊相赎。

观 棋 并引

予素不解棋，尝独游庐山白鹤观，观中人皆阖户昼寝，独闻棋声于古松流水之间，意欣然喜之，自尔欲学，然终不解也。儿子过，乃粗能者，僮守张中日从之戏。予亦隅坐竟日，不以为厌也。

五老峰前，白鹤遗趾。长松荫庭，风日清美。我时独游，不逢一士。谁欤棋者，户外屡二。不闻人声，时闻落子。纹枰坐对，谁究此味。空钩意钓，岂在鲂鲤。小儿近道，剥啄信指。胜固欣然，败亦可喜。优哉游哉，聊复尔耳。

余 米

余米买束薪，百物资之市。不缘耕樵得，饱食殊少味。再拜请邦君，愿受一厘地。知非笑昨梦，食力免内愧。春秧几时花，夏稗忽已穗。怅焉抚来耜，谁复识此意。

入 寺

曳杖入寺门，辑杖挹世尊。我是玉堂仙，谪来海南村。多生宿业尽，一气中夜存。旦随老鸦起，饥食扶桑暾。光圆摩尼珠，照耀玻璃盆。来从佛印可，稍觉魔忙奔。闲看树转午，坐到钟鸣昏。敛收平生心，耿耿聊自温。

次韵子由三首

东 亭

仙山佛国本同归，世路玄关两背驰。到处不妨闲卜筑，流年自可数期颐。遥知小槛临廛市，定有新松长棘茨。谁道苑檐劣容膝，海天风雨看纷披。

东 楼

白发苍颜自照盆，董生端合是前身。独栖高阁多辞客，为著新书未绝麟。小醉易醒风力软，安眠无梦雨声新。长歌自调真堪笑，底处人间是所欣。柳子厚诗云：长歌返故室，自谓非所欣。

椰子冠

天教日饮欲全丝，美酒生林不待仪。自流疏巾邀醉客，更将空壳付冠师。前汉高纪注云薛有作冠师。规摹简古人争看，簪导轻安发不知。更著短檐高屋帽，东坡何事不违时。

次韵子由月季花再生

幽芳本长春，暂瘁如蚀月。且当付造物，未易料枯朽。也知宿根深，便作紫笋茁。乘时出婉娩，为我暖栗冽。先生蚤贵重，庙论推英拔。而今城东瓜，不记召南茇。陋居有远寄，小圃无阔蹊。还为久处计，坐待行年匝。子由明年六十。腊果缀梅枝，春杯浮竹叶。谁言一萌动，已觉万木活。聊将玉蕊新，世谓此玫瑰花。插向纶巾折。

次韵子由浴罢

理发千梳净，风晞胜汤沐。闭息万窍通，雾散名干浴。颓然语默丧，静见天地复。时令具薪水，漫欲濯腰腹。陶匠不可求，盆斜何由足。海南无浴器，故常干浴而已。老鸡卧粪土，振羽双瞑目。倦马 风沙，奋鬣一喷玉。垢净各殊性，快惬聊自沃。云母透蜀纱，琉璃莹蕲竹。稍能梦中觉，渐使生处熟。楞严在床头，妙偈时仰读。返流归照性，独立遗所瞩。未知仰山禅，已就季主卜。安心会自得，助长毋相督。

借前韵贺子由生第四孙斗老

今日散幽忧，弹冠及新沐。况闻万里孙，已报三日浴。朋来四男子，大壮泰临复。开书喜见面，未饮春生腹。无官一身轻，有子万事足。举家传吉梦，殊相惊凡目。烂烂开眼电，硠硠峙头玉。李贺诗云：头玉硠硠眉刷翠，杜郎生得真男子。但令强筋骨，可以耕衍沃。不须富文章，端解耗纸竹。君归定何日，我计久已熟。长留五车书，要使九子读。吾与子由共九孙男矣。箠瓢有内乐，轩冕无流瞩。人言适似我，穷达已可卜。蚤谋二顷田，莫待八州督。吾前后典八州。

独 觉

瘴雾三年恬不怪，反畏北风生体疥。朝来缩颈似寒鸦，焰火生薪聊一快。红波翻屋春风起，先生默坐春风里，浮空眼缬散云霞，无数心花发桃李。翛然独觉午窗明，欲觉犹闻醉鼾声。回首向来萧瑟处，也无风雨也无晴。

十二月十七日夜坐达晓寄予由

灯烬不挑垂暗蕊，炉香重拨上余薰。清风欲发鸦翻树，缺月初升犬吠云。闭眼此心新活计，随身孤影旧知闻。雷州别乘应危坐，跨海幽光与子分。

谪居三适三首

旦起理发

安眠海自运，浩浩潮黄宫。日出露未晞，郁郁濛霜松。老栉从我久，齿疏含清风。一洗耳目明，习习万窍通。少年苦嗜睡，朝谒常匆匆。爬搔未云足，已困冠巾重。何异眼辕马，沙尘满风鬃。珣鞍响珂月，实与扭械同。解放不可期，枯柳岂易逢。谁能书此乐，献与腰金公。

午窗坐睡

蒲团盘两膝，竹几阁双肘。此间道路熟，径到无何有。身心两不见，息息安且久。睡蛇本亦无，何用钩与手。神疑疑夜禅，体适剧卯酒。我生有定数，禄尽空余寿。枯杨下飞花，膏泽回衰朽。谓我此为觉，物至了不受。谓我今方梦，此心初不垢。非梦亦非觉，请问稀夷叟。

夜卧濯足

长安大雪年，束薪抱衾裯。云安市无井，斗水宽百忧。今我逃空谷，孤城啸鸺鹠。得米如得珠，食菜不敢留。况有松风声，釜鬲鸣飕飕。瓦盎深及膝，时复冷暖投。明灯一瓜剪，快若鹰辞。天低瘴云重，地薄海气浮。土无重腿药，独以薪水瘳。谁能更包裹，冠履装沐猴。

子由生日

上天不难知，好恶与我一。方其未定间，人力破阴隲。少忍待其定，报应真可必。季氏生而仁，观过见其实。端如柳下惠，焉往不三黜。天有时而定，寿考未易毕。儿孙七男子，三子四孙。次第皆逢吉。遥知设罗门，独掩悬罄室。回思十年事，无愧篋中笔。但愿白发兄，年年作生日。

以黄子木拄杖为子由生日之寿

灵寿扶孔光，菊潭饮伯始。虽云闲草木，岂乐蒙此耻。一时偶收用，千载相瘢痂。海南无佳植，野果名黄子。坚瘦多节目，天材任操倚。嗟我始剪裁，世用或缘此。贵从老夫手，往配先生几。相从归故山，不愧仙人杞。本草，枸杞一名仙人杖。

过于海舶得迈寄书酒作诗远和之皆粲然 可观子由有书相庆也因用其韵赋一篇并 寄诸子侄

我似老牛鞭不动，雨滑泥深四蹄重。汝如黄犊走却来，海阔山高百程送。庶几门户有八慈，不恨居邻无二仲。他年汝曹笏满床，中夜起舞踏破甕。会当洗眼看腾跃，莫指痴腹笑空洞。誉儿虽是两翁癖，积德已自三世种。岂惟万一许生还，尚恐九十烦珍从。六子晨耕箨瓢出，众妇夜绩灯火共。春秋古史乃家法，诗笔离骚亦时用。但令文字还照世，粪上腐余安足梦。

上元夜过赴儋守召独 坐有感戊寅岁

使君置酒莫相违，守舍何妨独掩扉。静看月窗盘蜴蜥，卧闻风幔落蜘蛛。灯花结尽吾犹梦，香篆消时汝欲归。搔首凄凉十年事，传柑归遗满朝衣。

海南人不作寒食而以上巳上冢予携一瓢 酒寻诸生皆出矣独老符秀才在因与饮至 醉符盖儋人之安贫守静者也

老鸦衔肉纸飞灰，万里家山安在哉。苍耳林中太白过，鹿门山下德公回。管宁投老终归去，王式当年本不来。记取城南上巳日，木绵花落刺桐开。

新居

朝阳入北林，竹树散疏影。短篱寻丈间，寄我无穷境。旧居无一席，逐客犹遭屏。结茅得兹地，翳翳村巷永。数朝风雨凉，畦菊发新颖。俯仰可卒岁，何必谋二顷。

五色雀

海南有五色雀，常以两绦者为长，进止必随焉，俗谓之凤皇云。久旱而见辄雨，潦则反是。吾卜居儋耳城南，尝一至庭下，今日又见之。进士黎子云及其弟威家，既去，吾举酒祝之曰：若为吾来者，当再集也。已而果然，乃为赋诗。

粲粲五色羽，炎方凤之徒。青黄缟玄服，翼卫两绦朱。仁心知闵农，常告雨霖符。我穷惟四壁，破屋无瞻乌。惠然此粲者，来集竹与梧。锵鸣如玉佩，意欲相嬉娱。寂寞雨黎生，食菜直臞儒。小圃散春物，野桃陈雪肤。举杯得一笑，见此红鸾雏。高情如飞仙，未易握粟呼。胡为去复来，眷眷岂属吾。回翔天壤间，何必怀此都。

倦 夜

倦枕厌长夜，小窗终未明。孤村一犬吠，残月几人行。衰鬓久已白，旅怀空自清。荒园有络纬，虚织竟何成。

用过韵冬至与诸生饮酒

小酒生黎法，干糟凡盎中。芳辛知有毒，滴沥取无穷。冻醴寒初泫，春醅暖更 。华夷两樽合，醉笑一欢同。里闲峨山北，田园震泽东。归期郡敢说，安讯不曾通。鹤鬓惊全白，犀围尚半红。愁颜解符老，寿耳斗吴翁。得谷鹅初饱，亡猫鼠益丰。黄姜收土芋，苍耳斫霜丛。儿瘦缘储药，奴肥为种松。频频非窃食，数数尚乘风。河伯方夸若，灵媧自舞冯。归途陷泥淖，炬火燎茅蓬。膝上王文度，家传张长公。和诗仍醉墨，戏海乱群鸿。符吴皆坐客，其余皆即事实录也。

纵笔三首

寂寂东坡一病翁，白须萧散满霜风。小儿误喜朱颜在，一笑那知是酒红。

父老争看乌角巾，应缘曾现宰官身。溪边古路三叉口，独立斜阳数过人。北船不到米如珠，醉饱萧条半月无。明日东家知祀灶，只鸡斗酒定膾吾。

贫家净扫地

贫家净扫地，贫女好梳头。下士晚闻道，聊以拙自修。扣门有佳客，一饭相邀留。春炊勿草草，此客未易偷。慎勿用劳薪，感我如薰蕕。德人抱衡石，铢黍安可瘦。

次韵子由赠吴子野先生二绝句

马迹车轮满四方，若为闭著小苑堂。仙心欲捉左元放，痴疾还同顾长康。江令苍苔围故宅，谢家语燕集华堂。先生笑说江南事，祇有青山绕建康。

被酒独行遍至子云威徽先觉四黎之舍三首

半醒半醉问诸黎，竹刺藤梢步步迷。但寻牛矢觅归路，家在牛栏西复西。
总角黎家三小童，口吹葱叶送迎翁。莫作天涯万里意，溪边自有舞雩风。
符老风情奈老何，朱颜减尽鬓丝多。投梭每困东邻女，换扇唯逢春梦婆。
是日复见符林秀才，说换扇之事。

夜烧松明火

岁莫风雨交，客舍凄薄寒。夜烧松明火，照室红龙鸾。快焰初煌煌，碧烟稍团团。幽人忽富贵，穗帐芬椒兰。珠煤缀屋稍，香储音诣。松沥也，出本草注。流铜槃。坐看十八公，俯仰灰烬残。齐奴朝爨蜡，莱公夜长叹。海康无此物，烛尽更未阑。

庚辰岁人日作时闻黄河已复 北流老臣旧数论此今斯言乃验

老去仍栖隔海村，梦中时见作诗孙。天涯已惯逢人日，归路犹欣过鬼门。
三策已应思贾让，孤忠终未赦虞翻。典衣剩买河源米，屈指新 作上元。
不用长愁挂月村，槟榔生子竹生孙。海南勒竹，每节生枝，如竹竿大，盖竹孙也。新巢语燕还窥砚，旧雨来人不到门。春水芦根看鹤立，夕阳枫叶见鸦翻。此生念念随泡影，莫认家山作本元。

庚辰岁正月十二日天门冬 酒熟予自漉之且漉且尝遂以大醉二首

自拨床头一甕云，幽人先已醉浓芬。天门冬熟新年喜，淘米春香并舍闻。
杜子美诗云：闻道云安淘米春，盖酒名也。菜圃渐疏花漠漠，竹扉斜掩雨纷纷。
拥裘睡觉知何处，吹面东风散缬纹。
载酒无人过子云，年来家酝有奇芬。醉乡杏查谁同梦，睡息麴麴得自闻。
口业向诗犹小小，眼花因酒尚纷纷。点 更试淮南语，泛滥东风有毅纹。淮南子云：东风至而酒泛滥。许慎注云：酒泛，清酒也。

追和戊寅岁上元

春鸿社燕巧相违，白鹤峰头白板扉。石建方欣洗牖厕，姜庞不解叹蠹蛄。
一瓮京口嗟春梦，万炬钱塘忆夜归。合浦卖珠无复有，当年笑我泣牛衣。

题过所画枯木竹石

老可能为竹写真，小坡今与石传神。山僧自觉菩提长，心境都将付卧轮。
散木支离得自全，交柯蚴蟉欲相缠。不须更说能鸣雁，要以空中得尽年。
倦看涩勒暗蛮村，乱棘孤藤束瘴根。唯有长身六君子，依依犹得似淇园。

真一酒歌 并引

布算以步五星，不如仰观之捷；次律以求中声，不如耳齐之审；铅汞以为药，荣易以候火，不如天造之真也。是故神宅空乐，出虚蹻蹻者以气升，孰能推是类以求天造之药乎，于此有物，其名曰真一。远游先生方治此道，不饮不食，而饮此酒，食此药，居此堂。予亦窃其一二，故作真一之歌。其词曰：

空中细茎插天芒，不生沮泽生陵冈。涉阅四气更六阳，森然不受螟与蝗。飞龙御月作秋凉，苍波改色屯云黄。天旋雷动玉尘香，起搜十裂照坐光。跼跌牛噉安且详，动摇天关出琼浆。壬公飞空丁女藏，三伏遇井了不尝。酿为真一和而庄，三杯俨如侍君王。湛然寂照非楚狂，终身不入无功乡。

第七卷

诗八十九首

汲江煎茶

活水还须活火烹，唐人云：茶须缓火炙，活火煎。自临钓石取深清。大瓢贮月归春甕，小杓分江入夜鉶。茶雨已翻煎处脚，松风忽作泻时声。枯肠未易禁三碗，坐数荒村长短更。

予来儋耳得吠狗曰乌喙甚猛而驯随予迁合浦 过澄迈泅而济路人皆惊戏为作此诗

乌喙本海契，幸我为之主。食余已瓠肥，终不忧鼎俎。昼驯识宾客，夜捍为门户。知我当北还，掉尾喜欲舞。跳踉趁僮仆，吐舌喘汗雨。长桥不肯蹠，径度清深浦，拍浮似鹅鸭，登岸剧 虎。盗肉亦小疵，鞭箠当贯汝。再拜谢恩厚，天不遣言语。何当寄家书，黄耳定乃祖。

澄迈驿通潮阁二首

倦客愁闻归路遥，眼明飞阁俯长桥。贪看白鹭横秋浦，不觉青林没晚潮。余生欲老海南村，帝遣巫阳招我魂。杳杳天低鹧没处，青山一发是中原。

洞酌亭诗 并引

琼山郡东，众泉鬻发，然皆冽而不食。丁丑岁。六月，轼南迁过琼，始得双泉之甘于城之东北隅，以告其人，自是汲者常满，泉相去咫尺而异味。庚辰岁六月十七日，迁于合浦，复过之。太守承议郎陆公求泉上之亭名与诗，名之日洞酌。其诗曰：

洞酌彼两泉，挹彼注兹。一瓶之中，有泥有淄。以沦以烹，众喊莫齐。自江徂海，浩然无私。岂弟君子，江海是仪。既味我泉，亦啼我诗。

六月二十日夜渡海

参横斗转欲三更，苦雨终风也解晴，云散月明谁点缀，天容海色本澄清。空余鲁叟乘桴意，粗识轩辕奏乐声。九死南荒吾不恨，兹游奇绝冠平生。

自雷适廉宿于兴廉村净行院

荒凉海南北，佛舍如鸡栖。忽此榕林中，跨空飞拱榭。当门冽碧井，洗我两足泥。高堂磨新 ，洞户分角圭。倒床便甘寝，鼻息如虹霓。僮仆不肯去，我为半日稽。晨登一叶舟，醉兀十里溪。醒来知何处，归路老更迷。

廉州龙眼质味殊绝可敌荔支

龙眼与荔支，异出同父祖。端如柑与橘，未易相可否。异哉西海滨，琪树罗玄圃。累累似桃李，一一流膏乳。坐疑星陨空，又恐珠还浦。图经未尝说，玉食远莫数。独使皴皮生，弄色映瑯俎。蛮荒非汝辱，幸免妃子污。

合浦愈上人以诗名岭外将访道南岳留诗 壁上云闲伴孤云自在飞东坡居士过其精 舍戏和其韵

孤云出岫岂求伴，锡杖凌空自要飞。为问庭松尚西指，不知老桷几年归。

梅圣俞之客欧阳晦夫使工画茅庵已居其 中一琴横床而已曹子方作诗四韵仆和之云

寂寞王子猷，回船剡溪路。超遥戴安道，雪夕谁与度。倒披王恭氅，半掩袁安户。应调折弦琴，自和捻须句。

欧阳晦夫惠琴枕

中郎不眠仰看屋，得此古椽围尺竹。轮囷落非笛材，剖作袖琴徽轸足。流传几处到渊明，卧枕纶巾酒新漉。孤鸾别鹤谁复闻，鼻息齁齁自成曲。

留别廉守

编藿以荳猪，谨涂以涂之。小饼如嚼月，中有酥与饴。悬知合浦人，长诵东坡诗。好在真一酒，为我醉宗资。

瓶笙诗 并引

庚辰八月二十八日，刘几仲饯饮东坡。中觴闻笙萧声，杳杳若在云霄间，抑扬往返，粗中音节，徐而察之，则出于双瓶，水火相得，自然吟啸，盖食顷乃已。坐客惊叹，得未曾有，请作瓶笙诗记之。

孤松吟风细冷冷，独茧长缫女媧笙。陋哉石鼎逢弥明，丘蚓窍作苍蝇声。瓶中宫商自相赅，昭文无亏亦无成。东坡醉熟呼不醒，但云作劳吾耳鸣。

欧阳晦夫遗接离琴枕戏作此诗谢之

携儿过岭今七年，晚涂更着黎衣冠。白头穿林要藤帽，赤脚踏水须花纒。不愁故人惊绝倒，但使俚俗相恬安。见君合浦如梦寐，挽须握手俱泛澜。妻缝接离雾縠细，儿送琴枕冰徽寒。无弦且寄陶令意，倒载犹作山公看。我怀汝阴六一老，眉宇秀发如春峦。羽衣鹤氅古仙伯，岌岌两柱扶霜纨。至今画像作此服，凛如退之加渥丹。尔来前辈皆鬼录，我亦带脱巾敬宽。作诗颇似六一语，往往亦带梅翁酸。

次韵王郁林

晚涂流落不堪言，海上春泥手自翻。汉使节空余皓首，故侯瓜在有颓垣。平生多难非天意，此去残年尽主恩。误辱使君相收拭，宁闻老鹤更乘轩。

藤州江上夜起对月赠邵道士

江月照我心，江水洗我肝。端如径寸珠，堕此白玉盘。我心本如此，月满江不湍。起舞者谁欤，莫作三人看。峽南瘴毒地，有此江月寒。乃知天壤间，何人不清安。床头有白酒，盎若白露清。独醉还独醒，夜气清漫漫。仍呼邵道士，取琴月下弹。相将乘一叶，夜下苍梧滩。

徐元用使君与其子端常邀仆与小儿过同游东山浮金堂戏作此诗

昔与徐使君，共赏钱塘春。爱此小天竺，时来中圣人。松如迁客老，酒似使君醇。系舟藤城下，弄月潭汪滨。江月夜夜好，云山朝朝新。使君有令子，真是石麒麟。我子乃散材，有如木轮囷。二老白接离，两郎乌角巾。醉卧松下石，扶归江上津。浮桥半没水，揭此碧鳞鳞。

送鲜于都曹归蜀灌口旧居

策尽霜须照碧铜，依然春雪在长松。朝行犀浦催收芋，夜渡绳桥看伏龙。莫叹倦游无驷马，要将老健敌千钟。子云三世惟身在，为向西南说病容。

送邵道士彦肃还都峽

乞得纷纷扰扰身，结苑都峽与仙邻。少而寡欲颜常好，老不求名语益真。许迈有妻还学道，陶潜无酒亦从人。相随十日还归去，万劫清游结此因。

书韩干二马

赤髯碧眼老鲜卑，回策如萦独善骑。赭白紫骝俱绝世，马中岳湛有妍姿。

将至广州用过韵寄迈迨二子

皇天遣出家，临老乃学道。北归为儿子，破戒堪一笑。披云见天眼，回首失海潦。蛮唱与黎歌，余音犹杳杳。大儿牧众稚，四岁守孤峽。次子病学医，三折乃粗晓。小儿耕且养，得暇为书绕。我亦困诗酒，去道愈茫渺。纷纷何时定，所至皆可老。莫学柳仪曹，诗书教氓獠。亦莫事登陟，溪山有何好。安居与我游，闭户净洒扫。

赠郑清叟秀才

风涛战扶胥，海贼横泥子。胡为犯二怖，博此一笑喜。问君奚所欲，欲谈仁义耳。我才不逮人，所有聊足已。安能相付予，过听君误矣。霜风扫瘴毒，冬日稍清美。年来万事足，所欠惟一死。澹然两无求，滑净空棐几。

和孙叔静兄弟李瑞叔唱和

病骨瘦欲折，霜髯策更疏。喜闻新国政，兼得故人书。秉烛真如梦，倾杯不敢余。天涯老兄弟，怀抱几时摅。

广倅萧大夫借前韵见赠复和答之

坐还粗胜虞，早退不如疏。垂死初闻道，平生误信书。风涛惊夜半，疾病送灾余。赖有萧夫子，幽怀得少摅。心闲诗自放，笔老语翻疏。赠我皆强韵，知君得异书。滔滔沮曳是，绰绰孟生余。一笑沧溟侧，应无愤可摅。

王进叔所藏画跋尾五首

徐熙杏花

江左风流王谢家，尽携书画到天涯。却因梅雨丹青暗，洗出徐熙落墨花。

赵昌四季

芍药

倚竹佳人翠袖长，天寒犹着薄罗裳。扬州近日红千叶，自是风流时世妆。

踯躅

枫林翠壁楚江边，踯躅千层不忍看。开卷便知归路近，剑南樵叟为施丹。

寒菊

轻肌弱骨散幽葩，真是青裙两髻了。便有佳名配黄菊，应缘霜后苦无花。

山茶

游蜂掠尽粉丝黄，落蕊犹收蜜露香。待得春风几枝在，年来杀菽有飞霜。

和黄秀才鉴空阁

明月本自明，无心孰为境。挂空如水鉴，写此山河影。我观大瀛海，巨浸与天永。九州居其间，无异蛇盘镜。空水两无质，相照但耿耿。妄云桂兔

蟆，俗说皆可屏。我游鉴空阁，缺月正凄冷。黄子寒无衣，对月句愈警。借君方诸泪，一沐管城颖。谁言小丛林，清绝冠五岭。

韦偃牧马图

神工妙技帝所收，江都曹韩逝莫留。人间画马唯韦侯，当年为谁扫骅骝。至今霜蹄踏长楸，围人困卧涉垆头。沙苑茫茫蒺藜秋，风发雾鬣寒飕飕。龙种尚与驽骀游，长稽短豆岂我羞。八銮六辔非马谋，古来西山与东丘。

题灵峰寺壁

灵峰山上宝陀寺，白发东坡又到来。前世德云今我是，依稀犹记妙高台。

众妙堂

湛然无观古真人，我独观此众妙门。夫物芸芸各归根，众中得一道乃存。道人晨起开东轩，趺坐一醉扶桑暾。余光照我玻璃盆，倒射窗几清而温。欲收月魄餐日魂，我自日月谁使吞。

题冯通直明月湖诗后

老衍清篇墨未枯，小冯新作语尤姝。呼儿净洗涵星砚，为子赓歌堕月湖。闻道江空抱珥，年来合浦自还珠。请君多酿莲花酒，准拟王乔下履舄。南诏有西洱河，即古柯江也。河形如月耳珥，故名之西洱云。

次韵郑介夫二首

一落泥涂迹愈深，尺薪如桂米如金。长庚到晓空陪月，太岁今年合守心。相与啮毡持汉节，何妨振履出商音。孤云倦鸟空来往，自要闲飞不作霖。

一生忧患萃残年，心似惊蚕未易眠。海上偶来期汗漫，苇间犹得见寅缘。良医自要经三折，老将何妨败两甄。收取桑榆种梨枣，祝君眉寿似增川。

昔在九江与苏伯固唱和其略曰我梦扁舟
浮震泽雪浪横江千顷白觉来满眼是庐山
倚天无数开青壁盖实梦也昨日又梦伯固
手持乳香婴儿示予觉而思之盖南华赐物
也岂复与伯固相见于此耶今得来书已在
南华相待数日矣感叹不已故先寄此诗

扁舟震泽定何时，满眼庐山觉又非。春草池塘惠连梦，上林鸿雁子卿归。水香知是曹溪口，眼净同看古佛衣。不向南华结香火，此生何处是真依。

次韵韶守狄大夫见赠二首

华发萧萧老遂良，褚河南帖云：即日遂良须发尽白，盖谪长沙时也。一身萍挂海中央。无钱种菜为家业，有病安心是药方。才疏正类孔文举，凝绝还同顾长康。万里归来空泣血，七年供奉殿西廊。迩英阁在延和殿西廊下。

森森画乾拥朱轮，坐咏梁公觉有神。白传间游空诵句，事见乐天吴郡诗石叙。拾遗穷老敢论亲。事见子美赠狄明府诗。东海莫怀疏受意，西风幸免庾公尘。为公过岭传新唱，催发寒梅一信春。

次韵韶倅李通直二首

一篇泷吏可书绅，莫向长沮更问津。老去常忧伴新鬼，归来且喜是陈人。曾陪令尹苍髯古，又见郎君白发新。回首天涯一惆怅，却登梅岭望枫宸。

青山祇在古城隅，万里归来卜筑初。会见四山朝鹤驾，更看二李控鲸鱼。欲从抱朴传家学，应怪中郎得异书。待我丹成驭风去，借君琼佩与霞裾。仆昔为开封幕，先公为赤令，暇日相与论内外丹，且出其丹示仆。今三十年而见君曲江，同游南华，宿山水间数日，道旧感叹，且劝我卜居子舒，故诗中皆及之。

狄韶州煮蔓菁芦菔羹

我昔在田间，寒庖有珍烹。常支折脚鼎，自煮花蔓菁。中年失此味，想像如隔生。谁知南岳老，解作东坡羹。中有芦菔根，尚含晓露清。勿语贵公子，从渠醉糟腥。

李伯时画其弟亮功旧宅图

乐天蚤退今安有，摩诘长闲古亦无。五亩自栽池上竹，十年空看辋川图。近闻陶令开三径，应许扬雄寄一区。晚岁与君同活计，如云鹅鸭散平湖。

赠龙光长老

斫得龙光竹两竿，持归岭北万人看。竹中一滴曹溪水，涨起西江十八滩。

赠岭上老人

鹤骨霜髯心已灰，青松合抱手亲栽。问翁大庾岭头住，曾见南迁几个回。

赠岭上梅

梅花开尽杂花开，过尽行人君不来。不趁青梅尝煮酒，要看细雨熟黄梅。

予昔过岭而南题诗龙泉钟上今复过而北次其韵

秋风卷黄落，朝雨洗绿净。人贪归路好，节近中原正。下岭独徐行，艰
险未敢忘。遥知叔孙子，已致鲁诸生。

过岭二首

暂著南冠不到头，却随北雁与归休。平生不作兔三窟，今古何殊貉一丘。
当日无人送临贺，至今有庙祀潮州。剑关西望七千里，乘兴真为玉局游。
七年来往我何堪，又试曹溪一勺甘。梦里似曾迁海外，醉中不觉到江南。
波生濯足鸣空涧，雾绕征衣滴翠岚。谁遣山鸡忽惊起，半岩花雨落毵毵。

留题显圣寺

渺渺疏林集晚鸦，孤村烟火梵王家。幽人自种千头橘，远客来寻百结花。
浮石已干霜后水，焦坑闲试雨前茶。祇疑归梦西南去，翠竹江村缭白沙。

子初谪岭南过田氏水阁东南一峰丰下锐
上俚人谓鸡笼山予更名独秀峰今复过之
戏留一绝

倚天巉绝玉浮屠，肯与彭郎作小姑。独秀江南知有意，要三二别四方壶。

乞数珠一首赠南禅湜老

从君觅数珠，老境仗消遣。未敢转千佛，且从千佛转。儒生推变化，乾
策数大衍。道士守玄牝，龙虎看舒卷。我老安能为，万劫付一喘。默坐阅尘
界，往来八十反。区区我所寄，蹙缩蚕在茧。适从海上回，蓬莱又清浅。

郁孤台 再过虔州和前韵

吾生如寄耳，岭海亦闲游。赣石三百里，寒江尺五流。楚山微有霰，越
瘴久无秋。望断横云峤，魂飞咤雪洲。晓钟时出寺，暮鼓各鸣楼。归路迷千
嶂，劳生阅百州。不随猿鹤化，甘作贾胡留。祇有貂裘在，犹堪买钓舟。

虔守霍大夫监郡许朝奉见和此诗复次前韵

大邦安静治，小院得闲游。赣水雨已涨，廉泉春水流。同烹贡茗雪，一
洗瘴茅秋。秋思生莼鲙，寒衣待橘洲。扬雄未有宅，王粲且登楼。老境无多
日，归心梦几州。敢因逃酒去，端为和诗留。旧篋藏新语，清风自满舟。

赠虔州术士谢君

属国新从海外归，君平且莫下帘帷。前生恐是卢行者，后学过呼韩退之。
死后人传戒定慧，生时宿直斗牛箕。凭君为算行年看，便数生时到死时。

虔州景德寺荣师湛然堂

卓然精明念不起，兀然灰槁照不灭。方定之时慧在定，定慧寂照非两法。妙湛总持不动尊，默然真入不二门。语息则默非对话，此话要将周易论。诸方人人把雷电，不容细看真头面。欲知妙湛与总持，更问江东三语掾。

和阳行先 用郁孤台韵

室空惟法喜，心定有天游。摩诘元无病，须沮不入流。若嫌寻直枉，坐待寸田秋。虽未麒麟阁，已逃鹦鹉洲。酒醒风动竹，梦断月窥楼。众谓元德秀，自称阳道州。拔葵终相鲁，辟谷会封留。用舍俱无碍，飘然不系舟。

用数珠韵赠湜长老

嗣宗虽不言，叔宝犹理遣。东坡但熟睡，一夕一展转。南迁昔虞翻，却扫今冯衍。古佛既手提，诸方皆席卷。当年清隐老，鹤瘦归不喘。和我弹丸寺，百发亦百反。耆年日调丧，但有犊角茧。时来窥方丈，共笑尻毛浅。

和犹子迟韵赠孙志举

轩裳大炉，陶冶一世人。从衡落模范，谁复甘饥贫。可怜方回痴，初不疑嘉宾。颇念怀祖黠，瞋儿与兵姻。失身堕浩渺，投老无涯垠。回看十年旧，谁似数子真。孙郎表独立，霜戟交重闉。深居小汝覲，岂问亲与邻。连枝皆秀杰，英气推伯仁。我从海外归，喜及崆峒春。新年得异书，西郭有逸民。阳行先以登真隐诀见借。小孙又过我，欢若平生亲。清诗五百言，句句皆绝伦。养火虽未伏，要是丹砂银。我家六男子，朴学非时新。诗词各璀璨，老语徒周諄。愿言敦夙好，永与竹林均，六子岂可忘，从我屡厄陈。

南禅长老和诗不已故作六虫篇答之

凤凰览德辉，远引不待遣。鸛鹑恋庭宇，倏忽来千转。那将坐井蛙，而比谈天衍。蠢鱼著文字，槁死犹遭卷。老牛疲耕作，见月亦妄喘。东坡方三问，甫禅已五反。老人但目击，侍者应足茧。最后六虫篇，深寄恨语浅。

明日南禅和诗不到 故重赋数殊篇以督之二首

未来不可招，已过那容遣。中间见在心，一一风轮转。自从一生二，巧历莫能衍。不如袖手坐，六用都怀卷。风雷生警欬，万窍自号喘。诗人思无邪，孟子内自反。大珠分一月，细纆合两茧。累然挂禅床，妙用夫岂浅。

朝来取饭化，乃是维摩遣。全锋虽未露，半藏已曾转。说有陋裴頠，谈无笑王衍。看经聊尔耳，遮眼初不卷。三咤故自醒，一呬何由喘。请归视故棣，静夜珠当反。安居三十年，古衲磨山茧。持珠尚默坐，岂是功用浅。

用前韵再和霍大夫

文字先生饮，谓刘执中江山清献游。典刑传父老，尊俎继风流。度岭逢梅雨，还家指麦秋。自惭鸿雁侣，争集稻梁洲。野阔横双练，城坚耸百楼。行看凤尾诏，却下虎头州。君意已吴越，我行无去留。归涂应食粥，乞米使君舟。

用前韵再和许朝奉

高门元世旧，客路晓追游。清绝闻诗语，疏通岂法流。传家有衣钵，断狱尽春秋。邂逅陪车马，寻芳谢眺洲。凄凉望乡国，得句仲宣楼。恨赋投湘水，悲歌祀柳州。何如五字律，相与一樽留。更约登尘外，归时月满舟。

用前韵再和孙志举

人众者胜天，天定亦胜人。邓通岂不富，郭解安得贫。惊飞贺厦燕，走散人幕宾。醉眠中山酒，梦结南柯姻。宠辱能几何，悲欢浩无垠。回视人间世，了无一事真。洒扫古玉局，香火通帝闈。我室思无邪，我堂德有邻。所至为乡里，事贤友其仁。之子富经术，蔚如井火春。蜿螭楚南极，淑气生此民。唱高和自寡，非我谁当亲。譬彼嶰谷竹，剪裁侍伶伦。俗学吁可鄙，纸缙配乌银。聊将调痴鬼，亦复争华新。愿子事笃实，浮言扫谗諛。穷通付造物，得丧理本均。期子如太仓，会当发陈陈。

崔文学申携文见过萧然有出尘之姿问之 则孙介夫之甥也故复用前韵赋一篇示志举

象服盛簪珥，岂是邢夫人。弊衣破冠履，可怜范叔贫。君看崔员外，晚就观国宾。当年颇赫赫，翁媪争为姻。事见退之赠崔员外诗。蹭蹬阻风水，横斜挂边垠。青衫映白发，今似梅子真。道存百无害，甘守吴市闈。自言总角岁，慈母为择邻。邦人惊似舅，矫矫恶不仁。诗文非他师，家法乃富春。岂非空同秀，为国产隗民。挺然齐鲁生，近出姬姜亲。为文不在多，一颂了伯伦。清诗要鍛链，乃得铅中银。自我迁岭外，七见槐火新。著书已绝笔，一默含千諛。蕞桴和苇籥，天节非人均。时时自娱嬉，岂为俗子陈。

画车诗二首

何人画此只轮车，便是当年欵器图。上易下难须审细，左提右挈免疏虞。九衢歌舞颂主明，谁恻寒泉独自清。赖有千车能散福，化为膏雨满重城。

虔州吕倚承奉年八十三读书作诗不已 好收古今帖贫甚至食不足

杨雄老无子，冯衍终不遇。不识孔方兄，但有灵照女。家藏古今帖，墨色照箱笥。饥来据空案，一字不堪煮。枯肠五千卷，磊落相撑拄。吟为蝸

声，时有岛可句。为语里长者，德齿敬已古。如翁有几人，薄少可时助。

王子直去岁送子由北归往反百
舍今又相逢赣上戏用旧韵作诗留别

米尽无人典破裘，送行万里一邹游。解舟又欲携君去，归舍聊须与妇谋。
闻道年来丹伏火，不愁老去雪蒙头。剩买山田添鹤口，庙堂新拜富民侯。

次韵江晦叔二首

人老家何在，龙眠雨未惊。酒船回太白，稚子候渊明。幸与登仙郭，同
依坐啸成。小楼看月上，剧饮到参横。钟鼓江南岸，归来梦自惊。浮云世事
改，孤月此心明。雨已倾盆落，诗仍翻水成。二江争送客，木杪看桥横。

次韵江晦叔兼呈器之

横空初不跨鹏鳌，但觉胡床步步高。器之言尝梦飞。自觉身与所坐床，
皆起空中。一枕昼眠春有梦，扁舟夜渡海无涛。归来又见颠茶陆，多病仍逢
止酒陶。笑说南荒底处所，祇今榕叶下亭皋。

寒食与器之游南塔寺寂照堂

城南钟鼓斗清新，端为投荒洗瘴尘。总是镜空堂上客，谁为寂照镜中人。
红英扫地风惊晓，绿叶成阴雨洗春。记取明年作寒食，杏花曾与此翁邻。

器之好谈禅不喜游山山中笋出戏语
器之可同参玉板长老作此诗

丛林真百丈，法嗣有横枝。玉板横枝，竹笋也。不怕石头路，来参玉板
师。聊凭柏树子，与问箴龙儿。瓦砾犹能说，此君那不知。

永和清都观谢道士童颜须发
问其年生于丙子盖与予同求此诗

镜湖敕赐老江东，未似西归玉局翁。羈枕未容春梦断，青都宛在默存中。
每逢佳境携儿去，试问流年与我同。自笑余生消底物，半篙清涨百滩空。予
与刘器之同发虔州，江水忽清，涨丈余。赣右三百里，无一见者，至永和。
器之解舟先去，予独游清都，作此诗。

赠诗僧道通

雄豪而妙苦而腴，祇有琴聪与蜜殊。钱塘僧思聪，总角善琴。后舍琴而
学诗。复弃诗而学道。其诗似皎然而加雄放。安州僧仲殊诗，敏捷立成，而
工妙绝人远甚，殊辟谷常啖蜜。语带烟霞从古少，李太白云：他人之文，如

山无烟霞，春无草木。气含蔬笋到公无。谓无酸馁气也。香村乍喜闻薜葡，古井惟愁断辘轳。为报韩公莫轻许，从今岛可是诗奴。

张竞辰永康所居万卷堂

君家四壁如相如，卷藏天禄吞石渠。岂惟邺侯三万轴，家有世南行秘书。儿童拍手笑何事，笑人空腹谈经义。未许中郎得异书，且共扬雄说奇字。清江萦山碧玉环，下有老龙千古闲。知君好事家有酒，化为老人夜扣关。留侯之孙书满腹，玉函宝方何用读。濠梁空复五车多，圯上从来一篇足。

刘壮舆长官是是堂

间燕言仁义，是非安可无。非非义之属，是是仁之徒。非非近乎讪，是是近乎谏。当为感麟翁，善恶分锱铢。抑为阮嗣宗，臧否两含糊。刘君有家学，三世道益孤。陈古以刺今，絀史行天诛。皎如大明镜，百陋逢一妹。鸮立时四顾，何由扰群狐。作堂名是是，自说行坦途。孜孜称善人，不善自远狙。愿君置坐右，此语禹所谟。

予昔作壶中九华诗其后八年复过湖口则石已为好事者取去乃和前韵以自解云

江边阵马走千峰，问讯方知冀北空。尤物已随清梦断，刘梦得以九华为造物一尤物。真形犹在画图中。道藏有五岳真形图。归来晚岁同元亮，却扫何人伴敬通。赖有铜盆修石供，仇池玉色自 珑。家有铜盆贮仇池石，正绿色，有洞水达背，予又尝以怪石供佛印师，作怪石供一篇。

次韵郭功甫二首

蚤知臭腐即神奇，海北天南总是归。九万里风安税驾，云鹏今悔不卑飞。可怜倦鸟不知时，空羨骑鲸得所归。玉局西南天一角，万人沙苑看孤飞。

次韵法芝举旧诗

春来何处不归鸿，非复羸牛踏旧踪。但愿老师真似月，谁家瓮里不相逢。

次旧韵赠清凉长老

过淮入洛地多尘，举扇西风欲污人。但怪云山不改色，岂知江月解分身。安心有道年颜好，遇物无情句法新。送我长芦舟一叶，笑看雪浪满衣巾。

睡起闻米元章到东园送麦门冬饮子

一枕清风直万钱，无人肯买此惺眠。开心暖胃门冬饮，知是东坡手自煎。

梦中作寄朱行中

舜不作六器，谁知贵珣璠。哀哉楚狂士，抱璞号空山。相如起睨柱，头壁相与还。何如郑子产，有礼国自闲。虽微韩宣子，鄙夫亦怀环。至今不贪宝，凛然照尘寰。

答径山琳长老

与君皆丙子，各已三万日。一日一千偈，电往那容诘。大患缘有身，无身则无疾。平生笑罗付，神咒真浪出。

何公桥诗

天壤之间，水居其多。人之往来，如鷁在河。顺水而行，云驶鸟疾。维水之利，千里咫尺。乱流而涉，过膝则止。维水之害，颺尺千里。沔彼滥觞，蛙跳儵游。溢而怀山，神禹所忧。岂无一木，支此大坏。舞于盘涡，冰拆雷解。坐使此邦，画为两州。鸡犬相闻，胡越莫救。允毅何公，甚勇于仁。始作石梁，其艰其勤。将作复止，更此百难。公心如铁，非石则坚。公以身先，民以悦使。老壮负石，如负其子。为玉虹，隐为金堤。直栏横槛，百贾所栖。我来与公，同载而出。欢呼填道，抱其马足。我叹而言，视此滔滔。未见刚者，孰为此桥。愿公千岁，与桥寿考。持节复来，以慰父老。如朱仲卿，食于桐乡。我作铭诗，子孙不忘。

续 集
第 一 卷

古诗一百六十五首

灵上访道人不遇

花光红满栏，草色绿无岸。不逢青眼人，长歌白石涧。

送淡公二首

燕本冰雪骨，越淡莲花风。五言双宝刀，联响高飞鸿。翰苑钱舍人，诗韵铿雷公。识本不识淡，仰咏嗟无穷。清韵生物表，朗玉倾壶中。常于冷竹坐，相语道意冲。崧洛兴不薄，稽江事难同。明日若不来，我作黄石翁。何以兀其心，为君学虚空。

坐重青草公，意合沧海滨。渺渺独见水，悠悠不闻人。镜浪洗手绿，剡花入心春。虽然防外触，眼前遶衣新。行当译文字，慰此吟殷勤。

北归次韵

秋风卷黄落，朝雨洗绿净。人贪归路好，节近中原正。下岭独徐行，艰难一作嶮未敢忘。遥知叔孙子，已致鲁诸生。

上韩持国

韩氏三虎秉枢极，中有一虎似伟节。端居隐几学无心，夙驾入朝常正色。犯时独行太，回天不忌真药石。擎致归来荷二圣，推排使至有众力。吾侪小人但饱饭，不有君子何能国。西湖醉卧春水船，如何为人作丰年。

送 别

鸭头春水浓如染，水面桃花弄春脸。衰翁送客水边行，沙衬马蹄乌帽点。昂头问客几时归，客道秋风落叶飞。系马绿杨开口笑，傍山依约见斜晖。

琴 枕

清眸作金徽，素齿为玉轸。响泉竟何用，金带常苦窘。斓斑渍珠泪，宛转堆云鬢。若若安七絃，应弹卓氏引。

黄 州

南山一尺雪，雪尽山苍然。涧谷深自暖，梅花应已繁。使君厌骑从，车马留山前。行歌招野叟，共步青林间。长松得高荫，盘石堪醉眠。祇乐听山鸟，携琴写幽泉。爱之欲忘返，但苦世俗牵。归来始觉远，明月高峰颠。

常山赠刘鋹

刘侯年少日，骏马拊便面。援弓应自落，不待白羽贯。

古 风

精神洞元化，白日升高。俯仰倒景，龙行速如神。半道过紫府，弭节聊逡巡。金床设宝几，璀璨明月珍。仙者二三子，眷然骨肉亲。饮我霞石杯，放杯恍如春。遂朝玉虚上，冠剑班列真。无端拜失仪，放弃令自新。云霄难遽返，下土多埃尘。淮南守天庖，嗟我复何人。

游杭州山

山平村坞迷，野寺钟相答。晚阴失林莽，一作抄落日犹在塔。行招两社僧，共步青山月。送客渡石桥，迎客出林樾。幽寻本真性，往事听徐说。钱王方壮年，此邦事轻侠。乡人鄙贫贱，异类识英杰。立石像兴王，遗址今岌岌。功勋三吴定，富贵四海甲。归来父老藏，崇高畏倾一作轻压。诗人工讥病，此欲恣挑抉。流传后世，谈笑资口舌。是非今已矣，兴废何仓卒。持归问禅翁，笑指浮沕没。

游三游洞游洞之日有亭吏乞诗既为留三
绝句于洞之石壁明日至峡州吏又至意若
未足乃复以此授之

一径遶山翠，萦纡去似蛇。忽惊溪水急，争看洞门呀。滑蹬攀秋蔓，飞桥踏古槎。三扉迎北吹，一穴向西斜。叹息烟云去，追思岁月遐。唐人昔未到，古俗此为家。洞暖无风雪，山深富鹿豨。相逢衣尽草，环坐髻应髻。灶突依岩黑，樽罍就石窪。洪荒无传记，想像在牺媧。此事今安有，遗踪我独嗟。山翁劝留句，强为写槎牙。

穆父新凉

家居妻儿号，出仕猿鹤怨。未能逐什一，安敢搏九万。常恐樗栌身，坐缠冠盖蔓。受恩如负债，粗报乃焚券。但知眠牛衣，宁免刺虎圈。清风来既雨，新稻香可饭。紫螯应已肥，白酒谁能劝。君今崔蔡手，政比张赵健。三公行可致，一语自先献。幸推江湖心，边我鱼鸟头。

无 题

引手攀红樱，红樱落如线。仰首看红日，红日走如箭。年光与时景，顷刻互衰变。何当血肉身，安得常强健。人心苦执迷，富贵忧贫贱。忧色常在眉，欢容不上面。吾今头半白，把镜非不见。惟应花下杯，更待他人劝。

十一月三日与几先自竹西来访庆老不见
独与君卿供奉蟾知客东阁道话久之惠州
追录

卷卷长廊走黄叶，席帘垂地香烟歇。主人待来终不来，火红销尽灰如雪。

古 意

儿曹鞭笞学官府，翁怜儿痴旁笑侮。翁出坐曹鞭复呵，贤于群儿能几何。
儿曹鞭人以为戏，公怒鞭人血流地。等为戏剧谁复先，我笑为翁儿更贤。

次子由诗相庆

我似老牛鞭不动，雨滑泥深四蹄重。汝如黄犊却走来，海阔山高百程送。
庶儿门户有八慈，不恨居邻无二仲。他年汝曹笏满床，中夜起舞踏破瓮。
会当洗眼看腾跃，莫借痴腹笑空洞。誉儿虽是两翁癖，积德已自三世种。
岂惟万一许生还，尚恐九十烦珎从。六子晨耕箠瓢出，众妇夜缉灯火共。
春秋古史乃家法，诗笔离骚亦时用。但令文史还照一作昭世，粪土腐馀安足梦。

用定国韵赠二十侄震

衡门老苔藓，行柏千兵屯。开樽邀落日，未对乌鸟言。清风举吹籁，散
乱书秩翻。传呼一何急，人马从车奔。贫居少宾客，邻妇窥篱藩。墙头过春
酒，绿泛田家盆。比来伏青蒲，坐捉白兽樽。王猷修润色，亦有簿领烦。朝
廷贵二陆，屡闻天语温。犹能整笔阵，愧我非韩孙。

正辅既见和复次前韵慰鼓盆劝学佛

稚川信一作真长生，少从郑君游。孝章偶不死，免为文举忧。馀龄会有
过，一作边独往岂相攸。由来警露鹤，不羨撮蚤鹞。愿加视后鞭，同驾躅空
辇。宁飧脱齿堇，勿忆齐眉羞。何时遂纵壑，归路同首丘。东冈松柏老，西
岭橘柚秋。着意寻弥明，长颈高结喉。无心逐定远，燕颌飞虎头。君方卒功
名，一泛范蠡舟。我亦沾需渥，渐解钟仪囚。宁须张子房，万户自择留。犹
滕嵇州夜，孤愤甘长幽。南窗可寄傲，北山早归耒。此语君勿疑，老彭跨商
周。

闻潮阳吴子野出家

子昔少年日，气盖里间侠。自言似剧孟，叩门知缓急。千金已散尽，白
首空四壁。烈士叹暮年，老骥悲伏枥。妻孥真弊屣，脱弃何足惜。四大犹幻
尘，衣冠矧外物。一朝发无上，顾老灵山宅。世事子如何，禅心久空寂。世
间出世间，此道无两得。故应入枯槁，习气要除拂。丈夫生岂易，趣舍志匪
石。当为师子吼，佛法无南北。

吕倚梦得承事借示古今书一轴作诗代跋
尾倚年八十一

杨雄老无子，冯衍终不遇。不识孔方兄，但有灵照女。家藏古今帖，墨色照箱笥。饥来据空案，一字不堪煮。枯肠五千卷，磊落相撑拄。吟为蝮蛩声，时有岛可句。为语里长者，德齿敬已古。如翁有几人，薄少可时助。

补唐文宗柳公权联句

人皆苦炎热，我爱夏日长。薰风从南来，殿阁生微凉。一为居所移，苦乐永相忘。愿言均此施，清阴分四方。

宋玉对楚王，此独大王之雄风也，庶人安得而共之？讥楚王知己而不知人也。柳公权小子与文宗联句，有美而无箴，故为足成其篇云。

食槟榔

月照无枝林，夜栋立万础。吵吵云间扇，荫此九月暑。上有垂房子，下绕绛刺御。风欺紫凤卵，雨暗苍龙乳。裂包一堕地，还以皮自煮。北客初未诸，劝食俗难阻。中虚畏泄气，始爵或半吐。吸津得微甘，著齿随亦苦。面目太岩冷，滋味绝媚妩。诛彭勋可荣，推轂勇宜贾。瘴风作坚顽，导利时有补。药储固可尔，果录讵用许。先生失膏粱，便腹委败鼓。日啖过一粒，肠胃为所侮。蛰雷殷脐肾，藜藿腐亭午。书灯看膏尽，钲漏历历数。老眼怕少睡，竟使赤眚努。渴思梅林咽，饥念黄独举。奈何农经中，收此困羁旅。牛舌不饷人，一斛肯多与。乃知见本偏，但可酬恶语。

古离别送苏伯固

三度别君来，此别真迟暮。白尽老髭须，明日淮南去。酒罢月随人，泪湿花如雾。后夜逐君还，梦绕湖边一作江南路。

次韵鲁直书伯时画王摩诘

前身陶彭泽，后身韦苏州。欲觅王右丞，还向五字求。诗人与画手，兰菊芳春秋。又恐两皆是，分身来入流。

试 笔

子石如琢玉，远烟真削鬣。入我病风手，玄云滃淒淒。是中有何好，而我喜欲迷。既似蜡展阮，又如鍛柳嵇。醉笔得天全，宛宛天投蜺。多谢中书君，伴我此幽栖。

雷州八首

白发坐钩党，南迁濒海州。灌园以糊口，身自杂苍头。篱落秋暑中，碧

花蔓牵牛。谁知把锄人，旧日东陵侯。

荔子无几何，黄柑遽如许。迂臣不惜日，恣意移寒暑。层巢俯云木，信美非吾土。草芳自有时，鶗鴂何关汝。

下居近流水，小巢依岭岑。终日数椽间，但闻鸟遗音。炉香入幽梦，海月明孤斟。鸛鷖一技足，所恨非故林。

培 无松柏，驾言此为游。读书与意会，却扫可忘忧。尺蠖以时屈，其伸亦非求。得归良不恶，未归且淹留。

粤岭风俗殊，有疾皆勿药。束带趁房祀，用史巫纷若。弦歌荐茧栗，奴至洽觴酌。呻吟殊未央，更把鸡骨灼。

粤女市无常，所至辄成区。一日三四迁，处处售虾鱼。青裙脚不袜，臭味猿与狙。孰云风土恶，白洲生绿珠。

海康腊已西，不论冬孟仲。杀牛挝鼓祭，城郭为倾动。虽非尧颁历，自我先人用。苦笑荆楚人，嘉平腊云梦。

旧时日南郡，野女出成群。此去尚应远，东风已如云。 氓托丝布，相就通慙 。可怜秋胡子，不遇卓文君。

五色菊赠朱逊之次韵

黄华候秋节，远自夏小正。坤裳有正色，鞠衣亦令名。一从人伪胜，遂与天力争。易性偶一作寓非族，改颜随所令。新奇既易售，粹驳宜一作定相倾。疾恶逢伯厚，识真似渊明。君言我所印，世论谁敢评。愿君为霜风，一洗紫与頰。

妒佳月

狂云妒佳月，怒飞千里黑。佳月了不嗔，曾何污洁白。爱有谪仙人，举酒为三客。今夕偶不见，洎澜念风怕。毋烦风伯来，彼也易灭没。支颐少待之，寒空净无迹。粲粲黄金盘，独照一天碧。玉绳惨无辉，玉露洗秋色。浩瀚玻璃玑，和光入胸臆。使我能永延，约君为莫逆。

追和沈辽项赠南华诗

善哉彼上人，了知明镜台。欢然不我厌，肯致远公材。莞尔无心云，胡为出岫来。一堂安寂灭，卒岁扃苍苔。

梦 雪

残杯失春温，破被生夜悄。开门千山白，俯仰同一照。虽时出圭角，固自绝瑕窍。儿童勿惊怪，调汝得一笑。

雪林砚屏率鲁直同赋

西山无时春，巉岩锁顽阴。分明倚天辟，点缀无风林。物固为人出，兴谁于此深。穷奇真自蠹，诗句且娱心。

次韵黄鲁直赤目

诵诗得非子夏学，网史正作丘明书。天公戏人亦薄相，略遣幻翳生明珠。
赖君年来屏鲜腴，百千灯光同一如。书成自写蝇头表，端就君王觅镜湖。

寄子由

吾谪海南，子由谪雷，被命即行，了不相知，至梧乃闻其尚在藤也。
旦夕当追及，作诗以示之。

九疑联绵属衡湘，苍梧独在天一方。孤城吹角烟树里，落月未落江苍茫。
幽人拊枕坐叹息，我行忽至舜所藏。江边父老能说子，白须红颊如君长。莫
嫌琼雷隔云海，圣恩尚许遥相望。平生学道真实意，岂与穷达俱存亡。天其
以我为箕子，要与此意留要荒。他年谁与作地志，海南万里真吾乡。

广州何道士众妙堂

湛然无观古真人，我独观此众妙门。夫物芸芸各归根，众一作妙中得一
道乃存。道人晨起开东轩，趺坐一醉扶桑暾。馀光照我玻璃盆，倒射窗几清
而温。欲收月魄飨日魂，我自日月谁吐一作使吞。

南屏谦师妙于茶事自云得之于心应之于
手非可以言传学到者十月二十七日闻轼
游寿星寺远来设茶作此诗赠之

道人晓出南屏山，来试点茶三昧手。忽惊午玃兔毫斑，打作春瓮鹅儿酒。
天台乳花世不见，玉川风腋今安有。东坡有意续茶经，会使老谦名不朽。

琴 枕

中郎不眠仰看屋，得此古椽围尺竹。轮囷濩落非笛材，破作细琴徽轸足。
流传几处到渊明，卧枕纶巾酒初漉。惊鸾别鹤谁复闻，鼻息齁齁自成曲。

申王画马图

天宝诸王爱名马，千金争致华轩下。当时不独玉花驹，飞电流云绝潇洒。
两坊歧薛宁与申，凭陵内厩多清新。肉骏汗血尽龙种，紫袍玉带真天人。骊
山射猎包原隰，御前急诏穿围入。杨鞭一蹙破霜蹄，万骑如风不能及。雁飞
兔走惊弦开，翠华按辔从天回。五家锦绣变一作遍山谷，百里舄饵遗纤埃。
青骡蜀栈两一作西超忽，高准浓娥散荆棘。回首追风趁日飞，一作苜蓿连天
鸟自飞。五陵佳气春萧瑟。

奉和成伯大雨中会客解嘲

乐事难并真实语，坐排用意多乖误。兴来取次或成懽，瓦钩却胜黄金注。我生祸患久不择，肯为一时风雨阻。天公变化岂有常，明月行看照归路。

和公济饮湖上

昨夜醉归还独寝，晓来宿雨鸣孤枕。扁舟小棹截湖来，正见青山驳云锦。须知老人兴不浅，莫学公荣不共饮。与君歌舞乐丰年，唤取千夫食陈廩。

赠 僧

道人自嫌三世将，弃家十年今始壮。玉骨犹含富贵馀，漆瞳已照人天上。去年相见古长干，众中矫矫如翔鸾。今年过我江西寺，病瘦已作霜松寒。朱颜不办供岁月，风月蒿火汤中雪。好问君家黄面翁，乞得摩尼照生灭。莫学王郎与支遁，臂鹰走马怜神骏。还君画图君自收，不如木人骑土牛。

周教授索枸杞因以诗赠录呈广倅萧大夫

邺侯藏书手不触，嗟我嗜书终日读。短檠照字细如毛，怪底昏花悬两目。扶衰赖有王母杖，名字于今挂仙录。荒城古堑草露寒，碧叶丛低红菽粟。春根夏苗秋著子，尽付天随耻充腹。兰伤桂折缘有用，尔独何损丹其族。赠君慎勿比薏苡，采之终日不盈掬。外泽中乾非尔侔，敛藏更借秋阳曝。鸡壅桔梗一称帝，堇也虽尊等臣仆。时复论功不汝遗，异时谨事东篱菊。

次韵董夷仲茶磨

前人初用茗饮时，煮之无问叶与骨。浸穷厥味白始用，复计其初碾方出。计尽功极至于磨，信哉智者能创物。破槽折杵向墙角，亦其遭遇有伸屈。岁久讲求知处所，佳者出自衡山窟。巴蜀石工强镌凿，理疏性软良可咄。子家江陵远莫致，坐上何人为披拂。

送公为游淮南

负米万里缘其亲，运甓无度忧其身。读书莫学流麦士，挟荣莫比亡羊人。乃翁辛苦到白首，汝今强勉当青春。昔时管鲍以君霸，此两士贾宁非贫。

谢苏自之惠酒

高士例须怜麴蘖，此语尝闻退之说。我今有说殆不然，麴蘖未必高士怜。醉者坠车庄生言，全酒未若全於天。达人本自不亏缺，何暇更求全处全。景山沉迷阮籍傲，毕卓盗窃刘伶颠。贪狂嗜怪无足取，世俗喜异矜其贤。杜陵诗客尤可笑，罗列八子参群仙。流涎露顶置不说，为问底处能逃禅。我今不饮非不饮，心月皎皎长孤圆。有时客至亦为酌，琴虽未去聊忘弦。吾宗先生有深意，百里双罌远将寄。且言不饮固亦高，举世皆同吾独异。不如同异两俱冥，得鹿亡羊等嬉戏。决顶饮此勿复辞，何用区区较醒醉。

西山戏题武昌王居士

子往在武昌西山九曲亭上，有题一句：玄鸿横号黄懒岷。九曲亭即吴王岷山，一山皆榭叶，其旁即元结陂湖也。黄花极盛，因为对云：皓鹤下浴红荷湖。坐客皆笑，同请赋此诗。

江干高居坚关扃，犍耕躬稼角挂经。篙竿系舸菰菱隔，笳鼓过军鸡狗惊。解襟顾景各箕踞，击剑赓歌几举觥。荆筲供脍愧搅聒，干锅更忧甘瓜羹。

戏和正甫一字韵

故居剑阁隔锦官，柑果姜蕨交荆管。奇孤甘挂汲古细，饶觊敢揭钩金竿。已归耕稼供藁秸，公贵干蛊高巾冠。改更句格各蹇吃，姑因狡狴加间关。王方平谓麻姑云：姑因少年，吾老矣，不复作此狡狴变化也。

池上二首

小池新凿会天雨，一部鼓吹从何来。有蟾正碧乱草色，时汹出没东南隈。井干跳梁亦足乐，洞庭鱼龙何有哉。能歌德声莫入月，清池与尔俱忘回。

不作太白梦日边，还同乐天赋池上。池上新年有荷叶，细雨鱼儿轻浪。男儿学易不应举，幽人一爻吾得尚。此池便可当长江，欲傍茅斋来荡漾。

赠仲素寺丞致仕归隐潜山

潜山隐君七十四，绀瞳绿发方谢事。腹中灵液变丹砂，江上幽居连福地。彭城为我驻三日，明月满舟同一醉。丹书细字口传诀，顾我沉迷真弃耳。年来四十发苍苍，始欲求方救憔悴。他年若访潜山居，慎勿逃人改名字。

鲁直以诗馈双井茶次韵为谢

江夏无双种奇茗，汝阴六一夸新书。磨成不敢付僮仆，自看雪汤生几珠。列仙之儒瘠不腴，只有病渴同相如。明年我欲东南去，画舫何妨宿太湖。归田录，草茶以双井为第一。画舫宿太湖，北诸贡茶故事。

扬州以上物寄少游

鲜鲫经年秘醽醑，团脐紫蟹脂填腹。后春药茁活如酥，先社姜芽肥胜肉。鳧子累累何足道，点缀盘飧亦时欲。淮南风俗事瓶罌，方法相传竟留蓄。且同千里寄鹅毛，何用孜孜饫麋鹿。

赠 县 秀

白云出山初无心，栖鸟何必恋山林。道人偶爱山水故，纵步不知湖岭深。空岩已礼百千相，曹溪更欲瞻道像。要知水味孰冷暖，始信梦时非幻妄。袖

中忽出贝叶书，中有辟月匡星珠。人间胜绝略已遍，匡庐南岭并西湖。西湖北望三千里，大堤冉冉横秋水。诵师佳句说南屏，瘴云应逐秋风靡。胡为只作十日欢，杖策复寻归路难。留师筍蕨不足道，怅望荔子何时丹。

再过泗上二首

眼明初见淮南树，十客相逢九吴语。旅程已付夜帆风，客睡不妨背船雨。黄柑紫蟹见江海，红稻白鱼饱儿女。殷勤买酒谢船师，千里劳君勤转橹。

系舟淮北两折轴，系舟淮南风断桥。客行有期日月疾，岁事欲晚霜雪骄。山根浪头作雷吼，缩手敢试舟师篙。不用燃犀照幽怪，要须拔剑斩长蛟。

赠李兕彦威秀才

魏王大瓠实五石，种成漉落将安边。可怜公子持十牛，海上三年竟何得。先生少负不羁才，从军数到单于台。天山直欲三箭取，白衣将军何人哉。夜逢怪石曾饮羽，戏中戟枝何足数。誓将马革裹尸还，肯学班超苦儿女。封侯卫霍知几许，老矣先生困羁旅。酒酣聊复说平生，结袜犹堪一再鼓。弃书捐剑学万人，纨袴儒冠皆误身。穷途政似不龟手，与世羞为西子颦。如今惟有谈天口，云梦胸中吞八九。世间万事寄黄粱，且与先生说乌有。

次韵谢子高读渊明传

枯木嵌空微黯淡，古器虽在无古弦。袖中正有南风手，谁为听之谁为传。风流岂落正始后，甲子不数义熙前。一山黄菊平生事，无酒令人意缺然。

庞 公

襄阳庞公少检束，白发不髡亦不俗。世所奔趋我独弃，我已有馀彼不足。鹿门有月树下行，虎溪无风舟上宿。不识当时捕鱼客，但爱长康画金粟。杜口如今不复言，庞公为人不曲局。东西有人问老翁，为道明灯照华屋。五言七言正儿戏，三行五行亦偶尔。我性不饮只解醉，正如春风弄群卉。四十年来同幻事，老去何须别愚智。古人不住亦不灭，我今不作亦不止。寄语悠悠世上人，浪生浪死一埃尘。洗墨无池笔无冢，聊尔作戏悦吾神。

送吕行甫司门倅河阳

结交不在久，倾盖如平生。识子今几日，送别亦有情。子生公相家，高义久峥嵘。天才既超诣，世故亦屡更。譬如追风骥，岂免羁与纓。念我山中人，久与麋鹿并。误出挂世网，举动俗所惊。归田虽未果，已觉去就轻。河阳岂云远，出处恐异程，便当从此别，有酒无徒倾。

食 雉

雄雉曳修尾，惊飞向日斜。空中纷格斗，彩羽落如花。喧呼勇不顾，投

网复谁嗟。百钱得一双，新味时所佳。烹煎杂鸡鹜，爪距漫槎牙。谁知化为蜃，海上落飞鷗。

双凫观 在叶县

王乔古仙子，时出观人寰。常为汉郎吏，厌世去无还。双鬼偶为戏，聊以惊世顽。不然神仙迹，罗网安能攀。纷纷尘埃中，铜印纡青纶。安知无隐者，窃笑彼愚奸。

郭 纶

纶本河西弓箭手，屡战有功不赏，自黎州都监官满，贫不能归，今权嘉州监税。

河西猛士无人识，日暮津亭阅过船。路人但觉骢马瘦，不知铁槩大如椽。因言西方久不战，截发愿作万骑先。我当凭轼与寓目，看君飞矢射蛮毡。

初发嘉州

朝发鼓阗阗，西风猎画航。故乡飘已远，往意浩无边。锦水细不见，蛮江清更鲜。奔腾过佛脚，旷荡造平川。野市有禅客，钓台寻暮烟。相期定先到，久立水潺潺。是日期乡僧宗一。会别钓鱼台下。

犍为王氏书楼

树林幽翠满山谷，楼观突兀起江滨。云是昔人藏书处，磊落万卷今生尘。江边日出红雾散，绮窗画阁青氛氲。山猿悲啸谷泉响，野鸟嚶戛岩花春。借问主人今何在，被甲远戍长苦辛。先登搏战事斩级，区区何者为三坟。书生古亦有战阵，葛中羽扇挥三军。古人不见悲世俗，回首苍山空白云。

过宜宾见夷口乱山

江寒晴不知，远见山上日。朦胧含高峰，晃荡射峭壁。横云忽飘散，翠树纷历历。行人揭孤光，飞鸟投远碧。蛮荒谁复爱，秣秀安可边。岂无避世士，高隐炼精魄。谁能从之游，路有豺虎迹。

夜泊牛口

日落江雾生，系舟宿牛口。居民偶相聚，三四依古柳。负薪出深谷。见客喜且售。煮蔬为夜飧，安识肉与酒。朔风吹茅屋，破壁见星斗。儿女自咿忧，亦足乐且久。人生本无事，苦为世味诱。富贵耀吾前，贫贱独难守。谁知深山子，甘与麋鹿友。置身落蛮荒，生意不自陋。今予独何者，汲汲强奔走。

牛口见月

掩窗寂已睡，月脚垂孤光。披衣起周览，飞露洒我裳。山川同一色，浩若涉大荒。幽怀耿不寐，四顾独彷徨。忽忆丙申年，京邑大雨雾。蔡河中夜决，横浸国南方。车马无复见，纷纷操棹郎。新秋忽已晴，九陌尚汪洋。龙津观夜市，灯火亦煌煌。新月皎如昼，疏星弄寒芒。不知京国喧，谓是江湖乡。今年牛口清，见月重凄凉。却思旧游处，满陌沙尘黄。

舟中听大人弹琴

弹琴江浦夜漏永，敛衽窃听独激昂。风松瀑布已清绝，更爱玉佩声琅琅。自从郑卫乱雅乐，古器残缺世已忘。千年寥落独琴在，有如老仙不死阅兴亡。世人不容独反古，强以新曲求锤髀。微音淡弄忽变转，数声浮脆如笙簧。无情枯木今尚尔，何况古意堕渺茫。江空月出人响绝，夜阑更请弹文王。

泊南牛口期任遵圣长官到晚不及见复来

江上有微径，深榛烟雨埋。崎岖欲取别，不见又重来。下马未及语，固已慰长怀。江湖涉浩渺，安得与之偕。

江上看山

船上看山如走马，倏忽过去数百群。前山槎牙忽变态，后岭杂沓如惊奔。仰看微迳斜缭绕，上有行人高缥缈。舟中举手欲与言，孤帆南去如飞鸟。

留题仙都观

山前江水流浩浩，山上苍苍松柏老。舟中行客去纷纷，古今换易如秋草。空山楼观何峥嵘，真人王远阴长生。飞符御气朝百灵，悟道不复诵黄庭。龙车虎驾来下迎，去如旋风搏紫清。真人厌世不回顾，世间生死如朝暮。学仙度世岂无人，飡霞绝粒长辛苦。安得独从逍遥君，冷然乘风驾浮云，超世无有我独行。

屈原塔

在忠州，原不当有塔于此，意者后人追思，故为作之。

楚人悲屈原，千岁意未歇。精魄飘何处，父老空嗟咽。至今沧江上，投饭救饥渴。遗风成竞渡，猿叫楚山裂。屈原古壮士，就死意甚烈。世俗安得知，眷眷不忍决。南宾旧属楚，山上有遗塔。应是奉佛人，恐子就沦灭。此事虽无凭，此意固已切。古人谁不死，何必较考折。名声实无穷，富贵亦暂热。大夫知此理，所以持死节。

西山诗和者三十余人再次前韵为谢

朱颜发过如春酪，胸中梨枣初未栽。丹砂未易扫白发，赤松却欲参黄梅。

寒溪本自远公社，白莲翠竹依崔嵬。当时石泉照金像，神光夜发如五台。饮泉鉴面得真意，坐视万物皆浮埃。欲收暮景返田里，远诉江水穷 堆。还朝岂独羞老病，自叹才尽倾空罍。诸公渠渠若夏屋，吞吐风月清隅隈。我如废井久不食，古甃缺落生阴苔。数诗往复相感发，汲新除旧寒光开。遥知二月春江阔，雪浪倒卷云峰推。石中无声水亦静，云何解转空山雷。欲就诸公评此句，一作语要识忧喜何从来。愿求南宗一勺水，往与屈贾湔余哀。

新 滩

扁舟转山曲，未至已先惊。白浪横江起，搓牙似雪 。番番从高来，一一投涧坑。大鱼不能上，暴鬣一作楸滩下横。小鱼散复合，灑灑如遭烹。鸬鹚不敢下，飞过两翅轻。白鹭夸瘦捷，插脚还欹倾。区区舟上人，薄技安敢呈。只应滩头庙，赖此牛酒盈。

新滩阻风

北风吹寒江，来自两山口。初闻似摇扇，渐觉平沙走。飞云满崑谷，舞电穿窗牖。滩下三日留，识尽滩一作山前叟。孤舟倦鸦轧，短缆困牵揉。尝闻不终朝，今此何其久。只应留远人，此意固亦厚。吾今幸无事，闭户为饮酒。

昭 君 村

昭君本楚人，艳色照江水。楚人不敢娶，谓是汉妃一作家子。谁知去乡国，万里为胡鬼。人言生女作门楣，昭君当时忧色衰。古来人事尽如此，反覆纵横安可知。

黄 牛 庙

江边石壁高无路，上有黄牛不服箱。庙前行客拜且舞，击鼓吹萧屠白羊。山下耕牛苦硗确，两角磨崖四蹄湿。青刍半束长苦饥，仰看黄牛安可及。

虾 蟆 培

蟆背似覆盂，蟆颐如偃月。谓是月中蟆，开口吐月液。根源来甚远，百尺苍崖裂。当时龙破山，此水随龙出。入江江水浊，犹作深碧色。稟受苦洁清，独与凡水隔。岂惟煮茶好，酿酒应无敌。

留题峡州甘泉寺 姜诗故居

轻舟横江来，吊古悲纯孝。逶迤寻远迹，婉娈见遗貌。清泉不可揭，涸尽空石窖。古人飘何之，唯有风竹闹。行行玩村落，户户悬网罩。民风坦和平，开户夜无钞。丛林富笋茹，平野绝虎豹。嗟哉此乐乡，无乃姜子教。

寄题清溪寺 在峡州、鬼谷子之故居。

口舌安足恃，韩非死说难。自知不可用，鬼谷乃真奸。遗书今未亡，小数不足观。秦仪固新学，见利不知患。嗟时无桓文，使彼二子颠。死败无足怪，夫子固使然。君看巧更穷，不若愚自安。遗宫若有神，颌首然吾言。

赴岭表过金陵蒋山泉老召食阻雨不及往

今日江头天色恶，炮车云起风雨一作欲作。独望钟山叫宝公，云间白塔如孤鹤。宝公骨冷叫不闻，却有老泉来唤人。电眸虎齿霹雳舌，为余吹散千峰云。南行万里亦何事，一酌曹溪知水味。他年若画蒋山图，为作泉公唤居士。

荆门惠泉

泉源从高来，走下随石脉。纷纷白沫乱，隐隐苍崖折。索回成曲沼，清激见肝膈。泻为长溪，奔驰荡蛙蝮。初开不容挽，渐去已如帛。传闻此山中，神物懒一作频遭谪。不能致雷雨，滟滟吐寒碧。遂令山前人，千古灌稻麦。

次韵答荆门张都官维见和惠泉诗

楚人少井饮，地气常不泄。蓄之为惠泉，盆若有所折。泉源本无情，岂问浊与澈。贪愚彼二水，终古耻莫雪。只应所处然，遂使语异别。泉旁平地衍，泉上山 嶮。君子慎所居，此义安可阙。古人贵言赠，敢用况高节。不为冬霜乾，肯畏夏日烈。冷冷但不已，海远要当彻。

涪阳早发

富贵本先定，世人自荣枯。器器好名心，嗟我岂独无。不能便退缩，但使进少徐。我行念西国，已分田园芜。南来竟何事，碌碌随商车。自进苟无补，乃是懒且愚。人生重意气，出处夫岂徒。永怀江阳叟，种藕春满湖。

夜行观星

天高夜气严，列宿森就位。大星光相射，小星闹若沸。天人不相干，嗟彼本何事。世俗强指摘，一一立名字。南箕与北斗，乃是家人器。天亦岂有之，无乃遂自谓。迫观知何如，远想偶有以。茫茫不可晓，使我长叹喟。

汉水

舍掉忽逾月，沙尘困远行。襄阳逢汉水，偶似蜀江清。蜀江固浩荡，中有蚊与鲸。汉水亦云广，欲涉安敢轻。文王化南国，游女俨如卿。洲中浣沙子，环珮锵锵鸣。古风随世变，寒水空冷冷。过之不敢慢，仁立整冠缨。

万 山

西行度连山，北出临汉水。汉水蹙成潭，旋转山之趾。禅房久已坏，古磴含清泚。下有仲宣栏，纒刻深容指。回头望西北，隐隐龟背起。传云古隆中，万树桑柘美。月炯转山曲，山上见洲尾。绿水带平沙，盘盘如抱珥。山川近且秀，不到懒成耻。问之安能详，画地费簪屨。

隆 中

诸葛来西国，千年爱未衰。今朝游故里，蜀客不胜悲。谁言襄阳野，生此万乘师。山中有遗貌，矫矫龙之姿。龙蟠山水秀，龙去渊潭移。空余蜿蜒迹，使我寒涕垂。

竹 叶 酒

楚人汲汉水，酿酒古宜城。春风吹酒熟，犹似汉江清。耆旧 何人在，丘坟应已平。惟余竹叶在，留此千古情。

鳊 鱼

晓日照江水，游鱼似玉瓶。谁言解缩颈，贪饵每遭烹。杜老当年意，临流忆孟生。吾今又悲子，辍筋涕纵横。

望夫台 在忠州南数十里。

山头孤石远亭亭，江转船回石似屏。可怜千古长如昨，船去船来自不停。浩浩长江赴沧海，纷纷过客似浮萍。谁能坐待山月出，照见寒影高伶俜。

永安宫 今夔之永安门，即宫之遗址。

千古陵谷变，故宫安得存。徘徊问耆老，惟有永安门。游人杂楚蜀，车马晚喧喧。不见重楼好，谁知昔日尊。吁嗟蜀先生，兵败此亡魂。只应法正死，使公去遭燔。

八 阵 碛

平沙何茫茫，髣髴见石蕪。纵横满江上，岁岁沙水啮。孔明死已久，谁复辨行列。神兵非学到，自古不留诀。至人已心悟，后世徒妄说。自从汉道衰，蜂起尽奸杰。英雄不相下，祸难久连结。驱民市无烟，战野江流血。万人赌一掷，杀尽如沃雪。不为久远计，草草常无法，孔明最后起，意欲扫群孽。崎岖事节制，隐忍久不决。志大遂成迂，岁月去如瞥。六师纷未整，一旦英气折。唯馀八阵图，千古壮夔峡。

诸葛盐井

井有十四，自山下至山上，其十三井常空，盛夏水涨，则盐泉迤 迂去。常去于江水之所不及。

五行水本咸，安择江与井。如何不相入，此意复谁省。人心固难足，物理偶相逞。犹嫌取未多，井上无闲绁。

颍大夫庙

人情难强回，天性可微感。世人争曲直，苦语费摇撼。大夫言何柔，暴主意自惨。荒祠旁孤家，古隧有残坎。千年惟茅焦，世亦贵其胆。不解此微言，脱衣徒勇敢。

许州西湖

西湖小雨晴，滟滟春渠长。来从古城角，夜半传新响。使君欲春游，浚沼役千掌。纷坛具畚鍤，闹若蚁运壤。天桃弄春色，生意寒犹快。唯有落残梅，标格若矜爽。游人坌已集，挈榼三且两。醉客卧道傍，扶起尚偃仰。池台信宏丽，贵与民同赏。但恐城市欢，不知田野怆。颍川七不登，野气长苍莽。谁知万里客，湖上独长想。

江上值雪效欧阳体限不以盐玉鹤鸳絮蝶飞舞之类为比仍不使皓白洁素等字

缩颈夜寒如冻龟，雪来唯有客先知。江边晓起浩无际，树抄风多寒更吹。青山有似少年子，一夕变尽沧浪髭。方知阳气在流水，沙上盈尺江无澌。随风颠倒纷不择，下满坑谷高陵危。江空野阔落不见，入户但觉轻丝系。沾裳细看若一作巧刻镂，岂有一一天工为。霍然一麾遍九野，吁此权柄谁执持。世间苦乐知有几，今我幸免沾肌肤。山夫只见压樵担，岂知带酒飘歌儿。天王临轩喜有麦，宰相献寿嘉及时。冻吟书生笔欲折，夜织贫女寒无帏。高人著屐踏冷冽，飘拂中帽真仙姿。野僧斫路出门去，寒液满鼻清淋漓。洒袍入袖湿靴底，亦有执版趁阶墀。舟中行客何所爱，愿得猎骑当风披。草中咻咻有寒兔，孤隼下击千夫驰。敲冰煮鹿最可乐，我虽不饮强倒卮。楚人自古好戈猎，谁能往者我欲随。纷坛旋转从满面，马上操笔为赋之。

渚 宫

渚宫寂寞依古郢，楚地荒芜非故基。二王台阁已卤莽，湘东王高氏何况远问纵横时，楚王猎罢击灵鼓，猛士操舟张水嬉。钓鱼不复数鱼鳖，大鼎千古烹蚊虻。当时郢人架宫殿，意思绝妙般与捶。飞楼百尺照湖水，上有燕赵千娥眉。临风扬扬意自得，长使宋玉作楚词。秦兵西来取钟簴，故宫禾黍秋。千年壮观不可复，今之存者盖已卑。池空野迥楼阁小，惟有深竹藏狐狸。台中绛帐谁复见，台下野水一作鸭浮清漪。绿窗朱户春昼闭，想见深屋弹朱丝。腐儒亦解爱声色，何用白首谈孔姬。沙泉半涸草堂在，破窗无纸风

颺颺。陈公踪迹最未远，七瑞寥落今何之。百年人事知几变，直恐荒废成空肢。谁能为我访遗迹，草中应有湘东碑。

出 峡

入峡喜嶮崿，出峡爱平旷。吾心淡无累，遇境即安畅。东西径千里，胜处颇屡访。幽寻远无厌，高绝每先上。前诗尚遗略，不录久恐忘。忆从巫庙回，中路寒泉涨。汲归真可爱，翠碧光满盎。忽惊巫峡尾，岩腹有穿扩。仰见天苍苍，石室开南向。宣尼古庙宇，从木作帟帐。铁楯横半空，俯瞰不计丈。古人谁架构，下有不测浪。石窦见天园，瓦棺悲古葬。新滩阻风雪，村落去携杖。亦到龙马溪，苑屋沽村酿。玉虚悔不至，实为舟人诳。闻道石最奇，寤寐见怪状。峡山富奇伟，得一知几丧。苦恨不知名，历历但想像。今朝脱重险，楚水渺平荡。鱼多客庖足，风顺行意王。追思偶成篇，聊助舟人唱。

神女庙

大江从西来，上有千切山。江山自环拥，恢诡富神奸。深渊龟鳖横，去声巨壑蛇龙顽。旌阳斩长蛟，雷雨移苍湾。蜀守降老蹇，至今带连环。纵横若无主，荡逸侵人寰。上帝降瑶姬，来处荆巫间。神仙岂在猛，玉座幽且闲。飘萧驾风驭，弭节朝天关。倏忽巡四方，不知道里艰。古妆具法服，邃殿罗烟鬟。百神自奔走，杂沓来趋班。云兴灵怪聚，云散鬼神还。茫茫夜潭静，皎皎秋月弯。还应摇玉佩，来听水漏漏。

巫 山

瞿塘迤迳尽，巫峡峥嵘起。连峰稍可怪，石色变苍翠。天工运神巧，渐欲作奇伟。块轧势方深，结构意未遂。旁观不暇瞬，步步造幽邃。苍崖忽相逼，绝壁凛可悸。仰观八九顶，俊爽凌颢气。晃荡天宇高，崩腾江水沸。孤超死不让，直拔勇无畏。攀缘见神宇，憩坐就石位。嶮嶮隔江波，一一问庙吏。遥观神女石，绰约诚有以。俯首见斜鬟，拖霞弄修帔。人心随物变，远觉含深意。野老笑吾旁，少年尝屡至。去随猿猱上，反以绳索试。石笋依孤峰，突兀殊不类。世人喜神怪，论说惊幼稚。楚赋亦虚传，神仙安有是。次问扫坛竹，云此今尚尔。翠叶纷下垂，婆娑绿凤尾。风来自偃仰，若为神物使。绝顶有三碑，诘曲古篆字。老人那解读，偶见不能记。穷探到峰背，采斫黄杨子。黄杨生石上，坚瘦纹如绮。贪心去不顾，涧谷千寻绝。山高虎狼绝，深入坦无忌。洪濛草树密，葱蒨云霞膩。石窦有洪泉，甘滑如流髓。终朝自盥漱，冷冽清心胃。浣衣挂树梢，磨斧就石鼻。徘徊云日晚，归意念城市。不到今十年，衰老筋力惫。当时代残木，牙龔已如臂。忽闻老人说，终日为叹喟。神仙固有之，难在忘势利。贫贱尔何爱，弃去如脱展。嗟尔苦无还，绝粮应不死。

观大水望朝阳岩作

朝阳岩前不结庐，下眺江水百步余。春泉溅溅出乳窦，青莎白石半涂。
不到津头二三日，谁知江水涨天墟。遥望横杯不敢济，岩口正有人罾鱼。

沧洲亭怀古

湘水悠悠天际来，夹江古木抱山回。城中人物若可数，日晏市散多苍苔。
九嶷嶮天古云埋，遥想帝子龙车回。心衰目极何可望，九歌寂寂令人哀。

栢家渡

栢家渡西日欲落，青山上下猿鸟乐。欲因新月望吴云，遥看北斗挂南岳。
一梦惺惺四十秋，古人不死终未休。草舍萧条谁与语，香风欲过白蘋洲。

清远舟中寄耘老

小寒初渡梅花岭，万壑千岩背人境。清远聊为泛宅行，一梦分明堕乡井。
觉来满眼是湖山，鸭绿波摇凤凰影。海陵居士无云梯，岁晚结庐颖水湄。山
腰自悬苍玉珮，野马不受黄金羁。门前车盖猎猎走，笑倚清流数鬓丝。汀洲
相见春风起，白蘋吹花散烟水。万里飘蓬未得归，目断沧浪泪如洗。北应南
来遗素书，苦言大浸没我庐。清斋十日不燃鼎，曲突往往巢龟鱼。今年玉粒
贱如水，青铜欲买囊已虚。人生百年如寄尔，七十朱颜能有几。有子休论贤
与愚，倪生枉却带经锄。天南看取东坡史，可是平生废读书。

书堂屿

苍山古木书堂屿，北出湘川百余步。谁为往来亏世界，至今人指安禅处。
岂无惊蛇与飞鸟，后来那复知其趣。不知我身今是否，空记名称作常住。

次履常腊梅韵

天工点酥作梅花，此有腊梅禅老家。蜜蜂采花作黄蜡，取蜡为花亦其物。
天工变化谁得知，我亦儿嬉作小诗。君不见万松岭上黄千叶，玉蕊檀心两奇
绝。醉中不觉度千山，夜闻梅香失醉眠。归来却梦寻花去，梦里花仙觅奇句。
此问风物属诗人，我老不饮当付君。君行边吴我边越，笑指西湖作衣钵。

醉睡者

有道难行不如醉，有口难言不如睡。先生醉卧此石间，万古无人知此意。

戏咏子舟画两竹两鸚鵡

风晴日暖摇双竹，竹间对话双鸚鵡。鸚鵡之肉不可食，人生不才果为福。
子舟之笔利如锥，千变万化皆天机。未知笔下鸚鵡语，何似梦中蝴蝶飞。

老翁井

井中老翁误年华，白沙翠石公之家。公来无踪去无迹，井面团圆水生花。翁今与世两何与，无事纷纷惊牧竖。改颜易服与世同，无使世人知有翁。

赠山谷子

黄童三尺世无双，笔头衮衮悬秋江。不优老子难为父，平生崛起今心降。我来喜共阿戎语，应敌纵横如急雨。生子还如孙仲谋，豚犬谩多何足数。黄家小儿名拾得，眉如长松眼如漆。只今数岁已动人，老人留眼看他日。笑君老蚌生明珠，自笑此物吾家无。君当置酒我当贺，有儿传业更何须。

观子玉郎中草圣

柳侯运笔如电闪，子云寒悴羊欣俭。百斛明珠便可扛，此书非我谁能双。

鰕鱼行

渐台人散长弓射，初啖鰕鱼人未识。西陵衰老纛帐空，肯向北河亲馈食。两雄一律盗汉家，嗜好亦若肩相差。食每对之先太息，不因噎呕缘疮痍。中间霸据关梁隔，一枚何啻千金直。百年南北鲑菜通，往往残余饱臧获。东随海舶号倭螺，异方珍宝来更多。磨沙沦沛成大馘，剖蚌作脯分馀波。君不闻蓬莱阁下駟棋岛，八月边风备胡獠。船舶跋浪鼉鼉震，长镜铲处岩谷倒。膳夫善治荐华堂，坐令雕俎生辉光。肉芝石耳不足数，醋苺鱼皮真倚墙。中都贵人珍此味，糟浥油藏能远致。割肥方厌万钱厨，决皆可醒千日醉。三韩使者金鼎来，方奩馈送烦舆台。辽东太守远自献，临菑掾吏谁为材。吾生东归收一斛。包苴未肯钻华屋。分送羹材作眼明，却取细书防老读。

次韵水官诗

净因大觉璉师，以阎立本画水官遗编礼公，公既报之以诗，谓某汝亦作，某顿首再拜次韵，仍录二诗为一卷以献。

水官骑苍龙，龙行欲上天。手攀时且住，浩若乘风船。不知几何长，足尾犹在渊。下有二从臣，左右乘鱼鳧。矍铄相顾视，风举衣袂翻。女子侍君侧，白颊垂双鬟。手执雉尾扇，容如未开莲。从者八九人，非鬼非戎蛮。出水未成列，先登扬旗旛。长刀拥旁牌，白羽注强拳。虽服甲与裳，状貌犹鲸鱣。水兽不得从，仰面以手扳。空虚走雷霆，雨雹晦九川。风师黑虎囊，面目昏尘烟。翼从三神人，万里朝天关。我从大觉师，得此诡怪编。画者古阎子，于今三百年。见者谁不爱，予者诚已难。在我犹在子，此理宁非禅。报之以好词，何必画在前。老泉高人岂学画，用笔乃其天。譬如善游人，一一能操船。阎子本逢掖，畴昔慕云渊。丹青偶为戏，染指初尝鼈。爱之不自己，笔势如风翻。传闻正观中，左衽解椎髻。南夷羞白雉，佛国贡青莲。诏令拟王会，别殿写戎蛮。熊冠金络额，豹袖拥幡旛。传入应门内，俯伏脱剑拳。天姿俨龙凤，杂沓朝鹏鱣。神功与绝迹。后世两莫扳。自从李氏亡，群盗窃

山川。长安三日火，至宝随飞烟。尚有脱身者，漂流出东关。三官岂容独，得此今已编。吁嗟至神物，会合当有年。京城诸权贵，欲取百计难。赠以玉如意，岂能动高禅。信应一篇诗，皎若画在前。

吊徐德占

余初不识德占，但闻其初为吕惠卿所荐。以处士用。元丰五年三月，偶以事至蕲水，德占闻余在传舍，惠然见访，与之语有过人者。是岁十月闻其遇祸，作诗吊之。

美人种松柏，欲使低映门。栽培虽易长，流恶病其根。哀哉岁寒姿，肮脏谁与伦。竟为明所误，不免刀斧痕。一遭儿女污，始觉山林尊。从来觅栋梁，未免傍篱藩。南山隔秦岭，千树龙蛇奔。大厦若果倾，万牛何足言。不然老岩壑，合抱枝生孙。死者不可悔，吾将遗后昆。

题李伯时渊明东篱图

彼哉稽阮曹，终以明白膏。靖节固昭旷，归来侣蓬蒿。新霜着疏柳，大风起江涛。东篱理黄华，意不在芳醪。白衣挈壶至，径醉还游遨。悠然见南山，意与秋气高。

李白谪仙诗

我居青空里，君隐黄埃中。声形不相吊，心事难形容。欲乘明月光，访君开素怀。天杯饮清露，展翼登蓬莱。佳人持玉尺，度君多少才。玉尺不可尽，君才无时休。对面一笑语，共蹑金鳌头。绛宫楼阁百千仞，霞衣谁与云烟浮。

数日前梦一僧出二镜求诗

僧以镜置日中，其影甚异，其中一如芭蕉，其一如莲花，梦中与作诗。

君家有二镜，光景如湛庐。或长如芭蕉，或圆如芙蕖。飞电着子壁，明月入我庐。月下合三壁，日月跳明珠。问子是非我，我是非文殊。

饮酒四首

我观人间世，无如醉中真。虚空为销殒，况乃百忧身。惜哉知此晚，坐令华发新。圣人骤难得，日且致贤人。

左手持蟹螯，举觞瞩云汉。天生此神物，为我洗忧患。山川同恍惚，鱼鸟共萧散。客至壶自倾，欲去不得间。

有客远方来，酌我一瓯茗。我醉方不啜，强啜忽复醒。既凿浑沌氏，遂远华胥境。操戈逐儒生，举筋还酩酊。

雷觞淡于水，经年不濡唇。爱有扰龙裔，为造英灵春。英灵韵甚高，蒲荡难与邻。他年血食汝，当配杜康神。

大雪独留尉氏

古驿无人雪满庭，有客冒雪来自北。纷纷笠上已盈寸，下马登堂面苍黑。苦寒有酒不能饮，见之何必问相识。我酌徐徐不满觥，看客倒尽不留湿。千门昼闭行路绝，相与笑语不知夕。醉中不复问姓名，上马忽去横短策。

阮籍啸台 在尉氏

阮生古狂达，遁世默无言。犹余胸中气，长啸独轩轩。高情遗万物，不与世俗论。登临偶自写，激越荡乾坤。醒为啸所发，饮为醉所昏。谁能与之较，乱世足自存。

留别叔通元弼垣夫

田三昔同寮，向我每倾倒。当年或龃龉，反覆看愈好。寇三我部民，孝悌化邻保。有如袁伯业，苦学到衰老。石生吾邑子，劲立风中草。宦游甌生尘，菽水媚翁媪。我穷交旧绝，计拙集枯稿。三子尤见存，往复纷纭縞。迎我淮水北，送我睢阳道。愿存金石契，凛凛贯华皓。

余归自道场何山遇大风因憩耘老溪亭命 官奴秉烛捧砚写风竹一枝题诗云

更将掀舞势，把烛画风篠。美人为破颜，怜此腰肢袅。

和寄天选长官

寓形宇宙间，俛我方以老。流光安足恃，百岁同过鸟。顷子萦网罗，文采缘自表。自古山林人，何曾识机巧。但记寒岩翁，论心秋月皎。黄香十年旧，禅学参众妙。虚怀养天和，肯徇奔走闹。官居职事理，晨起何用早。桐阴满西斋，叱吏供洒扫。眷予东南来，野饭煮芹蓼。葆光既清尚，令尹亦高蹈。相将古寺行，软语颓晚照。公家有畸人，公有族人隐高山虚缘能自保。卜筑嵩山阳，何一作行当从结好。中山饶胜景，一览未易饱。何时命中车，共涉云外峤。翻然一作思筋力疲，不复追踴跳。公诗拟南山，雄拔千丈峭。形容逼真真，邂逅识其要。藩篱吾未窥，敢议穷阃奥。

昭陵六马

唐文皇战马也，琢石象之，立昭陵前。客有持此石本示予为赋之。

天将划隋乱，帝遣六龙来。森然风云姿，飒爽毛骨开。飚驰不及视，山川俨莫回。长鸣视八表，扰扰万弩殆。秦王龙风姿，鲁鸟不足摧。腰间大白羽，中物如风雷。区区数竖子，搏取若提孩。手持扫天帚，六合如尘埃。艰难济大业，一一非常才。维时六驥足，绩与英卫陪。功成锵八鸾，玉辂行天街。荒凉昭陵阙，古石埋苍苔。

颜 阖

颜阖古有道，躬耕自衣食。区区鲁小邦，不足隐明德。轺轩来我门，聘币继金璧。出门应使者，耕稼不谋国。但疑误将命，非敢惮行役。使者反锡命，户庭空履迹。薄俗徇世荣，截趾履之边。所重易所轻，隋珠弹飞翼。伊人畏照影，独往就阴息。鼎俎荐忠贤，谁能死燔炙。念彼藏皮冠，安知获尧客。

送朱寿昌使蜀七首

蔼蔼青城云，娟娟蛾眉月。随我西北来，照我光不灭。
我在尘土中，白云呼我归。我游江湖上，明月湿我衣。
岷峨天一方，云月在我侧。谓是山中人，相望了不隔。
梦寻西南路，默数长短亭。似闻嘉陵江，跳波吹枕屏。
送君无一物，清江饮君马。路穿慈竹林，父老拜马下。
不用惊去装，使者我友生。听讼如家人，细说为汝评。
若逢山中友，问我归何日。为话腰脚轻，犹堪弄泉石。

赠狄崇班季子

狄生臂鹰来，见客不会揖。踞床咤得隼，借箸数禽入。短后掬豹裘，犹溅猩血湿。指呼索酒尝，快作长鲸吸。半酣论刀槊，怒发欲起立。北方老獬子，狂突尚不繫。要须此慄悍，气压边锋急。夜走追锋车，生斩活离级。持归献天王，封侯稳可拾。何为走猎师，日使群毛泣。

题庐鸿学士堂图

昔为太室花，庐岩在东麓。直上登封坛，一夜茧生足。径归不复往，峦壑空在目。安知有千老，舒卷不盈轴。一处一庐生，裘褐荫乔木。方为世外人，行止何须录。百年入篋笥，犬马同一束。嗟予缚世累，归未有苑屋。江千百亩田，清泉映修竹。尚欲逃世名，岂须上图轴。

芦

芦筍初似竹，稍开叶似蒲。方春节抱甲，渐老根生须。不爱当夏绿，爱此及秋枯。黄叶倒风雨，白花摇江湖。江湖不可到，移植当勤劬。安得双野鸭，飞来成画图。

寄周安孺茶

大哉天宇内，植物知几族。灵品独标奇，遇超凡草木。名从姬旦始，渐播桐君录。赋咏谁最先，厥传惟杜育。唐人未知好，论著始于陆。常李亦清流，当年慕高躅。遂使天下士，嗜此偶于俗。岂但中土珍，兼之异邦鬻。鹿

门有佳士，博览无不瞩。邂逅天随翁，篇章互赓续，开园顾山下，屏迹松江曲。有兴即挥毫，灿然存简牍。伊子素寡爱，嗜好本不笃。越自少年时，低回客京毂。虽非曳裾者，庇荫或华屋。颇见绮纨中，齿牙厌梁肉。小龙得屡试，粪土视珠玉。团凤与葵花，砒砒杂鱼目。贵人自矜借，捧玩且緘牍。未数日注卑，定知双井辱。于兹自研讨，至味识五六。自尔入江湖，寻僧访幽独。高人固多暇，探究亦颇熟。闻道早春时，携簞赴初旭。惊雷未破蕾，采采不盈掬。旋洗玉泉蒸，芳馨岂停宿。须臾布轻缕，火候谨盈缩。不惮顷间劳，经时废藏蓄。髹筒净无染。箬笼匀且复。苦畏梅润侵，暖须人气燠。有如刚耿性，不受纤芥触。又若廉夫心，难将微秽读。晴天敞虚府，石碾破轻绿。永日遇闲宾，乳泉发新馥。香浓夺兰露，色嫩欺秋菊。闽俗竟传夸，丰腴面如粥。白云叶家白，颇胜中山醪。好是一杯深，午窗春睡足。清风击两腋，去欲凌鸿鹤。嗟我乐何深，水经亦屡读。子咤中冷，次乃康王谷。培塿曾尝，瓶罌走僮仆。如今老且懒，细事百不欲。美恶两俱忘，谁能强追逐。姜盐抖白土，稍稍从吾蜀。尚欲外形体，安能徇心腹。由来薄滋味，日饭止脱粟。外慕既已矣，胡为此羁束。昨日散幽步，偶上天峰麓。山圃正春风，蒙茸万旗簇。呼儿为佳客，采制聊亦复。地僻谁我从，包藏置厨麓。何尝较优劣，但喜破睡速。况此夏日长，人间正炎毒。幽人无一事，午饭饱蔬菽。困 北窗风，风微动窗竹。乳瓯十分满，人世真局促。意爽飘欲仙，头轻快如沐。昔人固多癖，我癖良可赎。为问刘伯伦，胡然枕糟面。

余自城中还道中云气自山中来如群马
奔突以手掇开笼收其中归家云盈笼开
而放之作摸云篇

物役会有时，星言从高驾。道逢南山云，欬吸如电过。竟谁使令之，袞袞从空下。龙移相排拶，凤舞或颓亚。散为东郊雾，冻作枯树稼。或飞入吾车，逼仄人时胯。搏取置笥中，提携反茅舍。开緘仍放之，掣去仍变化。云兮汝归山，无使达官怕。

游山呈通判承议写寄参寥师

煌煌世胄馀，夫子非碌碌。由来有诗书，所以能绝俗。得官本河朔，瓜期未易促。扁舟下南来，逸驾追鸣鹄。遇胜即倘佯，风餐兼露宿。嗟予偶倾盖，一笑外羁束。杖策每过从，相携访山谷。东风披鲜云，绣错出林麓。松门有时尽，幽景无断续。崖转闻钟声，林疏见华屋。衔山馀落景，归迹犹踟躅。谁云邺下欢，往事不可复。吾曹二三事，取乐亦云足。愿公寄新诗，一能见录。船头行北归，囊囊有美玉。尘埃京洛人，亦与洗心目。

和郭功父韵送芝道人游隐静

观音妙智力，应感随缘度。芝师访东坡，宁辞万里步。道义偶相契，十年同去住。行穷半世间，又欲浮杯渡。我愿焚囊钵，不作陈俗具。会取却归时，只是而今路。

次韵鲁直戏赠

昨夜试微凉，汗衾初退红。我愿随秋风，随身入房栊，君王不好事，只作好惊鸿。细看卷蚕尾，我家真栗蓬。

夜坐与迈联句

清风来无边，明月翳复吐。自松声满虚空，竹影侵半户。迈暗枝有惊鹊，坏壁鸣饥鼠。白露叶耿高梧，风萤落空庞。迈微凉感团扇，古意歌白纻。自乐哉今夕游，复此陪杖屦。迈传家诗律细，已自过宗武。短诗膝下成，聊以慰怀祖。自

寄傲轩

先生英妙年，一扫千兔秃。仕进固有馀，不肯践场屋。通闾何所做，傲名非傲俗。定知轩冕中，享荣不偿辱，岂无自安计，得失犹转毂。先生独扬扬，忧患莫能读。得如虎挟乙，失若龟藏六。茅檐聊寄寓，俯仰亦自足。东坡无边春，方寸尽藏蓄。醉哦旁若无，独侑一樽醪。床头车马道，残月挂疏木。朝客纷扰时，先生睡方熟。

榆

我行汴堤上，厌见榆阴绿。千株不盈亩，斩伐同一束。及居幽囚中，亦复见此木。蠹皮溜秋雨，病叶埋墙曲。谁言霜雪苦，生意殊未足。坐待春风至，飞英覆空屋。

槐

忆我初来时，草木向衰歇。高槐虽惊秋，晚蝉犹抱叶。淹留未云几，离离见疏英。栖鸦寒不去，哀叫饥啄雪。破巢带空枝，疏影挂残月。岂无两翅羽，伴我此愁绝。

竹

今日南风来，吹乱庭前竹。低昂中音会，甲刃纷相触。萧然风雪意，可折不可辱。风弄竹已一作亦回，猗猗散青玉。故山今何有，秋雨荒篱菊。此君知健否，归扫南轩曲。

柏

故园多珍木，翠柏如蒲苇。幽囚无与乐，百日看不已。时来拾流胶，一作肪未忍践落子，当年谁所种，少长与我齿。仰视苍苍榦，所阅固多矣。应见李将军，胆落温御史。

问渊明

或曰东坡此诗与渊明反此非知言也，盖亦相引以造意言者未始相非也。元祐五年十月日

子知神非形，何复异人天。岂惟三才中，所在靡不然。我引而高之，则为星斗悬。我散而卑之，宁非山与川。三皇虽云没，至今在我前。八百要有终，彭祖非永年。皇皇谋一醉，发此露槿妍。有酒不辞醉，无酒斯饮泉。立善求我誉，饥人食馋涎。委运忧伤生，忧一作运去生亦迁。纵浪大化中，正为化所缠。应尽便须尽，宁复事此言。

题云龙草堂石磬

折为督邮腰，悬作山人室。殊非濮上音，信是泗滨石。

朱亥墓

昔日朱公子，雄豪不可追。今来游故国，大冢屈称儿。平日轻公相，千金弃若遗。梁人不好事，名字寄当时。鲁史盗齐豹，求名谁复知。慎无怨世俗，犹不遭仲尼。

严 颜 碑

先生反刘璋，兵意颇不义。孔明古豪杰，何乃为此事。刘璋固庸主，谁为死不二。严子独何贤，谈笑傲砧几。国亡君已执，嗟子死谁为。何人刻山石，使我空涕泪。吁嗟断头将，千古为病悸。

岷 山

远客来自南，游尘昏岷首。过关无百步，旷荡吞楚藪。登高忽惆怅，千载意有偶。所忧谁复知，嗟我生苦后。团团山上桧，岁岁阅榆柳。大才固已殊，安得同永久。可怜山前客，倏忽星过溜。贤愚未及分，来者当自剖。

骊 山

君门如天深几重，君王如帝坐法官。人生难处是安稳，何为来此骊山中。复道凌云接金阙，楼观隐烟横翠空。林深雾暗迷八骏，朝东暮西劳六龙。六龙西幸峨眉栈，悲风便入华清院。霓裳萧散羽衣空，麋鹿来游猿鹤怨。我上朝元春半老，满地落花无人扫。羯鼓楼高挂夕阳，长生殿古生青草。可怜吴楚两醢鸡，筑台未就已堪悲。长杨五柞汉幸免，江都楼成隋自迷。由来留连多丧国，宴安酖毒因奢惑。三风十愆古所戒，不必骊山可亡国。

和子由除日见寄

薄官驱我西，远别不容借。方愁后会远，未暇忧岁夕。强欢虽有酒，冷

酌不成席。秦烹惟羊羹，陇馔有熊腊。念为儿童岁，屈指已成昔。往事今何追，忽若箭已释。感时嗟事变，所得不偿失。府卒来驱傩，矍铄惊远客。愁来岂有魔，烦汝为攘碟。寒梅与冻杏，嫩萼初似麦。攀条为惆怅，玉蕊何时拆。不忧春艳晚，行见弃夏核。人生行乐耳，安用声名籍。胡为独多感，不见膏自炙。诗来苦相宽，子意远可射。依依见其面，疑子在咫尺。兄今虽小官，幸忝佐方伯。北池近所凿，中有汧水碧。临池饮美酒，尚可消永日。但恐诗力弱，斗健未免馘。诗成十日到，谁谓千里隔。一月寄一篇，忧愁何足掷。

次韵范淳父送秦少章

宿缘在江海，世网如予何。西来瘦公尘，已濯长淮波。十年淮海人，初见一麦禾。但欣争讼少，未觉舟车多。秦郎忽过我，赋诗如卷阿。句法本黄子，二豪与揩磨。嗟我久 群，逝将老西河。后生多名士，欲荐空悲歌。小范真可人，独肯勤收罗。瘦马识馱耳，枯桐得云和。近闻馆李生，病鹤借一柯。赠行苦说我，妙语 蹉跎。西羌已解仇，烽火连朝那。坐筹付公等，吾将寄潜沱。

第二卷

律诗一百七十九首

过巴东县不泊闻颇有莱公遗迹

莱公昔未遇，寂寞在巴东。闻道山中树，犹馀手种松。江山养豪杰，礼数困英雄。执版迎官长，趁尘拜下风。当年谁刺史，应未识三公。

白帝庙

朔风催入峡，惨惨去何之。共指苍山路，来朝白帝词。荒城秋草满，古树野藤垂。浩荡荆江远，凄凉蜀客悲。迟回问风俗，涕泗阅兴衰。故国依然在，遗民岂复知。一方称警蹕，万乘拥旌旗。远略初吞汉，雄心岂在夔。崎岖来野庙，闷默愧常时。破甑蒸山麦，长歌唱竹枝。荆都真壮士，吴柱本经师。失计虽无及，图王固已奇。犹馀帝王号，皎皎在门楣。

戎州

乱山围古郡，市易带群蛮。瘦岭春耕少，孤城夜漏闲。往时边有警，征马去无还。自顷方从化，年来亦欵关。颇能贪漠布，但未脱金环。何足争强弱，吾民尽玉颜。

见鲁人孔宗翰题诗三首

屈指从来十七年，交亲零落亦潜然。婣娟再见中秋月，依旧清辉照客眠。

右孔

坏壁题诗已五年，敌人风物两依然。定知来岁中秋月，又照先生枕 眠。更邀明月说明年，记取孤吟孟浩然。此去宦游如传舍，拣枝惊鹊几时眠。

奉和凝祥池

似知金马客，时梦碧鸡坊。冰雪消残腊，烟波写故乡。鸣銮自容与，立马久回翔。乞与三韩使，新图到乐浪。时有高丽使在京。每至胜境，即图画以归。

奉和颖叔万寿观

道人幽梦晓初还，已觉笙箫下月坛。风伯前驱清宿雾，祝融参乘破朝寒。英姿连壁从多士，妙句锵金和八鸾。已向词臣得颇牧，路人莫作者儒看。

正月十四夜扈从端门观灯三绝

淡月疏星绕建章，仙风吹下御炉香。侍臣鹄立通明殿，一朵红云捧玉皇。

薄雪初消野未耕，卖薪买酒看升平。吾君勤俭倡优拙，自是丰年有笑声。

老病行穿万马群，九衢人散月纷纷。归来一盏残灯在，犹有传柑遗细君。
上元夜登楼贵戚，例有黄柑相遗，侍臣谓之传柑。

获鬼章二十韵

青唐有速寇，白首已穷妖。窃据临桃郡，潜通讲渚桥。庙谋周召虎，边帅汉班超。坚垒千兵破，连航一炬烧。擒奸从窟穴，奏捷上烟霄。诡异人图像，欢娱路载谣。千诛非一事，伐叛自先朝。取道经陵寝，前期告庙祧。西来闻几日，面缚见今朝。二圣临云陛，千官溢海潮。载囚车 辘，失主马萧条。横拜如蹲犬，胡装尚衣貂。理卿辞具服，译长舌初调。缓死恩殊厚，求生尾屡摇。慈仁逢太母，宽厚戴唐尧。赤手真擒虎，和羹未赐臯。藁街虚授首，东市偶全腰。困兽何须杀，遗雏或可招。威声西振夏，武节北通辽。帝道有强弱，天时或长消。羌情防报复，军胜忌矜骄。慎重关西将，奇功勿再要。

光禄庵二首

文章恨不见文园，礼乐方将访石泉。何事庵中着光禄，枉教闲处笔如椽。
城中太守的何人，林下先生非我身。若向庵中觅光禄，雪中履迹镜中真。

过通判曹仲锡饮书怀两绝

公退清闲如致仕，酒馀欢适似还乡。不妨更有安心病，卧看紫帘一炷香。
心有何求遣病安，年来古井不生澜。只应戏瓦闲童子，却作泠泠一水看。

过木枋观

石壁高千尺，微踪远欲无。飞檐如剑寺，出剑门东望上寺字仿佛可见古柏似仙都。许子尝高遁，行舟悔不迂。斩蛟闻猛烈，提剑想崎岖。寂寞棺犹在，修崇世已愚。隐居人不识，化去俗争吁。洞府烟霞远，人间爪发枯。飘飘乘倒景，谁复顾遗躯。

和喜雨

密云今日破郊西，小雨萧萧未作泥。且及清闲同笑乐，行看衰病费扶携。
花前白酒倾云液，户外青骢响月题。不用临风苦挥泪，君家自与竹林齐。

观开西湖次吴左丞韵

伟人谋议不求多，事定纷纷自唯阿。尽放龟鱼还绿净，肯容萧苇障前坡。
一朝美事谁能绝，百尺苍岩尚可磨。天上列星当亦喜，月明时下浴明波。

荆州十首

游人出三峡，楚地尽平川。北客随南贾，吴樯间蜀船。江侵平野断，风卷白沙旋。欲问兴亡意，重城自古坚。

南方旧战国，惨淡意犹存。慷慨因刘表，凄凉为屈原。废城犹带井，古姓聚成村。亦解观形胜，升平不敢论。

楚地阔无边，苍茫万顷连。耕牛未尝汗，投种去如捐。农事谁当劝，民愚亦可怜。平生事游情，那得怨凶年。

朱槛城东角，高王此望沙。江山非一国，烽火畏三巴。战骨沦秋草，危楼倚断霞。百年豪杰尽，扰扰见鱼虾。

沙头烟漠漠，来往厌喧卑。野市分麇闹，宫帆过渡迟。游人多问卜，伦叟尽携龟。日暮江天静，无人唱楚词。

太守王夫子，山东老俊髦。壮年闻猛烈，白首见雄豪。食雁君应厌，驱车我正劳。中书有安石，慎勿赋离骚。

残臆多风雪，荆人重岁时。客心何草草，里巷自嬉嬉。爆竹惊邻鬼，驱傩逐小儿。故人应念我，相望各天涯。

江水深成窟，潜鱼大似犀。赤鳞如琥珀，老枕胜玻璃。上客举雕俎，佳人摇翠篔。登庖更作器，何以免屠判。

北雁来南国，依依似旅人。纵横遭折翼，感恻为沾巾。平日谁能挹，高飞不可驯。故人持赠我，三嗅若为珍。

柳门京国道，驱马及春阳。野火烧枯草，东风动绿芒。北行连许邓，南去极衡湘。楚境横天下，怀王信弱王。

渝州寄王道祖

曾闻五月到渝州，水拍长亭砌下流。唯有梦魂长缭绕，莫论唐史更绸缪。舟经故国岁时改，霜落寒江波浪收。归梦不成冬夜永，厌闻船上报更筹。

过安乐山闻山上木叶有文如道士篆符云此山乃张道陵所寓二首

天师化去知何在，玉印相传世共珍。故国子孙今尚在，满山秋叶岂能神。真人已不死，外慕堕空虚。犹余好名意，满树写天书。

涪州得山胡 善鸣出黔中

日锁筠笼，回头惜翠茸。谁知声，亦自意重重。夜宿烟生浦，朝鸣日上峰。故巢何足恋，鹰隼岂能容。

巫山庙上下数十里有乌鸢无数取食于行舟之上舟人以神之故亦不敢害

群飞来去噪行人，得食无忧便可驯。江上饥乌无足怪，野鹰何事亦频频。

夷陵县欧阳永叔至喜堂

夷陵虽小邑，自古控荆吴。形胜今无用，英雄久已无。谁知有文伯，远谪自王都。人去年年改，堂倾岁岁扶。追思犹咎吕，感叹亦怜朱。时朱太守为公筑此堂旧种孤楠老，新霜一橘枯。清篇留峡洞，醉墨写邦图。三游洞有诗夷陵图后有留题处。故老问行客，长官今白须。著书多念虑，许国减欢娱。寄语公知否，还须数倒壶。

入 峡

自昔怀幽赏，今兹得纵探。长江连楚蜀，万派泻东南。合水来如电，黔波绿似蓝。馀流细不数，远势竞相参。入峡初无路，连山忽似龛。萦迂收浩渺，蹙缩作渊潭。风过如呼吸，云生似吐含。坠岩鸣窸窣，垂蔓绿毵毵。冷翠多崖竹，孤生有石楠。飞泉飘乱雪，怪石走惊骖。绝涧知深浅，樵僮忽两三。人烟偶逢郭，沙岸可乘篮。野戍荒州县，邦君古子男。放衙鸣晚鼓，留客荐霜柑。闻道黄精草，丛生绿玉 。尽应充食饮，不见有彭聃。气候冬犹暖，星河夜半涵。遗民悲昶衍，孟昶从此入觐玉衍亦蜀主。旧俗接鱼蚕。版屋浸无瓦，崑居窄似庵。伐薪常冒嶮，得米不盈甔。叹息生何陋，劬劳不自惭。叶舟轻远溯，大浪固尝谙。矍铄空相视，呕哑莫与谈。蛮荒安可驻，幽逢信难枕。独爱孤栖鹤，高超百尺岚。横飞应自得，远扬似无贪。振翮游霄汉，无心顾雀鹑。尘劳世方病，局束我何堪。尽解林泉好，多为富贵酣。试看飞鸟乐，高遁此心甘。

马融石室

未应将军聘，初从季直游。绛纱生不识，苍石尚能留。岂害依梁冀，何须困李侯。吾诗慎勿刻，猿鹤为君羞。

代书寄桃山居士张圣可

十日春寒不出门，不知江柳已摇村。稍闻泱泱流冰谷，渐见青青没烧痕。数亩荒园留我住，半缸浊酒待君温。去年今日关山路，细雨梅花正断魂。

题赠田辨之琴姬

流水随弦滑，清风入指寒。坐中有狂客，莫近绣帘弹。

六月六日以病在告独游湖 上诸寺晚谒损之戏留一绝

示病维摩元不病，在家灵运已忘家。何须魏帝一丸药，且尽庐仝七碗茶。是日净慈南屏惠昭小昭庆及此凡饮已七碗。

重九日以病辞府宴来谒损

之啜茶清话复留小诗

湖上青山翠作堆，葱葱郁郁气佳哉。笙歌丛里抽身出，云水光中洗眼来。白足赤发迎我笑，拒霜黄菊为谁开。明年桑苎煎茶处，忆着衰翁首重回。皎然有重九日与陆羽煎茶诗羽自称桑苎翁。

李铃辖坐上分题戴花

二八佳人细马驮，十千美酒渭城歌。帘前柳絮惊春晚，头上花枝奈老何。露湿醉巾香掩冉，月明归路影婆娑。绿珠吹笛何时见，莫把斜红插皂罗。

同 前

半雨半晴寒食夜，野酴醾发暗香来。分无素手簪罗髻，旦折霜蕤浸玉醅。

四十年前元夕与故人夜游得此句

午夜胧胧淡月黄，梦回犹有暗尘香。纵横满地霜槐影，寂寞莲灯半在亡。

戏孙公素

投扇昔年笑温峤，握刀晚岁战刘郎。不须戚戚如冯衍，便与时时说李阳。

雪后便欲与同僚寻春一病弥月杂花都尽 独牡丹在耳刘景文左藏和顺闍黎诗见 赠次韵答之

残花怨久病，剩雨泣馀妍。不见双旌出，空令九陌还。开园市井皆入知君苦寂寞，妙语嚼芳鲜。浅紫从争发，浮红任早蔫。天葩尚青暮，国色待华颠。载酒邀诗将，臞儒不是仙。

南康望湖亭 一本云过洞庭。

八月渡长湖，萧条万象疏。一本云潇湘景物疏。秋风片帆急，暮霭一本作雨一孤山。许国心犹在，康时术已虚。术一作业岷峨家万里，投老得归无。

半山亭

登岭势巍巍，莲峰太华齐。凭栏红日早，回首白云低。松柏月中老，猿猴物外啼。禅师吟绝后，千古指人迷。

儋耳山

突兀隘空虚，他山总不如。君看道傍石，尽是补天馀。

建中靖国元年正月复过虔再次前韵

吾生如寄耳，岭外亦闲游。赣石三百里，寒江五尺流。楚山微有霰，越瘴久无秋。望断横云峤，魂飞咤雪洲。晓钟时出寺，暮鼓各鸣楼。归路迷千嶂，劳生阅百州。不随猿鹤化，甘作贾胡留。只有貂裘在，犹堪买钓舟。

次韵闻复上人

前身本同社，宿业独临边。一悟镜空老，始知圆泽贤。归心忘犊佩，生术寄羊鞭。不似欧阳子，空留六一泉。

宋复古画潇湘晚景图三首

西征忆南国，堂上画潇湘。照眼云山出，浮空野水长。旧游心自省，信手笔都忘。会有衡阳客，来看意渺茫。

落落君怀抱，山川自屈蟠。经营初有边，挥洒不应难。江市人家少，烟村古木攒。知吾有幽意，细细为寻看。

咫尺殊非少，阴晴自不齐。径蟠趁后崦，水会赴前溪。自说非人意，曾经入马蹄。他年宦游处，应话剑山西。

儋州二首

小邑浮桥外，青山石岸东。茶枪烧后出，麦浪水前空。万户不禁酒，三年真识翁。结茅来此住，岁晚有谁同。

荔子几时熟，花头今已繁。探春先拣树，买夏欲论园。居士常携客，参军许扣门。周参军家多荔子。明年更有味，怀抱闹诸孙。一云带诸孙。

海上道人传以神守气诀

但向起时作，还于作处收。蛟龙莫放睡，雷雨直须休。要会无穷火，尝观未尽油。夜深入散后，惟有一灯留。

曹溪夜观传灯录灯花落一僧字上口占

山堂夜岑寂，灯下看传灯。不觉灯花落，茶毗一个僧。

赠包安静先生三首

皓色生匝面，堪称雪见羞。东坡调诗腹，今夜睡应休。偶谒大中精蓝中，故人烹日注茶果不虚示，故诗以记之。

建茶三十斤，不审味如何。奉赠包居士，僧房战睡魔。昨日点日注极佳，点此复云罐中馀者可示及舟中涤神耳。

野菜初出珍又珍，送与安静病酒人。便须起来和热吃，不消洗面裹头巾。

杭州次周焘韵游天竺观激水

道眼转丹青，常于寂处鸣。早知雨是水，不作两般声。

过海得子由书

经过废来久，有弟忽相求。门外三竿日，江关一叶秋。萧疏悲白发，漫浪散穷愁。世事江声外，吾生幸且休。

去岁与子野游逍遥堂日欲没因并西山叩罗浮道院至已二鼓矣遂宿于西堂今岁索居儋耳子野复来相见作诗赠之

往岁追欢地，寒窗梦不成。笑谈惊半夜，风雨暗长檠。鸡鸣山树晓，钟鸣霜外声。只今那复见，务髯似三生。

元祐五年十二月十二日同景文义伯圣途次元伯固仲蒙游七宝寺题竹上

结根岂殊众，修柯独出林。孤高不可恃，岁晚霜风侵。

泗州过仓中刘景文老兄戏赠一绝

既聚伏波米，还数魏舒筹。应笑苏夫子，侥幸得湖州。

戏题巫山县用杜子美韵

巴俗深留客，吴侬但忆归。直知难共语，不是故相违。东县闻铜臭，江陵换侠衣。丁宁巫峡雨，慎莫暗朝晖。

初贬英州过把赠马梦得

万古他池穴，归心负雪堂。殷勤竹林咏，犹得比山王。

答晁以道索书

阅世真难记，如公自不忘。其于书太简，正以懒相妨。

大老寺竹间阁子

残花带叶暗，新筍出林香。但见竹阴绿，不知汧水黄。树高倾陇鸟，池浚落河魴。栽种良辛苦，孤僧瘦欲尪。

惠州太守东堂祠故相陈文惠公堂下有
公手植荔枝一株郡人谓之将军树今岁
大熟尝啖之余下及吏卒其高不可致者
纵猿取之

丞相祠堂下，将军大树傍。炎云骈火实，瑞露酌天浆。烂紫垂先熟，高红挂远扬。分甘遍铃下，也到黑衣郎。

赠何道士

安心守玄牝，闭眼觅黄庭。问疾来三客，浇愁有半瓶。风松时落蕊，病鹤不梳翎。樽空我归去，山月伴君醒。

和庐山上人竹轩

洞外复空中，千千万万同。劳师向竹颂，清是阿谁风。

叹塞来享

蠢尔氏羌国，天诛亦久稽。既能知面内，不复议征西。斥候销烽火，边城息鼓鼙。输忠修贡职，弃过为黔黎。雪满流沙静，云沉太白低。巍巍二圣治，盛德古难齐。

观 台

三界无所住，一台聊自宁。尘劳付白骨，寂照起黄庭。残磬风中溺，孤灯雪后青。须防童子戏，投瓦犯清冷。

吴江岸

晓色兼秋色，蝉声杂鸟声。壮怀销铄尽，回首尚心惊。

嘲子由

堆几尽埃简，攻之如蠹虫。谁知圣人意，不在古书中。

无 题

六秩行当启，区中缘更疏。不贪为我宝，安步当君车。故国多乔木，先人有弊庐。誓将闲散好，不着一行书。

元祐九年立春

熊白来山北，猪红削剑南。春盘得青韭，臠酒寄黄柑。

扶风天和寺

远望若可爱，朱栏碧瓦沟。聊为一驻足，且慰百回头。水落见山石，尘高昏市楼。临风莫长啸，遗涕浩难收。

再赠常州报恩长老

荐福老怀真巧便，净慈两本更尖新。凭师为作铁门限，准备人间请话人。

闻挑西捷报

汉家将军一丈佛，诏赐天池八尺龙。露布朝驰玉关塞，捷书夜到甘泉宫。似闻指挥筑上郡，已觉谈笑无西戎。牧臣不见天颜喜，但惊草木放一作皆春容。

三尊牡丹

风雨何年别，留真向此邦。至今遗恨在，巧过不成双。

己未十月十五日狱中恭闻太 皇太后不豫有赦作诗

庭柏阴阴昼掩门，乌知有赦闹黄昏。汉宫自种三生福，楚客还招九死魂。纵有锄犁及田亩，已无面目见丘园。只应圣主如尧舜，犹许先生作正言。

题李景元画

闻说神仙郭恕先，醉中狂笔势澜翻。百年寥落何人在，只有华亭李景元。

谢人惠云中方舄二首

燕尾称呼理未便，剪裁云叶却天然。无心只是青山物，覆顶宜归紫府仙。转觉周家新样俗，头巾起后周末容陶令旧名传。鹿门佳士勤相赠，黑雾玄霜合比肩。皮裘美赠天随子纱巾诗云：掩敛乍疑裁黑雾，轻明浑似带玄霜。

胡靴短勒格龠疏，古雅无如此样殊。妙手不劳盘作风，晋永嘉中有风头。鞋轻身只欲化为皂。魏风褊俭堪羞葛，楚客豪华可笑珠。拟学梁家名解脱，武帝作解脱履便于禅坐作跏趺。

儋州上元过子赴使君会

使君置酒莫相违，守舍何妨独掩扉。卧看月窗蟠蜥蜴，静闻风幔落蜘蛛。灯花结尽吾犹梦，香篆消时汝欲归。回首凄凉十年事，传柑归遗满朝衣。

儋耳寄子由

灯烬不挑垂暗蕊，香炉重拨尚余薰。狂风欲发鸦翻树，缺月初升犬吠云。
闭目此生新活计，随身孤影旧知闻。雷州别驾应危坐，跨海清光与子分。驾
一作乘子由时谪雷州别驾。

谢宋汉杰惠李承晏墨

老松烧尽结轻花，妙法来从北李家。翠色冷光何所似，墙东鬣发堕寒鸦。

被命南迁途中寄定武同僚

人事千头及万头，得时何喜失时忧。只知紫绶三公贵，不觉黄粱一梦游。
边见恩纶临定武，忽遭分职赴英州。南行若到江干侧，休宿浔阳旧酒楼。

李委吹笛 并引

元符五年十二月十九日，东坡生日也。置酒赤壁矶下，踞高峰，俯
鹊巢。酒酣，笛声起于江上，客有郭石二生，颇知音，谓坡曰：笛声有
新意，非俗士也。使人问之，则进士李委，闻坡生日，作新曲曰鹤南飞
以献。呼之使前，则青巾紫裘，要笛而已。既奏新曲，又快作数弄，嘹
然有穿云裂石之声，坐客皆引满醉倒。委袖出嘉纸一幅曰：吾无求于公，
得一绝句足矣，坡笑而从之。

山头孤鹤向南飞，载我南游到九疑。下界何人也吹笛，可怜时复犯龟兹。

书衮仪所藏惠崇画二首

两两孤鸿欲破群，依依还似北归人。遥知朔漠多风雪，更待江南半月春。
竹外桃花三两枝，春江水暖鸭先知。蒌蒿满地芦芽短，正是河豚欲到时。

次韵徐得之常与余约卜邻于江淮间将赴登 州同舟至山阳以诗见送留别

别时酒盏照灯花，知我归期渐有涯。去岁渡江萍似斗，今年并海枣如瓜。
多情明月邀君共，无价青山为我赊。千首新诗一竿竹，不应空钓汉江槎。

书黄筌画翎毛花蝶图二首

短翎长喙喜喧卑，曳练双翔亦自奇。赖有黄鹂斗嬛好，独依藓石立多时。
绿阴青子已愁人，忍见中庭燕麦新。怱怱刘郎今白首，时来看卷觅余春。

次韵王定国得晋卿酒相留夜饮

短衫压手气横秋，更着仙人紫绮裘。使我有名全是酒，从他作病且忘忧。

诗无定律君应将，醉有真卿我可侯。且倒余樽尽今夕，睡蛇已死不须钩。

偶于龙井辨才处得歙砚甚奇作小诗

罗细无文角浪平，半丸犀壁浦云泓。午窗睡起人初静，时听西风拉瑟声。

秋晚客兴

草满他塘霜送梅，疏林野色近楼台。天围故越侵云尽，潮上孤城带月回。客梦冷随枫叶断，愁心低逐雁声来。流年又喜经重九，可意黄花是处开。

陈伯比和回字复次韵

日里冯生宁屑去，湖海陈侯犹肯来。诗书好在家四壁，蒲柳翳然城一隈。骑上下山亦疏矣，倏从容出何为哉。市桥十步即尘土，晚雨潇潇殊未回。

广陵后园题申公扇子

露叶风枝晓未匀，绿阴青子净无尘。闲吟绕屋扶疏句，须信渊明是可人。

山光寺回次芝上人韵

闹里清游借隙光，醉时真境发天藏。梦回拾得吹来句，十里南风草木香。

与道源游西庄遇济道人同往草堂为济书此

桑麻已零落，藻符复销沉。园宅在人境，岁时伤我心。强穿南埭路，遥望北山岑。欲与道人语，跨鞍聊一寻。

寒食夜

漏声透入碧窗纱，人静秋千影半斜。沉麝不烧金鸭冷，淡云笼月照梨花。

答子勉三首

君不登郎省，还应上谏坡。才高殊未识，岁晚幸无他。畅马羸难出，邻鸡束不歌。寒炉余几火，灰里拨阴何。

惊人得佳句，或以做王公。处士还清节，滑稽安足雄。深沉似康乐，简远到安丰。一点无俗气，相期林下风。

欲舞腰身柳一窠，小梅摧拍大梅歌。舞余片片梨花落，争奈当途风物何。

送杨奉礼

谱牒推关右，风流出靖恭。时情任险肢，家法故雍容。南去河千顷，大

水中相别。余惟酒一钟。更谁哀老子，令得放疏慵。

别东武流杯

莫笑官居如传舍，故应人世等浮云。百年父老知谁在，唯有双松识使君。

走笔谢吕行甫惠子鱼

卧沙细肪吾方厌，通印长鱼谁肯分。好事东平贵公子，贵人不与与苏君。

孔周翰尝为仙源令，中秋夜以事留于东武官舍。时陈君荣右王君建中皆在郡，其后十七年中秋。周翰持节过郡，而二君已亡。感时怀旧，留诗于壁。又其后五年中秋，轼与客饮于超然台。闻周翰乞此郡，客有诵诗者。乃次其韵二篇，以为他日一笑。

坏壁题诗已五年，故人风物两依然。定知来岁中秋月，又照先生枕曲眠。更邀明月说明年，记取孤吟孟浩然。此去宦游如传舍，拣枝惊鹊几时眠。

送穆越州

江海相忘十五年，羨公松柏蔚苍颜。四朝耆旧冰霜后，两郡风流水石间。旧政犹传蜀父老，先声已振越溪山。樽前俱是蓬莱守，莫放高楼云月闲。

赠葛苇

竹掾苑屋半摧倾，肯向蜂窠寄此生。长恐干头卷室去，欲将船尾载君行，小诗试拟孟东野，大草闲临张伯英。消遣百年须底物，故应怜我不归耕。

雨 二 首

越井冈头云出山， 柯江上水如天。床床避漏幽人屋，浦浦移舟艇子船。龙卷鱼虾并雨落，人随鸡犬上墙眠，只应楼下平阶水，长记先生过岭年。

疏一作急雨潇潇作晚凉，卧闻榕叶响长廊。微明灯火耿残梦，半湿帘栊浥旧香。高浪殷床吹瓮盎，暗风惊树摆琳琅。先生不出晴无用，留向空阶滴夜长。

杭州牡丹开时仆犹在常润周 令作诗见寄次其韵复次一首选赴阙

羞归应为负花期，已是成阴结子时。与物寡情怜我老，遣春无恨赖君诗。玉台不见嘲酣酒，金缕犹歌空折枝。从此年年定相见，欲师老圃问樊迟。

莫负黄花九日期，人生穷达可无时，十年且就三都赋，万户终轻千首诗。
天静伤鸿犹戢翼，月明惊鹊未安枝。君看六月河无水，万斛龙骧到自迟。

访詹使君食槐芽 一作叶冷淘

批把已熟粲金珠，桑落初尝滟玉蛆。暂借垂莲十分盏，来浇空腹五车书。
青浮卯碗槐芽饼，红点冰盘薺叶鱼。醉饱高眠真事业，此生有味在三余。

示 过 并跋

春鸿社燕巧相违，白鹤峰头玉板扉。石建方欣洗踰厕，姜庞不解叹蠨蛸。
一瓮京口嗟春梦，万炬钱塘忆夜归。合浦卖珠无复有，当年笑我泣牛衣。

戊寅上元，余寓儋耳。过子夜出，余独守舍，作违字韵诗。今庚辰上元，已再期矣。家在惠州白鹤峰下，过子并妇子从余来此，其妇亦笃孝，惻然悯之。故和前篇有石建姜庞之句，而又复悼怀同安君季章，故有牛衣之句。悲君之亡而喜余在此也，书以示过，看了勿复感怆。切切。

焦坑寺

渺渺疏林集晚鸦，孤村灯一作烟火梵王家。幽人自种千头桥，远客来寻百结花。
浮石已干霜后水，焦坑聊试雨前茶。只疑归梦西南去，翠竹江村绕白沙。

赠虔州慈云寺鉴老

居士无尘堪洗沐，道人有句借宣扬。窗间但见蝇钻纸，门外唯闻佛放光。
遍界难藏真薄相，一丝不挂且逢场。却须重说圆通偈，千眼薰笼是法王。

和方南圭寄迓周文之三首

共惜相从一寸阴，酒杯虽浅意殊深。且同月下三人影，聊豁一作莫作天涯万里心。
东岭旧一作近开松竹径，甫堂初绝斧斤音。知君善颂如张老，犹望携壶更一临。

数亩蓬蒿古县阴，小窗明快夜堂深。也知卜筑非真宅，聊欲跣跣看此心。
闻道携壶问奇字，更宜登木助徽音。一云振履出商音相娱北户江千顷，直下都无地可临。

此生真欲老墙阴，却扫都忘岁月深。拔薤已观贤守政，摘蔬聊慰故人心。
风流贺监常吴语，憔悴钟仪独楚音。治状两邦俱第一，颍川归去肯重临。

壶中九华诗

湖口人李正臣蓄异石，九峰玲珑，宛转若窗棂然。余欲以百金买之，与仇池石为偶，方南迁未暇也。名之日壶中九华，且以诗识之。

我家岷蜀最高峰，一作清溪电转失云峰梦里犹惊翠扫空。五岭莫愁千嶂

外，九华今在一壶中。天池水落层层见，一作石泉水落涓涓滴。玉女窗明处处通。念我仇池太孤绝，百金归买小一作碧玲珑。

留别登州举人

身世相忘久自知，此行闲看古黄陂。自非北海孔文举，谁识东莱太史慈。落笔已吞云梦客，抱寒欲访水仙师。莫嫌五日匆匆守，归去先传乐职诗。

过海

参横斗落转一作转欲三更，苦雨终风也解晴。云散月明谁点缀，天容海色本澄清。空余鲁叟乘桴意，无复一作粗识轩皇奏乐声。九死南荒吾不恨，兹游奇绝冠平生。

过岭寄予由三首

七年来往我何堪，又试曹溪一勺甘。梦里似曾迁海外，醉中不觉到江南。波生濯足鸣空洞，雾绕征衣滴翠岚。谁遣山鸡忽惊起，半岩花雨落毵毵。

投章献策谩多谈，能雪冤忠死亦甘。一片丹心天日下，数行清泪岭云南。光荣归佩呈佳瑞，瘴病幽居弄晓岚。从此西风度梅谢，却迎谁与马毵毵。

山林瘴雾老难堪，归去中原茶亦甘。有命谁怜终反北，无心却笑亦巢南。蛮音惯习疑侗语，脾病萦缠带岭岚。赖有祖师清净水，尘埃一洗落毵毵。

歇白塔铺

甘山庐阜郁长望，林隙依稀一作熹微漏日光。吴国晚蚕初断叶，占城早稻欲稔秧。迢迢涧水随人急，冉冉岩花扑马香。望眼尽从一作穷飞鸟远，白云深处是吾乡。

尝天门冬酒

载酒无人过子云，年来家酝有奇芬。醉乡杳杳谁同梦，睡息齁齁得自闻。口业向时犹小小，眼花因酒尚纷纷。点灯更试淮南语，泛蠹东风有縠纹。

西蜀杨看，二十年前见之甚贫，今见之亦贫，所异于昔者，苍颜华发耳。女无美恶，富者妍；士无贤不肖，贫者鄙。使其逢时遇合，岂减当世之士哉。顷宿长安驿舍，闻泣者甚怨，问之乃昔富而今贫者，乃作一诗，今以赠杨君。

孤村渐一作微雨逐秋凉，逆旅愁人怨夜长。不寐相看唯枥马，愁吟一作悲歌互答有寒螿。天寒滞穗犹横亩，岁晚空机尚倚墙。劝尔一杯聊复睡，人间贫富海茫茫。

赠 人

别后休论信息疏，仙凡自古亦殊途。蓬山路远人难到，霜柏威高道转孤。
旧赏未应亡楚国，新诗闻已满皇都。谁怜泽畔行吟者，目断长安貌欲枯。

赵成伯家有妹丽仆黍乡人不肯开樽徒吟春 雪谨依元韵以当一笑

绣帘朱户未曾开，谁见梅花落镜台。试问高吟三十韵，俗云检验死秀才。
带上有诗三十韵。何如低唱两三杯。世传陶谷学士买得党太尉家故妓，遇雪，
陶取雪水烹团茶，谓妓曰：党家应不识此？妓曰：彼龕人安有此景，但能于
销金暖帐下贱斟低唱，吃羊羔儿酒耳。陶默然愧其言。莫嫌衰鬓聊相映，须
得纤腰与共回。知道文君隔青锁，梁园赋客敢言才。聊答来句义取妇人而已，
罪过罪过。

观湖二首

乘槎远引神仙客，万里清风上海涛。回首不知沙界小，飘衣犹觉色尘高。
须弥有顶低垂日，兜率无根下戴鳌。释梵茫然齐劫火，飞云不觉醉陶陶。

朝阳照水红光开，玉涛银浪相徘徊。山分宿雾尽宽远，云驾高风驰送来。
升霞影色歇残火，及物气焰明纤埃。可怜极大不知己，浮生野马悠悠哉。

寄高令

满地春风扫落花，几番曾醉长官衙。诗成锦绣开胸臆，论极冰霜绕齿牙。
别后与谁同把酒，客中无日不思家。田园知有几孙委，早晚扁舟到海涯。

狱中寄子由二首

圣主如天万物春，小臣愚暗自忘身。百年未满先偿债，十口无归更累人。
是处青山可埋骨，他年夜雨独伤神。与君世世为兄弟，更结人间未了因。

柏台霜气夜凄凄，风动琅玕月向低。梦绕云山心似鹿，魂飞汤火命如鸡。
眼中犀角真吾子，身后牛衣愧老妻。百岁神游定何处，桐乡知葬浙江西。狱
中闻湖杭民为余作解厄斋经月，所以有此句也。朱邑葬桐乡犀角杜琮事。

出狱次前韵

百日归期恰及春，残生乐事最关身。出门便旋风吹面，走马联翩鹤啁人。
却对酒杯浑是梦，试拈诗笔已如神。此灾何必深追咎，窃禄从来岂有因。

平生文字为吾累，此去声名不厌低。塞上纵归他日马，城中不斗少年鸡。
休官彭泽贫无酒，隐几维摩病有妻。堪笑睢阳老从事，为余投檄向江西。子
由闻余下狱，乞以官爵赎罪，贬筠州监酒。

寄予由

厌暑多因一向情，银钩秀句益疏通。也知堆案文书满，未暇开轩砚墨中。
湖面新荷空照水，城头高柳谩摇风。吏曹不是尊贤事，谁把前言语化工。

诗送交代仲达少卿

此身无用且东来，赖有江山慰不才。旧尹未嫌衰废久，清尊犹许再三开。
满城遗爱知谁继，极目扁舟挽不回。归去青云还记否，交游胜绝古城隈。

次韵马元宾

流落江湖万里归，相逢自慰已差池。初闻好句惊人倒，悔过东庭识面迟。
握手宁知无贺监，结交谁复许袁丝。塞鸿正欲摩天去，垂老追攀岂可期。

第五桥

白露凄风洗瘴烟，梦回相对两凄然。雀罗廷尉非当日，鸠杖先生愈少年。
世事饱谙思缩手，主恩未报耻归田。谁怜第五桥东水，独照台州老郑虔。

次韵完夫再赠之什某已卜居毗陵与完夫有庐里之约云

柳絮飞时笋箨班，风流二老对开关，雪芽为我求阳羨，乳水君应饷惠山。
竹箴水风眠昼永，玉堂制草落人间。应容缓急烦闾里，桑柘聊同十亩闲。

和林子中待制

两翁留滞各皤然，人笑迂疏老更坚。共把鹅儿一作鸚夷一樽酒，相逢柳色五湖天。
江边遗爱啼斑白，海上先声入管弦。早晚渊明赋归去，浩歌长笑老斜川。

九日袁公济有诗次其韵

古来静治得清闲，我愧真常也一班。举酒东荣挹江海，回樽落日劝湖山。
平生倾盖悲欢里，早晚抽身簿领间。笑指西南是归路，倦飞弱羽久知还。

和吴安持使者迎驾

小雪疏烟杂瑞光，清波寒引御沟长。曈曈日色笼丹禁，杳杳鞭声出建章。
鹓鹭偶叨陪下列，天阍聊启望中央。归来喜气倾新句，满座疑闻锦绣香。

鹿鸣宴

连骑匆匆画鼓喧，喜君新夺锦标还。金罍浮菊催开宴，红蕊将春待入关。
他日曾陪探禹穴，白头重见赋南山。何时共乐升平事，风月笙箫坐夜闲。

次韵张甥棠美昼眠

炎歊五月北窗凉，更觉甘如饭稻粱。宰我粪墙讥敢避，孝先经笥谩兼忘。
忧虞心谢知时雁，安稳身同挂角羊。要识熙熙不争竞，华胥别是一仙乡。

真兴寺阁禱雨

太守亲从千骑禱，神翁远借一杯清。云阴黯黯将嘘遍，雨意昏昏欲酝成。
已觉微风吹袂冷，不堪残日傍山明。今年秋熟君知否，应向江南饱食粳。

惠州近城数小山类蜀道，春与进士许
毅野州，会意处饮之且醉，作诗以记。
边参寥专使欲归，使持此以示西湖之
上诸友，庶使知余未尝一日忘湖山也。

夕阳飞絮乱平芜，万里春前一酒壶。铁化双鱼沉远素，剑分二岭隔中区。
花曾识面香仍好，鸟不知名声自呼。梦想平生消未尽，满林烟月到西湖。

送蜀僧去尘

十年读易费膏火，尽日吟诗愁肺肝。不解丹青追世好，欲将芹芷荐君盘。
谁为善相宁嫌瘦，复有知音可废弹。拄杖挂经须倍道，故乡春蕨已阑干。

曾元恕游龙山吕穆仲不至

青春不觉老朱颜，强半销磨簿领间。愁客倦吟花似酒，佳人休唱日衔山。
共知寒食明朝过，且赴僧窗半日闲。命驾吕安邀不至，浴沂曾点暮方还。

黄 河

活活何人见混茫，昆仑气脉本来黄。浊流著解污清济，惊浪应须动太行。
帝假一源神禹迹，世流三患梗尧乡。灵槎果有仙家事，试问青天路短长。

壬寅重九不预会独游普门寺僧阁有怀子由

花开酒美盍不归，来看南山冷翠微。忆弟泪如云不散，望乡心与雁南飞。
明年纵健人应老，昨日追欢意正违。不问秋风强吹帽，秦人不笑楚人讥。

小饮公瑾舟中

青泥赤日午相烘，走访一作扣船窗柳影中。辍我东坡无限睡，赏君南浦不赀风。坐观邸报谈迂叟，闲说滁山忆醉翁。我去澄江三万顷，应明月照还空。邓滁人也，是日坐中观邸报云叟入下省。

和子由次王巩韵如囊之句可为一咎

平生未省为人忙，贫贱安闲气味长。粗免趋时头似葆，稍能忍事腹如囊。筒书见迫身今老，樽酒闻呼首一昂。欲挹天河聊自洗，尘埃满面鬓眉黄。

儋 耳

霹雳收威莫雨开，独凭栏槛倚崔嵬。垂天雌霓云端下，快意雄风海上来。野老已歌丰岁语，除书欲放逐臣回。残年饱饭东坡老，一壑能专万事灰。

答李端叔

若人如马亦如班，笑履壶头出玉关。已入西羌度沙碛，又来东海看涛山。识君小异千人里，慰我长思十载间。西省怜君一作邻居时邂逅，相逢有味是偷闲。

立春日，病中邀安国，仍请率禹功同
来。仆虽不能饮，当请成伯主会，某
当杖策倚几于其间，观诸公醉笑以发
滞闷也。

孤灯照影夜漫漫，拈得花枝不忍看。白发欹簪羞彩胜，黄耆煮粥荐春盘。东方烹狗阳初动，南陌争牛卧作团。老子从来兴不浅，向隅谁有满堂欢。
斋居卧病禁烟前，辜负名花已一年。此日使君不强喜，青春风物为谁妍。青衫公子家千里，白首先生杖百钱。易不相将来问病，已教呼取散花天。

和参寥见寄

黄楼南畔马台宫，云月娟娟正点空。欲共幽人洗笔砚，要传流水入丝桐。且随侍者寻西谷，莫学山僧老祝融。待我西湖借君去，一杯汤饼泼油葱。

东 园

岑寂东园可散愁，胶胶扰扰梦神州。万竿苦竹旌旗卷，一部鸣蛙鼓吹收。雨后月前天欲冷，身闲心远地偏幽。杜门谢客恐生谤，且作人间鹏鷃游。

次韵钱穆父以汝阴用杭越唱和韵作诗见寄

大耿疲劳已离群，小冯慈孝且当门。某以弟亲嫌请郡玉堂不著扶犁手，霜鬓偏宜画鹿鞦。豪杰虽无两王继，子直深父风流犹有二欧存。叔弼并季默

清诗已入新歌舞，要使邦人识雅言。

奉和陈贤良

不学孙吴与六韬，敢将弩马并英豪。望穷海表天还远，倾尽葵心日愈高。
身外浮名休琐琐，梦中归思已滔滔。三山旧是神仙地，引手东来一钓鳌。

秋兴三首

野鸟游鱼信往还，此身同寄水云间。谁家晚吹残红叶，一夜归心满旧山。
可慰摧颓仍健食，此生通脱屡酡颜。年华岂是催人老，双鬓无端只自斑。

故里依然一梦前，相携重上钓鱼船。尝陪大幕今陈迹，谬忝承明愧昔年。
报国无成空白首，退耕何处有名田。黄鸡白酒云山约，此计当时已浩然。

浴凤池边星斗光，宴余香满上书囊。楼前夜月低韦曲，云里车声出未央。
去国何年双鬓雪，黄花重见一枝霜。伤心无限厌厌梦，长似秋宵一倍长。

夜直秘阁呈王敏甫

蓬流宫阙隔埃氛，帝乐天香似许闻。瓦弄寒蝉鸳卧月，楼生晴霭凤盘云。
共谁交臂论今古，只有闲心对此君。大隐本来无境界，北山猿鹤谩移文。

题永叔会老堂

三朝出处共雍容，岁晚交情见二公。乘兴不辞千里远，放怀还喜一樽同。
嘉谋定国垂青史，盛事传家有素风。自顾纓尘犹未濯，九霄终日羨冥鸿。

次韵参寥寄少游

岩栖木石已皤然，交旧何人慰眼前。素与昼公心印合，每思秦子意珠圆。
当年州月来幽谷，拄杖穿云冒夕烟。台阁山林本无异，故应文字不离禅。

谢曹子方惠新茶

陈植文华斗右高，景公诗句复称豪。数奇不得封龙额，禄仕何妨有马曹。
囊简久藏科斗字，铉锋新莹鸕鹚膏。南州山水能为助，更有英辞胜广骚。

题潭州徐氏春晖亭

瞳瞳晓日上三竿，客向东风竟倚栏。穿竹鸟声惊州武，入檐花影落杯盘。
勿嫌州月临玄圃，冷笑乘槎向海滩。胜概直应吟不尽，凭君寄与画图看。

赠仲勉子文

雨昏南浦曾相对，雪满荆州喜再逢。有子才如不羁马，知君心似后凋松。
闲看书册应多味，老傍人门想更情。何日晴轩观笔砚，一杯相属更从容。

讲武台南有感

山城九月冒朝寒，讲武台南路屈盘。骢子雨中乘马去，村童烟外倚墙看。
鸦啼冢木秋风急，鹭立渔船夜水干。花似去年堪折赠，插花人去泪阑干。

题宝鸡县斯飞阁

西南归路远萧条，倚槛魂飞不可招。野阔牛羊同雁鹜，天长草树接云霄。
昏昏水气浮山麓，泛泛春风弄麦苗。谁使爱官轻去国，此生无计老渔樵。

重游终南子由以诗见寄次韵

去年新柳报春回，今日残花覆绿苔。溪上有堂还独宿，谁人无事肯重来。
古琴弹罢风吹坐，山阁醒时月照杯。懒不作诗君错料，旧适应许过时陪。

次韵和子由欲得骊山沉泥砚

举世争称邺瓦坚，一枚不换百金颁。岂知好事王夫子，自采临潼绣领山。
经火尚含泉脉暖，吊秦应有泪痕潜。封题寄去吾无用，近日从戎拟学班。

次韵子由弹琴

琴上遗声久不弹，琴中古意本长存。苦心欲记常迷旧，信指如归自看痕。
应有仙人依树听，空教瘦鹤舞风骞。谁知千里溪堂夜，时引惊猿撼竹轩。

和晁美叔

反观皆自直，相诋竟谁讷。事过始堪笑，梦中今了无。珍材尚空谷，疲
马正长途。未识造化意，茫然同一炉。

绝句一百五十三首

再次前韵 系织锦图上回文

春机满织回文锦，粉泪挥残露井桐。人远寄情书字小，柳丝低日晚庭空。
红 短写空深恨，锦句新翻欲断肠。风叶落残惊梦蝶，戍边回雁寄情郎。
羞云敛惨伤春暮，细缕诗成织意深。头伴枕屏山掩恨，日昏坐暗玉窗琴。

和人回文五首

红窗小泣低声怨，永夜春寒斗帐空。中酒落花飞絮乱，晓莺啼破梦匆匆。
同谁更倚闲窗绣，落日红扉小院深。东复西流分水岭，恨无愁续断弦琴。
寒信风飘霜叶黄，冷灯残月照空床。看君寄忆传纹锦，字字萦愁写断肠。

前堂画烛夜凝泪，半夜清香荔惹衾。烟锁竹枝寒宿鸟，水沉天色霁横参。
娥翠敛时闻燕语，泪珠弹处见鸿归。多情妾似风花乱，薄幸郎如露草晞。

次韵参寥咏雪

朝来处处白毡铺，楼阁山川尽一如。总是烂银并白玉，不知奇货有谁居。

嵇绍似康

王凌谓贾充曰：汝非贾梁道之子耶，乃欲以国与人。由此观之，梁道之忠于魏也久矣。司马景王既执凌而归，过梁道庙，凌大呼曰：我大魏之忠臣也。及司马景王病，见凌与梁道守而杀之，二人者，可谓忠义之至，精贯于幽明矣。然梁道之灵，独不能已其子充之奸，至使首发成济之事，此又理之不可晓者也。故余尝戏作小诗云。

嵇绍似康为有子，郗超叛鉴似无孙。如今更恨贾梁道，不杀公闾杀子元。

移合浦郭功甫见寄

君恩浩荡似阳春，合浦何如在海滨。莫趁明珠弄明月，夜深无数采珠人。

过太行 自过太行至闻潮阳吴子野出家共十九篇

始余赴中山，连日风埃，未尝了了见太行也，意颇以为恨。今将边岭表，过临城道中，天气肃然，西山草木皆可数，忽悟笑曰：余南迁其必返乎？此退之衡山之祥也。乃作小诗。

逐客何人著眼看，太行千里送征鞍。未应愚谷能留柳，可独衡山解识韩。

惠州一绝

罗浮山下四时春，卢橘杨梅次第新。日啖荔枝三百颗，不妨长作岭南人。

送佛面杖与罗浮长老

十方三界世尊面，都在东坡掌握中。送与罗浮德长老，携归万窍总号风。

过子忽出新意以山芋作玉糝羹色香味皆奇绝天上酥陀则不可知人间决无此味也

香似龙涎仍酹白，味如牛乳更全清。莫将北海金齏鲙，轻比东坡玉糝羹。

次韵功父观余画雪鹊有感二首

早知臭腐即神奇，海北天南总是归。九万里风安税驾，云鹏今悔不卑飞。

可怜倦鸟不知时，空羨骑鲸得所归。玉局西南天一角，万人沙苑看孤飞。

追忆郭功父观余旧画雪
鹤复作二韵寄之时在惠州

平生才力信瑰奇，今在穷荒岂易归。正似雪林楼上画，羽翰虽好不能飞。

复官北归再次前韵

秋霜春雨不同时，万里今从海外归。已出网罗毛羽在，却寻云迹帖天飞。

儋耳四绝句

舶一作北船不到米如珠，醉饱萧条半月无。明日东家知祭灶，只鸡斗酒定膾吾。

父老争看乌角巾，应缘曾见宰官身。溪边古路三义口，独立斜阳数过人。半醒半醉问诸黎，棘刺藤梢州州迷。但寻牛屎觅归路，家在牛栏西复西。寂寂东坡一病翁，白头萧散满霜风。小儿误喜朱颜在，一笑那知是酒红。

蜀僧明操思归龙丘子书壁

更厌劳生能几日，莫将归思扰衰年。片云会得无心否，南北东西只一天。

武昌酌菩萨泉送王子立

送行无酒亦无钱，劝尔一杯菩萨泉。何处低头不见我，四方同此水天中。

举旧诗次今韵呈晁秀

春风何处不归鸿，非复羸羊踏旧踪。但愿老师真似月，谁家瓮里不相逢。

答海上翁

山翁不复见新诗，疑是河南石壁曦。海水岂容鲸饮尽，然犀何处觅琼枝。

占山亭

尚父提封海岱间，南征惟到穆陵关。谁知海上诗狂客，占得胶西一半山。我是胶西旧史君，此山仍占与君分。故应窃比山中相，时作新诗寄白云。

题怀素草帖

人人送酒不曾沽，终日松间挂一壶。草圣无成狂饮发，真堪画作醉僧图。

雨中明庆赏牡丹

霏霏雨露作清妍，烁烁明灯照欲然。明日春阴花未老，故应未忍着酥煎。

与王郎夜饮井水

吴兴六月水泉温，千顷荷花聚暗蚊。此井独能深一丈，源龙如故亦如君。

赠僧思谊

泻汤旧得茶三昧，觅句近窥诗一斑。清夜漫漫困披览，一作搜揽斋肠那得许慳顽。

子玉以诗见邀同刁丈游金山

君年甲子未相逢，难向君前说老翁。更有方瞳八十一，奋衣矍铄走山中。

次韵致远

长笑右军称草圣，不如东野以诗鸣。乐天自欲吟淮月，怀祖无劳听角声。

次韵景文山堂听箏三首

忽忆韩公二妙姝，琵琶箏韵落空无。犹胜江左狂灵运，空斗东昏百草须。马上胡琴塞上姝，郑中丞后有人无。诗成画烛飘金烬，八尺英公欲燎须。荻花枫叶忆秦姝，切切么弦细欲无。莫把胡琴挑醉客，回看霜戟褚公须。

成伯家宴造坐无由辄欲效顰而酒已尽入夜不欲烦扰戏作小诗求数酌而已

道士令严难继和，僧伽帽小却空回。隔篱不唤邻翁饮，抱瓮须防吏部来。道士令，悦神乐中所谓离而复合者。杜诗云：肯与邻翁相对饮，隔篱呼取尽余杯。

成伯席上赠所出妓川人杨姐

坐来真个好相宜，深注唇儿浅画眉。须信杨家佳丽种，洛川自有浴妃池。

又答毡帐

卧病经旬减带围，清樽忘却故人期。莫嫌雪里闲毡帐，作事犹来未合时。

往年宿瓜州梦中得小诗录示民师

吴塞蒹葭空碧海，隋宫杨柳只金堤。春风自恨无情水。吹得东风竟日西。

送范德孺

渐觉东风料峭寒，青蒿黄韭试春盘。遥想庆州千嶂里，暮云衰草雪漫漫。

陆莲庵

何妨红粉唱迎仙，来伴山僧到处禅。陆地生花安足怪，而今更有火中莲。

仆年三十九在润州道上过除夜作此诗 又二十年在惠州录之以付过

寺官官小未朝参，红日半窗春睡酣。为报邻鸡莫惊觉，更容残梦到江南。
钓艇归时菖叶雨，缲车鸣处楝花风。长江昔日经游地，尽在如今梦寐中。

寿阳岸下

街东街西翠幄成，池南池北绿钱生。幽人独来带残酒，一作雨偶听一作
闻得黄鹂第一声。

戏答王都尉传柑

侍史传柑玉座傍，人间草木尽天浆。寄与维摩三十颗，不知薝人是余香。
举轻明重维摩犹三十枚

万州太守高公宿约游岑公洞 而夜雨连明戏赠二小诗

肩輿欲到岑公洞，正怯冲泥傍险行。定是岑公闕清境，春江一夜雨连明。
蓬窗高枕雨如绳，恰似糟床压酒声。今日岑公不能饮，吾侪犹健可频倾。

游中峰杯泉

石眼杯泉举世无，要知杯度是凡夫。可怜狡狴维摩老，戏取江湖入钵盂。

憩寂图

东坡虽是湖州派，竹石风流各一时。前世画师今姓李，不妨还作辋川诗。

送柳宜归

折脚铛边煨淡粥，曲枝桑下饮离杯。书生不是南迁客，魑魅惊人须早回。

寒具 乃捻头出刘禹锡佳话

纤手搓来玉数寻，碧油轻醮嫩黄深。夜来春睡浓于酒，压 佳人缠臂金。

参寥惠杨梅

新居未换一根椽，只有杨梅不直钱。莫共金家斗甘苦，参寥不是老婆禅。

雨夜宿净行院

芒鞋不踏利名场，一叶轻一作虚舟寄渺茫。林下对床听夜雨，静无灯火照凄凉。

送惠州监押

一声鸣一作鸿雁破江云，万叶梧桐卷露银。我自飘零是羁旅，更堪秋晚送行人。

过黎君郊居

半园荒草没佳蔬，煮得占禾半是薯。万事思量都是错，不如还叩仲尼居。

赠王勣

何人生得宁馨子，今夜初逢掣笔郎。莫怪围棋忘瓜葛，已能作赋继灵光。

太夫人以无咎生日置酒书壁一绝

寿樽余沥到朋簪，要与郎君夜语深。敢问阿婆开后阁，井中车辖任浮沉。

余旧在钱塘伯固开西湖今方请越戏谓伯固可复来开镜湖伯固有诗因次其韵

已分江湖送此生，会稽行复得岑成。镜湖席卷八百里，坐啸因君又得名。

召伯梵行寺山茶

山茶相对阿一作本谁栽，细雨无人我独来。说似与君君不会，一作见烂红如火雪中开。

奉和成伯兼戏禹功

金钱石竹道傍秋，翠黛红裙马上讴。无限小儿齐拍手，山公又作习池游。

洗 儿

人皆养子望聪明，我被聪明误一生。惟愿孩儿愚且鲁，无灾无难到公卿。

病后醉中

病为兀兀安身物，酒作蓬蓬入脑声。堪笑钱塘十万户，官家付与老书生。

刘监仓家煎米粉作饼子余云为甚
酥潘邠老家造这巡酒余饮之莫
作醋错著水来否后数日余携家
饮郊外国作小诗戏刘公求之二首

一杯连坐两髯棋，数片深红入座飞，十分潋滟君休诉，且看桃花好面皮。
唐诗云：未有桃花面皮。先作杏子眼孔。

野饮花间百物无，杖头惟挂一葫芦。已倾潘子错著水，更觅君家为甚酥。

梦中绝句

揪树高花欲插天，暖风迟日共茫然。落英满地君方见，惆怅春光又一年。

元翰少卿宠惠谷帘水一器龙团二枚仍以
新诗为贶叹味不已次韵奉和

岩垂足练千丝落，雷起双龙万物春。此水此茶俱第一，共成三绝景中人。

藏春坞三首

退之身外无穷事，子美生前有尽花。更有多情君未识，不随柳絮落人家。
莫寻群玉峰头路，莫看玄都观里花。但解闭门留我住，主人休问是谁家。
朱阁前头露井多，碧桃枝下美人过。寒泉未必能如此，柰有银床素绉何。

谢都事惠米

平生忍欲今忍贫，闭口逢人不少陈。俸薄身轻赵都事，也能作意向诗人。

撷 菜

吾借王参军地种菜不及半亩，而吾与过子终年饱菜。夜半饮醉，无以解酒，辄撷菜煮之，味含土膏，气饱风露，虽梁肉不能及也。人生须底物而更贪耶，乃作四句。

秋来霜露满东园，芦菔生儿芥有孙。我与何曾同一饱，不知何苦食鸡豚。

别公择

黍离不复闵宗周，何暇雷塘吊一丘。若问西来祖师意，竹西歌吹是扬州。

绝 句

春来濯濯江边柳，秋后离离湖上花。不羨千金买歌舞，一篇珠玉是生涯。

书寄韵

已将镜铍投诸地，喜见苍颜白发新。历数三朝轩冕客，色声谁是独完人。

游灵隐寺戏赠开轩李居士

推倒墙垣也不难，一轩复作两轩看。若教从此成千里，巧历如今也被漫。

常州太平寺 薝蔔亭

六花薝蔔林前佛，九节菖蒲石上仙。何似东坡铁拄杖，一时惊起野狐禅。

过文觉显公房

斓斑碎玉养菖蒲，一勺清泉养石盂。净几明窗书小楷，便同尔雅注虫鱼。

惠州灵惠院壁间画一仰面向天醉僧云是 蜀僧隐峦所作题诗于其下

直视无前气吐虹，五湖三岛在胸中。相逢莫怪不相揖，只见山僧不见公。

同状元行老学士秉道先辈游太平寺净土 院观牡丹中有淡黄一朵特奇为作

醉中眼缬自斓斑，天雨曼陀照玉盘。一朵淡一作官黄微拂掠，鞞红魏紫不须看。

此 君 轩

云幢烟节十洲一作七州人，犀甲檀枪百万军。翳荟发生何足道，一作数此君真是此君君。

观子美病中作嗟叹不足因次韵

百尺长松涧下摧，知君此意为谁来。霜枝半折孤根出，尚有狂风急雨催。

谒敦诗先生因留一绝

凛凛人言君似雪，我言凛凛雪如君。时人尽怪苏司业，不解将钱与广文。

余将赴文登过广陵而择老移住石塔相送
竹西亭下留诗为别

竹西失却上方老，石塔还逢惠照师。我亦化身东海去，姓名莫遣世人知。

绝句三首

松柏萧森溪水南，道人只作两团庵。市区收罢豚鱼税，来与弥拖共一龛。
此生分付一蒲团，静对萧萧竹数竿。偶与老僧煎茗粥，自携修细汲清泉。
天风吹月入阑干，乌鹊无声夜向阑。织女明星来枕上，乃知身不在人间。

呈定国

旧病应逢医口药，新妆渐画入时眉。信知诗是穷人物，近觉王郎不作诗。

绝句二首

峨峨叠石立何孤，赖有萧萧翠竹俱。日暮无人鸥鸟散，空留远水伴寒芦。
漠漠秋高露气清，新蒲倚石近溪生。夜来雨后西风急，静向窗前似有声。

破琴诗后

余作破琴诗，求得宋复古画邢和璞于柳仲远。仲远以此本托王晋卿临写为短轴，名为邢房悟前生图，作诗题其上。

此身何处不堪为，逆旅浮云自不知。偶见一张闲故纸，便疑身是永禅师。

送柳子玉至灵山

世事方艰便猛回，此心未老已先灰。何时梦入真君殿，也学传呼观主来。

次韵章子厚飞英留题

款段曾陪马少游，而今人在凤麟洲。黄公酒肆如重过，杳杳白蘋天尽头。

赠江州景德长老

白足高僧解达观，安排春事满幽栏。不须天女来相试，总把空花眼里看。

杂诗二首

窗摇细浪鱼吹沫，一作日手弄黄花蝶绕一作透衣。不觉春风吹酒醒，空

教明月照人归。

昔日双鸦照浅眉，如今婀娜绿云垂。蓬莱老守明朝去，肠断帘间蟋蟀悲。

元祐癸酉八月二十七日于
建隆章净馆书赠王靓

海上东风犯雪来，臆前先折镜湖梅。遥思禁苑青春夜，坐待宫人画诏回。

元祐元年二月八日朝退独在起居院读汉
书儒林传感申公故事作小诗一绝

寂寞申公谢客时，自言已见穆王几。缩臧下吏明堂废，又作龙钟病免归。

闻 捷

元丰四年十月二十二日，谒王文父齐愈于江南，坐上得陈季常书报。是月四日种谔领兵深入，破杀西夏六万余人。获马五千匹，众喜抃，各饮一巨觥。

闻说将军取乞闾，将军旗鼓捷如神。故知无定河边柳，得共中原雪絮春。

睡 起

柿叶满庭红颗秋，薰炉沉水度春篝。松风梦与故人过，自驾飞鸿跨九州。

秋思寄子由

黄叶山川知晚秋，小虫催女献功裘。老松阅世卧云壑，挽著苍江无万牛。

碣石庵戏赠湛庵主 相国寺僧也

保康桥上夜观灯，碣石岩前夏饮冰。莫把山林笑朝市，老夫手里有乌藤。

散郎亭

法花下有散郎亭，老树苍崖如有情。欢戚已随时事去，壁间只有古人名。

侯 滩

江边皎皎过侯滩，更上山腰看打盘。百岁老儿亲击鼓，城中忧患不相干。

春 夜

春宵一刻直千金，花有清香月有阴。歌管楼台声细细，秋千院落夜沉沉。

火星岩

火星岩下石凌壁，阁上相忘止一僧。莫问人间兴废事，门前流水几前灯。

读开元天宝遗事三首

姚宋亡来事事兴，一官铢重万人轻。朔方老将风流在，不取西蕃石堡城。
潭里春船百倍多，广陵铜器越溪罗。三郎官爵如泥土，争唱弘农得宝歌。
琵琶弦急袞梁州，羯鼓声高舞臂鞞。破费八姨三百万，大唐天子要缠头。

过泗上喜见张嘉父二首

眉间冰玉照淮明，笔下波澜老欲平。直得全生如许妙，不知形迹已多名。
空翠娱人意自还，明窗一榻共秋闲。会知名利不到处，定把清觞属此山。

谢惠猫儿头笋

长沙一日煨筍笋，鸚鵡洲前人未知。走送烦公助汤饼，猫儿突兀鼠穿篱。

题净因壁

瞑倚薄团卧钵囊，半窗疏箔度微凉。蕉心不展待时雨，葵叶为谁倾夕阳。

同景文味蓬塘

塘上钩帘对晚香，不知斜日已侵床。江妃自借凌波袜，长在高荷扇影凉。

睡起

食罢茶瓯未要深，清风一榻直千金。腹摇鼻息庭花落，还尽平生未足心。

书望洪亭壁

河涨平来出旧洪，山城都在水光中。忽然归壑无寻处，千里禾麻一半空。

子美召公择饮偶以病不及往公择有诗次韵

樊素阿蛮皆已出，使臣应作玉笋歌。可怜病士西窗下，一夜丹田手自摩。

和参寥

芥舟只合在坳堂，纸帐心期老孟光。不道山人今忽去，晓猿啼处月茫茫。

醉题信老方丈

鹤作精神松作筋，阶庭兰玉一时春。愿君且住三千岁，长与东坡作主人。

常州太平寺观牡丹

武林千叶照观空，别后湖山几信风。自笑眼花红绿眩，还将白首看鞞红。

竹枝词

自过鬼门关外天，命同人舢舨头船。北人堕泪南人笑，青嶂无梯问杜鹃。

寄欧叔弼

昔葬衣冠今在否，近来消息不须疑。曾闻圯上逢黄石，久矣留侯不见欺。

题净因院

门外黄尘不见山，个中草木亦常闲。履声如渡薄冰过，催粥华鲸吼夜阑。

绝句

柴桑春晚思依依，屋角鸣鸠雨欲飞。昨日已收寒食火，吹花风起却添衣。

和黄龙清老三首

万山不隔中秋月，一雁能传寄远书。深密伽陀枯战笔，真诚相见问何如。
风前橄榄星宿落，月下桄榔羽扇开。静嘿堂中有相忆，清江或遣化人来。
骑驴觅驴真可笑，以马喻马亦成痴。一天月色为谁好，二老风流各自知。

过土山寨

南风日日纵篙撑，时喜北风将我行。汤饼一杯银线乱，菱蒿如著玉簪横。

书辨才白云堂壁

不辞清晓叩松扉，却值支公久不归。山鸟不鸣天欲雪，卷帘惟见白云飞。

琴诗

若言琴上有琴声，放在匣中何不鸣。若言声在指头上，何不于君指上听。

韩康公坐上侍几求书扇

一一窗扉面水开，更于何处觅蓬莱。天香满袂人知否，曾到旃檀小殿来。

骊山绝句三首

功成虽欲善持盈，可叹前王恃太平。辛苦骊山山下土，阿房才废又华清。
几变雕墙几变灰，举烽指鹿事悠哉。上皇不念前车戒，却怨骊山是祸胎。
海中方士觅三山，万古明知去不还。咫尺秦陵是商监，朝元何必苦跻攀。

短 桥

谁能铺白簟，永日卧朱桥。树影栏边转，波光版底摇。

轩 窗

东邻多白杨，夜作雨声急。窗下独无眠，秋虫见灯入。

曲 槛

流水照朱栏，青红乱明鉴，谁见槛上人，无言观物泛。

双 池

溯流入城郭，亶亶渡千家。不见双池水，长漂十里花。

荷 花

田田抗朝阳，节节卧春水。平铺乱萍叶，屡动报鱼子。

鱼

湖上移鱼子，初生不畏人。自从识钩饵，欲见更无因。

牡 丹

花好常患稀，花多信佳否。未有四十枝，枝枝大如斗。

桃 花

争开不待叶，密缀欲无条。傍沼人窥鉴，惊鱼水溅桥。

李

不及梨英软，应惭梅萼红，西园有千叶，淡仁更纤秃。

杏

开花送余寒，结子及新火。关中幸无梅，汝强充鼎和。

梨

霜降红梨熟，柔柯已不胜。未尝蠲夏渴，长见助冬冰。

枣

居人几番老，枣树未成搓。汝长才堪轴，吾归已及瓜。

櫻桃

独绕樱桃树，酒醒喉肺干。莫除枝上露，从向口中溲。

石榴

风流意不尽，独自送残芳。色作裙腰染，名随酒盏狂。

檮

自昔为神树，空闻罔 鸣。杜公烦见辍，为尔致羊羹。

槐

采擷殊未厌，忽然已成阴。蝉鸣看不见，鹤立赴还深。

松

强致南山树，来经渭水滩。生成未有意，鸦鹊莫相干。

桧

依依古仙子，郁郁绿毛身。每长须成节，明年渐庇人。

柳

今年手自栽，问我何年去。他年我复来，摇落伤人思。

六言四言一十首

跋姜君弼课册

姜君琼州人，已卯闰九月来从学于东坡，至儋耳。庚辰三月方还琼，

四言。

云兴天际，歛若车盖。凝未瞬，漫霭。惊雷出火，乔木糜碎。殷地空，万夫皆废。溜纒四坠，一作悬溜纒坠日中见沫。移而收，野无完块。

龙山补亡 并引四言

丙子九日，客有言龙山之会，风吹孟嘉帽落，桓温使孙盛为文嘲之，嘉作解嘲，辞致超逸，四座惊叹。恨今世不见其文，因戏为补之。

征西天府，重九令节。驾言龙山，宴凯群哲。壶歌雅奏，缓带轻帔。胡为中觴，一笑粲发。梗柎竞秀，榆柳独脱。骥騄交骛，驾蹇先蹶。楚狂醉乱，陨帽莫觉。戎服囚首，枯颅茁发。惟明将军，度量宏达。容此下士，颠倒冠袜。宰夫扬觶。兕觥举罚。请歌相鼠，以情此爵。

孟嘉解嘲 四言

吾闻君子，蹈常履素。晦明风雨，不改其度。平生丘壑，散发箕踞。坠车天全，颠沛何惧。腰适忘带，足适忘屨。不知有我，帽复奚数。流水莫系，浮云暂寓。飘然随风，非去非取。我冠明月，佩服宝璐。不纓而结，不簪而附。歌诗宁择，请歌相鼠。罚此陋人，俾出童羖。

忆江南寄纯如五首 六言

楚水别来十载，蜀山望断千重。毕竟拟为伦父，凭君说与吴依。
湖目也堪供眼，木奴自足为生。若话三吴胜事，不惟千里莼羹。
人在画屏中住，客依明月边游。未卜柴桑旧宅，须乘五马一作湖扁舟。
生计曾无聚沫，孤踪谩有清风。治产犹嫌范蠡，携孥颇笑梁鸿。
弱累已偿俗尽，老身将伴僧居。未许季鹰高洁，秋风直为鲈鱼。

数日前梦人示余一卷文字大略若论马者
用吃蹶两字梦中甚赏之觉而忘其余戏作
数语足之 四言

天骥虽老，举鞭脱逸。交驰议封，州中衡石。旁睨驾骀，丰肉灭节。徐行方轨，动辄吃蹶。天资相绝，未易致诘。

惠崇芦雁 六言

惠崇烟雨芦雁，坐我潇湘洞庭。欲买扁舟归去，故人云是丹青。

第三卷

和陶诗一百二十首

追和陶渊明诗引 子由作

东坡先生谪居儋耳，置家罗浮之下，独与幼子过负担度海，葺茅竹而居之。日啖薯芋，而华屋玉食之念，不存于胸中。平生无所嗜好，以图史为园囿，文章为鼓吹，至是亦皆罢去，独犹喜为诗，精深萃妙，不见老人衰惫之气。是时辙亦迁海康，书来告曰：“古之诗人有拟古之作矣，未有追和古人者也。追和古人，则始于吾，吾于诗人无所甚好，独好渊明之诗。渊明作诗不多，然其诗质而实绮，癯而实腴，自曹、刘、鲍谢、李、杜诸人，皆莫及也。吾前后和其诗凡一百有九篇，至其得意，自谓不甚愧渊明。今将集而并录之，以遗后之君子，其为我志之。然吾于渊明，岂独好其诗也哉？如其为人，实有感焉。渊明临终疏告严等：‘吾少而穷苦，每以家弊，东西游走，性刚才拙，与物多忤，自量为已，必贻俗患，黽勉辞世，使汝等幼而饥寒’。渊明此语，盖实录也。吾真有此病而不早自知，半生出仕，以犯世患，此所以深愧渊明，欲以晚节师范其万一也。”嗟呼！渊明不肯为五斗米一束带见乡里小儿，而子瞻出仕三十余年，为狱吏所折困，终不能悛，以陷大难，乃欲以桑榆之末景，自托于渊明，其谁肯信之？虽然，子瞻之仕，其出处进退，犹可考也。后之君子，其必有以处之矣。孔子曰：述而不作，信而好古，窃比于我老彭。孟子曰：曾子与子思同道，区区之迹，盖未足以论士也。辙少而无师，子瞻既冠而学成，先君命辙师焉。子瞻尝称辙诗有古人之风，自以为不若也。然自其斥居东坡，其学日进，沛然如川之方至。其诗比李太白、杜子美有余，遂与渊明比，辙虽驰骤从之，而常出其后。其和渊明，辙继之者亦一二焉。丁丑十二月，海康城南东斋引。

和 时 运

丁丑二月十四日，白鹤峰新居成。自嘉祐寺迁入，咏渊明时运诗云：斯晨斯夕，言息其庐，似为余发也。乃次其韵，长子迈与余别三年矣，挈携诸孙，万里远至，老朽忧患之余，不能无欣然。

我卜我居，居非一朝。龟不吾欺，食此江郊。废井已塞，乔木干霄。昔人伊何，谁其裔苗。下有碧潭，可饮可濯。江山千里，供我遇瞩。木固无胫，瓦岂有足。陶匠自至，啸歌相乐。我视此邦，如涖如沂。邦人劝我，老矣安归。自我幽独，倚门或挥。岂无亲友，云散莫追。旦朝丁丁，谁斲我庐。子孙远至，笑语纷如。剪发垂髻，一作剪彩垂髻覆此瓠壶。三年一梦，乃复见余。

和 劝 农

海南多荒田，俗以贸香为业。所产粳稌，不足于食，乃以薯时诸切芋杂米作粥糜以取饱。余既哀之，乃和渊明劝农诗，以告其有知者。咨尔汉黎，均是一民。鄙夷不训，夫岂其真。怨忿劫质，寻戈相因。欺

谩莫诉，曲自我人。天祸尔士，不麦不稷。民无用物，怪珍是殖。播厥薰木，腐余是穢。贪夫污吏，鹰鹯狼食。岂无良田，平陆。兽踪交缔，鸟喙谐穆。惊麇朝射，猛豨夜逐。芋羹薯糜，以饱耆宿。听我苦言，其福永久。利尔锄耜，好尔邻偶。斩艾蓬藿，南东其亩。父兄搢挺，以扶游手。天不假易，亦不汝匱。春无遗勤，秋有厚冀。云举雨决，妇姑毕至。我良孝爱，袒跣何愧。逸谚戏侮，博奕顽鄙。投之生黎，俾勿冠履。霜降稻实，千箱一轨。大作尔社，一醉醇美。

和 停 云

自立冬以来，风雨无虚日。海道断绝，不得子由书，乃和渊明停云诗以寄。

停云在空，黯其将雨。嗟我怀人，道修且阻。眷此区区，俯仰再抚。良辰过鸟，逝不我伫。颺作海浑，天水溟濛。云屯九河，雪立三江。我不出门，寤寐北窗。念彼海康，神驰往从。凜然清癯，落其骄荣。馈奠化之，廓兮忘情。万里迟子，晨兴宵征。远虎在侧，以宁先生。对奕未终，摧然斧柯。再游兰亭，默数永和。梦幻去来。谁多弹指太息，浮云几何。

和归田园居六首

三月四日，游白水山佛迹岩。沐浴于汤泉，晞发于悬瀑之下，浩歌而归，肩舆却行，以与客言，不觉至水北荔枝浦上。晚日葱昽，竹阴萧然，时荔子累累如芡实矣，有父老八十五，指以告余曰：及是可食，分能携酒来游乎？意忻然许之。归卧既觉，闻儿子过诵渊明归园田居诗六首，乃悉次其韵。始余在广陵和渊明饮酒二十首，今复为此，要当尽和其诗乃已耳。今书以寄妙总大士参寥子。

环州多白水，际海皆苍山。以彼无尽景，寓我有限年。东家著孔丘，西家著颜渊。市为不二价，农为不争田。周公与管蔡，恨不茅三间。我饱一饭足，薇蕨补食前。门生馈薪米，救我厨无烟。斗酒与只鸡，酣歌饯华颠。禽鱼岂知道，我边物自闲。悠悠未必尔，聊乐我所然。

穷猿既投林，疲马初解鞅。心空饱新得，境熟梦余想。江鸥渐驯集，蜺叟已还往。南池绿钱生，北岭紫笋长。提壶岂解饮，好语时见广。春江有佳句，我醉堕渺莽。

新浴觉身轻，新沐感发稀。风乎悬瀑下，却行咏而归。仰观江摇山，俯见月在衣。州从父老语，有约吾敢违。老人八十余，不识城市娱。造物偶遗漏，同济尽丘墟。平生不渡江，水北有幽居。手插荔枝子，合抱三百株。莫言陈家紫，甘冷恐不如。君来坐树下，饱食携其余。归舍遗儿子，怀抱不可虚。有酒持饮我，不问钱有无。

坐倚朱藤杖，行歌紫芝曲。不逢商山翁，见此野老足。愿同荔枝社，长作鸡黍局。教我同光尘，月固不胜烛。霜飈散氛浸，廓然似朝旭。庄子云：月固不胜火。郭象曰：大而暗，不若小而明。陋哉斯言也。余为更之曰：明于大者，必晦于小。月能烛天地而不能烛毫厘。此其所以不胜火也。然卒之火胜月胜那。

昔我在广陵，怅望柴桑陌。长吟饮酒诗，颇获一笑边。当时已放浪，朝

坐夕不夕。矧今长闲人，一劫展过隙。江山互隐见，出没为我役。斜川追渊明，东皋友王绩。诗成竟何为，六博本无益。

五月旦日作和戴主簿

海南无冬夏，安知岁将穷。时时小摇落，荣瘁俯仰中。上天信包荒，佳植无由丰。锄耰代肃杀，有择非霜风。手栽兰与菊，侑我清宴终。撷芳眼已明，饮酒腹尚冲。草去土自隤，井深墙愈降。勿笑一亩园，蚁垤齐衡嵩。

酬刘柴桑

红薯与紫芋，远插墙四周。且放幽兰春，莫争霜菊秋。穷冬出瓮盎，磊落胜农畴。淇上白玉延，淇上出山药一名玉延。能复过此不。一饱忘故山，不思马少游。

与殷晋安别 和送昌化军使张中罢官赴阙

孤生知永弃，末路嗟长勤。久安儋耳陋，日与雕题亲。海国此奇士，官居我东邻。卯酒无虚日，夜棋有达晨。小瓮多自酿，一瓢时见分。仍将对床梦，伴我五更春。暂聚水上萍，忽散风中云。恐无再见日，笑谈来生因。空吟清诗送，不救归装贫。

和王抚军座送客 再送张中

胸中有佳处，海瘴不能腓。三年无所愧，十口令同归。汝去莫相怜，我生本无依。相从大块中，几合几分违。莫作往来相，而生爱见悲。悠悠含山日，炯炯留清晖。悬知冬夜长，不恨晨光迟。梦中无与别，作诗记忘遗。

和答庞参军 三送张中

留灯坐达晓，要与影晤言。下帷对古人，何暇复窥园。使君本学武，少诵十三篇。颇能口击贼，戈戟亦森然。才智谁不如，功名叹无缘。独来向我说，愤想当奚宣。一见胜百闻，往麇皋兰山。白衣挟三矢，趁此征辽年。

形 赠 影

天地有常运，日月无闲时。孰居无事中，作止推行之。细察我与汝，相因以成兹。忽然乘物化，岂与生灭期。梦时我方寂，偃然无所思。胡为有哀乐，辄复随涟漪。我舞汝凌乱，相应不少疑。还将醉时语，答我梦中辞。

影 答 形

丹青写君容，常恐画师拙。我依月灯出，相肖两奇绝。妍媸本在君，我岂相媚悦。君如火上烟，火尽君乃别。我如镜中像，镜坏我不灭。虽云附阴

晴，了不受寒热。无心但因物，万变岂有竭。醉醒皆梦尔，未用议优劣。

神 释

二子本无我，其初因物著。岂惟老变衰，念念不如故。知君非金石，安足长托附。莫从老君言，亦莫用佛语。仙山与佛国，终恐无是处。甚欲随陶翁，移家酒中住。醉醒要有尽，未易逃诸数。平生逐见戏，处处余作具。所至人聚观，指目生毁誉。如今一弄火，好恶都焚去。既无负载劳，又无寇攘惧。仲尼晚乃觉，天下何思虑。

怨诗楚调示庞主簿邓治中

当欢有余乐，在戚亦颓然。渊明得此理，安处故有年。嗟我与先生，所赋良奇偏。人间少宜边，惟有归耘田。我昔堕轩冕，毫厘真市廛。困来卧重裯，忧愧自不眠。如今破茅屋，一夕或三迁。风雨睡不知，黄叶满枕前。宁当出怨句，惨惨如孤烟。但恨不早悟，犹推渊明贤。

九日闲居

明日重九，雨甚，展转不能寐，起坐索酒，和渊明一篇，醉熟昏然，殆不能佳也。

九日独何日，欣然惬平生。四时靡不佳，乐此古所名。龙山忆孟子，栗里怀渊明。鲜鲜霜菊艳，溜溜糟床声。闲居知令节，乐事满余龄。登高望云海，醉觉三山倾。长歌振履商，起舞带索荣。坎柯识天意，淹留见人情。但愿饱秔稌，年年乐秋成。

和移居二首

余去岁三月，自水东嘉祐寺迁居合江楼，迫今一年，多病寡欢，颇怀水东之乐也。得归善县后隙地数亩，父老云古白鹤观也，意欣然欲居之，乃和此诗。

昔我初来时，水东有幽宅。晨与乌鹊朝，暮与牛羊夕。谁令迁近市，日有造请役。歌呼杂闾巷，鼓角鸣枕席。出门无所诣，乐事非宿昔。病瘦独弥年，束薪谁与析。

洄潭转埼岸，我作江郊诗。今为一廛氓，此地乃得之。葺为无邪斋，思我无所思。古观废已久，白鹤归何时。我岂丁令威，千岁复还兹。江山朝福地，古人不吾欺。

岁暮作和张常侍

十二月二十五日，酒尽取米欲酿，米亦竭。时吴远游陆道士客于余，因读渊明岁暮和张常侍，亦以无酒为叹，乃用其韵赠二子。

我生有天禄，玄膺流玉泉。何事陶彭泽，乏酒每形言。仙人道士，自养岂在繁。但使荆棘除，不忧梨枣愆。我年六十一，颓景薄西山。岁暮似有

得，稍觉散亡还。有如千丈松，常苦弱蔓缠。养我岁寒枝，会有解脱年。米尽初不知，但怪饥鼠迁。二子真我客，不醉亦陶然。

和郭主簿二首

清明日，闻过诵书，声节闲美，感念少时，怅然追怀先君宫师之遗意，且念淮德二幼孙，无以自遣，乃和渊明二篇，随意所寓，无复伦次也。

今日复何日，高槐布初阴。良辰非虚名，清和盈我襟。孺子卷书坐，诵诗如鼓琴。却念四十年，玉颜如汝今。闭户未尝出，出为邻里钦。家世事酌古，百史手自斟。当年二老人，喜我作此音。淮德入我梦，角羈未胜簪。孺子笑问我，君何念之深。

雀鷖含淳音，竹萌抱静节。此两句先君少时诗失其全首诵我先君诗，肝肺为澄澈。犹为鸣鹤和，未作获麟绝。愿因骑鲸李，追此御风列。丈夫贵出世，功名岂人杰。家书三万卷，独取服食诀。地行即空飞，何必挟日月。

示周缘祖谢和游城东学舍作

闻有古学舍，窃怀渊明欣。摄衣造两塾，窥户无一人。邦风方杞夷，庙貌犹殷因。先生饌已缺，弟子散莫臻。忍饥坐谈道，嗟我亦晚闻。永言百世祀，未补平生勤。今此复何国，岂与陈蔡邻。水愧虞仲翔，弦歌沧海滨。

和答庞参军

周循州彦质在郡二年，书问无虚日，罢归过惠，为余留半月。既别，和此诗送之。

我见异人，且得异书。挟书从人，何边不娱。罗浮之趾，卜我新居。而非玄德，三顾我庐。

旨酒荔蕉，绝甘分珍。虽云晚接，数面自亲。海隅一笑，岂云无人。无酒贴我，或乞其邻。

将行复止，眷言孜孜。苟有于中，倾倒出之。奕奕千言，粲焉陈诗。觞行笔落，了不容思。

卯妙侍侧，两髦兮分。歌舞寿我，永为欢欣。曲终凄然，仰视浮云。此曲此声，何时复闻。

击鼓其镗，船开舳鸣。顾我而言，雨泣载零。子卿白首，当还西京。辽东万里，亦归管宁。

感子至意，托辞西风。吾生一尘，寓形空中。愿言谦亨，君子有终。功名在子，何异我躬。

和连雨独饮二首

吾谪海南，尽卖酒器，以供衣食。独有一荷叶杯，工制美妙，留以自娱，乃和渊明连雨独饮。

平生我与我，举意辄相然。岂止磁石针，虽合犹有间。此外一子由，出

处同偏仙。晚景最可惜，分飞海南天。纠缠一作纒不吾欺，宁此忧患先。顾影一杯酒，谁谓无往还。寄语海北人，今日为何年。醉里有独觉，梦中无杂言。

阿堵不解醉，谁欵此颓然。误入无功乡，掉臂嵇阮间。饮中八仙人，与我俱得仙。渊明岂知道，醉语忽谈天。偶见此物真，遂超天地先。醉醒可还酒，此觉无所还。清风洗徂暑，连雨催丰年。床头伯雅君，此子可与言。

和赠羊长史

得郑会嘉靖老书，欲于海舶载书千余卷见借。因读渊明赠羊长史诗云：愚生三季后，慨然念黄虞。得知千载事，上赖古人书，次其韵以谢郑君。

我非皇甫滥，门人如挚虞。不特两鸱酒，肯借一车书。欲令海外士，观经似鸿都。结发事文史，俯仰六十逾。老马不耐放，长鸣思服舆。故知尘根在，未免病药俱。念君千里足，历块犹踟蹰。好学真伯业，比肩可相如。此书久已熟，救我今荒芜。顾惭桑榆迫，岂厌诗酒娱。奏赋病未能，草玄老更疏。犹当距杨墨，稍欲惩荆舒。

和乞食

庄周昔贷粟，犹欲舂脱之。鲁公亦乞米，炊煮尚不辞。渊明端乞食，亦不避嗟来。呜呼天下士，死生寄一杯。斗水何所直，远汲愁姜诗。幸有余薪米，养此老不才。至味久不坏，可为子孙贻。

和胡西曹示顾贼曹

长春如稚女，飘摇倚轻颺。卯酒晕玉颊，红绢卷生衣。低颜香自敛？含睇意颇微。宁当娣黄菊，未肯姒戎葵。谁言此弱质，阅岁观盛衰。頽然疑薄怒，沃盥未可挥。瘴雨吹蛮风，凋零岂容迟。老人不解饮，短句余清悲。

游斜川和正月五日与儿子过出游作

谪居淡无事，何异老且休。虽过靖节年，未失斜川游。春江绿未波，人卧船自流。我本无所边，泛泛随鸣鸥。中流遇洑徊，舍舟州曾丘。有口可与饮，何必逢我俦。过子诗似翁，我唱儿辄酬。未知陶彭泽，颇有此乐不。问点尔何如，不与圣同忧。问翁何所笑，不为由与求。

和己酉岁九月九日

十月初吉，菊始开，乃与客作重九。因次韵渊明己酉岁九月九日一首，胡广饮菊潭水而寿，然李固传赞云，其视胡广赵戒犹粪土也。

今日我重九，谁谓秋冬交。黄花与我期，草中实后调。香余白露干，色映青松高。怅望南阳野，古潭靠庆霄。伯始真粪土，平生夏畦劳。饮此亦何益，内热中自焦。持我万家春，一酌五柳陶。夕英幸可掇，继此木兰朝。

和癸卯岁始春怀古田舍二首

僇人黎子云兄弟居城东南，躬农圃之劳，偶与军使张中同访之。居临大池，水木幽茂，坐客欲为贖钱作屋，余亦欣然许之，名其屋曰载酒堂。用渊明始春怀古田舍韵作二首。

退居有成言，垂老竟未践。何曾渊明归，屡作敬通免。休闲等一味，妄想生愧。渊明本用緬字聊取其同音字聊将自知明，稍积在家善。城东两黎子，室迩人自远。呼我钓其他，人鱼两忘返。使君亦命驾，恨子林塘浅。

茅茨破不补，嗟子乃尔贫。菜肥人愈瘦，灶闲井常勤。我欲致薄少，解衣劝坐人。临池作虚堂，雨急瓦声新。客来有美载，果熟多幽欣。丹荔破玉肤，黄柑溢芳津。借我三亩地，结茅为子邻。鳩舌偿可学，化为黎母民。

和饮酒二十首

吾饮俩至少，常以把杯力乐，往往颓然坐睡，人见其醉，而吾中了然，盖莫能名其为醉为醒也。在扬州时，饮酒过午辄罢，客去解衣盘礴终日，欢不足而边有余。因和渊明饮酒二十首，庶以仿佛其不可名者，示舍弟子由、晁无咎学士。

我不如陶生，世事缠绵之。云何得一边，亦有如生时。寸田无荆棘，佳处正在兹。纵心与事往，所遇无复疑。偶得酒中趣，空杯亦常持。

二豪诋醉客，气涌胸中山。漼然忽冰释，亦复在一言。蓄气实其腹，云当享长年。少饮得径醉，此秘君勿传。

道丧士失己，出语辄不情。江左风流人，醉中亦求名。渊明独清真，谈笑得此生。身如受风竹，掩冉众叶惊。俯仰各有态，得酒诗自成。

蠹蠕食叶虫，仰空慕高飞。一朝传两翅，乃得粘网悲。啁啾厌巢雀，沮泽疑可依。赴水在两壳，遭闭何时归。二虫竟谁是，一笑百念衰。幸此未化间，有酒君莫违。

小舟真一叶，下有暗浪喧。夜掉醉中发，不知枕几偏。天明门前路，已度千金山。嗟我亦何为，此道常往还。未来宁早计，既往复何言。

百年六十化，念念竟非是。是身如虚空，谁受誉与毁。得酒未举杯，丧我固忘尔。倒床自甘寝，不择菅与绮。

顷者大雪年，海波翻玉英。有士常痛饮，饥寒见真情。床头有败榼，孤坐时一倾。未能平体粟，且复浇肠鸣。脱衣裹冻酒，每醉念此生。

我坐华常上，不改麋鹿姿。时来蜀冈头，喜见霜松枝。心知百尺底，已结千岁奇。煌煌凌霄花，缠绕复何为。举觞酌其根，无事莫相羁。

芙蓉在秋水，时节自阖开。清风亦何意，入我芝兰怀。一随采折去，永与江湖垂。断丝不复续，斗水何足栖。不如玉井莲，结根天池泥。感此每自慰，吾事幸不谐。酒中有归路，了了初不迷。乘流且复逝，抵曲吾当回。

篮舆兀醉守，路转古城隅。酒力如过雨，清风消半途。前山正可数，后骑且勿驱。我缘在东南，往寄白发余。遥知万松岭，下有三亩居。

民劳吏无德，岁美天有道。暑雨避麦秋，温风送蚕老。三咽初有闻，一溉未儒槁。诏书宽积欠，父老颜色好。再拜贺吾君，获此不贪宝。颓然笑阮籍，醉几书谢表。

我梦入小学，自谓总角时。不记有白发，犹诵论语辞。人间本儿戏，颠倒略似兹。惟有醉时真，空洞了无疑。坠车终无伤，庄叟不吾欺。呼儿具纸笔，醉语辄录之。

醉中虽可乐，犹是生灭境。云何得此身，不醉亦不醒。痴如景升牛，莫保夙与领。黠如东郭，束缚作毛颖。乃知嵇叔夜，非坐虎文炳。

我家小冯君，天性颇纯至。清坐不饮酒，而能容我醉。归休要相依，谢病当以次。岂知山林士，肮脏乃尔贵。乞身当念早，过是恐少味。

去乡三十年，风雨荒旧宅。惟存一束书，寄食无定迹。每用愧渊明，尚取禾三百。欣然六男子，粗可传清白。于吾岂不多，何事复叹惜。

晓晓六男子，弦诵各一经。复生五丈夫，戢戢丁欲成。归田了门户，与国充践更。普儿初学语，玉骨开天庭。淮老如鹤雏，破壳已能鸣。举酒属千里，一欢愧凡情。

淮海虽故楚，无复轻扬风。斋厨圣贤杂，无事时一中。谁言大道远，正赖三杯通。使君不夕坐，衙门散刀弓。

何人筑东台，一郡坐何得。亭亭古浮图，独立表众惑。芜城阅兴废，雷塘几开塞。明年起华堂，置酒吊亡国。无令竹西路，歌吹久寂默。

晁子天麒麟，结交及未仕。高才固难及，雅志或类己。各怀伯业能，共有丘明耻。歌呼时就君，指我醉乡里。吴国门下客，贾谊独见纪。请作鹏鸟赋，我亦得坎止。行乐当及时，绿发不可恃。

盖公偶谈道，齐相独边真。颓然不事事，客至先饮醇。当时刘项罢，四海创痕新。三杯洗战国，一斗销强秦。寂寥千载后，阳公嗣前尘。醉卧客怀中，言笑徒多勤。我时阅旧史，独与三人亲。未暇餐脱粟，苦心学平津。草书亦何用，醉墨淋衣巾。一挥三十幅，持去听坐人。

和 止 酒

丁丑岁，余谪海南，子由亦贬雷州。五月十一日，相遇于藤，同行至雷。六月十一日，相别渡海。余时病痔呻吟，子由亦终夕不寐，因诵渊明诗，劝余止酒，乃和元韵，因以赠别。庶几真止矣。

时来与物逝，路穷非我止。与子各意行，同落百蛮里。萧然两别驾，各携一稚子。子室有孟光，我室惟法喜。相逢山谷间，一月同卧起。茫茫海南北，粗亦足生理。劝我师渊明，力薄且为己。微疴坐杯勺，止酒则瘳矣。望道虽未济，隐约见津涘。从今东坡室，不立杜康祀。

还旧居和梦归惠州白鹤山居作

痿人常念起，夫我岂忘归。不敢梦故山，恐兴坟墓悲。生世本暂寓，此身念念非。鹅城亦何有，偶舍鹤毳遗。穷鱼守故沼，聚沫犹相依。大儿当门户，时节供丁推。梦与邻翁言，惘默怜我衰。往来付造物，未用相招麾。

和始作镇军参军经曲阿

虞人非其招，欲往畏简书。穆生责醴酒，先见我不如。江左古弱国，强臣擅天衢。渊明堕诗酒，遂与功名疏。我生值良时，朱金义当纡。天命边如

此，幸收废弃余。独有愧此翁，大名难久居。不思牺牛龟，兼取熊掌鱼。北郊有大赉，南冠解囚拘。眷言罗浮下，白鹤返故庐。

和庚戌岁九月中于西田获早稻

蓬头三獠奴，谁谓愿且端。晨兴洒扫罢，饱食不自安。愿治此圃畦，少资主游观。昼功不自觉，夜气乃潜还。早韭欲争春，晚菘先破寒。人间无正味，美好出艰难。早知农圃乐，岂有非意干。尚恨不持锄，未免驛我颜。此心苟未降，何边不间关。休去复歇去，菜食何所叹。

和丙辰岁八月中于下 澗田舍获

聚粪西垣下，凿泉东垣隈。劳辱何时休，宴安不可怀。天公岂相喜，雨露与意谐。黄菘养土羔，老楮生树鸡。来忍便烹煮，绕观日百回。跨海得远信，冰盘鸣玉哀。茵陈点脍缕，照坐如花开。一与蜒叟醉，苍颜两推颓。齿根日浮动，自与梁肉乖。食菜岂不足。一作好呼儿拆鸡栖。

和乙巳岁三月为建威参军 使都经钱溪 和游城北谢氏废园作

乔木卷苍藤，浩浩崩云积。谢家堂前燕，对话悲宿昔。仰看枕榔树，玄鹤舞长翮。新年结荔子，主人黄壤隔。溪阴宜馆我，稍省薪水役。相如卖车骑，五亩亦可易。但恐鹏鸟来，此生还荡析。谁能插篱槿，护此残竹柏。

辛丑七月赴假还江陵夜行 途中作口号 和郊行步月

缺月不早出，长林踏青冥。大吠主人怒，愧此闾里情。怪我夜不归，茜袂窥柴荆。云间与地上，待我两友生。惊鹊再三起，树端已微明。白露净原野，始觉丘陵平。暗蛩方夜绩，孤萤亦宵征。归来闭户坐，寸田且默耕。莫赴花月期，免为诗酒萦。诗人如布谷，聒聒常自名。

和咏二疏

二疏事汉时，迹寓心已去。许侯何足道，宁识此高趣。可怜魏丞相，免冠谢陋举。中兴多名臣，有道独两传。世途方毂击，谁肯行此路。是身如委蜕，未蜕何所顾。已蜕则两忘，身后谁毁誉。所以遗子孙，买田岂先务。我常游东海，所历若有素。神交久从君，屡梦今乃悟。渊明作诗意，妙想非俗虑。庶几二大夫，见微而知著。

和咏三良

此生太山重，忽作鸿毛遗。三子死一言，所死良已微。贤哉晏平仲，事君不以私。我岂犬马哉，从君求盖帷。杀身故有道，大节要不亏。君为社稷

死，我则同其归。顾命有治乱，臣子得从违。魏颖真孝爱，三良安足希。仕官岂不荣，有时缠忧悲。所以靖节翁，服此黔娄衣。

和咏荆轲

秦如马后牛，吕氏非复嬴。天欲厚其毒，假手李客卿。功成志自满，积恶如陵京。灭身会有时，徐观可安行。沙丘一狼狈，笑落冠与纓。太子不少忍，顾非万人英。魏韩裂智伯，肘足本无声。胡为弃成谋，托国此狂生。荆轲不足说，田子老可惊。燕赵多奇士，借哉亦虚名。杀父囚其母，此岂容天庭。亡秦只三户，况我数十城。渐离虽不伤，陞戟加周营。至今天下人，愍燕欲其成。废书一太息，可见千古情。

和读山海经十三首

陶渊明读山海经十三首，其七首皆仙语。余读抱朴子有所感，用其韵赋之。

今日天始霜，众木敛以疏。幽人掩囱卧，明景翻空庐。开心无良友，寓眼得奇书。建德有遗民，道远我无车。无粮食自足，岂谓谷与蔬。愧此稚川翁，千载与我俱。画我与渊明，可作三士图。学道虽恨晚，赋诗岂不如。

稚川虽独善，爱物均孔颜。欲使螻蛄流，知有龟鹤年。辛勤破封执，苦语剧移山。博哉无穷利，千载食此言。

渊明虽中寿，雅志仍丹丘。远矣无怀民，超然邈无俦。奇文出纆息，岂复生死流，我欲作九原，异世为三游。

子政信奇逸，妙筹穷阴阳。淮仙枕中诀，养练岁月长。岂伊臭浊中，争此顷刻光。安知青黎火，丈人非中黄。

乱离弃弱女，破冢割恩怜。宁知效龟息，三岁号穷山。长生定可学，当信仲弓言。支床竟不死，抱一无穷年。

三山在咫尺，灵药非草木。玄芝生太元，黄精出长谷。仙都浩如海，岂不供一浴。何当从山火，束缊分寸烛。

蜀士李八百，穴居吴山阴。默坐但形语，从者纷如林。其后有李宽，鸡鵠非同音。口耳固多伪，识真要在心。

黄华育甘谷，灵根固深长。廖井窞丹砂，红泉涌寻常。二女戏口耳，一作鼻松膏以为粮。闻此不能寐，起坐夜未央。

谈道鄙俗儒，远自太史走。仲尼实不死，于圣亦何负。紫文出吴宫，丹雀本无有。辽哉广桑君，独显三季后。

金丹不可成，安期渺云海。谁谓黄门妻，至道乃近在。支解竟不传，化去空余悔。金成亦安用，御气本无待。

郑君故多方，玄翁所亲指。奇文二百篇，了未出生死。素书在黄石，岂敢辞跪履。万法等成壤，金丹差可恃。

古强本妄庸，蔡诞亦夸士。曼都斥仙人，谒帝轻举止。学道未有得，自欺谁不尔。稚川亦隘人，疏录此庸子。

东坡信畸人，涉世真散材。仇池有归路，罗浮岂从来。践蛇及茹蛊，心空了无猜。携手葛与陶，归哉复归哉。

和杂诗十一首

斜日照孤隙，始知空有尘。微风动众窍，谁信我忘身。一笑问儿子，与汝定何亲。从我来海南，幽绝无四邻。耿耿如缺月，独与长庚晨。此道固应尔，不当怨尤人。

故山不可到，飞梦隔五岭。真游有黄庭，闭目寓两景。室空无可照，火灭膏自冷。披衣起视夜，海阔河汉永。西窗半明月，散乱梧楸影。良辰不可系，逝水无留骋。我苗期后枯，持此一念静。

真人有妙观，俗子多妄想。区区劝粒食，此岂知子房。我非徒跌相，终老怀未央。免死缚淮阴，徇功指平阳。哀哉亦可羞，世路皆羊肠。

相如偶一官，嗤鄙蜀父老。不记犊鼻时，涤器混佣保。著书曾几许，渴肺灰土燥。琴台有遗魄，笑我归不早。作书遗故人，皎皎我怀抱。余生幸无愧，可与君平道。

孟德黠老狐，好言噉鸿豫。哀哉丧乱世，泉鸾各腾翥。逝者知几人，文举独不去。天方斫汉室，岂计一郗虑。昆虫正相啮，乃比藿相如。我知公所坐，大名难久住。细德方险微，岂有容公处。既往不可悔，庶为来者惧。

博大古真人，老聃关尹喜。独立万物表，长生乃余事。稚川差可近，恍有接物意。我顷登罗浮，物色恐相值。徘徊朱明洞，沙水自清驶。满把菖蒲根，叹息复弃置。

蓝桥近得道，常苦世褊迫。西游王屋山，不践长安陌。尔来宁复见，鸟道度太白。昔与吴远游，同藏一瓢窄。潮阳隔云海，岁晚恍见客。伐薪供养火，看作栖凤宅。

南荣晚闻道，未肯化庚桑。陶顽铸强犷，枉费尘与糠。越子古成之，韩生教休粮。参同得灵钥，九锁启伯阳。鹅城见诸孙，贫苦为我伤。空余焦先室，不传元化方。遗像似李白，一奠临江觞。

余龄难把玩，妙解寄笔端。常恐抱永叹，不及丘明迁，亲友复劝我，放心饯华颠。虚名非我有，至味知谁餐。思我无所思，安能观诸缘。已矣复何叹，旧说易两篇。

申韩本自圣，陋古不复稽。巨君纵独欲，借经作岩崖。遂令青衿子，珠壁人人怀。凿齿并蛙耳，信谓天可弥。大道久分裂，破碎日愈离。我如终不言，谁悟角与羈。吾琴岂得已，昭氏有成亏。

我昔登胸山，出日观沧凉。欲济东海县，恨无石桥梁。今兹黎母国，何异于公乡。螻蛄既黏山，暑路亦飞霜。所欣非自网，不怨道里长。

和拟古九首

有客叩我门，系马门前柳。庭空鸟雀散，门闭客立久。主人枕书卧，梦我平生友。忽闻剥啄声，惊散一杯酒。倒裳起谢客，梦觉两愧负。坐谈杂今古，不答颜愈厚。问我何处来，我来无何有。

酒尽君可起，我歌已三终。由来竹林人，不数涛与戎。有酒从孟公，慎勿从杨雄。崎岖颂沙麓，尘埃污西风。昔我未尝达，今者亦安穷。穷达不到处，我在阿堵中。

客去室幽幽，鹏鸟来坐隅。引吭伸两翅，太息意不舒。吾生如寄耳，何者为我庐。去此复何之，少安与汝居。夜中闻长啸，月露荒棒茆。无问亦无

答，吉凶两何如。

少年好远游，荡志隘八荒。九夷为藩篱，四海环我堂。庐生与若士，何足期杳茫。稍喜海南州，自古无战场。奇峰望黎母，何异嵩与邙。飞泉泻万仞，舞鹤双低昂。分未入海，膏泽弥此方。芋魁傥可饱，无肉亦奚伤。

冯洗古烈妇，翁媪国于兹。策勋梁武后，开府隋文时。三世更险易，一心无磷缁。锦伞平积乱，犀渠破余疑。庙貌空复存，碑板漫无辞。我欲作铭志，慰此父老思。遗民不可问，倭句莫余欺。燔牲菌鸡卜，我当一访之。铜鼓壶庐笙，歌此迎送诗。

沉香作庭燎，甲煎纷相和。岂若注微火，綦烟嫋清歌。贪人无饥饱，胡椒亦求多。朱刘两狂子，隕队如风花。本欲竭泽渔，奈此明年何。朱初平刘谊欲冠带黎人以取水沉耳

鸡窠养鹤发，及与唐人游。来孙亦垂白，颇识李崖州。再逢庐与丁，阅世真东流。斯人今在亡，未遽掩一丘。我师吴季子，守节到晚周。一见春秋末，渺马不可求。

城南有荒池，琐细谁复采。幽姿小芙蓉，香色独未改。欲为中州信，浩荡绝云海。遥知玉井莲，落蕊不相待。攀跻及少壮，已矣那容悔。矣一作失

黎山有幽子，形槁神独完。负薪入城市，笑我儒衣冠。生不闻诗书，岂知有孔颜。倏然独往来，荣辱未易关。日暮鸟鲁散，家在孤云端。问答了不通，叹息指屡弹。似言君贵人，草莽栖龙鸾。遗我吉贝布，海风今岁寒。

和东方有一士

瓶居本近危，甑坠知不完。梦求忘楚弓，笑解边越冠。忽然反自照，识我本来颜。归路在脚底，骹潼失重关。屡从渊明游，云山出毫端。借君无弦物，寓我非指弹。岂惟舞独鹤，便可蹑飞鸾。还将岭茅瘴，一洗月阙寒。此东方一士，正渊明也。不知从之游者谁乎？若了得此一段，我即渊明，渊明即我也。

集归去来诗十首

命驾欲何向，忻忻春木荣。世人无往复，乡老有逢迎。云外流泉远，风前飞鸟轻。相携就衡宇，酌酒话交情。

涉世恨形役，告休成老夫。良欣就归路，不复向迷途。去去径有一作犹菊，行行田欲芜。情亲有还往，清酒引樽壶。

与世不相入，膝琴聊自一作尽欢。风光归笑傲，云物寄游观。言话审无倦，心怀良独安。东皋清有趣，植杖日盘桓。

世事非吾事，驾言归路寻。向时迷有命，今日悟无心。庭内菊归酒，窗前风入琴。寓形知己老，犹未倦登临。

云岫不知远，巾车行复前。仆夫寻老木，童子引清泉。矫首独傲世，委心还乐天。农夫告春事，扶老向良田。

富贵良非愿，乡关归去休。携琴已寻壑，载酒复经丘。翳翳景将入，涓涓泉欲流。农夫人不乐，我独与之游。

觴酒命僮仆，言归无复留。轻车寻绝壑，孤棹入清流。乘化欲一作亦安命，息交还绝游。琴书乐三径，老矣亦何求。

归去复归去，帝乡安可期。鸟还知己倦，云出欲何之。入室还携幼，临流亦赋诗。春风吹独立，不是傲亲知。

役役倦人事，来归车载奔。征夫问前路，稚子候衡门。入息亦诗策，出游常酒樽。交亲书已绝，云壑自相存。

寄傲疑今是，求荣感昨非。聊欣樽有酒，不恨室无衣。丘壑世情远，田园生事微。柯庭还独眇，时有鸟归飞。

和贫士七首

余迁惠州一年，衣食渐窘。重九俯迓，樽俎萧然，乃和渊明贫士诗七首，以寄许下高安宜兴诸子侄，并令过同作。

长庚与残月，耿耿如相依。以我旦暮心，惜此须臾晖。青天无今古，谁知织鸟一作乌飞。我欲作九原，独与渊明归。俗子不自悼，顾忧斯人饥。堂堂谁有此，千驷良可悲。

夷齐耻周粟，高歌颂虞轩。产禄彼何人，能致绮与园。古来避世士，死灰或余烟。末路益可羞，朱墨手自研。渊明初亦仕，弦歌本诚言。不乐乃径归，视世差独贤。

谁谓渊明贫，尚有一素琴。心闲手自边，寄此无穷音。佳辰爱重九，芳菊起自寻。疏中叹虚漉，尘爵笑空斟。忽饷二万钱，颜生良足钦。思送酒家保，勿违故人心。

人皆有耳目，夫子旷与娄。弱毫写万象，水镜无停酬。闲居惜重九，感此岁月周。端如孔北海，只有尊空忧。二子不并世，高风两无俦。我后五百年，清梦未易求。

芙蓉杂金菊，枝叶长兰干。遥怜退朝人，糕酒出大官。岂知江海上，落英亦可餐。典衣作重阳，祖岁惨将寒。无衣粟一作寒我肤，无酒顰我颜。贫居真可叹，二事长相关。

老詹亦白发，惠州太守詹范字器之。相对垂霜蓬。赋诗殊有味。涉世非所工。杖藜山谷间，状类渤海羹。半道要我饮，意与王弘同。有酒我自至，不须遣庞通。门生与儿子，杖履聊相从。

我家六儿子，流落三四州。辛苦更不识，今与农圃俦。买田带修竹，筑室依清流。未能遣一力，分汝薪水忧。坐念北归日，此劳未易酬。我独遗以安，鹿门有前修。

和桃花源诗

世传桃源事，多过其实，考渊明所记，止言先世避秦乱来此，则渔人所见，似是其子孙，非秦人不死者也。又云杀鸡作食，岂有仙而杀者乎？旧说南阳有菊水，水付而芳，民居三十余家，饮其水皆寿，或至百二三十岁。蜀青城山老人村，有见五世孙者，道极险远，生不识盐酪，而溪中多枸杞，根如龙蛇，饮其水故寿。近岁道稍通，渐能致五味，而寿亦益衰。桃源盖此比也软，使武陵太守得而至焉，则已化为争夺之场久矣。尝意天壤之间若此者甚众，不独桃源。余在颍州梦至一官府，人物与俗间无异，而山川清远，有足乐者，顾视堂上，榜曰仇池。觉而念之，仇池武都氏故地，杨难当所保，余何为居之。明日以问客，客有赵

令時德麟者曰：公何为问此，此乃福地，小有洞天之附庸也。杜子美盖云：万古仇池穴，潜通小有天。神鱼人不见，福地语真传。近接西南境，长怀十九泉，何时一茅屋，送老白云边。他日工部侍郎王钦臣仲至，谓余曰：吾尝奉使过仇池，有九十九泉，万山环之，可以避世如桃源也。

凡圣无异居，清浊共此世。心闲偶自见，念起忽已逝。欲知真一处，要使六用废。桃源信不远，藜杖可小憩。躬耕任地力，绝学抱天艺。臂鸡有时鸣，民驾无可税。苓龟亦晨吸，杞狗或夜吠。耘樵得甘芳，齧啮谢炮制。子骥虽形隔，渊明已心诣。高山不难越，浅水何足厉。不知我仇池，高举复几岁。从来一生死，近又等痴慧。蒲涧安期境，在广川罗浮稚川界。梦往从之游，神交发吾蔽。桃花满庭下，流水在户外。却笑逃秦人，有畏非真契。

和归去来兮辞

子瞻滴居昌化，追和渊明归去来兮，盖以无何有之乡为家，虽在海外，未尝不归云尔。

归去来兮，吾方南迁安得归。卧江海之溷洞，吊鼓角之凄悲。迹泥蟠而愈深，时电往而莫追。怀西南之归路，梦良是而觉非。悟此生之何常，犹寒暑之异衣。岂裘裘而念葛，盖得粗而丧微。我归甚易，匪驰匪奔。俯仰还家，下帷阖门。藩垣虽阙，堂室故存。挹我天醴，注之洼樽。饮月露以洗心，飡朝霞而眩颜。混客主以为一，俾妇姑之相安。知盗窃之何有，乃扃门而折关。廓圆镜以外照，纳万象而中观。治废井以晨汲，满百泉之夜还。守静极以自作，时爵跃而觐桓。归去来兮，请终老于斯游。我先人之弊庐，复舍此而焉求。均海南与漠北，摯往来而无忧。畸人告余以一言，非八卦与九畴。方饥须粮，已济无舟。忽人牛之皆丧，但乔木与高丘。惊六用之无成，自一根之反流。望故家而求息，蜀中道而三休。已矣乎，吾生有命归有时，我初无行亦无留。驾言随子听所之，岂以师南华而废从安期。谓易稼之终枯，遂不溉而不籽。师渊明之雅放，和百篇之新诗。赋归来之清引，我其后身盖无疑。

和刘柴桑 续添

万劫互起灭，百年一踟躅。漂流四十年，今乃言卜居。且喜天壤间，一席亦吾庐。稍理兰桂，尽平狐兔墟。黄椽出旧栝，紫茗抽新畬。我本早衰人，不谓老更劬。邦君助畚鍤，邻里通有无。竹屋从低深，山窗自明疏。一饱便终日，高眠忘百须。自笑四壁空，无妻老相如。

歌辞十九首

竹枝歌 并序

“竹枝歌”本楚声，幽怨恻怛，若有所深悲者。岂亦往者之所见，有足怨者欤？夫伤二妃而哀屈原，思怀王而怜项羽，此亦楚人之意相传而然者。且其山川风俗鄙野勤苦之态，固已见于前人之作，与今子由之诗。故特缘楚人畴昔之意，为一篇九章，以补其所未道者
苍梧山高湘水深，中原北望度千岑。帝子南游飘不返，惟有苍苍枫桂林。

枫叶萧萧桂叶碧，万里远来超莫及。乘龙上天去无踪，草木无情空寄位。水滨击鼓何喧阗，相将扣水求屈原。屈原已死今千载，满船哀唱似当年。海滨长鲸径千尺，食人为粮安可入。招君不归海水深，海鱼岂解哀忠直。吁嗟忠直死无人，可惜怀王西入秦。秦关已闭无归日，章华不复见车轮。君王去时箫鼓咽，父老送君车轴折。千里逃归迷故乡，南公哀痛弹长铗。三户亡秦信不虛，一朝兵起尽欢呼。当时项羽年最少，提剑本是耕田夫。横行天下竟何事，弃马乌江马垂涕。项王已死无故人，首入汉庭身委地。富贵荣华岂足多，至今唯有家嵯峨。故国凄凉人事改，楚乡千古为悲歌。

山坡陀行

山坡陀兮下属江，势崖绝兮游波所荡如颓墙。松蘿律兮百尺，旁拔此惊葛緜之。上不见日兮下可依，吾曳林兮吾僮亦吾之书随。藐余望兮水中沚，颯然而长者黄冠而羽衣。干颐坦腹盘石箕坐兮，山亦有址安不危，四无人兮可忘饥。仙人偃佳自言其居瑶之圃，一日一夜飞相往来不可数。使其开口言兮，岂惟河汉无极惊余心。默不言兮，蹇昭氏之不鼓琴。儻将山河，与日月长在。若有人兮梦中仇池我归路，此非小有兮噫乎何以乐此而不去。昔余游于葛天兮，身非陶氏犹与偕。乘渺茫良未果兮，仆夫悲余马怀。聊逍遥兮容与，晞余发兮兰之渚。余论世兮千载一人犹并时，余行洁曲兮欲知余者稀。峨峨洋洋余方乐兮，譬余系舟于水鱼潜鸟举亦不知。何必每念辄得应余若响，坐有如此兮人子期。

鸣泉思

鸣泉思思，君子也。君子抱道且殆，而时始弗与，民咸思之。鸣泉故基，堙圯殆尽，眉山苏公，搔首蜘蹰，作鸣泉思以思之。

鸣泉鸣泉，经云而漏泼。拔其毛骨者修竹，蒸为云气者靠烟。山夔莫能隐其怪，野翟讵敢藏其妍。茅芦萧萧，昔有人焉。其高如山，其清如水，其心金与玉，其道砥与弦。执德没世，落月入地，英名皎然，阳曦丽天。旧隐寂寂，新娟娟。思彼君子，我心若悬。谷鸟在上，岩花炫前。鸣泉鸣泉，能使我宛结而华颠。

辘轳歌

新系青丝百尺绳，心在君家辘轳上。我心皎洁君不知，辘轳一转一惆怅。何处春风吹晓幕，江南绿水通珠阁。美人二八颜如花，泣向花前畏花落。临春风，听春鸟，别时多，见时少。愁人一夜不得眠，瑶井玉绳相对晓。

美哉一首送韦城主簿欧阳君

美哉水，洋洋乎。我怀先生，送之子于城隅。洋洋乎，美哉水，送之子至于新渡。念彼嵩雒，眷焉西顾，之子于迈，至于白马。白马旧邦，其构性新，邦人流涕，画舫之孙。相其口髯，尚克似之，先生遗民，之子往字。

辨道歌

北方正气名法邪，东郊西应归中华。离南为室坎为家，先凝白雪生黄芽。黄河流驾紫河车，水精池产红莲花。赤龙腾霄惊盘蛇，姹女含笑婴儿呀。十二楼瞰灵泉注，华池玉液阴交加。子驰午前无停差，三田聚宝真生涯。龟精凤髓填谿罅，天地骇有鬼神嗟。一丹休别内外砂，长修久饵须升遐。肠中澄结无余粗，俗骨变换颜如葩。哀哉世人争齿牙，指伪为真正为哇。轻肥甘美形骄奢，谲诡诈妄言矜夸。游鱼在网兔在置，一气顿尽犹呕哑。余生所托诚栖搓，九原枯髀如乱麻。胡不割众如镢，空与利名交掌拿。胡不让霜如文，可惜贪爱相漫涂。真心道意非不嘉，餐金闲话非虚哗。何须横议相疵瑕，众口并发鸣群鸦。安知聚散同鱼虾，自缠如茧居如蜗。日怀嗔喜甘笼笪，其去死地犹猎獾。吾恨尔见有所遮，海波或至惊井蛙。乌轮即晚蟾影斜，吾时俱睹超云霞。

与叶亨老侯敦夫张秉道同 相视新河秉道有诗次韵二首

君不见元帅府前罗万戟，涛头未顺千弩射。至今凤凰山下路，长借一箭开两翼。我凿西湖还旧观，一眼已尽西南碧。又将回夺浮山险，千艘夜下无南北。坐陈三策本人谋，惟留一诺待我画。老病思归直暂寓，功名如幻终何得。从来自笑画蛇足，此事何殊食鸡肋。怜君嗜好更迂阔，得我新诗喜折履。江湖粗了我径归，余事后来当润色。一庵闲挂洞霄宫，并有丹砂水长赤。

荆溪父老愁三害，下斩长蚊本无赖。平生倔强韩退之，识字犹为鳄鱼戒。石门之役万金耳，首鼠不为吾已隘。江湖开塞古有数，两鹄飞来告成坏。劝农使者非常人，一言已破黎民骇。上饶使君更超逸，坐眼浮山如累块。髯张乃我结袜生，诗酒淋漓出狂怪。我作水衡生作丞，他日归朝同此拜。

陈守道

一气混沌生复生，有形有心即有情。共见利欲饮食事，各有爪牙头角争。争时怒发霹雳火，险处直在嵌岩坑。人伪相加有余怨，天真丧尽无纯诚。从自取先用极力，谁知所得皆空名。少微处士松柏寒，蓬菜真人冰玉清。山是心兮海为腹，阳为神兮阴为精。渴饮灵泉水，饥食玉树枝。白虎化坎青龙离，锁禁姹女关婴儿。楼台十二红玻璃，金公木母相东西。纯铅真汞星光辉，乌升兔降无年期。停颜郤老只如此，哀哉世人迷不迷。

老人行

有一老翁老无齿，处处无人问年纪。白发如丝向下垂，一双眸子碧如水。不裹头，又无履，相识虽多少知己。问翁毕竟何所止，笑言只在红尘里。秋风猎猎行云飞，老人此意无人会，目注云归心自知。黄口小儿莫相笑，老人旧日曾年少。浪迹常如不系舟，地角天涯知自跳。亦曾乐半夜，傅筹醉朱阁。美人如花弄弦索，只恨樽前明月落。亦曾忧羁旅，他乡迫暮秋。故国日边无信息，断鸿空逐水长流。或安贫，或安富，或爵通侯封万户。一任秋霜换鬓

毛，本来面目长如故。水有蘋兮山有芝，人意虽存事已非。有时却忆经游处，都似茫茫春梦归。迩来尤解安贫贱，不为公卿强陪面。皎如明月在秋潭，动着依前还不见。还不见，可奈何，空使远人增眷恋。但祇从他随物转，青楼黄阁长相见。若相见，莫殷勤，却是翁家旧主人。

襄阳乐府三篇

野鹰来

野鹰来，万山下，荒山无食鹰苦饥，飞来为尔系彩丝。北原有兔老且白，年年养子秋食寂。我欲击之不可得，年深兔老鹰力弱。野鹰来，城东有台高崔嵬。台中公子着皮袖，东望万里心悠哉。鹰何在，嗟尔公子归无劳。使鹰可呼亦凡曹，天阴月黑狐夜噪。

上 堵 吟

台上有客吟秋风，悲声萧散飘入宫。台边游女来窃听，欲学声同意不同。君悲竟何事，千里金城两稚子。白马为塞凤为关，山川无人空且闲。我悲亦何苦，江永冬更深，鳊鱼冷难捕。悠悠江上听歌人，不知我意从悲辛。

襄 阳 乐

使君未来襄阳愁，提戈入市裹毡裘。自从毡裘南渡沔，襄阳无事多春游。襄阳春游乐何许，岷山之阳汉江浦。使君朱旆来翻翻，人道使君似羊杜。道边逢人问洛阳，中原苦战春田荒。北人闻道襄阳乐，目送飞鸿应断肠。

仙都山鹿

老泉诗序云：至丰都县，将游仙都观。见知县李长官云：固知君之将至也。此山有鹿甚老，而猛兽猎人，终莫能害。将有客来游，鹿辄夜鸣，故常以此候之，而未尝失。余闻而异之，乃为作诗。东坡同赋

日月何促促，尘世苦局束。仙子去无踪，故山遗白鹿。仙人已去鹿无家，孤栖怅望层城霞，至今闻有游洞客，夜来江市叫平沙。长松千树风萧瑟，仙宫去人无咫尺。夜鸣白鹿安在哉，满山秋草无行迹。

白鹤吟留钟山觉海

白鹤声可怜，红鹤声可恶。白鹤招不来，红鸚挥不去。长松受秽死，乃以红鹤故。北山道人曰：美者自美，吾何为而喜？恶者自恶，吾何为而怒？去自去耳，吾何馭而追？来自来耳，吾何妨而拒？吾岂厌喧而求静，吾岂好丹而非素。汝谓松死吾无依焉，吾方舍阴而坐露。

虚飘飘三首

虚飘飘，画檐蛛结网，银汉鹊成桥。尘渍雨桐叶，霜飞风柳条。露凝残点见红日，星曳余光横碧霄。虚飘飘，比浮名利犹坚牢。

虚飘飘，花飞不到地，虹起谩成桥。入梦云千垒，游空丝万条。蜃楼百尺横苍海，雁字一行书绛霄。虚飘飘，比人身世犹坚牢。

虚飘飘，风寒吹絮浪，春水暖冰桥。势缓蟹垂线，声干叶下条。雨中馥点随流水，风里彩云横碧霄。虚飘飘，比时富贵犹坚牢。

东坡乐府

水 龙 吟 四 首

古来云海茫茫，道山绛阙知何处。人间自有，赤城居士，龙蟠凤举。清
净无为，坐忘遗照，八篇奇语。向玉霄东望，蓬莱阆苑，有云驾、骖凤驭。
行尽九州四海，笑纷纷、落花飞絮。临江一见，谪仙风采，无言心许。八表
神游，浩然相对，酒酣箕踞。待垂天赋就，骑鲸路稳，约相将去。

又

咏笛材。公旧序云：时太守间丘公显已致仕居姑苏，后。房懿卿者，甚
有才色，因赋此词。一云赠赵晦之

楚山修竹如云，异材秀出千林表。龙须半剪，凤膺微涨，玉肌匀绕。木
落淮南，雨晴云梦，月明风嫋。自中郎不见，桓伊去后，知孤负、秋多少。
闻道岭南太守，后堂深、绿珠娇小。绮窗学弄，梁州初遍，霓裳未了。嚼徵
含宫，泛商流羽，一声云抄。为使君洗尽，蛮风瘴雨，作霜天晓。

又 次韵章质夫杨花词

似花还似非花，也无人惜从教坠。抛家傍路，思量却是，无情有思。萦
损柔肠，困酣娇眼，欲开还闭。梦随风万里，寻郎去处，又还被、莺呼起。
不恨此花飞尽，恨西园、落红难缀。晓来雨过，遗踪何在，一池萍碎。春色
三分，二分尘土，一分流水。细看来，不是杨花点点，是离人泪。

又

公旧注云：间丘大夫孝直公显尝守黄州，作栖霞楼，为郡中胜绝。

元丰五年，余谪居于黄。正月十七日，梦扁舟渡江，中流回望，楼中歌
乐杂作。舟中人言：公显方会客也。觉而异之，乃作此词。公显时已致
仕在苏州

小舟横截春江，卧看翠壁红楼起。云间笑语，使君高会，佳人半醉。危
柱哀弦，艳歌余响，绕云萦水。念故人老大，风流未减，独回首、烟波里。推
枕惘然不见，但空江、月明千里。五湖闻道，扁舟归去，仍携西子。云梦南
州，武昌南岸，昔游应记。料多情梦里，端来见我，也参差是。

满 庭 芳

公旧序云：元丰七年四月一日，余将去黄移汝，留别雪堂邻里二三
君子。会李仲览自江东来别，遂书以遗之

归去来兮，吾归何处，万里家在岷峨。百年强半，来日苦无多。坐见黄
州再闰，儿童尽、楚语吴歌。山中友，鸡豚社酒，相劝老东坡。云何。
当此去，人生底事，来往如梭。待闲看，秋风洛水清波。好在堂前细柳，应
念我、莫剪柔柯。仍传语，江南父老，时与晒渔蓑。

又

香缓雕盘，寒生冰筋，画堂别是风光。主人情重，开宴出红妆。膩玉圆搓素颈，藕丝嫩、新织仙裳。双歌罢，虚檐转月，余韵尚悠扬。人间，何处有，司空见惯，应谓寻常。坐中有狂客，恼乱愁肠。报道金钗坠也，十指露、春笋纤长。亲曾见，全胜宋玉，想像赋高唐。

又

蜗角虚名，蝇头微利，算来著甚干忙。事皆前定，谁弱又谁强。且趁闲身未老，尽放我、些子疏狂。百年里，浑教是醉，三万六千场。思量。能几许，忧愁风雨，一半相妨。又何须，抵死说短论长。幸对清风皓月，苔茵展、云幕高张。江南好，千钟美酒，一曲满庭芳。

又

公旧序云：有王长官者，弃官三十三年，黄人谓之王先生。因迭陈慥来过余，因赋此

三十三年，今谁存者，算只君与长江，凜然苍桧，霜干苦难双。闻道司州古县，云溪上、竹坞松窗。江南岸，不因送子，宁肯过吾邦。批批。疏雨过，风林舞破，烟盖云幢。愿持此邀君，一饮空缸。居士先生者矣，真梦里、相对残缸。歌舞断，行人未起，船鼓已逢逢。

又

杨元素本事曲集云：子瞻始与刘仲达往来于眉山。后相逢于泗上，久留郡中。游南山话旧而作

三十三年，飘流江海，万里烟浪云帆。故人惊怪，憔悴老青衫。我自疏狂异趣，君何事、奔走尘凡。流年尽，穷途坐守，船尾冻相衔。嶮嶮。淮浦外，层楼翠壁，古寺空岩。步携手林间，笑挽扞扞。莫上孤峰尽处，索望眼、云海相搀。家何在，因君问我，归步绕松杉。

水调歌头 快哉亭作

落日绣帘卷，亭下水连空。知君为我，新作窗户湿青红。长记平山堂上，敲枕江南烟雨，渺渺没孤鸿。认得醉翁语，山色有无中。一千顷，都镜净，倒碧峰。忽然浪起，掀舞一叶白头翁。堪笑兰台公子，未解庄生天籁，刚道有雌雄。一点浩然气，千里快哉风。

又

公旧序云：余去岁在东武，作水调歌头以寄子由。今年，子由相从彭门百余日，

过中秋而去，作此曲以别余。以其语过悲，乃为和之。其意以不早退为戒，以退而相从之乐为慰云耳

安石在东海，从事鬓惊秋。中年亲友离别，丝竹缓离愁。一旦功成名遂，准拟东还海道，扶病入西州。雅志困轩冕，遗恨寄沧洲。岁云暮，须早计，要褐裘。故乡归去千里，佳处辄迟留。我醉歌时君和，醉倒须君扶我，惟酒可忘忧。一任刘玄德，相对卧高楼。

又

丙辰中秋，欢饮达旦，大醉。作此篇，兼怀子由

明月几时有，把酒问青天。不知天上宫阙，今夕是何年。我欲乘风归去，又恐琼楼玉宇，高处不胜寒。起舞弄清影，何似在人间。转朱阁，低绮户，照无眠。不应有恨，何事长向别时圆。人有悲欢离合，月有阴晴圆缺，此事古难全。但愿人长久，千里共婵娟。

又

公旧序云：欧阳文忠公尝问余：琴诗何者最善？答以退之听颖师琴诗最善。公曰：此诗最奇丽，然非听琴，乃听琵琶也。余深然之。建安章质夫家善琵琶者，乞为歌词。余久不作，特取退之词，稍加槩括，使就声律，以遗之云

昵呢儿女语，灯火夜微明。恩冤尔汝来去，弹指泪和声。忽变轩昂勇士，一鼓填然作气，千里不留行。回首暮云远，飞絮搅青冥。众禽里，真彩凤，独不鸣。跻攀寸步千险，一落百寻轻。烦子指间风雨，置我肠中冰炭，起坐不能平。推车从归去，无泪与君倾。

满江红

杨元素本事曲集：董毅夫名钺，自摔漕得罪归鄱阳，遇东坡于齐安。怪其丰暇自得。曰：吾再娶柳氏，三日而去官。吾固不戚戚，而忧柳氏不能忘怀于进退也。已而欣然同忧患，如处富贵，吾是以益安焉。乃令家僮歌其所作满江红。东坡嗟叹之，次其韵

忧喜相寻，风雨过、一江春绿。巫峡梦、至今空有，乱山屏簇。何似伯鸾携德耀，箪瓢未足清欢足。渐粲然、光彩照阶庭，生兰玉。幽梦里，传心曲。肠断处，凭他续。文君婿知否，笑君卑辱。君不见周南歌汉广，天教夫子休乔木。便相将、左手抱琴书，云间宿。

又

江汉西来，高楼下、蒲荡深碧。独自带、岷峨云浪，锦江春色。君是南山遗爱守，我为剑外思归客。对此间、风物岂无情，殷勤说。江表传，君休读。狂处士，真堪惜。空洲对鹦鹉，苇花萧瑟。不独笑书生争底事，曹公黄祖俱飘忽。愿使君、还赋滴仙诗，追黄鹤。

又 东武会流杯亭

东武南城，新堤固、涟漪初溢。隐隐遍、长林高阜，卧红堆碧。枝上残花吹尽也，与君更向江头觅。问向前、犹有几多春，三之一。官里事，何时毕。风雨外，无多日。相将泛曲水，满城争出。君不见兰亭修禊事，当时坐上皆豪逸。到如今、修竹满山阴，空陈迹。

又 怀子由作

清颍东流，愁目断、孤帆明灭。宦游处、青山白浪，万重千叠。孤负当年林下意，对床夜雨听萧瑟。恨此生、长向别离中，添华发。一尊酒，黄河侧。无限事，从头说。相看恍如昨，许多年月。衣上旧痕余苦泪，眉间喜气添黄色。便与君、池上觅残春，花如雪。

又 正月十三日送文安国还朝

天岂无情，天也解、多情留客。春向暖、朝来底事，尚飘轻雪。君过春来纤组绶，我应归去耽泉石。恐异时、杯酒忽相思，云山隔。浮世事，俱难必。人纵健，头应白。何辞更一醉，此欢难觅。欲向佳人诉离恨，泪珠先已凝双睫。但莫遣、新燕却来时，音书绝。

归朝欢

公尝有诗与苏伯固，其序曰：昔在九江，与苏伯固唱和，其略曰：“我梦扁舟浮震泽。雪浪横江千顷白。觉来满眼是庐山，倚天无数开青壁。”尽实梦也。然公诗复云：“扁舟震泽定何时，满眼庐山觉又非。”我梦扁舟浮震泽。雪浪摇空千顷白。觉来满眼是庐山，倚天无数开青壁。此生长接浙。与君同是江南客。梦中游，觉来清赏，同作飞梭掷。明日西风还挂席。唱我新词泪沾臆。灵均去后楚山空，澧阳兰芷无颜色。君才如梦得。武陵更在西南极。竹枝词，莫摇新唱，谁谓古今隔。

念 奴 娇 赤壁怀古

大江东去，浪淘尽、千古风流人物。故垒西边人道是，三国周郎赤壁。乱石穿空，惊涛拍岸，卷起千堆雪。江山如画，一时多少豪杰。遥想公瑾当年，小乔初嫁了，雄姿英发。羽扇纶巾谈笑间，檣櫓灰飞烟灭。故国神游，多情应笑我，早生华发。人间如梦，一尊还酹江月。

雨中花

今岁花时深院，尽日东风，荡扬茶烟。但有绿苔芳草，柳絮榆钱。闻道城西，长廊古寺，甲第名园。有国艳带酒，天香染袂，为我留连。清明过了，残红无处，对此泪洒尊前。秋向晚，一枝何事，向我依然。高会聊追短景，清商不暇余妍。不如留取，十分春态，付与明年。

沁园春

孤馆灯青，野店鸡号，旅枕梦残。渐月华收练，晨霜耿耿，云山摛锦，朝露传传。世路无穷，劳生有限，似此区区长鲜欢。微吟罢，凭征鞍无语，往事千端。当时共客长安。似二陆初来俱少年。有笔头千字，胸中万卷，致君尧舜，此事何难。用舍由时，行藏在我，袖手何妨闲处看。身长健，但优游卒岁，且斗尊前。

功金船 和元素韵自撰腔命名

无情流水多情客。劝我如曾识。杯行到手休辞却。这公道难得。曲水池上，小字更书年月。还对茂林修竹，似永和节。纤纤素手如霜雪。笑把秋花插。尊前莫怪歌声咽。又还是轻别。此去翱翔，遍赏玉堂金阙。欲问再来何岁，应有华发。

一丛花

今年春浅腊侵年。冰雪破春妍。东风有信无人见，露微意、柳际花边。寒夜纵长，孤衾易暖，钟鼓渐清圆。朝来初日半含山。楼阁淡疏烟。游人便作寻芳计，小桃杏、应已争先。衰病少情，疏慵自放，惟爱日高眠。

木兰花令

霜余已失长淮阔。空听潺潺清颖咽。佳人犹唱醉翁词，四十三年如电抹。草头秋露流珠滑。三五盈盈还二八。与余同是识翁人，惟有西湖波底月。

又 次马中玉韵

知君仙骨无寒暑。千载相逢犹旦暮。故将别语恼佳人，要看梨花枝上雨。落花已逐回风去。花本无心莺自诉。明朝归路下塘西，不见莺啼花落处。

又 宿造口闻夜雨寄子由、才叔

梧桐叶上三更雨。惊破梦魂无觅处。夜凉枕簟已知秋，更听寒蛩促机杼。梦中历历来时路。犹在江亭醉歌舞。尊前必有问君人，为道别来心与绪。

西江月 真觉赏瑞香二首

公子眼花乱发，老夫鼻观先通。领中飘下瑞香风，惊起谪仙春梦。后土祠中玉蕊，蓬莱殿后鞞红。此花清绝更纤称，把酒何人心动。

又 坐客见和复次韵

小院朱阑几曲，重城画鼓三通。更看微月转光风，归去香云入梦。翠袖争浮大白，皂罗半插斜红。灯花零落酒花秊，妙语一时飞动。

又 再用前韵戏曹子方

怪此花枝怨泣，托君诗句名通。凭将草木记吴风，继取相如云梦。点笔袖沾醉墨，谤花面有惭红。知君却是为情秊，怕见此花撩动。

又

闻道双衔凤带，不妨单著蛟绡。夜香知与阿谁烧，怅望水沉烟袅。云鬓风前绿卷，玉颜醉里红潮。莫教空度可怜宵，月与佳人共僚。

又 重九

点点楼头细雨。重重江外平湖。当年戏马会东徐，今日凄凉南浦。莫恨黄花未吐。且教红粉相扶。酒阑不必看茱萸，俯仰人间今古。

又 茶词

龙焙今年绝品，谷帘自古珍泉。雪芽双井散神仙，苗裔来从北苑。汤发云腴配白，盏浮花乳轻圆。人间谁取更争妍，斗取红窗粉面。

又

别梦已随流水，泪中犹裹香泉。相如依旧是臞仙，人在瑶台阆苑。花雾索风缥缈，歌珠滴水清圆。蛾眉新作十分妍，走马归来便面。

又

世事一场大梦，人生几度秋凉。夜来风叶已鸣廊，看取眉头鬓上。酒贱常愁客少，月明多被云妨。中秋谁与共孤光，把盏凄然北望。

又 送钱待制

莫叹平原落落，且应去鲁迟迟。与君各记少年时，须信人生如寄。白发千茎相送，深杯百罚休辞。拍浮何用酒为池，我已为君德醉。

又 梅花

玉骨那愁瘴雾，冰姿自有仙风，海仙时遣探芳丛，倒挂绿毛么凤。素面翻嫌粉涴，洗妆不褪唇红。高情已逐晓云空，不与梨花同梦。

又

公自序云：春夜蕲水中过酒家饮。酒醉，乘月至一溪桥上，解鞍曲少休。及觉，已晓。乱山葱宠，不谓尘世也。书此词桥柱
照野弥弥浅浪，横空暖暖微霄。障泥未解玉骢骄，我欲醉眠芳草。可惜一溪明月，莫教踏破琼瑶。解鞍敲枕绿杨桥，杜宇一声春晓。

又 平山堂

三过平山堂下，半生弹指声中。十年不见老仙翁，壁上龙蛇飞动。欲吊文章太守，仍歌杨柳春风。休言万事转头空，未转头时皆梦。

又 送别

昨夜扁舟京口，今朝马首长安。旧官何物与新官，只有湖山公案。此景百年几变，个中下语千难。使君才气卷波澜，与把新诗判断。

临江仙

龙丘子自洛之蜀，载二侍女，戎装骏马。至溪山佳处，辄留，见者以为异人。后十年，筑室黄冈之北，号静安居士。作此记之
细马远驮双侍女，青中玉带红靴。溪山好处便为家。谁知巴峡路，却见洛城花。面旋落英飞玉蕊，人间春日初斜。十年不见紫云车。龙丘新洞府，铅鼎养丹砂。

又 赠送

诗句端来磨我钝，钝锥不解生铓。欢颜为我解冰霜。酒阑清梦觉，春草满池塘。应念雪堂坡下老，昔年共采芸香。功成名遂早还乡。回车来过我，乔木拥千章。

又 辛未离杭至润，别张弼秉道

我劝鬣张归去好，从来自己忘情。尘心消尽道心平。江南与塞北，何处不堪行。俎豆庚桑真过矣，凭君说与南荣。愿闻吴越报丰登。君王如有问，结袜赖王生。

又 冬日即事

自古相从休务日，何妨低首微吟。天垂云重作春阴。坐中人半醉，帘外雪将深。闻道分司狂御史，紫云无路追寻。凄风寒雨是骎骎。问囚长损气，见鹤忽惊心。

又 送王缄

忘却成都来十载，因君未免思量。凭将清泪洒江阳。故山知好在，孤客自悲凉。坐上别愁君未见，归来欲断无肠。殷勤且更尽离觞。此身如传舍，何处是吾乡。

又

尊酒何人怀李白，草堂遥指江东。珠帘十里卷香风。花开又花谢，离恨几千重。轻舸渡江连夜到，一时惊笑衰容。语音犹自带吴依。夜阑对酒处，依旧梦魂中。

又

九十日春都过了，贪忙何处追游。三分春色一分愁。雨翻榆荚阵，风转柳花球。阆苑先生须自责，蟠桃动是千秋。不知人世苦厌求。东皇不约束，肯为使君留。

又 风水洞作

四大从来都遍满，此间风水何疑。故应为我发新诗。幽花香涧谷，寒藻舞沦漪。借与玉川生两腋，天仙未必相思。还凭流水送人归。层巅余落日，草露已沾衣。

又

一别都门三改火，天涯踏尽红尘。依然一笑作春温。无波真古井，有节是秋筠。惆怅孤帆连夜发，送行淡月微云。尊前不用翠眉颦。人生如逆旅，我亦是行人。

又 疾愈登望湖楼赠项长官

多病休文都瘦损，不堪金带垂腰。望湖楼上暗香飘。和风春弄袖，明月夜闻箫。酒醒梦回清漏永，隐床无限更潮。佳人不见董娇饶。徘徊花上月，空度可怜宵。

又

夜饮东坡醒复醉，归来仿佛三更。家童鼻息已雷鸣。敲门都不应，倚杖听江声。长恨此身非我有，何时忘却营营。夜阑风静毅纹平。小舟从此逝，江海寄余生。

又

冬夜夜寒冰合井，画堂明月侵帘。青缸明灭照悲啼。青缸挑欲尽，粉泪裛还垂。未尽一尊先掩泪，歌声半带清悲。情声两尽莫相违。欲知肠断处，

梁上暗尘飞。

渔家傲

金陵赏心亭送王胜之龙图。王守金陵，视事一日移南郡
千古龙蟠并虎踞，从公一吊兴亡处。渺渺斜风吹细雨。芳草渡，江南父
老留公住。公驾飞车凌彩雾，红鸾骖乘青鸾驭。却讶此洲名白鹭。非吾侣，
翩然欲下还飞去。

又 送台守江郎中

送客归来灯火尽，西楼淡月凉生晕。明日潮来无定准。潮来稳，舟横渡
口重城近。江水似知孤客恨，南风为解佳人温。莫学时流轻久困。频寄问，
钱塘江上须忠信。

又 七夕

皎皎牵牛河汉女，盈盈临水无由语。望断碧云空日暮。无寻处，梦回芳
草生春浦。 鸟散余花纷似雨，汀洲苹老香风度。明月多情来照户。但揽取，
清光长送人归去。

又 送张元唐省亲秦州

一曲阳关情几许，知君欲向秦川去。白马皂貂留不住。回首处，孤城不
见天霖雾。 到日长安花似雨，故关杨柳初飞絮。渐见鞞刀迎夹路。谁得似，
风流膝上王文度。

鹧鸪天 东坡谪黄州时作此词，真本藏林子敬家

林断山明竹隐墙。乱蝉衰草小池塘。翻空白鸟时时见，照水红蕖细细香。
村舍外，古城旁。杖藜徐步转斜阳。殷勤昨夜三更雨，又得浮生一日凉。

又

公自序云：陈公密出侍儿素娘，歌紫玉箫曲，劝老人酒。老人饮尽，
因为赋此词
笑捻红梅弹翠翘。扬州十里最妖饶。夜来绮席亲曾见，撮得精神滴滴娇。
娇后眼，舞时腰。刘郎几度欲魂消。明朝酒醒如何处，肠断云间紫玉箫。

少年游 端午赠黄守徐君猷

银塘朱槛麴尘波。圆绿卷新荷。兰条荐浴，菖花酿酒，天气尚清和。 好
将沉醉酬佳节，十分酒、一分歌。狱草烟深，讼庭人悄，无吝宴游过。

又 润州作

去年相送，余杭门外，飞雪似杨花。今年春尽，杨花似雪，犹不见还家。对酒卷帘邀明月，风露透窗纱。恰似姝娥怜双燕，分明照、画梁斜。

定 风 波

十月九日，孟亨之置酒秋香亭，有拒霜独向君猷而开。坐客喜笑，以为非使君莫可当此花，故作是词
两两轻红半晕腮，依依独为使君回。若道使君无此意，何为，双花不向别人开。但看低昂烟雨里，不已，劝君休诉十分杯。更问尊前狂副使，来岁，花开时节与谁来。

又

公旧序云：三月七日，沙湖道中遇雨。雨具先去，同行皆狼狈，余独不觉。已而遂晴，故作此词
莫听穿林打叶声，何妨吟啸且徐行。竹杖芒鞋轻胜马，谁怕，一蓑烟雨任平生。料峭春风吹酒醒，微冷，出头斜照却相迎。回首向来潇洒处，归去，也无风雨也无晴。

又 重阳

与客携壶上翠微，江涵秋影雁初飞。尘世难逢开口笑，年少，菊花须插满头归。酩酊但酬佳节了，云娇，登临不用怨斜晖。古往今来谁不老，多少，牛山何必更沾衣。

又 感旧

莫怪鸳鸯绣带长，腰轻不胜舞衣裳。薄幸只贪游冶去，何处，垂杨系马恣轻狂。花谢絮飞春又尽，堪恨，断弦尘管伴啼妆。不信归来但自看，怕见，为郎憔悴却羞郎。

又 送元素

千古风流阮步兵，平生游宦爱东平。千里远来还不住，归去，空留风韵照人清。红粉尊前深懊恼，休道，怎生留得许多情。记得明年花絮乱，须看，泛西湖是断肠声。

又

元丰六年七月六日，王文甫家饮酿白酒，大醉。集古句作墨竹词
雨洗娟娟嫩叶光，风吹细细绿筠香。秀色乱侵书秩晚，帘卷，清阴微过酒尊凉。人画竹身肥拥肿，何用，先生落笔胜萧郎。记得小轩岑寂夜，

廊下，月和疏影上东墙。

又 咏红梅

好睡慵开莫厌迟，自怜冰脸不时宜。偶作小红桃杏色，闲雅，尚余孤瘦雪霜姿。休把闲心随物态，何事，酒生微晕沁瑶肌。诗老不知梅格在，吟咏，更看绿叶与青枝。

又

公自序云：余昔与张子野、刘孝叔、李公择、陈令举、杨元素会于吴兴。时子野作六客词，其卒章云：“见说贤人聚吴分。试问。也应旁有老人星。”凡十五年，再过吴兴，而五人者皆已亡矣。时张仲谋与曹子方、刘景文、苏伯固、张秉道为坐客，仲谋请作后六客词
月满苔溪照夜堂，五星一老斗光芒。十五年间真梦里，何事，长庚对月独凄凉。绿鬓苍颜同一醉，还是，六人吟笑水云乡。宾主谈锋谁得似，看取，曹刘今对两苏张。

又 南海归赠王定国侍人寓娘

常羨人间琢玉郎，天应乞与点酥娘。尽道清歌传皓齿，风起，雪飞炎海变清凉。万里归来颜愈少，微笑，笑时犹带岭梅香。试问岭南应不好，却道，此心安处是吾乡。

南乡子 春情

晚景落琼杯，照眼云山翠作堆。认得岷峨春雪浪，初来，万顷蒲荡涨绿醅。暮雨暗阳台，乱洒高楼湿粉腮。一阵东风来卷地，吹回，落照江天一半开。

又 梅花词和杨元素

寒雀满疏篱，争抱寒柯看玉菱。忽见客来花下坐，惊飞，蹋散芳英落酒卮。痛饮又能诗，坐客无毡醉不知。花尽酒阑春到也，离离，一点微酸已着枝。

又 席上劝李公择酒

不到谢公台，明月清风好在哉。旧日髯孙何处去，重来，短李风流更上才。秋色渐摧颓，满院黄英映酒杯。看取桃花春二月，争开，尽是刘郎去后栽。

又 重九涵辉楼呈徐君猷

霜降水痕收，浅碧鳞鳞露远洲。酒力渐消风力软，飕飕，破帽多情却恋头。佳节若为酬，但把清尊断送秋。万事到头都是梦，休休，明日黄花蝶也愁。

又 送述古

回首乱山横，不见居人只见城。谁似临平山上塔，亭亭，迎客西来送客行。归路晚风清，一枕初寒梦不成。今夜残灯斜照处，荧荧，秋雨晴时泪不明。

又 有感

冰雪透香肌，姑射仙人不似伊。濯锦江头新样锦，非宜，故著寻常淡薄衣。暖日下重帏，春睡香凝索起迟。曼倩风流缘底事，当时，爱被西真唤作儿。

又 和杨元素

东武望余杭，云海天涯两杳茫。何日功成名遂了，还乡，醉笑陪公三万场。不用诉离筋，痛饮从来别有肠。今夜送归灯火冷，河塘堕泪羊公却姓杨。

又 自述

凉簟碧纱厨，一枕清风昼睡余。睡听晚衙无一事，徐徐，读尽床头几卷书。搔首赋归欤，自觉功名懒更疏。若问使君才与术，何如，占得人间一味愚。

又

公旧序云：沉强辅雯上出犀丽玉作胡琴，送元素还朝，同子野各赋一首

裙带石榴红，却水殷勤解赠依。应许逐鸡鸡莫怕，相逢，一点灵犀必暗通。何处遇良工，琢刻天真半欲空。愿作龙香双凤拨，轻拢，长在环儿白雪胸。

又 赠行

旌旆满江湖，诏发楼船万舳舻。投笔将军因笑我，迂儒，帕首腰刀是丈夫。粉泪怨离居，喜子垂窗报捷书。试问伏波三万语，何如，一斜明珠换绿珠。

又 双荔支

天与化工知，赐得衣裳总是绯。每向华堂深处见，怜伊，两个心肠一片

儿。 自小便相随，绮席歌筵不暂离。苦恨人人分拆破，东西，怎得成双似旧时。

又 集句

寒玉细凝肤吴融，清歌一曲倒金壶郑谷。冶叶倡条遍相识李商隐，争如，豆蔻花梢二月初杜牧。年少即须臾白居易。芳时偷得醉工夫白居易。罗帐细垂银烛背韩偓，欢娱，豁得平生俊气无杜牧。

又 集句

怅望送春杯杜牧，渐老逢春能几园杜甫。花满楚城愁远别许浑，伤怀，何况清丝急管催刘禹锡。吟断望乡台李商隐，万里归心独上来许浑。景物登临闲始见杜牧，徘徊，一寸相思一寸灰李商隐。

又 集句

何处倚阑干杜牧，弦管高楼月正圆杜牧。胡蝶梦中家万里崔涂，依然，老去愁来强自宽杜甫。朋镜借红颜李商隐，须著人间比梦间韩愈。蜡烛半笼金翡翠李商隐，更阑，绣被焚香独自眠许浑。

南歌子 游赏

山与歌眉敛，波同醉眼流。游人都上十三楼。不羨竹西歌吹、古扬州。 菰黍连昌歇，琼彝倒玉舟。谁家水调唱歌头。声绕碧山飞去、晚云留。

又 湖景

古岸开青葢，新渠走碧流。会看光满万家楼。记取他年扶路、入西州。 佳节连梅雨，余生寄叶舟。只将菱有与鸡头。更有月明千顷、一时留。

又 寓意

雨暗初疑夜，风回忽报晴。淡云斜照著山明。细草软沙溪路、马蹄轻。 卯酒醒还困，仙材梦不成。蓝桥何处觅云英。只有多情流水、伴人行。

又 和前韵

日出西山雨，无晴又有晴。乱山深处过清明。不见彩绳花板、细腰轻。 尽日行桑野，无人与目成。且将新句琢琼英。我是世间闲客、此闲行。

又 再用前韵

带酒冲山雨，和衣睡晚晴。不知钟鼓报天明。梦里栩然蝴蝶、一身轻。

老去才都尽，归来计未成。求田问舍笑豪英。自爱湖边沙路、免泥行。

又 晚春

日薄花房绽，风和麦浪轻。夜来微雨洗郊坰。正是一年春好、近清明。已改煎茶火，犹调入粥汤。使君高会有余清。此乐无声无味、最难名。

又 八月十八日观潮

海上乘槎侣，仙人萼绿华。飞升元不用丹砂。住在潮头来处、渺天涯。雷辊夫差国，云翻海若家。坐中安得弄琴牙。写取余声归向、水仙夸。

又 再用前韵

苒苒中秋过，萧萧两鬓华。寓身化世一尘沙。笑看潮来潮去、了生涯。方士三山路，渔人一叶家。早知身世两赘牙。好伴骑鲸公子、赋雄夸。

又

冷斋夜语云：东坡守钱塘，无日不在西湖。尝携妓谒大通禅师，大通愠形于色。东坡作长短句，令妓歌之。师唱谁家曲，宗风嗣阿谁。借君拍板与门槌。我也逢场作戏、莫相疑。溪女方偷眼，山僧莫皱眉。却愁弥勒下生迟。不见老婆三五、少年时。

又 别润守许仲涂

欲执河梁手，还升月旦堂。酒阑人散月侵廊。北客明朝归去、雁南翔。窈窕高明玉，风流郑季庄。一时分散水云乡。惟有落花芳草、断人肠。

又 湖州作

山雨潇潇过，溪桥浏浏清。小园幽榭枕苹汀。门外月华如水、彩舟横。苔岸霜花尽，江湖雪阵平。两山遥指海门青。回首水云何处、觅孤城。

又 暮春

紫陌寻春去，红尘拂面来。无人不道看花回。惟见石榴新蕊、一枝开。冰簟堆云髻，金尊能玉醅。绿阴青子莫相催。留取红巾千点、照池台。

又 黄州腊八日饮怀民小阁

卫霍元勋后，韦平外族贤。吹笙只合在猴山。闲驾彩鸾归去、趁新年。烘暖烧香阁，轻寒浴佛天。他时一醉画堂前。莫忘故人憔悴、老江边。

又 有感

笑怕蔷薇胃，行忧宝瑟僵。美人依约在西厢。只恐暗中迷路、认余香。 午夜风翻幔，三更月到床。簟纹如水玉肌凉。何物与侬归去、有残妆。

又 感旧

寸恨谁云短，绵绵岂易裁。半年眉绿未曾开。明月好风闲处、是人猜。 春雨消残冻，温风到冷灰。尊前一曲为谁哉。留取曲终一拍、待君来。

又 楚守周豫出舞鬟，因作二首赠之

绀绀双蟠髻，云敬小偃巾。轻盈红脸小腰身。叠鼓忽催花拍、斗精神。 空阔轻红歇，风和约柳春。蓬山才调最清新。胜似缠头千锦、共藏珍。

又 同前

琥珀装腰佩，龙香入领巾。只应飞燕是前身。共看剥葱纤手、舞凝神。 柳絮风前转，梅花雪里春。鸳鸯翡翠两争新。但得周郎一顾、胜珠珍。

好事近 送君猷

红粉莫悲啼，俯仰半年离别。看取雪堂坡下，老农夫凄切。明年春水漾桃花，柳岸隘舟楫。从此满城歌吹，看黄州闻咽。

又 湖上

湖上雨晴时，秋水半篙初没。朱槛俯窥寒鉴，照衰颜华发。醉中吹堕白纶巾，溪风漾流月。独掉小舟归去，任烟波飘兀。

鹊桥仙 七夕

缙山仙子，高情云渺，不学痴牛骏女。凤箫声断月明中，举手谢、时人欲去。 客槎曾犯，银河微浪，尚带天风海雨。相逢一醉是前缘，风雨散、飘然何处。

又 七夕和苏坚韵

乘槎归去，成都何在，万里江沱汉漾。与君各赋一篇诗，留织女、鸳鸯机上。 还将旧曲，重质新韵，须信吾济天放。人生何处不儿嬉，看乞巧、朱楼彩舫。

望江南 暮春

春已老，春服几时成。曲水浪低蕉叶稳，舞雩风软紵罗轻。酣咏乐升平。
微雨过，何处不催耕。百舌无言桃李尽，柘林深处鸦鸽鸣。春色属芜菁。

又 暮春

春未老，风细柳斜斜。试上超然台上看，半壕春水一城花。烟雨暗千家。
寒食后，酒醒却咨嗟。休对故人思故国，且将新火试新茶。诗酒趁年华。

卜 算 子 感 旧

蜀客到江南，长忆吴山好。吴蜀风流自古同，归去应须早。还与去年人，
共藉西湖草。莫惜尊前仔细看，应是容颜老。

又

黄鲁直跋云：东坡道人在黄州时作，语意高妙，似非吃烟火食人语。
非胸中有万卷书，笔下无一点尘俗气，孰能至是
缺月挂疏桐，漏断人初静。时见幽人独往来，缥缈孤鸿影。惊起却回头，
有恨无人省。拣尽寒枝不肯栖，枫落吴江冷。

瑞鹧鸪 观潮

碧山影里小红旗。侬是江南踏浪儿。拍手欲嘲山简醉，齐声争唱浪婆词。
西兴渡口帆初落，渔浦山头日未鼓。依欲送潮歌底曲，尊前还唱使君诗。

十拍子 暮秋

白酒新开九酝，黄花已过重阳。身外倘来都似梦，醉里无何即是乡。东
坡日月长。玉粉旋烹茶乳，金盃新捣橙香。强染霜髭扶翠袖，莫道狂夫不解
狂。狂夫老更狂。

清平乐 秋词

清淮浊沔。更在江西岸。红旆到时黄叶乱。霜入梁王故苑。秋原何处携
壶。停骏访古踟蹰。双庙遗风尚在，漆园做吏应无。

昭君怨 送别

谁作桓伊三弄。惊破绿窗幽梦。新月与愁烟。满江天。欲去又还不去。
明日落花飞絮。飞絮送行舟，水东流。

戚 氏 此词始终指意，言周穆王宾于西王母事

玉龟山，东皇灵媿统群仙。绛阙岩峩，翠房深迥，倚靠烟。幽闲，志萧

然，金城千里锁蝉娟。当时穆满巡狩，翠华曾到海西边。风露明霁，鲸波极目，势浮輿盖方圆。正迢迢丽日，玄圃清寂，琼草芋绵。争解绣勒香鞞。鸾辂驻跸，八马戏芝田。瑶池近、画楼隐隐，翠鸟翩翩。肆华筵。间作脆管鸣弦。宛若帝所钧天。稚颜皓齿，绿发方瞳，圆极恬淡高妍。尽倒琼壶酒，献金鼎药，固大椿年。缥缈飞琼妙舞，命双成、奏曲醉留连。云璈韵响泻寒泉。浩歌畅饮，斜月低河汉。渐渐绮霞、天际红深浅。动归思、回首尘寰。烂漫游、玉辇东还。杏花风、数里响鸣鞭。望长安路，依稀柳色，翠点春妍。

醉蓬莱 重九上君猷

笑劳生一梦，羁旅三年，又还重九。华发萧萧，对荒园搔首。赖有多情，好饮无事，似古人贤守。岁岁登高，年年落帽，物华依旧。此会应须烂醉，仍把紫菊荣莫，细看重嗅。摇落霜风，有手栽双柳。来岁今朝，为我西顾，酹羽觞江口。会与州人，饮公遗爱，一江醇酎。

贺新郎 夏景

乳燕飞华屋。悄无人、桐阴转午，晚凉新浴。手弄生绡白团扇，扇手一时似玉。渐困倚、孤眠清熟。帘外谁来推绣户，枉教人、梦断瑶台曲。又却是，风敲竹。石榴半吐红巾蹙。待浮花、浪蕊都尽，伴君幽独。秾艳一枝细看取，芳心千重似束。又恐被、秋风惊绿。若待得君来向此，花前对酒不忍触。共粉泪，两簌簌。

洞仙歌 咏柳

江南腊尽，早梅花开后。分付新春与垂柳。细腰肢、自有入格风流，仍更是、骨体清英雅秀。永丰坊那畔，尽日无人，惟见金丝弄晴昼。断肠是，飞絮时，绿叶成阴，无个事、一成消瘦。又莫是、东风逐君来，便吹散眉间，一点春皱。

案古今图书集成草木典卷二百六十六柳部误以此首为晏几道作。

又

公自序云：仆七岁时见眉山老尼姓朱，忘其名，年九十余，自言：尝随其师入蜀主孟昶宫中。一日大热，蜀主与花蕊夫人夜起避暑摩河池上，作一词。朱具能记之。今四十年，朱已死，人无知此词者。但记其首两句，暇日寻味，岂洞仙歌令乎，乃为足之

冰肌玉骨，自清凉无汗。水殿风来暗香满。绣帘开、一点明月窥人，人未寝、欹枕钗横鬓乱。起来携素手，庭户无声，时见疏星渡河汉。试问夜如何，夜已三更，金波淡、玉绳低转。但屈指、西风几时来，又不道、流年暗中偷换。

八声甘州寄参寥子

有情风、万里卷潮来，无情送潮归。问钱塘江上，西兴浦口，几度斜晖。不用思量今古，俯仰昔人非。谁似东坡老，白首忘机。

记取西湖西畔，正暮山好处，空翠烟霏。算诗人相得，如我与君稀。约他年、东还海道，愿谢公、雅志莫相违。西州路，不应回首，为我沾衣。

三部乐 情景

美人如月。乍见掩暮云，更增妍绝。算应无恨，安用阴晴圆缺。娇甚空只成愁，待下床又懒，未语先咽。数日不来，落尽一庭红叶。今朝置酒强起，问为谁减动，一分香雪。何事散花却病，维摩无疾。却低眉、惨然不答。唱金缕、一声怨切。堪折便折。且惜取、少年花发。

阮郎归 初夏

绿槐高柳咽新蝉，薰风初入弦。碧纱窗下水沉烟，棋声惊昼眠。微雨过，小荷翻，榴花开欲然。玉盆纤手弄清泉，琼珠碎却圆。

又 梅词

暗香浮动月黄昏，堂前一树春。东风何事入西邻，儿家常闭门。雪肌冷，玉容真，香腮粉未匀。折花欲寄岭头人，江南日暮云。

又 苏州席上作

一年三度过苏台，清尊长是开。佳人相同苦相猜，这回来不来。情未尽，老先催，人生真可咍。他年桃李阿谁栽，刘郎双鬓衰。

江神子

公旧注云：陶渊明以正月五日游斜川，临流班坐，顾瞻南阜，爱曾城之独秀，乃作斜川诗，至今使人想见其处。元丰壬戌之春，余躬耕于东坡，筑雪堂居之。南挹四望亭之后丘，西控北山之微泉，慨然而叹，此亦斜川之游也。

梦中了了醉中醒，只渊明，是前生。走遍人间，依旧却躬耕。昨夜东坡春雨足，乌鹊喜，报新晴。雪堂西畔暗泉鸣。北山倾，小溪横。南望亭丘，孤秀耸曾城。都是斜川当日境，吾老矣，寄余龄。

又 孤山竹阁送述古

翠蛾羞黛怯人看，掩霜纨，泪偷弹。且尽一尊，收泪唱阳关。漫道帝城天样远，天易见，见君难。画堂新构近孤山。曲阑干，为谁安。飞絮落花，春色属明年。欲掉小舟寻旧事，无处问，水连天。

又 江景

凤凰山下雨初晴，水风清，晚霞明。一朵芙蓉，开过尚盈盈。何处飞来双白鹭，如有意，慕娉婷。忽闻江上弄哀筝。苦含情，遣谁听。烟敛云收，依约是湘灵。欲待曲终寻问取，人不见，数峰青。

又 猎词

老夫聊发少年狂，左牵黄，右擎苍。锦帽貂裘，千骑卷平冈。为报倾城随太守，亲射虎，看孙郎。酒酣胸胆尚开张。鬓微霜，又何妨。持节云中，何日遣冯唐。会挽雕弓如满月，西北望，射天狼。

又 恨别

天涯流落思无穷，既相逢，却匆匆。携手佳人，和泪折残红。为问东风余几许，春纵在，与谁同。隋堤三月水溶溶。背归鸿，去吴中。回首彭城，清泗与淮通。寄我相思千点泪。流不到，楚江东。

又 冬景

相逢不觉又初寒，对尊前，惜流年。风紧离亭，冰结泪珠圆。雪意留君君不住，从此去，少清欢。转头山下转头看。路漫漫，玉花翻。银海光宽，何处是超然。知道故人相念否，携翠袖，倚朱阑。

又

公旧序云：大雪有怀朱康叔使君，亦知使君之念我也，作江神子以寄之

黄昏犹是雨纤纤，晓开帘，欲平檐。江阔天低，无处认青帘。孤坐冻吟谁伴我，揩病目，捻衰髯。使君留客醉厌厌。水晶盐，为谁甜。手把梅花，东望忆陶潜。雪似故人人似雪，虽可爱，有人嫌。

又

公自序云：陈直方妾嵇，钱塘人也。丐新词，为作此。钱塘人好唱陌上花缓缓曲，余尝作数绝以纪其事矣

玉人家在凤凰山，水云间，掩门关。门外行人，立马看弓弯。十里春风谁指似，斜日映，绣帘斑。多情好事与君还。闵新鳏，拭余潜。明月空江，香雾着云鬟。陌上花开春尽也，闻旧曲，破朱颜。

又 公之夫人王氏先卒，味此词，盖悼亡也

十年生死两茫茫，不思量，自难忘。千里孤坟，无处话凄凉。纵使相逢应不识，尘满面，鬓如霜。夜来幽梦忽还乡。小轩窗，正梳妆。相顾无言，惟有泪千行。料得年年断肠处，明月夜，短松冈。

蝶恋花 春景

花褪残红青杏小。燕子飞时，绿水人家绕。枝上柳绵吹又少，天涯何处无芳草。墙里秋千墙外道。墙外行人，墙里佳人笑。笑渐不闻声渐悄，多情却被无情恼。

又 佳人

一颗樱桃樊素口。不爱黄金，只爱人长久。学画鸦儿犹未就，眉尖已作伤春皱。扑蝶西园随伴走。花落花开，渐解相思瘦。破镜重圆人在否，章台折尽青青柳。

又 送春

雨后春容清更丽。只有离人，幽恨终难洗。北固山前三面水，碧琼梳拥青螺髻。一纸乡书来万里。问我何年，真个成归计。白首送春拚一醉，东风吹破千行泪。

又 暮春

簌簌无风花自舞。寂寞园林，柳老樱桃过。落日多情还照坐，山青一点横云破。路尽河回千转舵。系缆渔村，月暗孤灯火。凭仗飞魂招楚些，我思君处君思我。

又 密州上元

灯火钱塘三五夜。明月如霜，照见人如画。帐底吹笙香吐麝，此般风味应无价。寂寞山城人老也。击鼓吹箫，乍入农桑社。火冷灯稀霜露下，昏昏雪意云垂野。

又 密州冬夜文安国席上作

帘外东风交雨霰。帘里佳人，笑语如莺燕。深惜今年正月暖，灯光酒色摇金盏。掺鼓渔阳挝来遍。舞褪琼钗，汗湿香罗软。今夜何人吟古怨，清诗未就冰生砚。

又 过涟水军赠赵晦之

自古涟漪佳绝地。绕郭荷花，欲把吴兴比。倦客尘埃何处洗，真君堂下寒泉水。左海门前酤酒市。夜半潮来，月下孤舟起。倾盖相逢挤一醉，双凫飞去人千里。

又 述怀

云水萦回溪上路。叠叠青山，环绕溪东注。月白沙汀翘宿鹭，更无一点尘来处。溪叟相看私自语。底事区区，苦要为官去。尊酒不空田百亩，归来分得闲中趣。

采桑子 润州多景楼与孙巨源相遇

多情多感仍多病，多景楼中。尊酒相逢。乐事回头一笑空。停杯且听琵琶语，细捻轻拢。醉脸春融。斜照江天一抹红。

千秋岁 湖州暂来徐州重阳作

浅霜侵绿。发少仍新沐。冠直缝，巾横幅。美人怜我老，玉手簪黄菊。秋露重，珍珠落袖沾余馥。坐上人如玉。花映花奴肉。蜂蝶乱，飞相逐。明年人纵健，此会应难复。须细看，晚来月上和银烛。

苏幕遮 咏选仙图

暑笼晴，风解温。雨后余清，暗袭衣裾润。一局选仙逃暑困。笑指尊前、谁向青霄近。整金盆，轮玉笋。凤驾鸾车，谁敢争先进。重五休言升最紧。纵有碧油，到了输堂印。

永遇乐 寄孙巨源

长忆别时，景疏楼上，明月如水。美酒清歌，留连不住，月随人千里。别来三度，孤光又满，冷落共谁同醉。卷珠帘，凄然顾影，共伊到明无寐。今朝有客，来从淮上，能道使君深意。凭仗清淮，分明到海，中有相思泪。而今何在，西垣清禁，夜永露华侵被。此时看，回廊晓月，也应暗记。

又

公旧注云：夜宿燕子楼，梦盼盼，因作此词。一云：徐州梦觉北登燕子楼作

明月如霜，好风如水，清景无限。曲港跳鱼，圆荷泻露，寂寞无人见。统如三鼓，铿然一叶，黯黯梦云惊断。夜茫茫，重寻无处，觉来小园行遍。天涯倦客，山中归路，望断故园心眼。燕子楼空，佳人何在，空锁楼中燕。古今如梦，何曾梦觉，但有旧欢新怨。异时对，黄楼夜景，为余浩叹。

行香子 茶词

绮席才终。欢意犹浓。酒阑时、高兴无穷。共夸君赐，初拆臣封。看分香饼，黄金缕，密云龙。斗赢一水，功敌千钟。觉凉生、两腋清风。暂留红袖，少却纱笼。放笙歌散，庭馆静，略从容。

又 寓意

三入承明。四至九卿。问书生、何辱何荣。金张七叶，纨绔貂纓。无汗马事，不献赋，不明经。成都卜肆，寂寞君平。郑子真、岩谷躬耕。寒灰炙手，人重人轻。除竺乾学，得无念，得无名。

又 述怀

清夜无尘。月色如银。酒斟时、须满十分。浮名浮利，虚苦劳神。叹隙中驹，石中火，梦中身。虽抱文章，开口谁亲。且陶陶、乐尽天真。几时归去，作个闲人。对一张琴，一壶酒，一溪云。

又 秋兴

昨夜霜风。先入梧桐。浑无处、回避衰容。问公何事，不语书空。但一回醉，一回病，一回情。朝来庭下，光阴如箭，似无言、有意伤依。都将万事，付与千钟。任酒花白，眼花乱，烛花红。

又 冬思

携手江村。梅雪飘裙。情何限、处处消魂。敌人不见，旧曲重闻。向望湖楼，孤山寺，涌金门。寻常行处，题诗千首，绣罗衫、与拂红尘。别来相忆，知是何人。有湖中月，江边柳，陇头云。

又 过七里滩

一叶舟轻。双桨鸿惊。水天清、影湛波平。鱼翻藻鉴，鹭点烟汀。过沙溪急，霜溪冷，月溪明。重重似画，曲曲如屏。算当年、虚老严陵。君臣一梦，今古虚名。但远山长，云山乱，晓山青。

菩 萨 蛮 歌 妓

绣帘高卷倾城出，灯前澹湘横波溢。皓齿发清歌，春愁入翠蛾。凄音休怨乱，我已先肠断。遗响下清虚，累累一串珠。

又

碧纱微露纤纤玉，朱唇渐暖参差竹。越调变新声，龙吟彻骨清。夜来残酒醒，惟觉霜袍冷。不见敛眉人，胭脂觅旧痕。

又 西湖

秋风湖上萧萧雨，使君欲去还留住。今日漫留君，明朝愁杀人。佳人千点泪，洒向长河水。不用敛双蛾，路人啼更多。

又 杭妓往苏近新守

玉童西近浮丘伯，洞天冷落秋萧瑟。不用许飞琼，瑶台空月明。 清香
凝夜宴，借与韦郎看。莫便向姑苏，扁舟下五湖。

又

天怜豪俊腰金晚，故教月向松江满。清景为淹留，从君都占秋。 身
闲惟有酒，试问清游首。帝梦已遥思，匆匆归去时。

又 述古席上

娟娟缺月西南落，相思拨断琵琶索。枕泪梦魂中，觉来眉晕重。 华
堂堆烛泪，长笛吹新水。醉客各西东，应思陈孟公。

又 感旧

玉笙不受朱案“朱”原作“珠”，据吴讷本东坡词改唇暖，离声凄咽胸
填满。遗恨几千秋，恩留人不留。他年京国酒，滋泪攀枯柳。莫唱短因缘，
长安远似天。

又 新月

画檐初挂弯弯月，孤光未满先忧缺。遥认玉帘钩，天孙梳洗楼。 佳
人言语好，不愿求新巧。此恨固应知，愿人无别离。

又 七夕

风回仙驭云开扇，更阑月堕星河转，枕上梦魂惊，晓檐疏雨零。 相
逢虽草草，长共天难老。终不羨人间，人间日似年。

又 有寄

城隅静女何人见，先生日夜歌彤管。谁识蔡姬贤，江南顾彦先。 先生
那久困，汤沐须名郡。惟有谢夫人，从来见拟伦。

又

买田阳羨吾将老，从来只为溪山好。来往一虚舟，聊随物外游。 有
书仍懒著，水调歌归去。筋力不辞诗，要须风雨时。

又 回文

落花闲院春衫薄，薄衫春院闲花落。迟日恨依依，依依恨日迟。 梦
回营舌弄，弄舌莺回梦。邮便问人羞，羞人问便邮。

又 夏景回文

火云凝汗挥珠颗，颗珠挥汗凝云火。琼暖碧纱轻，轻纱碧暖琼。 晕
腮嫌枕印，印枕嫌腮晕。闲照晚妆残，残妆晚照闲。

又 回文

峤南江浅红梅小，小梅红浅江南峤。窥我向疏篱，篱疏向我窥。 老人行
即到，到即行人老。离别惜残枝，枝残惜别离。

又 回文春闺怨

翠鬟斜幔云垂耳，耳垂云幔斜鬟翠。春晚睡昏昏，昏昏睡晚春。 细花梨
雪坠，坠雪梨花细。顰浅念谁人，人谁念浅顰。

又 回文夏闺怨

柳庭风静人眠昼，昼眠人静风庭柳。香汗薄衫凉，凉衫薄汗香。 手红冰
碗藕，藕碗冰红手。郎笑藕丝长，长丝藕笑郎。

又 回文秋闺怨

井桐双照新妆冷，冷妆新照双桐井。羞对井花愁，愁花井对羞。 影孤怜
夜永，永夜怜孤影。楼上不宜秋，秋宜不上楼。

又 回文冬闺怨

雪花飞暖融香颊，颊香融暖飞花雪。欺雪任单衣，衣单任雪欺。 别时梅
子结，结子梅时别。归不恨开迟，迟开恨不归。

生查子 诉别

三度别君来，此别真迟暮。白尽老髭须，明日淮南去。 酒罢月随人，泪
湿花如雾。后月逐君还，梦绕湖边路。

翻香令

金炉犹暖麝煤残。惜香更把宝钗翻。重闻处，余熏在，这一番、气味胜
从前。 背人偷盖小蓬山。更将沉水暗同然。且图得，氤氲久，为情深、嫌
怕断头烟。

乌夜啼 寄远

莫怪归心甚速，西湖自有蛾眉。若见故人须细说，自发倍当时。小郑非常强记，二南依旧能诗。更有鲈鱼堪切脍，儿辈莫教知。

虞美人 琵琶

定场贺老今何在。几度新声改。怨声坐使旧声阑。俗耳只知繁手、不须弹。断弦试问谁能晓。七岁文姬小。试教弹作鞞雷声。应有开元遗老、泪纵横。

又 述怀

归心正似三春草。试着莱衣小。橘怀几日向翁开。怀祖已瞋文度、不归来。禅心已断人间爱。只有平交在。笑论瓜葛一枰同。看取灵光新赋、有家风。

又

本事集云：陈述古守杭，已及瓜代。未交前数日，宴僚佐于有美堂，因请贰车苏子瞻赋词，子瞻即席而就，寄拟破虞美人
湖山信是东南美，一望弥千里。使君能得几回来，便使尊前醉倒、且徘徊。沙河塘里灯初上，水调谁家唱。夜阑风静欲归时，惟有一江明月、碧琉璃。

又

冷斋夜话云：东坡与秦少游维扬饮别，作此词。世传贺方回所作，非也。山谷亦云。大观中，于金陵见其亲笔，实东坡词也
波声拍枕长淮晓，隙月窥人小。无情汴水自东流，只载一船离恨、向西州。竹溪花浦曾同醉，酒味多于泪。谁教风鉴在尘埃，酝造一场烦恼、送人来。

河满子 湖州作

见说蜗峨凄怆，旋闻江汉澄清。但觉秋来归梦好，西南自有长城。东府三人最少，西山八国初平。莫负花溪纵赏，何妨药市微行。试问当垆人在否，空教是处闻名。唱著子渊新曲，应须分外含情。

哨 遍

公旧序云：陶渊明赋归去来，有其词而无其声。余治东坡，筑雪堂于上，人俱笑其陋。独鄱阳董毅夫过而悦之，有卜邻之意。乃取归去来词，稍加隳括，使就声律，以遗毅夫。使家僮歌之，时相从于东坡，释

耒而和之，扣牛角而为之节，不亦乐乎

为米折腰，因酒弃家，口体交相累。归去来，谁不遣君归。觉从前皆非今是。露未晞。征夫指予归路，门前笑语喧童稚。嗟旧菊都荒，新松暗老，吾年今已如此。但小窗容膝闭柴扉。策杖看孤云暮鸿飞。云出无心，鸟倦知还，本非有意。噫。归去来兮。我今忘我兼忘世。亲戚无浪语，琴书中有真味。步翠麓崎岖，泛溪窈窕，涓涓暗谷流春水。观草木欣荣，幽人自感，吾生行且休矣。念寓形宇内复几时。不自觉皇皇欲何之。委吾心、去留谁计。神仙知在何处，富贵非吾志。但知临水登山啸咏，自引壶觞自醉。此生天命更何疑。且乘流、遇坎还止。

又 春词

睡起画堂，银蒜押帘，珠幕云垂地。初雨歇，洗出碧罗天，正溶溶养花天气。一霎暖风回芳草，荣光浮动，掩皱银塘水。方杏靛匀酥，花须吐绣，园林排比红翠。见乳燕捎蝶过繁枝。忽一线炉香逐游丝。昼永人闲，独立斜阳，晚来情味。便乘兴携将佳丽。深入芳菲里。拨胡琴语，轻拢慢捻总总利。看紧约罗裙，急趣檀板，霓裳入破惊鸿起。颦月临眉，醉霞横脸，歌声悠扬云际。任满头红雨落花飞。渐 鹊楼西玉蟾低。尚徘徊、未尽欢意。君看今古悠悠，浮宦人间世。这些百岁，光阴几日，三万六千而已。醉乡路稳不妨行，但人生、要适情耳。

点绛唇 己巳重九和苏坚

我辈情钟，古来谁似龙山宴。而今楚甸。戏马余飞观。顾谓佳人，不觉秋强半。箏声远。鬓云吹乱。愁入参差雁。

又 庚午重九再用前韵

不用悲秋，今年身健还高宴。江村海甸。总作空花观。尚想横汾，兰菊纷相半。楼船远。白云飞乱。空有年年雁。

又 再和送钱公永

莫唱阳关，风流公子方终宴。秦山禹甸。缥缈真奇观。北望平原，落日山衔半。孤帆远。我歌君乱。一送西飞雁。

又

醉漾轻舟，信流引到花深处。尘缘相误。无计花间住。烟水茫茫，千里斜阳暮。山无数。乱红如雨。不记来时路。

又 离恨

月转乌啼，画堂宫徵生离恨。美人愁闷。不管罗衣褪。清泪斑斑，挥断

柔肠寸。嗔人问。背灯偷搵。拭尽残妆粉。

人娇 王都尉席上赠侍人

满院桃花，尽是刘郎未见。于中更、一枝纤软。仙家日月，笑人间春晚。浓睡起，惊飞乱红千片。密意难传，羞容易变。平白地、为伊肠断。问君终日，怎安排心眼。须信道，司空自来见惯。

又 或云赠朝云

白发苍颜，正是维摩境界。空方丈、散花何碍。朱唇筋点，更髻鬟生彩。这些个，千生万生只在。好事心肠，著人情态。闲窗下、敛云凝黛。明朝端午，待学纫兰为佩。寻一首好诗，要书裙带。

又 戏邦直

别驾来时，灯火荧煌无数。向青琐、隙中偷觑。元来便是，共彩鸾仙侣。方见了，管须低声说与。百子流苏，千枝宝炬。人间有、洞房烟雾。春来何事，故抛人别处。坐望断，楼中远山归路。

诉衷情 送述古迓元素

钱塘风景古来奇，太守例能诗。先驱负弩何在，心已誓江西。花尽后，叶飞时。雨凄凄。若为情绪，更问新官，向旧官啼。

又 海棠

海棠珠缀一重重，清晓近帘栊。胭脂谁与匀淡，偏向脸边浓。看叶嫩，惜花红。意无穷。如花似叶，岁岁年年，共占春风。

又 琵琶女

小莲初上琵琶弦，弹破碧云天。分明绣阁幽恨，都向曲中传。肤莹玉，鬓梳蝉。绮窗前。素娥今夜，故故随人，似斗婵娟。

更漏子 送孙巨源

水涵空，山照市。西汉二疏乡里。新白发，旧黄金。故人思义深。海东头，山尽处。自古客槎来去。槎有信，赴秋期。使君行不归。

华清引 感旧

平时十月幸兰汤。玉骖琼梁。五家车马如水，珠玑满路旁。翠华一去掩方床。独留烟树苍苍。至今清夜月，依前过缭墙。

桃源忆故人 暮春

华胥梦断人何处，听得莺啼红树。几点蔷薇香雨，寂寞闲庭户。暖风不解留花住，片片著人无数。楼上望春归去，芳草迷归路。

醉落魄 述怀

醉醒醒醉，凭君会取这滋味。浓斟琥珀香浮蚁。一到愁肠，别有阳春意。须将幕席为天地，歌前起舞花前睡。从他落魄陶陶里。独胜醒醒，惹得闲憔悴。

又 席上呈元素

分携如昨，人生到处萍飘泊。偶然相聚还离索。多病多愁，须信从来错。尊前一笑休辞却，天涯同是伤沦落。故山犹负平生约。西望峨眉，长羡归飞鹤。

又 忆别

苍头华发，故山归计何时决。旧交新贵音书绝。惟有佳人，犹作殷勤别。离亭欲去歌声咽，潇潇细雨凉吹颊。泪珠不用罗巾裹。弹在罗衣，图得见时说。

又 述怀

轻云微月，二更酒醒船初发。孤城回望苍烟合。公子佳人，不记归时节。巾偏扇坠藤床滑，觉来幽梦无人说。此生飘荡何时歇。家在西南，长作东南别。

谒金门 秋夜

秋帷里，长漏伴人无寐。低玉枕凉轻绣被，一番秋气味。晓色又侵窗纸，窗外鸡声初起。声断几声还到耳，已明声未已。

又 秋兴

秋池阁，风傍晓庭帘幕。霜叶未衰吹未落，半惊鸦喜鹊。自笑浮名情薄，似与世人疏略。一片懒心双懒脚，好教闲处着。

又 秋感

今夜雨，断送一年残暑。坐听潮声来别浦，明朝何处去。孤负金尊绿醕，来岁今宵圆否。酒醒梦回愁几许，夜阑还独语。

如 梦 令

元丰七年十二月十八日，浴泗州雍熙塔下，戏作如梦令阕。此曲本唐庄宗制，名忆仙姿，嫌其名不雅，故改为如梦令。盖庄宗作此词，卒章云：“如梦如梦。和泪出门相送。”因取以为名云
水垢何曾相受，细看两俱无有。寄语揩背人，尽日劳君挥肘。轻手，轻手，居士本来无垢。

又 同前

自净方能净彼，我自汗流呀气。寄语澡浴人，且共肉身游戏。但洗，但洗，俯为人间一切。

又 有寄

为向东坡传语，人在玉堂深处。别后有谁来，雪压小桥无路。归去，归去，江上一犁春雨。

又 春思

手种堂前桃李，无限绿阴青子。帘外百舌儿，惊起五更春睡。居士，居士，莫忘小桥流水。

阳 关 曲 中秋作 本名小秦王，入腔即阳关曲

暮云收尽溢清寒，银汉无声转玉盘。此生此夜不长好，明月明年何处看。

又 军中

受降城下紫髯郎，戏马台南旧战场。恨君不取契丹首，金甲牙旗归故乡。

又 李公择

济南春好雪初晴，才到龙山马足轻。使君莫忘霁溪女，还作阳关肠断声。

减字木兰花

赠润守许仲涂，且以“郑容落籍、高莹从良”为句首
郑庄好客，容我尊前先堕帻。落笔生风，籍籍声名不负公。高山白早，莹骨冰肤那解老。从此南徐，良夜清风月满湖。

又 寓意

云鬓倾倒，醉倚阑干风月好。凭仗相扶，误入仙家碧玉壶。连天衰草，下走湖南西去道。一舸姑苏，便逐鸱夷去得无。

又 荔支

闽溪珍献，过海云帆来似箭。玉座金盘，不贡奇葩四百年。轻红酿白，雅称佳人纤手擘。骨细肌香，恰是当年十八娘。

又 送东武令赵晦之

贤哉令尹，三仕已之无喜愠。我独何人，犹把虚名玷搢绅。不如归去，二顷良田无觅处。归去来兮，待有良田是几时。

又 送别

玉觞无味，中有佳人千点泪。学道忘忧，一念还成不自由。如今未见，归去东园花似霰。一语相开，匹似当初本不来。

又 送赵令

春光亭下，流水如今何在也。岁月如梭，白首相看拟奈何。故人重见，世事年来千万变。官况阑珊，惭愧青松守岁寒。

又 过吴兴，李公择生子，三日会客，作此词戏之

惟熊佳梦，释氏老君亲抱送。壮气横秋，未满三朝已食牛。犀钱玉果，利市平分沾四坐。多谢无功，此事如何到得依。

又 得书

晓来风细，不会鹊声来报喜。却羨寒梅，先觉春风一夜来。香笺一纸，写尽回文机上意。欲卷重开，读遍千回与万回。

又 送别

天台旧路，应恨刘郎来又去。别酒频倾，忍听阳关第四声。刘郎未老，怀恋仙乡重得到。只恐因循，不见如今劝酒人。

又

本事集云：钱塘西湖，有诗僧清顺居其上，自名藏春坞。门前有二古松，各有凌霄花络其上，顺常昼卧其下。子瞻为郡，一日屏骑从过之，松风骚然。顺指落花觅句，子瞻为赋此词
双龙对起，白甲苍髯烟雨里。疏影微香，下有幽人昼梦长。湖风清软，

双鹊飞来争噪晚。翠颭红轻，时下凌霄百尺英。

又 赠小鬟琵琶

琵琶绝艺，年纪都来十一二。拨弄么弦，未解将心指下传。主人瞋小，欲向东风先醉倒。已属君家，且更从容等待他。

又 立春

春牛春杖，无限春风来海上。便与春工，染得桃红似肉红。春幡春胜，一阵春风吹酒醒。不似天涯，卷起杨花似雪花。

又 雪词

云容皓白，破晓玉英纷似织。风力无端，欲学杨花更耐寒。相如未老，梁苑犹能陪俊少。莫惹闲愁，且折江梅上小楼。

又 花

玉房金蕊，宜在玉人纤手里。淡月朦胧，更有微微弄袖风。温香熟美，醉慢云鬟垂两耳。多谢春工，不是花红是玉红。

又 春月

春庭月午，摇荡香醪光欲舞。步转回廊，半落梅花婉婉香。轻云薄雾，总是少年行乐处。不似秋光，只与离人照断肠。

又 赠胜之

天然宅院，赛了千千并万万。说与贤知，表德元来是胜之。今来十四，海里猴儿奴子是。要赌休痴，六只骰儿六点儿。

浣溪沙 新秋

风卷珠帘自上钩，萧萧乱叶报新秋，独携纤手上高楼。缺月向人舒窈窕，三星当户照绸缪，香生雾縠见纤柔。

又 游蕲水清泉寺。寺临兰溪，溪水西流

山下兰芽短浸溪，松间沙路净无泥，萧萧暮雨子规啼。谁道人生无再少，门前流水尚能西，休将白发唱黄鸡。

又 渔父

西塞山边白鹭飞，散花洲外片帆微，桃花流水鳊鱼肥。自庇一身青箬笠，相随到处绿蓑衣，斜风细雨不须归。

又案此首别误入黄庭坚豫章黄先生词。

又

十二月二日，雨后微雪，太守徐君猷携酒见过，坐上作浣溪沙三首。

明日酒醒，雪大作，又作二首

覆块青青麦未苏，江南云叶暗随车，临臯烟景世间无。雨脚半收檐断线，雪林初下瓦疏珠，归来冰颗乱黏须。

又 前韵

醉梦醺醺晓未苏，门前辘轳使君车，扶头一盏怎生无。废圃寒蔬挑翠羽，小槽春酒冻真珠，清香细细嚼梅须。

又 前韵

雪里餐毡例姓苏，使君载酒为回车，天寒酒色转头无。荐士已闻飞鹞表，报恩应不用蛇珠，醉中还许揽桓须。

又 再和前韵

半夜银山上积苏，朝来九陌带随车，涛江烟渚一时无。空腹有诗衣有结，湿薪如桂米如珠，冻吟谁伴捻髭须。

又 前韵

万顷风涛不记苏，雪晴江上麦千车，但令人饱我愁无。翠袖倚风萦柳絮，绛唇得酒烂樱珠，尊前呵手镊霜须。

又 九月九日二首

珠桧丝杉冷欲霜，山城歌舞助凄凉，且餐山色饮湖光。共挽朱轡留半日，强揉青蕊作重阳，不知明日为谁黄。

又 和前韵

霜鬓真堪插拒霜，哀弦危柱作伊凉，暂时流转为风光。未遣清尊空北海，莫因长笛赋山阳，金钗玉腕泻鹅黄。

又 有感

傅粉郎君又粉奴，莫教施粉与施朱，自然冰玉照香酥。有客能为神女赋，

凭君送与雪儿书，梦魂东去觅桑榆。

又 咏橘

菊暗荷枯一夜霜，新苞绿叶照林光，竹篱茅舍出青黄。香雾噀人惊半破，清泉流齿怯初尝，吴姬三日手犹香。

又

公守湖，辛未上元日，作会于伽蓝中，时长老法惠在坐。时有献剪伽花彩甚奇，谓有初春之兴。因作二首，寄袁公济
雪颔霜髯不自惊，更将剪彩发春荣，羞颜未醉已先赧。莫唱黄鸡并白发，且呼张丈唤殷兄，有人归去欲卿卿。

又 前韵

料峭东风翠幕惊，云何不饮对公荣，水晶盘莹玉鳞赭。花影莫孤三夜月，朱颜未称五年兄，翰林子墨主人卿。

又 徐门石潭谢雨道上作五首

照日深红暖见鱼，连溪绿暗晚藏鸟，黄童白叟聚睢盱。麋鹿逢人虽未惯，猿猱闻鼓不须呼，归家说与采桑姑。

又

旋抹红妆看使君，三三五五棘篱门，相挨踏破茜罗裙。老幼扶携收麦社，鸟鸢翔舞赛神村，道逢醉叟卧黄昏。

又

麻叶层层 叶光，谁家煮茧一村香，隔篱娇语络丝娘。垂白杖藜抬醉眼，捋青捣 软饥肠，问言豆叶几时黄。

又

簌簌衣巾落枣花，村南村北响缲车，牛衣古柳卖黄瓜。酒困路长惟欲睡，日高人渴漫思茶，敲门试问野人家。

又

软草平莎过雨新，轻沙走马路无尘，何时收拾耦耕身。日暖桑麻光似泼，风来蒿艾气如茵，使君元是此中人。

又 春情

道字娇讹苦未成，未应春阁梦多情，朝来何事绿鬟倾。彩索身轻长趁燕，红窗睡重不闻莺，困人天气近清明。

又 菊节

缥缈危楼紫翠间，良辰乐事古难全，感时怀旧独凄然。璧月琼枝空夜夜，菊花人貌自年年，不知来岁与谁看。

又 春情

桃李溪边驻画轮，鹧鸪声里倒清尊，夕阳虽好近黄昏。香在衣裳妆在臂，水连芳草月连云，几时归去不销魂。

又 荷花

四面垂杨十里荷，问云何处最花多，画楼南畔夕阳和。天气乍凉人寂寞，光阴须得酒消磨，且来花里听笙歌。

又 赠闾丘朝议，时还徐州

一别姑苏已四年，秋风南浦送归船，画帘重见水中仙。霜鬓不须催我老，杏花依旧驻君颜，夜阑相对梦魂间。

又 有赠

惟见眉间一点黄，诏书催发羽书忙，从教娇泪洗红妆。上殿云霄生羽翼，论兵齿颊带风霜，归来衫袖有天香。

又 忆旧

长记鸣琴子贱堂，朱颜绿发映垂杨，如今秋鬓数茎霜。聚散交游如梦寐，升沉闲事莫思量，仲卿终不避桐乡。

又 春情

风压轻云贴水飞，乍晴池馆燕争泥，沈郎多病不胜衣。沙上不闻鸿雁信，竹间时听鹧鸪啼，此情惟有落花知。

又

公旧序云：绍圣元年十月二十三日，与程乡令侯晋叔、归善簿谭汲

同游大云寺。野饮松下，设松黄汤，作此阕
罗袜空飞洛浦尘，锦袍不见谪仙人，携壶藉草亦天真。玉粉轻黄千岁药，
雪花浮动万家春，醉归江路野梅新。

又 重九旧韵

白雪清词出坐间，爱君才器两俱全，异乡风景却依然。可恨相逢能几日，
不知重会是何年，荣莫仔细更重看。

又

元丰七年十二月二十四日，从泗州刘倩叔游南山
细雨斜风作晓寒，淡烟疏柳媚晴滩，入淮清洛渐漫漫。雪沫乳花浮午盏，
蓼茸蒿笋试春盘，人间有味是清欢。

又 送梅庭老赴潞州学官

门外东风雪洒裾，山头回首望三吴，不应弹铗为无鱼。上党从来天下脊，
先生元是古之儒，时平不用鲁连书。

又 徐州藏春阁园中

惭愧今年二麦丰，千畦细浪舞晴空，化工余力染天红。归去山公应倒载，
阑街拍手笑儿童，甚时名作锦薰笼。

又 同上

芍药樱桃两斗新，名园高会送芳辰，洛阳初夏广陵春。红玉半开菩萨面，
丹砂浓点柳枝唇，尊前还有个中人。

又 赠楚守田待制小鬟

学画鸦儿正妙年，阳城下蔡困嫣然，凭君莫唱短因缘。雾帐吹笙香嫋嫋，
霜庭按舞月娟娟，曲终红袖落双缠。

又 和前韵

一梦江湖费五年，归来风物故依然，相逢一醉是前缘。迁客不应常眊眊，
使君为出小婵娟，翠鬟聊著小诗缠。

又 端午

轻汗微微透碧纨，明朝端午浴芳兰，流香涨腻满晴川。彩线轻缠红玉臂，

小符斜挂绿云鬟，佳人相见一千年。

又 感旧

徐邈能中酒圣贤，刘伶席地幕青天，潘郎白璧为谁连。无可奈何新白发，不如归去旧青山，恨无人借买山钱。

又 自适

倾盖相逢胜白头，故山空复梦松楸，此心安处是菟裘。卖剑买牛吾欲老，乞浆得酒更何求，愿为辞社宴春秋。

又 寓意

炙手无人傍屋头，萧萧晚雨脱梧楸，谁怜季子敝貂裘。顾我已无当世望，似君须向古人求，岁寒松柏肯惊秋。

又 即事

画隼横江喜再游，老鱼跳槛识清讴，流年未肯付东流。黄菊篱边无怅望，白云乡里有温柔，挽回霜鬓莫教休。

双荷叶 即秦楼月

双溪月，清光偏照双荷叶。双荷叶，红心未偶，绿衣偷结。背风迎雨流珠滑，轻舟短棹先秋折。先秋折，烟鬟未上，玉杯微缺。

皂罗特髻 采菱拾翠

采菱拾翠，算似此佳名，阿谁消得。采菱拾翠，称使君知客。千金买、采菱拾翠，更罗裙、满把珍珠结。采菱拾翠，正髻鬟初合。真个、采菱拾翠，但深怜轻拍。一双手、采菱拾翠，绣衾下、抱着俱香滑。采菱拾翠，待到京寻觅。

调笑令

渔父，渔父，江上微风细雨。青蓑黄蒹裳衣，红酒白鱼暮归。归暮，归暮，长笛一声何处。

又

归雁，归雁，饮啄江南南岸。将飞却下盘桓，塞外春来苦寒。寒苦，寒苦，藻荇欲生且住。

荷 华 媚 荷 花

霞苞电荷碧。天然地、别是风流标格。重重青盖下，千娇照水，好红红白白。每怅望、明月清风夜，甚低迷不语，妖邪无力。终须放、船儿去，清香深处住，看伊颜色。

青玉案 和贺方回韵送伯固归吴中故居

三年枕上吴中路。遣黄耳、随君去。若到松江呼小渡。莫惊鸥鹭，四桥尽是，老子经行处。辋川图上看春暮，常记高人右丞句。作个归期天已许。春衫犹是，小蛮针线，曾湿西湖雨。以上东坡词卷下一百五十六首（原一百五十七首，一首未录）

渔家傲 赠曹光州

些小白须何用染，几人得见星星点。作郡浮光虽似箭，君莫厌，也应胜我三年贬。我欲自嗟还不敢，向来三郡宁非忝。婚嫁事稀年冉冉，知有渐，千钧重担从头减。

江城子

前瞻马耳九仙山，碧连天，晚云闲。城上高台，真个是超然。莫使匆匆云雨散，今夜里，月婵娟。小溪鸥鹭静联拳。去翩翩，点轻烟。人事凄凉，回首便他年。莫忘使君歌笑处，垂柳下，矮槐前。

又

墨云拖雨过西楼，水东流，晚烟收。柳外残阳，回照动帘钩。今夜巫山真个好，花未落，酒新。美人微笑转星眸。月华羞，捧金瓯。歌扇萦风，吹散一春愁。试问江南诸伴侣，谁似我，醉扬州。

南乡子 用韵和道辅

未倦长卿游，漫舞天歌烂不收。不是使君能矫世，谁留。教有琼梳脱麝油。香粉镂金球，花艳红笺笔欲流。从此丹唇并皓齿，清柔，唱遍山东一百州。

又 用前韵赠田叔通家舞鬟

绣鞅玉钿游。灯晃帘疏笑却收。久立香车催欲上，还留。更且檀唇点杏油。花遍六么球。面旋回风带雪流。春入腰肢金缕细，轻柔。种柳应须柳柳州。

菩萨蛮 四首

娟娟侵鬓妆痕浅，双鬓相媚弯如剪。一瞬百般宜，无论笑与啼。酒阑思翠被，特故腾腾地。生怕促归轮，微波先注人。

又 咏足

涂香莫惜莲承步，长愁罗袜凌波去。只见舞回风，都无行处踪。偷穿宫样稳，并立双趺困。纤妙说应难，须从掌上看。

又

玉钿坠耳黄金饰，轻衫罩体香罗碧。缓步困春醪，春融脸上桃。花钿从委地，谁与郎为意。长爱月华清，此时憎月明。

蝶恋花 送潘大临

别酒劝君君一醉，清润潘郎，又是何郎婿。记取钗头新利市，莫将分付东邻子。回首长安佳丽地，三十年前，我是风流帅。为向青楼寻旧事，花枝缺处余名字。

又 同安生日放鱼，取金光明经救鱼事

泛泛东风初破五，江柳微黄，万万千千缕。佳气郁葱来绣户，当年江上生奇女。一盞寿觞谁与举，三个明珠，膝上王文度。放尽穷鳞看圉圉，天公为下曼陀雨。

浣溪沙 端午

入袂轻风不破尘，玉簪犀壁醉佳辰，一番红粉为谁新。团扇只堪题往事，新丝那解系行人，酒阑滋味似残春。

又

几共查梨到雪霜，一经题品便生光，木奴何处避雌黄。北客有来初未识，南金无价喜新尝，含滋嚼句齿牙香。

又

山色横侵蘸晕霞，湘川风静吐寒花，远林屋散尚啼鸦。梦到故园多少路，酒醒南望隔天涯，月明千里照平沙。

减字木兰花 琴

神闲意定，万籁收声天地静。玉指冰弦，未动宫商意已传。悲风流水，

写出寥寥千古意。归去无眠，一夜余音在耳边。

又

银箏旋品，不用缠头千尺锦。妙思如泉，一洗闲愁十五年。为公少止，起舞属公公莫起。风里银山，摆撼鱼龙我自闲。

又 赠君猷家姬

柔和性气，雅称佳名呼懿懿。解舞能讴，绝妙年中有品流。眉长眼细，淡淡梳妆新绾髻。懊恼风情，春着花枝百态生。

又

莺初解语，最是一年春好处。微雨如酥，草色遥看近却无。休辞醉倒，花不看开人易老。莫待春回，颠倒红英间绿苔。

又

江南游女，问我何年归得去。雨细风微，两足如霜挽紵衣。江亭夜语，喜见京华新样舞。莲步轻飞，迁客今朝始是归。

又 赠徐君猷三侍人妩卿

娇多媚，体柳轻盈千万态。殢主尤宾，敛黛含嚬喜又瞋。徐君乐饮，笑谑从伊情意恁。脸嫩敷红，花倚朱阑裹住风。

又 胜之

双鬟绿坠，娇眼横波眉黛翠。妙舞蹁跹，掌上身轻意态妍。曲穷力困，笑倚人旁香喘喷。老大逢欢，昏眼犹能仔细看。

又 庆姬

天真雅丽，容态温柔心性慧。响亮歌喉，遏住行云翠不收。妙词佳曲，啜出新声能断续。重客多情，满劝金卮玉手擎。

南 歌 子

见说东园好，能消北客愁。虽非吾土且登楼。行尽江南南岸、此淹留。短日明枫缣，清霜暗菊球。流年回首付东流。凭仗挽回潘鬓、莫教秋。

如梦令 题淮山楼

城上层楼叠巘，城下清淮古汴。举手揖吴雪，人与暮天俱远。魂断，魂断，后夜松江月满。

瑞鹧鸪

城头月落尚啼乌，朱舰红船早满湖。鼓吹未容迎五马，水云先已漾双凫。映山黄帽螭头舫，夹岸青烟鹳尾炉。老病逢春只思睡，独求僧榻寄须臾。

临江仙 赠王友道

谁道东阳都瘦损，凝然点漆精神。瑶林终自隔风尘。试看披鹤氅，仍是谪仙人。省可清言挥玉尘，真须保器全真。风流何以道家纯。不应同蜀客，惟爱卓文君。

少年游

黄之侨人郭氏，每岁正月迎紫姑神，以箕为腹，箸为口，画灰盘中，为诗敏捷，立成。余往观之。神请余作少年游，乃以此戏之
玉肌铅粉傲秋霜，准拟凤呼凰。伶伦不见，清香未吐，且糠粃吹扬。到处成双君独只，空无数、烂文章。一点香檀，谁能借箸，无复似张良。

一斛珠

洛城春晚，垂杨乱掩红楼半。小池轻浪纹如篆。烛下花前，曾醉离歌宴。自惜风流云雨散，关山有限情无限。待君重见寻芳伴。为说相思，目断西楼燕。

点绛唇 二首

闲倚胡床，庾公楼外峰千朵原注：一作暝烟深处。与谁同坐。明月清风我。别乘一来原注：一或作窗，有唱应须和。还知么。自从添个。风月平分破。

又

红杏飘香，柳含烟翠拖轻缕。水边朱户。尽卷黄昏雨。烛影摇风，一枕伤春绪，归不去。凤楼何处。芳草迷归路。

虞美人

持杯遥劝天边月，愿月圆无缺。持杯复更劝花枝，且愿花枝长在、莫离披。持杯月下花前醉，休问荣枯事。此欢能有几人知，对酒逢花不饮、待何时。

天仙子

走马探花花发未，人与化工俱不易。千回来绕百回看，蜂作婢，莺为使。谷雨清明空屈指。白发卢郎情未已，一夜剪刀收玉蕊。尊前还对断肠红，人有泪，花无意。明日酒醒应满地。

满庭芳

余谪居黄州五年，将赴临汝，作满庭芳一篇别黄人。既至南都，蒙恩放归阳羨，复作一篇

归去来兮，清溪无底，上有千仞嵯峨。画楼东畔，天远夕阳多。老去君恩未报，空回首、弹铗悲歌。船头转，长风万里，归马驻平坡。无何。何处有，银潢尽处，天女停梭。问何事人间，久戏风波。顾谓同来稚子，应烂汝、腰下长柯。青衫破，群仙笑我，干缕挂烟蓑。

南乡子 宿州上元

千骑试春游，小雨如酥落便收。能使江东归老客，迟留。白酒无声滑泻油。飞火乱星球，浅黛横波翠欲流。不似白雪乡外冷，温柔。此去淮甫第一州。以上元延祐本东坡乐府卷上

浣溪沙

缥缈红妆照浅溪，薄云疏雨不成泥，送君何处古台西。废沼夜来秋水满，茂林深处晚莺啼，行人肠断草凄迷。

又 送叶淳老

阳羨姑苏已买田，相逢谁信是前缘，莫教便唱水如天。我作洞霄君作守，白头相对故依然，西湖知有几同年。

减字木兰花

空床响琢，花上春禽冰上雹。醉梦尊前，惊起湖风入坐寒。转关镞索，春水流弦霜入拨。月堕更阑，更请宫高奏独弹。

又

五月二十四日，会于无咎之随斋。主人汲泉置大盆中，渍白芙蓉，坐客翛然，无复有病暑意
回风落景，散乱东墙疏竹影。满坐清微，入袖寒泉不湿衣。梦回酒醒，百尺飞润鸣碧井。雪洒冰麾，散落佳人白玉肌。

又 以大琉璃杯劝王仲翁

海南奇宝，铸出团团如栲栳。曾到昆仑，乞得山头玉女盆。绛州王老，百岁痴顽推不倒。海口如门，一派黄流已电奔。

行香子 与泗守过南山晚归作

北望平川，野水荒湾。共寻春、飞步孱颜。和风弄袖，香雾萦鬟。正酒酣时，人语笑，白云间。飞鸿落照，相将归去，澹娟娟、玉宇清闲。何人无事，宴坐空山。望长桥上，灯火乱，使君还。

画堂春 寄子由

柳花飞处麦摇波，晚湖净鉴新磨。小舟飞棹去如梭，齐唱采菱歌。平野水云溶漾，小楼风日晴和。济南何在暮云多。归去奈愁何。以上七首元延祐本东坡乐府卷下

浣溪沙 方响

花满银塘水漫流，犀槌玉板奏凉州，顺风环佩过秦楼。远汉碧云轻漠漠，今宵人在鹊桥头，一声敲彻绛河秋。

好事近

烟外倚危楼，初见远灯明灭。却跨玉虹归去、看洞天星月。当时张范风流在，况一尊浮雪。莫问世间何事、与剑头微映。

占春芳

红杏了，夭桃尽，独自占春芳。不比人间兰麝，自然透骨生香。对酒莫相忘。似佳人、兼合明光。只忧长笛吹花落，除是宁王。

南歌子

云鬓裁新绿，霞衣曳晓红。待歌凝立翠筵中。一朵彩云何事、下巫峰。趁拍鸾飞镜，回身燕漾空。莫翻红袖过帘栊。怕被杨花句引、嫁东风。

浪淘沙

昨日出东城，试探春情。墙头红杏暗如倾。槛内群芳芽未吐，早已回春。绮陌敛香尘，雪霁前村。东君用意不辞辛。料想春光先到处，吹绽梅英。

木兰花令

元宵似是欢游好，何况公庭民讼少。万家游赏上春台，十里神仙迷海岛。

平原不似高阳傲，促席雍容陪语笑。坐中有客最多情，不借玉山拚醉倒。

又

经旬未识东君信，一夕薰风来解愠。红绡衣薄麦秋寒，绿绮韵低梅雨润。瓜头绿染山光嫩，弄色金桃新傅粉。日高慵卷水晶帘，犹带春醪红玉困。

又

高平四面开雄垒，三月风光初觉媚。园中桃李使君家，城上亭台游客醉。歌翻杨柳金尊沸，饮散凭阑无限意。云深不见玉关遥，草细山重残照里。

虞美人

冰肌自是生来瘦，那更分飞后。日长帘幕望黄昏。及至黄昏时候、转销魂。君还知道相思苦，怎忍抛奴去。不辞迢递过关山。只恐别郎容易、见郎难。

又

深深庭院清明过，桃李初红破。柳丝搭在玉阑干。帘外潇潇微雨、做轻寒。晚晴台榭增明媚，已拚花前醉。更阑人静月侵廊。独自行来行去、好思量。

临江仙

昨夜渡江何处宿，望中疑是秦淮。月明谁起笛中哀。多情王谢女，相逐过江来。云雨未成还又散，思量好事难谐。凭陵急桨两相催。想伊归去后，应似我情怀。

蝶恋花

春事阑珊芳草歇，客里风光，又过清明节。小院黄昏人忆别，落红处处闻啼。咫尺江山分楚越，目断魂销，应是音尘绝。梦破五更心欲折，角声吹落梅花月。

又

记得画屏初会遇，好梦惊回，望断高唐路。燕子双飞来又去，纱窗几度春光暮。那日绣帘相见处，低眼佯行，笑整香云缕。敛尽春山羞不语。人前深意难轻诉。

又

昨夜秋风来万里，月上屏帟，冷透人衣袂。有客抱衾愁不寐，那堪玉漏长如岁。 羁舍留连归计未，梦断魂销，一枕相思泪。衣带渐宽无别意。新书报我添憔悴。

又

雨霰疏疏经泼火，巷陌秋千，犹未清明过。杏子梢头香蕾破，淡红褪白胭脂涴。苦被多情相折挫，病绪厌厌，浑似年时个。绕遍回廊还独坐，月笼云暗重门锁。

又

蝶懒莺慵春过半，花落狂风，小院残红满。午醉未醒红日晚，黄昏帘幕无人卷。云鬓鬢松眉黛浅，总是愁媒，欲诉谁消遣。未信此情难系绊，杨花犹有东风管。

渔家傲

临水纵横回晚鞚，归来转觉情怀动。梅笛烟中闻几弄，秋阴重，西山雪淡云凝冻。美酒一杯谁与共，尊前舞雪狂歌送。腰跨金鱼旌旆拥，将何用，只堪妆点浮生梦。

江城子

腻红匀脸衬檀唇，晚妆新，暗伤春。手捻花枝，谁会两眉颦。连理带头双 ，留待与、个中人。淡烟笼月绣帘阴。画堂深。夜沉沉。谁道 ，系得人心。一首绿窗偷见后，便憔悴、到如今。

祝英台近

挂轻帆，飞急桨，还过钓台路。酒病无聊，橹枕听鸣舻。断肠簇簇云山，重重烟树，回首望、孤城何处。闲离阻。谁念索损襄王，何曾梦云雨。旧恨前欢，心事两无据。要知欲见无由，痴心犹自，倩人道、一声传语。

雨中花慢

邃院重帘何处，惹得多情，愁对风光。睡起酒阑花谢，蝶乱蜂忙。今夜何人，吹笙北岭，待月西厢。空怅望处，一株红杏，斜倚低墙。羞颜易变，旁人先觉，到处被著猜防。谁信道，些儿恩爱，无限凄凉。好事若无间阻，幽欢却是寻常。一般滋味，就中香美，除是偷尝。

又

嫩脸羞蛾，因甚化作行云，却返巫阳。但有寒灯孤枕，皓月空床。长记

当初，乍谐云雨，便学鸾凰。又岂料、正好三春桃李，一夜风霜。丹青画，无言无笑，看了漫结愁肠。襟袖上，犹存残黛，渐减余香。一自醉中忘了，奈何酒后思量。算应负你，枕前珠泪，万点千行。

念奴娇 中秋

凭高眺远，见长空万里，云无留迹。桂魄飞来光射处，冷浸一天秋碧。玉宇琼楼，乘鸾来去，人在清凉国。江山如画，望中烟树历历。我醉拍手狂歌，举杯邀月，对影成三客。起舞徘徊风露下，今夕不知何夕。便欲乘风，翩然归去，何用骑鹏翼。水晶宫里，一声吹断横笛。

水龙吟

小沟东接长江，柳堤苇岸连云际。烟村潇洒，人闲一哄，渔樵早市。永昼端居，寸阴虚度，了成何事。但丝蕲玉藕，珠粳锦鲤，相留恋，又经岁。因念浮丘旧侣，惯瑶池、羽觞沉醉。青鸾歌舞，铢衣摇曳，壶中天地。飘堕人间，步虚声断，露寒风细。抱素琴，独向银蟾影里，此怀难寄。

又

露寒烟冷蒹葭老，天外征鸿寥唳。银河秋晚，长门灯悄，一声初至。应念潇湘，岸遥人静，水多菰米。望极平田，徘徊欲下，依前被、风惊起。须信衡阳万里，有谁家、锦书遥寄。万重云外，斜行横阵，才疏又缀。仙掌月明，石头城下，影摇寒水。念征衣未捣，佳人拂杵，有盈盈泪。以上二十四首见汲古阁本东坡词

渔父 四首

渔父饮，谁家去。鱼蟹一时分付。酒无多少醉为期，彼此不论钱数。

又

渔父醉，蓑衣舞。醉里却寻归路。轻舟短棹任斜横，醒后不知何处。

又

渔父醒，春江午。梦断落花飞絮。酒醒还醉醉还醒，一笑人间今古。

又

渔父笑，轻鸥举。漠漠一江风雨。江边骑马是官人，借我孤舟南渡。以上四首东坡集卷十五

醉翁操 一首并序

琅琊幽谷，山水奇丽，泉鸣空涧，若中音会。醉翁喜之，把酒临听，辄欣然忘归。既去十余年，而好奇之士沈遵闻之往游，以琴写其声，曰醉翁操，节奏疏宕，而音指华畅，知琴者以为绝伦。然有其声而无其辞。翁虽为作歌，而与琴声不合。又依楚词作醉翁引，好事者亦倚其辞以制曲。虽粗合韵度，而琴声为词所绳约，非天成也。后三十余年，翁既捐馆舍，遵亦没久矣。有庐山玉滴道人崔闲，特妙于琴。恨此曲之无词，乃谱其声，而请于东坡居士以补之云。

琅然。清圆。谁弹。响空山。无言。惟翁醉中知其天。月明风露娟娟。人未眠。荷蓑过山前。曰有心也哉此贤。泛声同此。醉翁啸咏，声和流泉。醉翁去后，空有朝吟夜怨。山有时而童巅。水有时而回川。思翁无岁年。翁今为飞仙。此意在人间。试听徽外三两弦。东坡后集卷八

奉安神宗皇帝御容赴景灵宫导引歌词

帝城父老，三岁望尧心。天远玉楼深。龙颜仿佛笙箫远，肠断属车音。离宫春色琐瑶林。云阙海沉沉。遗民犹唱当时曲，秋雁起汾阴。东坡内制集卷二

迎奉神宗皇帝御容赴西京会 圣宫应天禅院奉安导引歌词

经文纬武，十有九年中。遗烈震羌戎。渭桥夹道千君长，犹是建元功。西瞻温洛与神嵩。莲宇照琼宫，人间俯仰成今古，流泽自无穷。东坡内制集卷四

瑶池燕

飞花成阵。春心困，寸寸。别肠多少愁闷，无人问。偷啼自搵。残妆粉，抱瑶琴，寻出新韵。玉纤趁。南风来解幽愠。低云鬓，眉峰敛晕。娇和恨。侯鯖录卷三

千秋岁 次韵少游

岛边天外。未老身先退。珠泪溅，丹衷碎。声摇苍玉佩。色重黄金带。一万里。斜阳正与长安对。道远谁云会。罪大天能盖。君命重，臣节在。新恩犹可凯。旧学终难改。吾已矣。乘桴且恁浮于海。能改斋漫录卷十七

减字木兰花

凭谁妙笔。横扫素缣三百尺。天下应无。此是钱塘湖上图。苏轼一般奇绝。云淡天高秋夜月。费尽丹青。只这些儿画不成。仲殊苕溪渔隐丛话后集卷三十七引古今词话

失 调 名

高安更过几重山。

又

过湖携手屡沾襟。以上雪山集卷七东坡先生祠堂记

又

谁教幽梦里，插他花。翁方纲苏诗补注卷二引施注苏诗

菩 萨 蛮

湿云不动溪桥冷。嫩寒初透东风影。桥下水声长。一枝和月香。人怜花似旧。花比人应瘦。莫凭小栏干。夜深花正寒。全芳备祖前集卷一梅花门

踏 青 游

火初晴，绿遍禁池芳草。斗锦绣、火城驰道。踏青游，拾翠惜，袜罗弓小。莲步袅。腰支佩兰轻妙。行过上林春好。今困天涯，何限旧情相恼。念摇落、玉京寒早。任刘郎、目断蓬山难到。仙梦杳。良宵又过了。楼台万家清晓。全芳备祖后集卷十草门

阮 郎 归

歌停檀板舞停鸾。高阳饮兴阑。兽烟喷尽玉壶干。香分小凤团。雪浪浅，露珠圆。捧瓯春笋寒。绛纱笼下跃金鞍。归时人倚栏。全芳备祖后集卷二十八茶门

西 江 月 咏 梅

马趁香微路远，沙笼月淡烟斜。渡波清彻映妍华。倒绿枝寒凤挂。挂风寒枝绿倒，华妍映彻清波。渡斜烟淡月笼沙。远路微香趁马。回文类聚卷四

失 调 名 上 元 词

拚沉醉、金荷须满。怕年年此际，催归禁籞，侍黄柑宴。岁时广记卷十

一

踏 莎 行

山秀芙蓉，溪明罨画。真游洞穴沧波下。临风慨想斩蛟灵。长桥千载犹

横跨。解珮投簪。求田问舍。黄鸡白酒渔樵社。元龙非复少时豪，耳根洗尽功名话。咸淳毗陵志卷二十三

又

这个秃奴，修行忒煞。云山顶上空持戒。一从迷恋玉楼人，鹑衣百结浑无奈。毒手伤人，花容粉碎。空空色色今何在。臂间刺道苦相思，这回还了相思债，事林广记癸集卷十三

失 调 名

寂寂珠帘珠网满。新注断肠诗集卷一

鹧 鸪 天 佳 人

罗带双垂画不成。殢人娇态最轻盈。酥胸斜抱天边月，玉手轻弹水面冰。无限事，许多情。四弦丝竹苦了宁。饶君拨尽相思调，待听梧桐叶落声。

西 江 月 佳 人

碧雾轻笼两凤，寒烟淡拂双鸦。为谁流睇不归家。错认门前过马。有意偷回笑眼，无言强整衣纱。刘郎一见武陵花。从此春心荡也。

